

SAVEN

SABEN
4792

MEXICO

NOVAE NOVI ORBIS HISTORIÆ,

7 D. EST,

Rerum ab Hispanis in India Occidentali ha-
ctenus gestarum, & acerbo illorum
in eas gentes dominatu,

LIBRI TRES,

VRBANI CALVETONIS
*opera industriæque ex Italicis Hieronymi Benzo-
nis Mediolanensis, qui eas terras XIII. anno-
rum peregrinatione obiit, commentarijs descripti,
Latini facti, ac perpetuis notis, argumentis & locis
pleti memorabilium rerum accessione, illustrati.*

HIS ab eodem adiuncta est,

De Gallorum in Floridam expeditione, & insigni Hispanorum
in eos scruitia exemplo, Brevis Historia.



APVD EVSTATHIVM VIGNON.

M. D. LXXVIII.

INVESTIGATION
OF THE

PROGRESS OF THE
INDUSTRIAL REVOLUTION
IN THE
UNITED STATES

BY
JAMES H. HAYES
AND
J. M. HAYES
OF THE
BUREAU OF THE CENSUS
WASHINGTON
1890

Published by the
Government Printing Office
Washington, D. C.



EXIMIO DEI

SERVO, D. THEODORO

BEZAE, PRAECEPTORI ET PA-

renti plurimum semper observando,

VRBANVS CALVETO, *Gratiam*

& pacem à Domino.



N I H I L mihi minus hîc
propositum fuit (præ-
stantissime Doctor)
quàm vel sub clarissi-
mi tui nominis vmbra
me inferere famæ: vel
te, quem minimè omnium vellem, inep-
tiarum mearum testem aut patronum
facere. Quum enim nihil esse in me
haud inuitus agnoscam, quod conspi-
cium esse debeat: tum verò etiam taci-
tum tuum vnius iudicium equidem ve-
hementius, quàm apertas multorum de
me opiniones, reformido. Sed nimirum
exstare aliquando oportebat aliquod
observantiæ in te meæ testimonium:

E P I S T O L A.

quando ad pedes tuos eruditus, non cetera tantum, si quæ pauca fortè habeo, sed & hoc ipsum gratitudinis officium in præceptores, illustri exemplo ex te didici. Atque id quidem eò libentiùs facio, quòd beneficia erga me tua agnoscere nō possum, quin multiplices simul Deo gratias agam. Quum enim, per singularem Dei gratiam, vterque mihi parens, vera eius cognitione imbutus, obtigisset: præsertim pater, qui vergentiam ætate Euangelij gustum flagranti zelo imbiberat: isque haberet in votis ut per omnem honestarum artium cultum, sicut pueritiam, sic adolescentiam transigerem, quum Medicinæ me destinasset: Pietati nihil præuertendum ratus, detractum me Lutetia, præmaturis adhuc liberalium artium studiis meis, rectà huc misit.

HIC in D. GERMANI COLLADONII (quem parentis veriùs loco quàm auunculi semper venerari ac colere debeo) manibus educatus, te sacræ Theologiæ, IOANNEM TAGAVTIVM Philosophiæ præceptores, id est alteros parentes, nactus sum. Neque hîc te molestè laturum certum habeo, quòd

E P I S T O L A.

quòd præclari viri memoriam cum tua laude coniunxi: quem tu vsqueadeo uiuentem dilexisti, vt ne mortui quidem nomen nisi cum honore vsurpes. Sed ille quidem, vixdum medio ætatis spacio mihi aliisque subitò ereptus, studia nostra destituit. Ex eo nos totos, quàm grauioribus curis adhuc impares, possidere cœpisti: per te sacris initiati Theologicis, sub disciplina tua rudimenta adolescentiæ posuimus: tu mysteria per se augusta & nondum sat firmatis ingeniis ardua, ita peruia & plana fecisti, quum minima quęque veluti mansa in os ingereres, quum nos disputationibus, nos præceptis, fingeres: vt non modò quę ex te propriè didici, sed si qua postea hausi ex aliis, ea iure tibi omnia accepta hodie referam. Ac me hîc quidem præteritæ vitę spacia relegentem animo, recordari etiam nunc iuuat, quanta olim admiratione, quanta voluptate, te, præter raram quandam *deuotum*, quę peculiaris in te est, candidam perspicuitatem Philippi, sinceram ac solidam sanitatem Caluini, doctam vberitatem methodumque Martyris, celebri auditorio, regenerantem audiuiamus,

EPISTOLA.

Quid aliis vsuenerit, nescio: me quidem scio nihil iucundius simul & vtilius audiuisse aut vidisse in vita: quum tu perplexa distinctè, obscura nitidè, difficillima enucleatè & familiariter nobis exponeres: id vnum prorsus agens, vt non tantum pij doctique, sed etiam aliis docendis quamaptissimi, discipuli tui euaderēt. Ergo, beneficio tuo, insignes viri, decora ingenia, ex hac schola, tamquam yberrimo fonte, emersere: & doctrinæ tuæ fructus latè sparsi sunt. De me nihil ambitiosè referam. Etsi in præstantissima omnium scientia præstantissimum Doctorem sortitus, lentos admodum ac tenues progressus ingenij vitio fecerim: si tamen (quod ille de M. Tullio scripsit) is cui tu valdè placuisti, plurimum promouerit: non parum profecisse me iudico. Me quidem, vix Theologicis operatum studiis, tua cùm doctrina, tum docendi ratio, adeo vehementi amore raptum deuinxerat, vt patris voce in patriā reuocatus, quum is me aliò mittere, propinqui verò etiam retinere cuperent: huc tamen potius, bona quidem cum parentis venia, reuerterer. Neque me adhuc facti pænitet. Quum enim,
Chri-

EPISTOLA.

Christum sequens, huc Deo propicio
 primùm venissem, neque vlla sedes ma-
 gistrâque studiorum incorruptior hac
 vrbe, neque te Doctor alius absolutior
 videretur, nihil mihi de pristino institu-
 to mutandum censui. Et quę hîc postea
 expertus sum, non iudicium tâtum con-
 firmarūt meum, sed spem etiam vicere.
 Prosper per ea tempora ciuitatis status,
 nisi quòd incomparabilis viri morte gra-
 ue vulnus acceperat: eò vndiq. affluens
 studiosorum multitudo, docti & suaues
 condiscipuli: florens academia: vrbs ipsa
 præclaris legibus condita & moribus: &
 tu grande academix simul & vrbis spe-
 cimen, ea diligentia Ecclesiam concio-
 nibus, nos verò etiam prælectionibus
 erudiebas, vt quum multos longo inter-
 uallo anteissem, temet quotidie ipse vin-
 ceres. Itaque tum non Catechismus tan-
 tùm Christianæ doctrinæ, Epistolæ ad
 Hebræos, ad Romanos, & ceteræ Pauli,
 multorum quidem antea peragratę ve-
 stigiis, sed abs te singulari quadam me-
 thodo, nec trita aliis via, aperte: verum
 etiam abdita Prophetarū oracula (quo-
 rum vel sermonem vt nimis priscum &
 obsoleta vetustate informem plerique

antè horrebant) explicata & euoluta
 tuis laboribus, vel tyrunculis ipsis patue-
 runt: ac quemadmodum felici Caluini
 cura antè educata, sic in hac mæstitia
 temporum salubri tua suauitate hilarata
 Ecclesia est. Inter hæc ne domestica
 quidem tibi horæ vacuæ, illustria hæc
 scripta pepererunt, quibus insanam ob-
 trectatorum maledicentiam, Caluini
 magnitudinem tuamque allatrantium,
 facillimè compescuisti. Nec crebriores
 vlllo tempore Ecclesiarum in varia loca
 dispersæ coloniæ, te cum cetero presby-
 terio mittendis pastoribus, scribendis
 litteris, sententiis dicendis, ita distine-
 bant, vt non magis miraremur te tanta
 negotiorum mole non obrui, quàm sem-
 per alacriorem, ac veluti nouum, ad do-
 cendum accedere. Enimuero mira in-
 terea, vt felicitas ingenij, ita morum co-
 mitas: vbi res & negotia poscerēt, inten-
 tus & grauis: vbi quies laborum data e-
 rat, commodus & feriis lata miscere fa-
 cilis: ita temperatis curarum ac remissio-
 num vicibus, vt (quod difficillimum)
 nec facilitas auctoritatem, neq. grauitas
 comitatem corrumperet. Sed ne singu-
 lare quidem illud in paucis Dei donum
 omisero,

E P I S T O L A.

omifero, quòd ne senectus quidem, quæ plerosque in ocium & segnitiam resoluit, quidquam de pristino studio tuo & labore detraxit. Eadem planè facis quæ iunior solebas: scribis, legis, concionaris, idque assidue, insigne adolescentibus ipsis documentum: nec, quum in plerisque corporibus vigere ac deflorescere animos videamus, viuus ille ingenij tui vigor cum ætate consenuit. Quis sanus non patriam, non auocamenta omnia, ut hæc videret, contemneret? Atque id ego, quamquam non sum assequutus, voluisse tamen, huc veniens præ me tuli. Sed ecce, quum acriore quàm antè incensus studio, prælectionibus & concionibus illis tuis potissimum audiendis meditandisque progrederer, vnum hoc, pænitendum mihi semper, accidit: quòd præcoci (ut ego iudico) tua & amicorum de me cura, nimium intempestiue ab ore tuo & latere auulsus sum.

QVAM OB REM ceteris quibus eo bono frui diutius ac felicius licuit, eruditionis palmam, famam, primum locum, secundum, tertium, denique omnem præter vltimum, facile concessero: dum mihi grati discipuli nemo nomē eripiat. Quod partim ut testatum aliquando fa-

EPISTOLA

cerem, partim vt quas seuisti fruges, earum nonnihil pro tuo iure meteres: hūc libellum inscribere nomini tuo volui: quamquam vel amplitudini tuæ haud satis parem, vel personæ quam gëris, parum conuenientem, plerisque visum iri nō dubito: ac ne meum quidem iudiciū ab eorum opinione discrepat. Neque enim hīc augusta illa & diuina reperiēs, quæ nos non tantum ex te audire, sed etiam mirari, consueuimus: non proxima ab illis Philosophica: ac ne Historias quidem vel nouitate rerum, vel splendore gentium commendabiles: quales hodie multas scriptoribus, si quos cædes & insaniam hominum condere Annalibus iuuat, Europa nostra suppeditat. Sed expeditiones, iam septuagesimum ante annum vsque ad nostra hæc tempora in vltimum Occidentem ab Hispanis susceptas, & ad Indos ab illis importata vitia & bella: mox durissima in seruiētes imperia, fœdas repugnantium strages, & exhaustas cēdibus & rapinis prouincias. Postremò direptores ipsos in mutuam perniciem actos, vt ciuiliū etiam bellorum in altero Orbe exempla existerent: ingens Christianæ fidei
inter

EPISTOLA

inter Barbaras gentes dedecus. Parum
 læta omnia, & iam antè magna ex par-
 tē dicta aliis. Neque ego attigissem, ni
 incorruptam fidem professus hic autor,
 non parua in maius augens, vt Hispani:
 non audita ex aliis interpolans, vt cete-
 ri: sed quē ipse præsens audiuit & vidit,
 sincerè referret. Vnum in primis pla-
 cuit, quòd nostrorum hominum in illis
 terris vitia & scelera non reticēs (quod
 plerique scriptores fecere) interposito
 nonnumquam suo iudicio, Barbarorū
 etiam vel Christianis dignas de ijs sen-
 tentias accuratè exsequitur: adeo vt in
 tam exiguo scripto nullam propè iustæ
 Historiæ laudem desideres. Quod de-
 esse videbatur, Latine orationis lucem
 intuli: tum breueis addidi notas, & si qua
 præterea scitu digna visa sunt. Magnū
 in tenui re laborem. fateor. Nec tanti
 dignum patrocínio viri libellum: Ne
 istud quidem nego: sed quem tamen, ni
 te prorsus ignoro, verecundè sese tibi
 offerentem adrogari inter clientes tuos
 & maximam dignitatis suę partem mu-
 tuari ex tuo nomine, patieris. Quam-
 quam (vt vnde cœpi eò desinam) hac
 numcupatione mihi nihil verè destina-

EPISTOLA.

tum propositumque fuerit, quàm ut vel ignobili hoc monumento testatus, me Deo cum multis de rebus, tum de hac potissimum gratias agere, quòd te, corruptissimis his temporibus, optimarum artium & verè Religionis præceptore, singulari meo fato, vltus sum: simul etià nonnullo gratæ Pietatis in te officio fungerer. Quod quidem ita tibi acceptum esse & probari cupio, ut nihil pro eo maioris gratiæ abs te petā quàm ut inter prospera venerandæ tuæ senectutis solatia istud etiam reputes, tibi, quāquam non satis doctos, attamen non ingratos discipulos obtigisse; & me, sicuti facis, semper ut *γνίσκω* agnoscas.


Hoc verò & nunc & assiduīs precibus meis à Deo Opt. Max. peto quæsiq. ut solandis piorū miseriis, & illustrandis horum temporū tenebris, inter tot Ecclesiarum lumina, quam longæus floreat ac splendeat in domo Dei, stetque præluceat dominus meus coram Domino & coram Christo eius. SALOCERTAE. Anno temporis nouissimi, **CLIO LXXVIII. KAL. SEPT.**

CHRIST.



CHRISTIANIS

ET PIIS LECTO-
RIBVS S.



*Q*UOD magni initio operis flo-
rentissimus rerum Romana-
rum scriptor Liuius praefatur,
Se nimirum, dum prisca popu-
li Romani facta & primas origines tota mē-
te repetit, tantisper à conspectu malorū, qua
sua multos per annos vidit etas, animum
auertere: id in tenui hoc scripto propemo-
dum contigisse profiteri mihi licet. Me vi-
delicet, quum ardente iamdiu bellis Euro-
pa, solatium malis & animo meo requiem
quarerem, longinqua alicuius prouincia se-
cessum & secretum saepe optasse, vbi liceret
non modò à tot scelcrum conspectu, sed etiā
auditu & fama, procul agere. Ergo nihil
hīc vsquam quietum circumspēctans, tan-
dem aliquando in nouam illam Indiam
(quam vocant) vt vacuum bellis orbem, to-
to animo transuolo. Et eò potissimū in mul-
ta inuitabant: Auriferi amnes, mōtes aurei:
mira cali temperies, noua fructuum auiūm

P R Æ F A T I O

que species, rudis & antiqua hominum simplicitas: mare unionum ferax, gemmis grauida tellus: denique obuia opes fama magis quàm rerum fide tradita: quæ omnia perluſtrare vel animo iuuaret: ſed ante omnia inerme ocium & quies, & morum noſtrorum tædium.

Ac mox quidem tranſgreſſo, vti dixi, ea primò omnia non planè vana arridebāt. Sed quum iſs miraculis animum attenderē, ecce è diuerſo longè alia rerum facies. Extorres indigenæ, & Chriſtianis inſenſi: ſubuerſi iam montes & auro penè vacui: exauſta mapalia, triſtis vbiq; & horrida ſolitudo: ſerui, aut ſeruitutem horrentes Barbari, cuius ne nomen quidem antè nouerant: & atrocias eorum cum noſtris bella, & quæ bella ſequuntur calamitates. Denique noſtra illic omnia vitia, ſæuitiam, libidinem & auaritiã reperi. Hic continuo mecum: Earum rerum cauſas numquid ſciſcitari & exſequi libet? Itaque cognoscendi auidus, Hiſpanos ſcriptores adeo, eorum libros euoluo. Mira illic: Vno aut altero prælio perdomita prouincia: priùs penè rapta quàm inita Regna: inſignes Hiſpanorum de Barbaris victoriæ, niſi equis deberentur. Denique tot Scipiones aut Alexandros magnos dicereſ

Indiæ Oc
cid. facies
hodie mi
ſera.

P R Æ F A T I O.

res, quot Hispani duces in illis terris bella gessere. Neq. profecto gloriam meritos abnuerim, si vel ipsi sævitia, vel scriptores laudibus modum statuissent. De sceleribus interim eorum & flagitijs nonnihil, sed parcè. De Barbaris ferè omnia in peius, ut fermè victos, sicut cetera calamitates, ita ignominia sequitur.

Sed mirabar in primis, cur non potius inermi quæsitu sine bellis peragrata e terra essent: unde aut quo initio Indis cum Hispanis cōtracta bella: imò quas bellorum apud eos posse esse causas, ubi nulla esset diuitiarum admiratio, nulla honorum æmulatio aut cupiditas, creberrimæ inter homines certaminum causæ. Postremò cur Hispanos iniuria potius quàm beneficio experiri maluissent: à quibus præsertim non multa tantum instrumenta vitæ & honesti cultus morem, sed literas etiam, rarum inter Barbaros, cū Religione acciperent. Quare primò hæc ferè importuna cuidam agrestique immanitati, & ab omni societate abhorrenti natura tribuebam, quæ, ut nonnulla animalium, nullis beneficijs mansuesceret.

Quæ Indis aduersus Hispanos bellorū causæ.

Sed hæc fortè rimanti, commodum Benzoni in manus incidit: qui ut superiorum opinionum errore demto, nodos soluit quibus

PRÆFATIO.

Benzo
Hispanis
scriptori-
bus cur
præferen-
dus.

*impeditus hærebam: ita veros eorum malo-
rum fontes aperuit. Is quæ decem & qua-
tuor annorum spacio magna ex parte in
Occid. India vidit, Italico sermone conscri-
psit, mira quidem breuitate, sed ea tamen
quæ nihil propè scitu dignum prætermittat:
aut si qua sunt, nos ea utcumque expleui-
mus. Ac ne collatum quidem cum alijs, mul-
tùm ab ijs discrepare comperi, nisi quòd illi
ferè tantùm euentus rerum: hic quas illi cal-
lidè sæpe reticent, causas etiam exsequitur:
nec, ut plerique, audita ex alijs, sed ab se vi-
sa & explorata referens: unde maior testi-
monio autoritas & scribenti fides.*

Hispani
scriptores
suorum
gloriæ le-
nocinan-
tur.

*Hunc ego accuratè quum perlegissem,
suspectos habere priores illos scriptores, ut
gratiæ plurimùm dantes & suorum gloriæ
nimium lenocinantes, cæpi: ac faciliè intelli-
gere (quod res ipsa loquitur, & Barbari ipsi
non minus naturalis iudicij luce quàm ex
perientia deprehenderunt) Hispanos verbo
ad propagandos Christianæ religionis fi-
neis in eas oras nauigasse: re ipsa, ut ditissi-
mis ijs subactis prouincijs æternæ domina-
tionis sedes ibi figerent: id est, speciosum ti-
tulum, auaritiæ & prauis alijs cupidinibus
pratexuisse.*

*Sed operæ precium est, id non tam ex meis
verbis*

PRÆFATIO.

verbis quàm ex ipsorum factis cognoscere. Ita enim & subigendis illis populis, & postquam subegerant regendis, hætenus maxima ex parte sese agitanere, ut quum quiduis aliud re ipsa præstarent quàm quod præ se tulerant, Dionysii alicuius aut Machiaueli discipulos veriùs quàm Christi se esse proderent.

Age igitur, aliquot istius, si libet, placita cum horum gestis componamus: quando hæc tantam inter se similitudinem habent, ut faciliè vel istos ex Machiaueli ludoprofectos, vel istum ex horum præclaris in Italia facinoribus Theoremata sua hausisse credideris. Quum enim in commentarijs illis quibus Tyrannum veriùs quàm Principem instituit Machiauellus, suadeat inter alia, ut quum ex animo Deum non colat: Pietatis tamen externam speciem præ se ferens, eam de se opinionem ac famam apud omnes, quoad eius fieri possit, conciliet: Id non perniciosius docuisse videtur iste, quàm Hispani apud Indos præstitisse. Ac nihil primò facilius, quàm crassus Barbarorum ingenijs hoc persuadere, qui noua & peregrina gentis miraculo capti, de ea præclara omnia & quamuis absurda crederent. Ergo Hispanis, quum splendidum Dei & Chri-

Machiaueli dogmatum, & rerum ab Hispanis in India gestarum, collatio.

P R Æ F A T I O.

*stiani nominis gloria promouenda titulum
suis expeditionibus imponerent & se Chri-
stianos, ac filios Dei altissimi, alternis propè
verbis iactarent, usque adeo habita fides,
ut etiam descendisse istos è calis (nam &
hoc ementiri non pudebat) vulgò illis gen-
tibus persuasum esset: donec res ipsa & fa-
cinora hanc vanitatem coarguerent.*

*Hispani verò prona interim Barbarorū
credulitate adeo abuti, ut etiam opinionem
& spem quandam salutis illis insitam (cæ-
cam quidem illam & inanem, sed tamen
spem) ad exitum miserorum & suum quæ-
stum verterent. Exemplum vnum referam.*

*Hispani Ex quo in Hispaniola vicinisque insulis in-
specie pie digene operarij Hispanis ad exercenda me-
tatis In- talla defuerunt: providere sibi ex Lucay's
dos in fer- uitutem insulis, quæ infra Cubam ad Septemtrionē
pelliciūt. versa sunt, mancipia instituere. Qua in re
mira arte & consueta illa sua Pietatis larua
utebantur. Quum enim illi simplices &
minimè mali hominès, rigore Septemtrio-
nalis plagæ expiatis suis peccatis, in Elysios
quosdam campos migraturos se aliquando
confiderent, quos ad Meridiem sitos esse
somniaarent: Hispani illuc navibus appellen-
tes, persuadebant se eò venisse ut eos in
beatas illas sedes traducerent. Ita miseros*

vana

*vana spe illectos, & pro certo habentes se
in Paradisum aliquem amœnum abduci,
plenis nauigijs in aurisodinas asportabant.*

Et eiusmodi quidem capturis quinquaginta hominum millia absumta, & vniuersa propè Lucaiensium gens deleta est. Tantum videlicet in Hispanis illis Religionis erat, ut istos in Paradiso illo suo collocare nollent, nisi prius in Purgatorium demersos. Sed spectemus cetera.

Hispani
Lucaien-
sium cre-
dulitate
abutun-
tur.

*Monet Machiauellus, non posse melius
provinciam aut agrum recens captum sub
imperio teneri, quàm si deductis in eum co-
lonijs veteres incole pellantur, aut ita at-
tritis premantur opibus, ut nulla vis ac re-
bellio ab ijs metui possit. Id quoque strenuè
ab Hispanis præstitum. Ita enim eas terras
occuparunt (quo iure ac titulo ipsi viderint)
ut non tantum Colonias arcèsque impo-
nerent domitarum gentium cervicibus, sed
eas quoque sibi compedes suis manibus fa-
bricari cogerent. Neque id satis: sed quum
indigenas intolerabili sauitia pepulerint
domibus, exturbarint agris, aut inter man-
cipia habentes laboribus attriuerint, pleris-
que locis ex veteribus incolis nullos: multis
quam paucissimos, omnibus quidem ita in-
pes humilèsque Indos reliquerunt, ut ab*

ijs rebellionem non pertimescant. Eius tyrannidis testes sunt Hispaniola, Cuba, Iamaica, San-ioannis de Portu-diuite, & Guanaxia insulae, in quibus (vel ipsis Hispanis historicis testibus) ex quadragiescenties capitum millibus, quibus olim habitabantur, vix hodie quingenti aut sexcenti Indi supersint. Adeò ingentium etiam bellorum clades Auaritia superat.

In vita Agricolaë.

Neque ullam ferè gentium hodie video, cui iustius quadret quod Romanis quondam exprobratum à Britannis scribit Tacitus: Raptores orbis, postquam cuncta vastantibus defuere terre, & mare scrutantur: si locuples hostis est, auari: si pauper, ambitiosi: quos non Oriens non Occidens satiauerit: soli omnium opes atq. inopiam pari affectu concupiscunt: auferre, trucidare, rapere, falsis nominibus imperium, atque ubi solitudinem faciunt, Pacem appellant.

*Idem Tyrannicus doctor præcipit, Nulla ratione melius ciuitatem aut prouinciam posse subigi quàm si malis moribus impleatur: qua arte Cyrus, suadente Cræso, Lydos magis quàm ullis armis fregit. At ne istud quidem Machiauellus melius scriptis, quàm Hispani factis expressere. *Vulgaria**

P R Æ F A T I O.

garia hac, Insuetos vino Barbaros ebrietate mollire & vincere, quod sæpe illis loco virtutis fuit: mulierum virginumque pudicitiam attrectare, unde mox in Europam atque in totum orbem Indica lues sparsa est: Hispanorum consuetudine quum liberos etiam eorum, in disciplinam Indorum liberi corrumpuntur. acceptos, iurare, sacrum Dei nomen blasphemis proscindere, aleari, furari, mentiri, scortari & sicas vibrare, docuerint. Ac ne ea quidem etiam gratuito: quando & aurum, & uniones, & libertatē, & cetera bonorū, ab illis gentibus accepere, quum sua illis vitia traderent. Qua in re tamen illud percommode accidit, quod, præter naturalem lucem, Præcepta Dei, quæ utcumque ab Hispanis didicere, cum eorum exemplis & factis componentes, horrenda ipsorum scelera & flagitia graui præiudicio damnent, donec in iudicio aduersus eos consurgant, Barbari.

Præter hac Machiauellus docet, Nulla ratione facilius in pace ac fide contineri, & Hispani Barbaris quæ habent & quæ nō habent extorquent. prohiberi à rebellionē subditos, quàm si inopia & labore cohibeantur. Mirum quàm auide arreptum hoc dociles isti ad vitia discipuli, in rem atque usum verterint. Neque enim tantum quidquid circum brachia, colla, aures, braculas, auri habuere Barbari,

PRÆFATIO.

cum ceteris delicijs excussere: sed penitus ire in viscera terræ, & paruo alioqui contentos, versis montibus, scrutari abditas opes coegerunt. Hinc tributa, onera, metalla, seruiuentium pœna, Indis imposita, & cetera, in quibus excogitandis nimio plus quàm velimus ingeniosa Auaritia est.

Nec contenti eripere quacumque habebant, etiam quæ non habebant, miseros homines vi, malo, tormentis inuenire subegerunt, & ijs locis ubi ne mica quidem auri esset, aurum superbis dominis pendere: donec miseri illi homines tot malorum exitû desperatione & deformi exitu quærerent.

Barbari
auaritiâ
Hispano-
rum miri-
ficè ex-
plent.

Atque hîc quidem (nisi vniuerso Christiano nomini grauius iniustum esset dedecus, quàm vtrîsum mereri posset) operæ pretium sit cognoscere, quàm lepide Barbarorum nonnulli furiosam illam auri famem expleuerint: quum vt rex Mithridates Aquilio Romano duci capto, ita Hispanis isti aurum in os infunderent. Imò quum Barbaros coegerunt, cum diris execrationibus, Aurum, Christianorum Deum, palàm vocare: quibus piaculis se ab tam graui noxa vnquam exsoluent?

Longum esset, omnia ad hunc modum persequi, quibus impotentem illum & tyrannicum

PRÆFATIO.

nicum suum dominatum in India isti fundarunt exercueruntque, quum Christi imperium propagare velle pratexerent. Illud quidē præfracta & insanabilis auaritia seuitiæq; insigne documentū est, quòd absumtis montium, amniū, terrarum & maris opibus, aut in Hispaniā transuectis, quum nil iam Indis præter nuda corpora superesset, corpora ipsa habere quæstui cæperunt, nec tantum illis pro asinis & mulis abuti, sed liberos quoq; homines undecumq; in seruitutem rapere, vendere, occidere: scilicet quia Christiani fieri nollent. Ac, credo, Indiam & Hispaniam mancipijs replessent, ni vangi anti auaritiæ frenos iniecisset Carolus Quintus: cui tamen vsque adeo obeditum non est, vt rebellare Coloniae & arma sumere in principem cum periculo, quàm parère cum detrimento mallent.

Hispani
Indorum
fortunis
consum-
tis, corpo-
ra seruitu-
ti manci-
pant.

Carolus
v. Indos
liberari
iubet.

Miremur iam Indos Christianam fidem respuere hætenus? Quo fructu prædicari Euangelium apud Barbaros ab ijs speres, quibus miseros homines in India affigere saxis, lacerare tormentis, obijcere canibus, proterere equis, vrere flammis, iocus & ludus fuit? Itaque his & talibus factis tam implacabile odium omnium Barbarorum non in se tantum, sed in omne quoque Chri-

PRÆFATIO.

stianum nomen, cōciuerunt: ut vulgò Christianos, non homines ex hominibus ortos, sed purgamenta quadam maris & monstra ex barbari elementi spumis concreta eietâque esse pro certo habeant: malintque liberos ex se ortos trucidare sua manu, quàm mancipia tyrannis alere.

Hispano-
rum excu-
satio.

Hic nonnulli, etsi Hispanos in totum nō excusant, subleuant tamen, & maximam partē horum malorū in earum gentiū vitia exonerant, quæ Deus scilicet ita ulcisci voluit. Nec ipse quidē meritos abnuerim, nisi peiores ij fuissent à quibus oppressi sunt. Et si enim isti suis quoque vitijs, & quidem magnis, laborant, sunt tamen in ijs nonnulla quæ non erubescamus imitari: & utinam ex hac indole aliquid Hispani haussissent, nec auidius aut gloriam aut caducas opes quàm isti concupiscerent. Certè, ut deessent illis alia, vel insigni quiete vitæ, vel innocentia umbra, vel hospitali benignitate in aduenas, non planè indignos indico quibuscum mitius ageretur. Quum verò etiam à litteris & Religione non abhorrerēt, alliciēdi potius beneficijs quàm vitijs absterrendi erant.

*CETERVM ne ipse quidem tamen
has*

P R Æ F A T I O.

has diuinitus illis clades obtigisse dubito: immò Deum (cuius profunda sunt iudicia & imperscrutabiles viæ) ut quondam Gotthorum & Hunnorum opera Italiam, Sarcenorum Gallias & Hispanias, Patrum nostrorum ætate Gallicis armis Neapolitanos principes attriuerit: ita nostris temporibus non tantum ad beluinas Indiæ gentes domandas, sed Europæ quoque lasciuiam castigandam Hispanis ministris uti. Sed an propterea (ô Gotthorum & Vandalorum sanguis) quòd patrum vestrorum vestigia sequentes, ventis hodie admodum secundis utimini: quòd nauibus, armis, viris, equis, terras & maria consternitis, Dei manum effugere vos posse existimatis? Venient haud dubiè, venient tempora, quibus stata vice vretur Hispania bellis, & vos qui alienis spoliis diuites estis, vicissim spoliabimini: Vos qui non tantum quietas sollicitastis gentes, sed etiam afflietas premittis, & iamdiu nostrum quatitis orbem: aliquando & ipsi quoque è calice irarum Domini, quem aliis hodie porrigitis, bibetis. Nondum stirps Maurorum planè exstincta est, qui Hispaniam armis occupatam aliquot secula tenuerunt. Nondum omne

P R Æ F A T I O.

Indorum genus funditus sustulistis, qui omnes rebellandi occasiones speculantur. Viuit adhuc in Sicilia eorum soboles, qui quondam licentiùs alieno utentes Gallos, una litterarum significatione, vno die, omnes obtruncarunt. Atque ut, fatali omnium ignauia, nulli aduersum vos sese arment populi, viuit tamen in calis Dominus, qui publicam Gentium insaniam & insolentiores triumphos suo tempore compescere consuevit.

VERVM, ut ipse quoque, & quidem æquius quàm Hispani, Hispanos subleuem, primùm me nullo Hispanorum odio, Indorum patrocinium suscepisse profiteor: ac si quid fortè hîc asperius in eos dictum exciderit, in bonos & honestos eius gentis viros dictum id me nolle significo: quos singulari beneuolentia complector: In primis fratres meos, pro Christo indigna multa atque aspera in Hispania perpetientes: pro quibus & nunc & quotidie Dominum oro, ut eos è fornace illa Babylonica mirabili potentia sua liberet. Deinde quum multa præclara Hispanos in India gessisse facile agnoscam: ita, siue diuturna earum gentium cõsuetudine, siue angustiis rerum, effe-

P R Æ F A T I O.

efferatos, multa sanè perperam, quorum pudeat, egisse non dubito: nec ipsos quidem, siquid vere indolis inest, recusaturos censeam, quominus in Historiis, quibus res eorum gesta narrantur, ut egregie facta, ita de suis vitiis nonnihil audiant: quando naevos & maculas si nudaueris, eluuntur: laudibus corrumpimur.

POSTREMO, ut in singulis saepe personis, ita in Gentibus naturalis quaedam & propria ad peculiare aliquod studium animi propensio est. Hanc nosse & dextrè regere homines debent: siquidem specie virtutis saepe in vitium degenerat. Hispani, bellis nata gens, & magnos ferè magis quàm quietos gerens spiritus, otij impatientes sunt, pigritiam odère. Laudabile id: sed ex eo, dum non cauent, & currere ad Indos, & laceffere quietos, nunc verò etiam ab Indis & Turcis in Christianos arma vertere, assueuerunt. Itaque quando ad contractas, necdum expiatas, in India culpas hoc quoque nefas addunt: patiantur se moneri, ut matura penitentia imminentem suis capitibus iram Dei auertant: discant operari manibus & terram colere, & suis contenti opibus intra Hispaniæ

P R Æ F A T I O.

*terminos, per laborem corporis & quietem
animi securam potius & tranquillam quàm
cruentam senectutem expectent. Me qui-
dem hoc libello non minus eorum
saluti quàm memoria consuluisse
numquam pigebit, si liben-
ter hæc legant &
resipiscant.*



D E A M B I G V O I N D I Æ nomine.

INDIA, propriè ingens illa Asiæ ad Ortum re-
gio vocatur, quæ Alexandri & Macedonum
armis perlustrata est. Hoc autem Orientalis
Indiæ nomen Nouo huic orbi à Columbo
primò eius inuentore impositum putamus,
quum Nouas illas insulas primùm repertas,
Cipangon esse existimaret, quæ ex aduerso
Sinæ & Cataij sita, Orientali potius quàm
Occidentali limiti attribuitur: idque iuxta A-
ristotelis & Senecæ sententiam, qui non pro-
cul abesse Indiam ab Hispania scripserunt.
Porrò vt veterem illam Indiam ab hac noua
nota aliqua distinguamus: illam Orientalem,
hanc Occidentalem ferè nuncupabimus.



EPIGRAMMATA

ALIQUOT.

¶ De Aurea ætate apud Indos Occid. in
Ferream mutata.

QVAERITIS unde Nouum tot ferrea
bella per orbem:

Curve quies illis non sit ut antè locis?

Auro foeta Ceres, & saui nescia Ferri,

Illic innocuas sponte ferebat opes.

At simul Occiduos, quos nondum norat, ad Indos

Thusca per incertas carbasus inuit aquas:

Inde Auro rediere graues, Ferrumque tulere,

Hispani, & populis imposuere iugum.

Hinc quondam atq. diu, miseris nunc gētibus, etas

Aurea quæ fuerat, Ferrea facta fuit.

VRB. CALVETONIS.

EIVSDEM,

De Indorum conuersione.

Hispanus, cæcis ut lumen redderet Indis,

Sciderat ignotas per freta longa vias.

Nec tamen vlla fides: nec lux promissa refulsit,

Nec cæpit miseris clarior ire dies.

Quin sibi Barbarus hinc, & clarè & multa vidēt,

Ereptos visus iam propè conqueritur.

Quid mirum, exhaustis opibus terræque marique

Si minus, aut potius, si nihil Inde vides?

EIVSDEM.

Celtiber Indorum sitiens (ut fama) salutem,

Et Christo multas querere certus oues:

*It, redit, ædificat, templis imponit honorem,
Corporâque infusis Barbara lustrat aquis.
Nec labor incassum: & quidni conuerteret Indos
Voce, manu montes vertere qui potuit?*

¶ De Hispanorum in Indiam Occid. nauigantium consilio.

*Captus opum studio rabiéque in sanus habendi,
Tentauit longas impiger Astur aquas,
Ut quondam iuuenes, Argiue robor a pubis,
Sunt vetitas ausi per maris ire vias,
Ad sauum Aeten, rigidas & Phasidis oras,
Auratum Colchis vellus ut eriperent:
Oceanum haud aliter penetrauit classis Ibera,
Ut raperet quas fert India diues opes,
India, quam memorant baccis auróque beatam:
Auro multa illic splendet arena micans.
Indica gemmiferis sparguntur littora conchis,
Et cara è terris effodiuntur opes.
Ergo, Hispanæ audax, lucrum fuit unica causa:
Tantæ Relligio non tibi causa via.*

ST. TR.

EIVSDEM.

*VRBANVS Latia perstrinxit arundine classis
Hispanæ in miseros effera facta viros.
Et meritò, miti quia nomen ducit ab vrbe,
Immites odit, nec fera facta probat.*

PRIMI



PRIMI LIBRI SVMMA
ET ARGVMENTVM.

INTER singularia huic seculo à Deo concessa beneficia & decora, Noui Orbis patefactionem meritò numerare possumus. Ac primi quidem eius Inuentoris nomen pia memoria prosequi, gratitudinis pars est. Itaque Benzo, postquam suscepta à se illuc navigationis causas, cursum & appulsum breuiter exposuit: quis primus in eas terras nauigare ausus sit, discussis ea de re Hispanorum fabulis, aperit. Mox ut Hispani tantum Dei munus sanitia, auaritia, libidine & seditionibus corruperint: unde inusitati in Hispaniola insula, quæ prima reperta est, turbines, indigenarum motus, & pradonum naufragia consequuta sunt. Inde varias Indorum de noua gente opiniones, quum Hispani se filios Dei esse passim iactarent: Barbari rem ex factis aestimantes, adduci ut crederent non possent. Inter hæc transgressi in Indicam continentem Hispani, quum insensos inquieta ipsorum auaritie Barbaros in amicitiam pellicere non possent: eos ut insociabiles apud Regem Hispaniæ criminantur. Itaque ob id imponitur regio Edicto Indis seruitus, & mox abrogatur. Interea nihilo secius crescere sanities Hispanorum in eos, & eorum implacabile in Hispanos odium, quorum etiam tyrannidem vulgò quæsitâ morte fugerent. Ac ne ipsi quidem Præfecti Hispani satis inter se concordēs, iam tum odijs, ambitione, & inuidia, omnia miscebant.

*donec , tragica scinitia exemplo , generum socer
securi pertineret.*

*IN hac egressus Benzo, ad Hispaniolam reuer-
titur (de qua propriè hoc libro : ut Secundo de re-
bus ab Hispanis in Castella aurea , Nicaragua,
Guattimala , Indicae continentis prouinciis, gestis:
Tertio , de iis quæ in Peruano regno acciderunt,
peculiariter agit) & eius indigenarum per-
nicacem superstitionem, ritus, mores,
fruges: Postremò Insula ipsius
situm, solique naturam
& commoda de-
scribit.*

NOVAE




NOVAE NOVI ORBIS

HISTORIÆ, PRIMVM AB
Hieronymo Benzone Mediolanensi
Italico sermone conscriptæ, nunc
verò in Latinum translata,

LIBER PRIMVS.

*Quæ causæ Benzonem ad navigationem in Indiam
Occid. suscipiendam impulerint.*

CAPVT I.



VVM essem adolescens, annos
viginti duos natus, &, multo-
rum exemplo, peragrandi orbis
cupidus: præsertim visendæ eius
mundi partis nuper repertæ, cui
Indiæ Occidentalis, & Noui orbis nomen fa-
ctum est, explere animû ipse tandem mecum
constitui. Postquâ igitur eò ire mihi sententia
stetit, Mediolano profectus, anno M. D. XLI. *Benzonis
in Indiam
naviga-
tio, anno
M. D. XLI,*
Dei summi gubernatoris ope fretus, terrestri
itinere Medinam-campi, celeberrimû totius
Hispaniæ emporium, perueni. Inde Hispalim
progressus, secûdo Bæti flumine ad oppidum
S. Lucari de Barrameda, lembo peruectus
sum: vbi omnium nauium ex Hispania in

Indiam commeantium atque inde redeuntium appulsus & portus est. Ibi fortè nauim mercibus onustam nactus, soluere & in Magnam-Canariam vela facere parantem: quum breuior atque expeditior traijciendi ratio mihi non occurreret: præterea accepissem naues vino, farina, melle, caseo, ceterisque eiusmodi rebus instructas, quæ ad eas regiones necessariae importantur, è Canariis insulis in Indiam omni tempore decurrere: desiderij mei velociter explendi auidus, eam nauim conscendi. Bimestri spatio expleto, in Magnam-Canariam peruenimus: vbi quum audiuissem celocem vnā in insula Palma (ea vna è Canariis est) vino oncrari vt mox in Indiam traijceret, protinus cōscenso nauigio in eam insulā biduo trauectus sum. Inde, posteaquam paucis diebus ea nauis omnibus rebus instructa est, soluimus.

PORRO quum quatuordecim dies prospero vento nauigassemus, ingentem vim marinarum auium repentè conspeximus: vnde non sine incredibili animi voluptate nos haud procul abesse terra, iudicium faciebamus.

*Pisces voc-
lucres.*

Nocte quoque sæpius volucres quidam pisces, longitudine palmi, in nauem nostram volitantes cadebant, quibus haud multo secus atque ipsis auibus species quædam alarum inerant. Iam Nauclerus nauigatoriae artis peritus Solis altitudinem & declinationem explorare cœperat, quæ ex linea Meridiana deprehenditur: noctu polum Arcticum seruans, aut vicinam illi stellam (Tramontanam illi vocant)

quæ

quæ iam multum nobis depressa erat. Ad eum modum nauigantes, post duos dies, Dominica quadam die manè sub ortum Solis terræ conspectum habuimus. Ibi magister-nauis mihi affirmat insulam eam ipsam esse, quam primam inuictus Christophorus Columbus secunda sua ex Hispania in Hispaniolam nauigatione vidisset. Eum enim, quum è Canariis soluens vigintiquatuor aut viginti-quinque totos dies nauigasset, absque ullius occurfu terræ, quum aliquam conspiceret incredibiliter arderet, protinus oculo eam insulam notasse, ac propterea Desideratam vocasse.

*Desiderata
insula.*

IN eo tractu multæ sparsæ insulæ, quarum maximam Hispani Guadalupeam appellant, incolis Caribibus ferè habitantur, qui humanis carnibus, id est hostium suorum, vesci consueuerunt. Dum eas præteruehimur, lintrem quem Indi piscatores agebant, obuium habuimus: sed illi nobis conspectis aufugere: nos institutum cursum sequuti, flexa in læuam prora, versus Æquinoctialem lineam, alias quasdam insulas continenti obiectas, post octauum diem conspeximus.

AD earum vnâ, Cubaguam nomine, ap-
pellimus, qua in insula tum fortè erat Hiero-
nymus Ortalus Cumanæ Præfectus. Is tan-
tos animo meo stimulos admouit, splendidi-
dis me verbis & pollicitis onerans (sicuti earum regionum Gubernatoribus facere solenne est) vt me secum manere subigeret.

*Cubagua
insula.*

Quippe quum is propediem cum non spernenda Hispanorū manu in suam Prouinciam iturum prę se ferret, (quam indigenę Nautal, Hispani hodie Dorado, id est auream, nuncupant, vel eo vno vocabulo spem diuitiarum faciente) & nos breui ditissimos euasuros alternis propē verbis sponderet: vanis istis eius promissis, & multis alijs maioribus effectum est vt cum eo manerem, non minus videlicet rei faciundę quā visendi Noui orbis cupidus.



Quomodo Hispani in India Occid. Barbaris, tum amicis tum inimicis, vtantur.

CAP. II.

PAVCIS pōst diebus quā in Cubaguan appuleramus, cōdem Petrus Errera insulę Margaritę pręfectus duobus phaselis triginta cum Hispanis applicuit, vt inde in aduersum trajiciens mancipia aliquot ē continenti raperet. Itaque eo consilio paucis quā eo venerat diebus manē duabus post lucem horis inde soluens, Hieronymum Ortalum & nos secum abduxit: & sub eius diei vesperam Cumanę fluuij ostium inuecti sumus. Eo loco ædificatum erat ab Hispanis propugnaculum ē materia, ad tutanda nauigia, ē Cubagua ad flumen illud aquatum commeantia. Exstruxerat quidem antē aliud munimentum ē cespite in eo litore

litore Iacobus Castellio, quo tempore vnionum piscatus vigeat: sed paulo post auctum continuis imbribus flumen plana camporum ad duo ferme passuum millia ita inundauit, vt eam arcem quoque euerteret. Ibidem erant quatuor ferme aut quinque tuguria fluuialibus cannis & arundinibus cōtexta, vnde (sic uti post dicemus) Didacus Ocampus trib. mil. Toletum urbem condiderat. Iam Hispani omnem eam oram propè desolauerant: & ex tanta Indorum multitudine quanta olim erat, nulli ferme tum reperiebantur præter paucos aliquot & pauperes regulos, quibus Hispani pepercerant, vt iis ad operas suas pro mancipiis vterentur. Ceteri in solitudines & deserta loca concesserant, tantum vt Christianorum imperium fugerent.

*Toletum
noua colo-
nia 4, aut
5. tuguriis
constans.*

SED dum nos aliquot in Cumana moramur dies, cō venit Indica mulier præcipui eius provincie reguli vxor, quasillum patriis fructibus plenum ferens: ceterum eo oris corporisque habitu vt tam deformem ac prodigiosam speciem neque ante neque post eam diem vidisse me vnquam meminerim: neque tum rei nouæ miraculo stupefactus eam intuendo explere oculos possem. Illa vt venit, ad Erreram præfectum ingressa, posito ei ante pedes quod attulerat munere, tacita in scamno assedit, tali habitu ac specie: Primum prorsus nuda exceptis pudendis, quæ velare eius provincie consuetudo fert: vetula, virgata toto corpore ac depicta nigro, promissis ad pubem capillis: præterea auriculis infimis adeo productis

Indica mulieris inusitata species.

demissisque vt in humeros vsque penderent, (scœdum visu spectaculum) deinde per medium fissis, ac foraminibus insertos anellos gerens, leuissimos, è ligno quodam elaborato, quod eorum lingua Cacoma dicitur. Vngues ei præter modum longi, atri dentes, os patulum, nares perforatæ inserto anulo, quem ipsi Caricori appellant: ita vt monstri cuiusdam potius quàm humanam speciem haberet.

BIDVO expleto, è Cumana soluimus & vsque oram legentes in Ortum per sinum Pariæ, ad ea litora appellebamus, in quibus Reguli fœdere & amicitia cum Hispanis iuncti erāt: quúmque iis ferè locis egrederemur in terram, pro paululo vino Hispaniensi, pro induſio, pro cultello & aliis eiusmodi minimi precij rebus, quibus Præfectus illos munerbatur, ipsi nobiscum aliquot è suis clientibus & subditis mittebant, duces itinerum, qui loca & tractus indicarent, vnde capitales ipsorum hostes Indos captiuos abduceremus, quum ipsi Christianorum se amicos & socios ferrēt. Itaque manente Præfecto cum octo Hispanis in Cariaco eius oræ litore, ceteri omnes iter ingressi, præeuntibus ducibus de gente amica datis, & commeatus ferentibus, prædabundo agmine, cētum fermè passuum millia terrestri itinere introrsus emensi sumus: mōtes, valles, flumina, saltus & cetera locorum aspera multa cum vexatione transgressi, quā iter duces monstraauerant. Tandem per inuias rupes & prærupta saxa, & foramina, quā vulpes quoque
ipſas

ipsas transire dubitaturas existimem, sapius
 noctu quàm interdiu procedentes: ducentos *Hispani in*
 & quadraginta Indos mares ac feminas, pube- *India pre-*
 res atq; impuberes, manu captos abduximus. *das homi-*
 Agminis nostri ductor metuens ne alimenta *num agūt.*
 deficerent (tametsi ex Indorum mapalibus
 aliqua cibaria contraherentur) signū receptui
 dedit. Quum retro vnde veneramus, egrede-
 remur, manè quodam ad primam fermè Au-
 roram fortè duos ignes eminus repentè con-
 spicimus, vnum in monte, alterum in planicie:
 quum utròque ire liberet, agmine in duas par-
 tes diuiso, alij in planitiem, alij ad montem
 contendunt. Qui in plana sese demiserant,
 velocius quò destinabant perueniunt: ibique
 reperta tantum anu quadam cum filia, quæ
 infantem aleret, manus vtrique iniiciunt. Illæ
 somno correptæ facillimè oppressæ sunt, sed
 improviso irruentium impetu excitæ tantum
 clamorem ediderunt, vt qui in monte erant
 procul eam vocem exaudirent. Itaque prius-
 quam nostri ad eos peruenissent, clamorem
 & ipsi altè tollūt: vnde nostri pauci Indorum
 multitudine territi, retro sese ad suos recipiūt
 vt iunctis cum reliquo agmine viribus, vbi
 nos eramus, hostem propulsarent. Interea ho-
 stes iuga & aditus quæ subire nos oportebat,
 occupare festinant: sed quum orta lux maio-
 rem armatorum multitudinem quàm quan-
 tam rati erant aperuisset, præsidio excessere-
 runt. Nihilo secius interea abeuntes sagittis
 venenatis configere nostros, & conuiciis
 incessere, latrones, canes, proditores, præ-

dones vocando & probra alia obiectando: neque dubito quin, nisi ab amicis nostris prohibiti & fugati essent, ingens clades accipienda nobis fuerit. Ita absque vlllo detrimento saltum illum superauimus, relicta anu illa quam ceperamus, quum ambulare non posset: ac biduo post ad eum locum vbi Præfectus erat, peruenimus; mox inde, resectis aliquot dierum quiete corporibus, & correptis aliquot lintribus quibus indigenæ vulgò uti solent, octoginta fermè millia passuum eius oræ percurrimus. Indi alueis ex singulis arboribus cauatis nauigant, quas cymbas illi Piraguas vocant, & earum maximæ quinquaginta circiter homines ferunt.

Indica nauigia monoxyla.

PORRO quum per omnem eius oræ longitudinem Indorum aliqui è montibus ad mare piscandi causa descendere consueuissent, nos eius moris minimè ignari, aptis ad insidias locis abditi, vnde minimè conspici possemus, totum sæpe diem opperiebamur, si quos fortè in æquum degressos excipere possemus. Mox ut Indi apparuerant, tum nos subito omnes ex suis quisque latebris exorti, in eos, ceu lupi in agnos, vndique impetum faciebamus. Hac arte amplius quinquaginta mancipia, omnes fermè feminas, cum liberis paruulis, cepimus: tandem tamen, quum ea omnia litora crebris exscensionibus infesta fecissemus, à quibusdam inimicis Indis conspecti sumus. Illi verò piscantes simulac nos viderunt, ingenti clamore sublato aliis signum nostri aduentus dedere. Itaque quot

Alia venandorum mancipiorum ratio.

quotquot circum ea litora erant, diffugiunt: nos verò in terram egressi nihil prædæ inuenimus, præter siccos pisces qui craticulis ex arundinibus compactis impositi læto igne torrebantur, & locustas ad solem exsiccatas, quas indigenæ vt domi recondere, lineatim filo traiecerant.

D v x noster postquam detecta fraude prædam hominum se facere ultra non posse intellexit, retro iter flexit & ad domum pauperis cuiusdam reguli Hispanis amicitia iuncti, applicans: postquam eum muneribus, phiala vini, indusio vno, & cultellis aliquot cōciliaffet, blandis verbis rogat velit se deducere in locū vnde prædari mancipia possit. Regulo Christianos secum ducere in expeditionem non placuit, sed sumtis aliquot è suis abiit, & postridie eius diei reuersus decē & sex Indos adduxit manibus post tergum reuinctis, eosque ductori nostro dono dedit. Is ei multas gratias agens promissis hominem implet spondetque se aliàs ei maioris precij res & elegantiores allaturum. His gestis, Cariacū reuertimur: die sequēti in Cumanam peruenimus: Præfectus captiuos in Cubaguam mittit, & Indis sociis, qui eum prosequuti fuerant, domos suas redeundi potestatem facit. Illos abeuntes in itinere inimici adoriuntur & quatuor interficiunt: reliqui in Cumanā regressi præfectum adeunt, & calamitatem suam querentes rogant vt secum Christianos aliquot armatos mittat, qui communes inimicos vlciscantur. Præfectus, quamquam vicem eorum vehemē

*Hispani
ad capiendos
Indos
Indorum
opera abutuntur.*

ter dolere vultu & verbis præ se ferret, tamen quando præuertendum ei aliud maioris momenti inceptum esset, in præsentia ipsis consulere se non posse respondit: verum fidem interea dare, hostes non impunè eā iniuriā laturos, sed simulac facultas adfuisset, se meritas de illis pœnas sumtutum. Illi male admodum contenti & offensi abeunt, diras in Christianos & eorum rapinas iacientes, qui tot ipsis malorum autores & causæ essent.



*¶ Indi captiui quomodo ab Hispanis tractentur.
Partensium mores, & arma.*

CAP. III.

PRAEFECTVS paucos post dies cum vniuerso agmine è Cumana soluens & oram occasum versus legens ad Amaracapanam appellit. Oppidum est quadraginta fermè domuum, quod quadringenti Hispani assiduè incolebant. Ii quotannis è suo corpore legebant ducem, qui dimidia militū parte attributa & multis eius finus accolis Indis quibuscum societas erat, assumtis, per multas eius oræ prouincias prædatum discurrebat. Ibi dum moramur, Petrus de Calice trib. mil. quatuor millia mancipiorum & amplius trahens, venit: multo etiam plures captos adducturus, ni partim labore, lassitudine & alimentorum penuria, partim ægritudine animi & desiderio patriæ, parentum ac liberorum, quos inuiti reliq

liquerant, permulti in via defecissent. Nonnullis etiam, quum agmen raptim ductum facile sequi non possent, ne ad bellum instaurandum superessent, Hispani latera & pectora ferro traiecerant. Spectaculum profecto fœdum ac miserabile intuentibus calamitosum agmen illud seruorum: nuda, lacera, mutilata corpora, fame & miseria debilitatos viros feminasque. Infelices matres cerneres duos trêsvē filios trahentes, aut collo atque humeris gestantes, mœrore & lacrymis perditas: omnium ceruices, brachia, manus, funibus & catenis ferreis innexa erant: neque vlla inter eos adulta virgo, quam prædatores non stuprassent: tam profusa libidine, vt ea mox Hispanis in contagionem atque inde in perniciales morbos euaderet. Iste tribunus mil. amplius septingenta millia passâ mari in mediterranea earum regionū penetrauerat, quæ *Hispani solitudinē in* sub primum Hispanorum aduentum frequētes & incolis refertæ: quum ego eò veni, *India fecerunt.* propemodum in vastitatem & solitudinem redactæ erant. Hispani equites qui aduersus eos populos bellum gerunt, thoracibus gossipio bene suffultis muniti corpora, lanceisq. & gladiis armati, prælia ineunt: peditū arma scutū, ensis, ballista: tegmē quoq. corporis equestri simile, sed leuius. Tormentulis verò, loricis, aut thoracibus ferreis non vtuntur, non tantum propter humidos vapores, qui è palustri & vliginoso solo gignuntur, sed quia quum sæpius in campis milites cubare necesse sit, partim sua sponte abundantius hu-

mescente terra, partim roscidis admodum noctibus, id genus armorum breui corrumpetur.

*Pariensis
regio In-
dia ferè a-
maniſſima*

CETERVM, meo iudicio, totus ille tractus & ingenti illi sinui Pariensi adiacens regio quâ meridiem spectat, omniũ quotquot adij Indiæ terrarum amœnissima est & feracissima. Si quidem ibi spacioſa planicies est, fertilis terra & aſſiduè flores fundens tum ſuavis tum tetri odoris: arboribus, velut vere perpetuo, toto anno folia durant, etſi paucae ſunt ſalubres & frugiferæ: plerisq. etiam locis magna vis caſiæ reperitur. Prouincia hæc in vniuerſum calida est & humida. itaque multa ex eo infecta generantur: in ijs culices, incolas noctu plurimum infeſtantes, & magna vis locuſtarum, quæ ſatis perniciem inferunt. Incolæ earum regionum penem tubo è cucurbitula, ceu theca aut vagina, includunt, cetera pendere extra ſinentes: quondam eiſcemodi bracculas, aureas & vnionibus decoras geſtare conſueuerant, ſed Hiſpani hunc illis morẽ finierunt. Feminæ viris iunctæ peplo aut caſtula (quam Pampanillam vocant) muliebria velant: virgines fascia tantum aut vitta. Regulis quàm multas libet vxores ducere licet: vna tamen tantum legitima habetur, eiſque in ceteras imperium eſt. Plebei tres quatuorve ſibi pro arbitrio iungunt: mox vbi conſenſere, eas ablegant & iuniores aſciſcunt: & coniugum ſuarum virginitatem delibandam tradunt ſacerdotibus quos Piacchos appellant.

CETERVM Indos non in Parienſi tantum

tum sinu, sed in alijs quoque Indiæ tractibus, piscatus fermè alit: vinum è Maizio, quod pro frumento illis est, & alijs fructibus radicibusque, moliuntur. Humana quoque interdum carne, pediculis simiarum ritu, ranis, vermibus & aliis eiusmodi spurcis alimentis vescuntur. Vnguentum quoddam ad confirmandos dentes conficiunt hoc modo. Vnionum feraces conchas cum foliis ¹ Axi cremant: mox cinectas modica macerant aqua, donec calcis candorem referant. Eo vnguento illitos dentes tam atros reddunt quàm carbo est, & tali remedio eos semper absque dolore conseruant. Nares quoque, labra, aures, perforare mos illis: & corpus variis herbarum succis aliisque rubris & nigris fucis distinguere: denique quò absurdior cultu sunt, eò sibi pulciores videntur. Reguli lectis, straguli aut toralis longioris quàm latioris instar factis, vuntur: plebeij verò fermè omnes retis ad formam suos contexunt, omnes quidem pariter è gossipio, & in iis ad duo tigilla alligatis atque in aere suspensis dormiunt. Qui in campis cubant, aduersus nocturnum frigus, perpetuū ignem vna ex parte, altera lectum, habent. Atque hunc in vniuersum cubandi vsum morèque seruant earum rerum regionum incolæ vsque ad fines ² Nominis dei (id oppidū Panamensis isthmi est) neque alia dormiendi consuetudo est in multis septentrionalis Oceani insulis.

*Pariensia
que lex
maritimo-
nū sit.*

*Medicamē
dentibus
confirman-
dis, Parien-
sibus vsur-
patum.*

*Cubandi
mos.*

ARMA illis præcipua arcus & sagittæ venenatæ. eas dupliciter fingunt, primum è pal-

ma, deinde arundinibus quibusdam concinnis, quas in ripis fluminum enatas, inopia ferri duris piscium squamis aut silicibus acutis asperant, mox bitumine nigro vngunt: pestiferum id virus est è radicibus, herbis, formicis, pomis, aliisque fœdis succis, permixtū, quod vetulæ cum serpentū sanie multo labore & diligentia decoquunt, donec ad exactū modum adduxerint: nec pauci interea tetro vapore, qui ex dira illa colluie exhalat, exanimantur. Si quis sagitta eo liquore adhuc recenti peruncta faucietur, ei corpus intumescit, vi veneni adeò rapida vt breue intra spatium rabie correptus intereat: si verò venenum aliquanto antè aut dudum factum sit, maximam partem lethalis efficacix deperdit. Veneni huius remedium præsentaneum est ferrum candens, inustum vulnere: & multos ego noui Hispanos, qui ea ope sanati sunt.

*Indicis
mancipij
quomodo
abutantur
Hispani.*

P O R R O omnes serui qui ab Hispanis in iis prouinciis capiuntur, abducuntur in Cubaguā: siquidem in ea insula Regij procuratores resident, qui regia vectigalia colligunt, nempe vniones, aurum, mancipia, & cetera id genus, ex quibus omnibus quinta Regi penditur id est, viginti è centum. Seruorum omnium faciei & brachiis ferro ignito, C. littera insculpto, nota inuritur: mox præfecti & duces de illis pro arbitrio statuunt: pars quoque militibus in prædam cedit, qui eos postea aut Hispanis aliis venumdant, aut de illorum capitibus inter se colludunt. Appellentibus quoque eò ex Hispania nauibus, mancipia ista vinq, farina

farina, nautico pane & aliis rebus necessariis, permutant: & quamuis Indicæ mulieres aliquæ ex Hispanis prægnantes sint, eas tamen quoque vendere nulla ipsis religio est. Mercatores eos seruos inde auctos aliò, reuendunt. Alij mancipiis magnos quosdam phaselos ad formam celocium (quas Carauellas vocant) factos complent, & in Hispaniolam insulam transmittunt. Sed præterquam quod mediterranei homines (quippe qui remotis ab Oceano terris ferè capiantur) nauigandi tædium ægrè tolerantes: ad hæc conferti stipatiq. in carinis sub tabulatis nauium, inter putidas sentinæ fordeis, nauscasq. & reliqua excrementa corporum, ceu pecora, in fæce ac stercore cõputrescunt: etiã non rarò, in summa maris malacia, tanta aquæ & ceteri victus penuria laborant, vt fermè omnes siti, fætore atq. æstu anima interclusa fœdum in modũ expirent. Quibus ex rebus hodie totus ille tractus & ora Pariensi sinui circumiecta ab Hispanis desolata est. Quum enim iam neq. vniones, neque aurum ibi reperiatur, & piscatio margaritarũ finè ceperit, nulla Hispanis spes quæstus, nisi ex mancipiis, superest, quæ & ipsa hodie pauca sunt. Earum enim regionum incolæ, pristina libertati Cæsaris beneficio restituti, aliò demigrarunt.

¹ AXI, planta vulgò nota in insulis & continentibus Indiae Occid. cuius fructu Indi per totum annum, pro condimento & pipere vtuntur.

² DE primo huius colonie conditore, & cur ita dicta sit, infra huius lib. cap. 22. De eius situ, lib. 2. cap. 9.



*¶ Indi Hispanos mortales esse, quomodo deprehenderint, quum
immortales esse crederent.*

CAP. IIII.



VNC ad Amaracapanam reuertor, quò, paucis postquam eò veneramus diebus, Regiæ San-Dominici curiæ mandatum allatum est. Ea iubebat Hieronymum Ortalum præfectum propter delictum ab ipso commissum, corripì, & firmo cum præsidio tutò in Hispaniolam perducì. Quare expeditionem illam promissam effluere sinens, spem quoque diuitiarum quam mihi sæpe fecerat, secum abstulit. Sed me præterea ex cæli mutatione, insolentia ciborum & vehementiore æstu affectum, quum adhuc malè cubando multum humidi terreni traxissem, morbus corripuit: ac nisi vir vnus extitisset, qui meas miseras respiceret, res meæ in perditissimo statu haud dubiè errant. Is Antonius Castellanus fuit, sacerdos Gallus, nobilis, summa vir comitate ac liberalitate, quam decora & plena dignitatis corporis species honestabat, quæ res ei omnium beneuolentiam ac reuerentiam conciliauerant. Is me in Amaracapanæ portu naui impositum in insulam Margaritam misit, iussitque ibi aduentum suum opperiri, vbi maximam partem seruitorum suorum & facultatum habebat: moxque vt eò venit, tanta in me charitate ac beneficentia vsus est vt si ex eo natus essem.

Neque

*Galli erga
Italum in
India be-
nignitas.*

Neque enim tantum sex menses domi suæ me dilecti filij loco habuit & curauit, sed recepta quoque valetudine inde abire volentem committere dimisit; rebusque omnibus ad nauigandum necessariis copiosissimè instruxit.

INDE quum carauella vna mancipiis onusta soluissemus, & oram legendo promontorium seu Caput-Veli circumuecti, altum non sine magnis laboribus propter summam maris tranquillitatem traiecissemus, tandem Boriquenam insulam tenuimus: quæ ab Hispanis vulgò S. Ioannis dicta, etiam propter ingentē auri & argenti vim in ea repertam, S. Ioannis de Portu-ricco, id est diuinitate, nuncupata est. Quum primò Hispani eam insulam subigere aggressi essent; insulares eos immortales esse pro certo habebant: eius rei periculum facere vnus è primoribus insulæ regulis aliquando constituit: dat negotium famulis vt Hispanum quemdam, hospitem suum, perlatum ad flumen, tamdiu pede vno retentum sub aqua mergi sinerent, donec extingui posset si mortalis esset. Illi sic demersum & suffocatū Hispanum humeris ad herum deferunt: is quum haud dubiè mortuum esse videret & tali experimento iudicaret ceteros quoque mortales fore, iniuriis Hispanorum accensus, à quibus auarè ac crudeliter habiti erant, in eos cum ceteris regulis coniurat. Illi in Hispanos necopinantes vnà impetum faciunt, & centum quinquaginta trucidant, qui per insulam palati & auro legendo intenti erant; ac ne vnus quidem cladi superuisset, nisi Di-

Indi Hispanos mortales esse quomodo deprehenderint.

dacus Salazar cum noua manu laborantibus subsidio venisset. Ex ea insula, vbi dierum aliquot quiete recreati essemus, soluentes, breui in Hispaniolam appulimus, atque in ciuitatem San-Dominici venimus. Ea prima terra ab Hispanis in illis regionibus frequentata, & colonia condita est.



¶ *Christophorus Columbus Genuensis primus Indie Occid.
reptor, utcumque Hispani eam laudem
alteri transcribant.*

CAP. V.

*Splendida
fabula de
primo In-
die occid.
inuentore*



AM verò quis incognitas quondā eas terras primus aperuerit, inter scriptores non satis conuenit. Primum Franciscus Lopez de Gomara in secunda parte Historiæ generalis Indicæ in hanc sententiam scribit: Naclerus quidam in Oceano nostro celoce nauigans, flante diu
» & vehementer Apeliote raptus, quum vento
» obsequi ei necesse esset, in regiones incogni-
» tas delatus est, quæ neque in Cosmographi-
» cis vllis tabulis notatæ, neque in indicibus na-
» uigatoriis exstarent. Inde ægrè in Hispaniam
» reuersus, tribus tantum aut quatuor nautis
» superstitis, in ipso portu morbo exstinctus
» est, quem ex miseria, fame, siti, ceterisque
» in tam longa nauigatione perpessis malis, cō-
» traxerat: neque vllam aut nominis aut patriæ
» suæ memoriam reliquit. Quamquam ne id
quidem

quidem ipsius culpa accidisse putandum est, «
sed aut quorundam malitia, aut eius inuidia «
quam Fortunam vocant. Eum nonnulli Tur- «
detanum seu Vandalū fuisse tradunt, ac tum «
mercaturas factitare solitum in Canariis in- «
sulis & Madera, quum ei longus ille & exitia- «
lis error obtigit. Alij Cantabrum ferunt, in «
Anglia & Gallia negotiantem. Sunt etiam «
qui Lusitanum fuisse contendunt, qui tum ad «
Minam (vt vocant) vel in Indiam nauigaret, «
aut inde rediret. quod quidem commodè qua- «
drat nomini nouis hisce terris imposito. Præ- «
terea dicunt nonnulli Nauclerum istum cara- «
uella vna appulisse in Portugalliam: alij in «
Maderam, aut aliquam Hesperidum: nemo «
tamen ea de certi & explorati quidquam af- «
firmat. Omnes tantum in eo vno consentiunt, «
quòd videlicet Nauclero illo apud Christ. «
Columbum extincto, penes eum defuncti «
hospitis aduersaria, chartæ, & indices omnes «
remanferint, atque in iis relatio tam longin- «
quæ nauigationis cum designatione Paralleli «
& Climatis eius oræ tum primū repertæ.

E T paulò post: Principiò Columbus nau- «
culariam exercuit, & multis annis Syriam a- «
liásque Orientis oras obiit. Inde indices ma- «
rinos seu chartas nauigatorias conficere ag- «
gressus, atque eius artis peritiam consequu- «
tus, vnde fortunam & opes postea nactus est, «
Portugalliam adiit vt Australia Africæ litora «
& quæcumque tum Lusitani nauibus perlu- «
strabāt, cognosceret, atq, ita nō parua accessio- «
ne auctis & illustratis Indicibus suis maiorem

» autoritatem preciumque conciliaret. Postre-
 » mō in eo regno vxorem ducit, vel (vt nonnul-
 » li tradunt) in Madera insula, vbi tum, opinor,
 » commorabatur quum dicta antè carauella
 » applicuit. Ibi ergo quum esset, nauis eius for-
 » tē magistrum eò ex diuturno errore appellen-
 » tem domi suæ excipit: is Columbo omnem
 » nauigationis suæ historiam exponens, quid-
 » quid de orā à se repertæ situ & parallelo cō-
 » pererat, aperit, contenditque vt nauigatoria
 » paginæ quam ab eo emebat, nouæ illius terræ
 » specimen simulque eius nomen à quo inuen-
 » ta esset, adscriberet. Interea Nauclerus ille
 » moritur: indicium & relationem eius terræ
 » Columbo relinquit. inde Columbus primū
 » nouæ illius Indiæ notitiam habuit. *Idem scri-*
 » *ptor postea subiungit:* Nequid intactum præ-
 » termittam, sunt qui Columbum linguæ La-
 » tinæ & Cosmographiæ peritum fuisse affir-
 » ment. Quūque Platonis Timæum & Cri-
 » tiam legisset, vbi ille ingentis cuiusdam insule
 » Atlantæ meminit, & obrutæ aquis terræ
 » quæ Africam & Asiam amplitudine excede-
 » ret, eo impulsus ad vestigandas Antipodum
 » terras & aureā illam Marci Pauli Cipangon.
 » Adhæc legisse apud Aristotelem, vel Theo-
 » phrastum, in libro De mirabilibus, negotia-
 » tores quosdam Carthaginienses, à freto Her-
 » culeo in Occidentem & Meridiem nauigan-
 » tes, tandem multis exactis diebus in vastam
 » quandam insulam peruenisse, desertam illam
 » quidem & incolis vacuum, sed rebus tamen
 » humanæ vitæ necessariis abundè instructam.

& fluuiis nauigabilibus perfusam.

M o x idem autor satisfidenter: Equidem *«*
Columbum (*inquit*) si suo Marte & ingenio *«*
vbi esset noua India cognosset, multò antè *«*
quàm in Hispaniam veniret, de ea peruestigā- *«*
da cum suis Genuensibus acturum fuisse exi- *«*
stimo, qui tum negotiandi causa totum or- *«*
bem peragrabāt: sed tale quid aggredi ei num *«*
quam venit in mentem, donec cum Nauclero *«*
illo Hispano egit, qui eam tempestate maris *«*
actus repererat.

S E D hæc vt fabulosa & indigna fide refel-
lere, non magni operis est. Petrus quidem *Christopho*
Martyr Mediolanensis, in eo quem de his *rus Colum*
conscripsit libello, Columbum ea de re cum *bus primus*
ciuitate Genuensi egisse ante omnia testatur, *Indiæ Oc-*
simulque causam commemorat quæ eum ad *cid. inuen-*
vestigandas illas oras impulerit. Eius verba *tor.*
hæc sunt: Quum Columbus (*inquit*) pro suo *«*
more ac instituto, trans Gades in Portugalliā *«*
& omnem illam Oceani oram nauigaret, sæ- *«*
penuerò animaduertit, & quidem multa cū *«*
cura & diligentia obseruans, ventos quosdam *«*
statis anni temporibus ab occasu flare consue *«*
uisse, qui multos dies constanti & æquabili *«*
tractu spirarent. Quos quum non aliundè *Columbus.*
quàm ex transmarina aliqua ora, cuius halitu *quibus con-*
gigneretur, proficisci posse iudicaret, tamdiu *iecturis*
circa eam rem cogitando animum versauit, vt *Nouas ter-*
eius certitudinem quærere aliquando consti- *ras depre-*
tueret. Ergo annos natus ferme x. Senatu & *henderit.*
populo Genuensi coram sua consilia exponēs *«*
sponondit se si à ciuitate aliquot nauibus in- *«*

» strueretur, Herculis columnas præteruectum
 » tamdiu in Occidentem nauigaturum, donec
 » orbem circumuectus in aromatum feraces in-
 » sulas perueniret. Sed eius rei inceptio tum pri-
 » mum audita incredibilis videri omnibus, qui-
 » bus videlicet nihil tale vnumquam ne somnian-
 » tibus quidem venisset in mentem, & nihil ta-
 » men eorum quæ ad nauigandi artem perti-
 » nent, ignotum esse videretur. Itaq. omnes hanc
 » Columbi commentationem, cœu inanem fa-
 » bulam aut somnium, respuerunt: etsi fortè ac-
 » cepissent veterum scriptorum alicui proditum
 » de quadam ingentis magnitudinis insula, quæ
 » multorum dierum in Occidentem nauigatio-
 » ne à Gadibus distaret.

H A V D equidem dubitem eam ipsam fuisse
 causam, quâ impulsus Columbus nouas il-
 las terras quærere aggressus sit: vnde facile
 existimare licet Gomaram multis argutis cõ-
 mentis veritatem permiscere ac corrumpere
 conari, & quidem eo consilio vt immortalẽ
 Christophori Columbi famam immi-
 nuat. Quippe ægrè multi patiuntur, pere-
 grinum hominem, & quidem è nostra Italia
 ortum, tantum honoris ac gloriæ consequu-
 tum, vt non tantum Hispanicæ gentis, sed &
 cuiusuis alterius, homines superauerit.

N O N alienum fuerit hoc loco quiddam
 narrare quod Columbo in Hispania, vti acce-
 pi, contigit, posteaquam iam Indiam repere-
 rat (etsi enim id olim quoque aliquando esset
 factum, recens tamen hoc inuentum, eius est)
 Quum fortè Columbus celebri conuiuio cū
 multis

multis nobilibus Hispanis adhibitus esset, & inter eos (vt fieri solet) de India sermo ortus esset, vnus eorum ita cum alloqui cœpit: Domine Christophore (inquit) etsi tu Indiam non reperisses, non defuisset tamen in hac nostra Hispania, qui idem ac tu tentasset, vt quæ multis magnis viris & ingeniosis abundet, Cosinographis & litteratis. Ad ea Columbus nihil prorsus respondit: sed ouo afferri in tricliniam iusso & mensæ imposito, verso ad omnes sermone: Agedum, inquit, domini mei, cum quolibet veltrûm deposito in cœnam pignore certo, neminem eorum qui hîc sunt facturum ouo isto quod ego facturum sum, nempe vt nullo nixum adminiculo, stans & erectum in pedem suo opte nactu maneat. Experti sunt omnes, neque vlli eorum successit: sed quum circumacto orbe ad Columbi manus peruenisset, ipse ouum, altero eius fastigio mensæ illiso ac leniter quassato, rectum firmumque constituit. Ea res omnium animos verecundia pupugit, postquam vtique illis patuit quid sibi tacitis ambagibus vellet: Nimirum id, postquam primus ipse tentasset, iam apertum omnibus & factu facile esse: debuisse ipsos potius principes Indiæ quærendæ viam rationemque inire, nec se ridere qui primus id experiri ausus esset, sicuti antè id cœptanti mirabundi illusissent, quasi rem impossibilem aggredienti.

b. iiii.



*¶ Christ. Columbi constans querenda India noua propositum,
atque vt diu irrita spe, tandem à Ferdinando
Castelle rege classe instructus,
voti compos fuerit.*

CAP. VI.



V N C, vt ad institutum reuertar & exsequi pergam quomodo hæc India primùm à Columbo inuenta fuerit: vt cognouit ipse ad tã præclari operis inceptum suscipiendum in Genuensibus parum opis sibi esse, transgredi vltcrius in Occidentem statuit: spe haud dubia fore vt ab aliquo principum, quorum ibi diuitiæ atque opes inclytæ essent, rebus ad eas quas ardentè deperiret et terras explorandas necessariis aliquando instrueretur. Itaque in Portugalliam concedens, inde fratrem suum Bartholomæum ad Henricum VII. Angliæ regem mittit, qui fauorem & naues Indiæ vestigandæ peteret: promittens se breui ex terris illis incredibiles diuitias allaturum. Sed Bartholomæus inde irrita spe & sine ope rediit. Itaque cum Alphonso V. Portugalliæ rege Columbus eam rem communicat, eumque supplex rogat, vt sibi naues aliquot armis & comineatu instructas tradi iubeat: se verò fidem ac iusiurandum dare, tandiu in Occidentem nauigaturum, quoad ditissimas auri, gemmarum & aliarum deliciarum quibus precium est, prouinciâs inueniret. Verùm
sicuti

*Columbi
diuturna
perseueran-
tia in suo
de queren-
da India
proposito.*

sicuti Columbus à Genuensibus suis pro vano habitus erat, ab Anglis ridiculus, ita tum quoque à Lusitanis pro futili & deliro circulatorè derisus est. Erant tum in Lusitania homines, qui Cosmographicam artem profitentes, nullam se eius partem ignorare arbitrarentur, Itaque superciliosè Columbum despicientes, regi suadebant, nequam peregrini hominis somniis fidem adhibere vellet. Quippe amen-tem esse: neque in Occidente aurum, aut diuitiarum quidquam existere posse, veluti exploratum affirmabant. Imo neminem subiectam Æquinoctiali lineæ plagam transgredi posse, quin immodicis solis ardoribus torreretur, siquidem eo in spacio maiorem æstus esse vim, quàm perpetuam inter duos Tropicos solis orbita & cursus est.

COLUMBVS ubi in Portugallia se ac verba sua ludibrio esse vidit, in Castellam profectus aulam Ferdinandi & Isabellæ regum adit, eisque suas cogitationes, ut ceteris, exponit, simulque eas quamefficacissimis potest rationibus, exemplis & testimoniis confirmat. Sed illis, etsi principia ipsa primò arriderent, incredibilia polliceri videbatur. Tandem consumtis aliquot in aula annis, quum in proposito constanter perseveraret, & tantæ rei spem exemplis & demonstrationibus euidentissimis confirmaret, ad extremum quorundam Hispaniæ procerum ope atque interuentu aditum ad Isabellam reginam obtinuit. Itaque tempus familiariter cum ea colloquendi nactus, adeo firmissimis rationibus eam labefecit, ut

dictis suis assensum fidemque præbere cogeret: donec tandem persuasa promitteret se ea de re cum Rege acturam, omnique ope atque opera enixuram nequid illi rei ad inceptum illud exsequendum necessariæ deesset. Quamobrem breui, Deo bene iuuante, & magnanimæ eius Reginae supplicatu, Rex Ferdinandus liburnicam vnâ & duas carauellas Christophoro Columbo instructas & armatas tradit.

*Prima
Christ. Co
lumbi in
Indiam na
uigatio.*

IPSE, cum Bartholomæo fratre, ineunte Augusto, anno M. cccc. xcii. è Calicio portu vela in altum faciēs, Gomeram insulam tenuit, quæ vna è septem Canariis est. Ibi aliquot diēs commoratus, vt aquam & cetera inde necessariasumeret, cœptum iter, Occidentem solem sequutus, peragere institit.

PORRO quum emensa dierum aliquot nauigatione nondum terra vlla in conspectu esset, milites in Columbum fremere incipiunt: ille mitigatis eorum animis, trigintaquinque dies nauigando extrahit, neque vllatum quoque terræ nota aut indicium apparebat. Itaque focij apertè Columbo minari & probra pro se quisque ingerere, Genuensem impostorem & planum palàm vocitantes. quippe nescire eum quorsum tenderet aut quò appellèret, & se eius ductu in certam perniciem ruere. Hic Columbus pro virili simulationes suas firmare, simul eos precari, orare ne animis per impatientiam deficerent: sibi spem esse, Deo bene iuuante, breui terram nouam in conspectu fore.

*Columbi in
toleranda
Hispanorū
impatietia
inuietus
animus.*

HIS

HIS tum vocibus sedati, quum aliquot præterea dies nauigassent, neque vlla tellus occurreret, fremitum in nauibus redintegrant, & se reduci iubent: alioqui pertinacius vltra tendentem in mare proiecturos. quippe vltius progrediētibus non suffecturos commeatus, maximè aquam, quæ in Hispaniam reuersuris necessaria foret. Ad extremum eò res rediit, vt promitteret reuersuros nisi intra triiduum terram vidissent: interea perspicuè ostendens non tantum suffectura ad reditum alimenta, si moderatè vti vellent, sed multo etiam longius. Itaque prosperè iter exsequi pergens, postridie eius diei demitti vela iubet: ac credibile quidē est, quum id diceret Columbus, haud procul terra afuisse, idque ex cæli conspectu deprehendisse, aura, & nubeculis quæ circa orientem solem in horizonte apparent: aut certè instinctu quodam ingentis & inuicti animi.

NOC T E quæ eum diem sequuta est, nauita quidam Lepiensis, è summo mali fastigio alta voce proclamans, Ignem, inquit, ignem prospicio. Tum euestigio excipiens adolescēs quidā, Non diu est, inquit, quum mihi dominus meus Columbus id ipsum dixit. Nauta ipse ingenti lætitia & spe auctus, haud dubius se, simulac Hispaniam attigisset, tam fausti nuncij à Rege præmia laturum, quòd primus visi ab se ignis è naui signum dedisset: postquā indonatus abiit, ira & dolore victus profugit in Africam & Christi fidem exiit.



¶ Columbus noua India reperta, primò ingenti Hispanorum gaudio, mox inuidia & calumnijs excipitur. Cubam & Hispaniolam detegit. Indi Hispanos amicissimè excipiunt. Hispani Indos auro & ornamentis, per speciem amicitiae, spoliant.

CAP. VII.

IAM quanta omnes voluptate perfusi fuerint, postquam nouam eam terram conspexere, nemo dicendo assequi possit. Alij vix præ gaudio mentium compotes, nouam oram intuendo explere oculos non poterant: aliqui perfusi lacrymis Columbum amplectebantur: nonnulli venerabundi manus eius deosculabantur, & qui cum offenderant, ignorantiae petebant veniam: denique omnes sese admirandæ ipsius virtuti humiles seruos ac deuotos ferebant. Interea Columbus demitti scapham in mare iubet: egreditur in terram: & deiecta arbore crucem ex ea factam in nomine D. Iesu Christi crucifixi in litore statuit: & Noui illius mundi ius ac possessionem Regum Catholicorum nomine vsurpat. Hoc modo Columbus propria virtute atque ingenio, secundum Dei gratiam, primus Indiam nouam aperuit.

Columbo inuidia ex gloria oritur. NEQUE minus tamen ex tam mirabili opere, cuius ipse autor & effector extitit, mille in eum inuidorum calumniæ exortæ sunt, vti mox dicam. Primùm enim Regij fisci procuratores, postquam in Hispaniam reue-

reuenerat litem ei intenderūt, iam à fratribus Pinzonibus Martino & Francisco duarum caruellarum magistris, apud Regem accusato, quòd, nisi ipsi à fœdo incepto deterruissent, regredi in Hispaniam ex itinere, non visa India, parasset.

CETERVM, possessione Indiæ, vt diximus, vsurpata, quum ibi diutius morari Columbus operæprecium non duceret, quòd ea insula in quam appulerat, exigua esset: regressus in naues vltèrius prouehitur & multas alias insulas detegit. Quum in Cubæ litora exscensionem fecisset, eam Fernandinam in memoriam gratiàmque Ferdinandi regis nuncupat. Ibi haud satis libenter ab insularibus conspectus est: quumque interea fortè mare turbari cœpisset, & ipse quòd in statione non satis tuta & fida nauibus esset, metueret ne tempestas nauigia ad scopulos allisa frangeret, subitò soluendi signum dedit.

Fernandina insula, vulgò Cuba.

INDE prouectus in Haytin insulam appellit, quam Hispaniolam nuncupat: sed ibi iactis in portu ancoris, quem Regium nominavit, Prætoria nauis scopulo icta frangitur: quotquot tamen ea vehébàtur homines cum maxima com meatuum parte, duarum caruellarum ope naufragio erepti sunt. Indi complures per omnem litoris oram sparsi naues mirabundi spectabant, sed simulac egredientes in terram Christianos viderunt, correpti formidine, celeri fuga dilapsi sunt. Hispani cursu vnā ex iis feminā assequuti ad Columbum perducūt: ille mulierem cibo potuq.

Hispaniola insula, vulgò Hayti.

expletam, eleganti & mundo indusio vestiri iubet: mox signis edoctam iussamque ire ad suos eosque hortari vt fidenter & sine vllō metu ad naues venirent, dimittit. Illa abijt: Barbari feminæ circumfusi, eam inusitato cultu vestitam non sine ingenti stupore aspectabant. Illā Columbi comitatem & muniticentiam in se inter populares prædicat: ceteri huius verbis adducti, præterea nouæ gentis barbatae & vestitæ videndæ cupidine, certatim lintribus suis carauellas circumdant.

*Celum non
animum,
mutat, qui
trans mare
currunt.*

IBI gaudium ingens pertentare Hispanorum animos cœpit, quum neminem in tanta Indorum multitudine viderent, cui non aurum & argentum in brachiis, collo & auribus fulgeret: mox etiam ea petere ab Indis vltro incipiunt: & illi, qui eas res parui facerent, cuilibet liberaliter & hilariter dabant. Columbus quum tantum Indorum in nauibus videret quantum vix illæ capere poterant, in terram cum multis Hispanis euadit. Ibi quum ab eius loci Cacico (ita regulos patrio idiomate appellant) cui nomen Guacanarillus, summa comitate exceptus esset, muneribus inuicem datis acceptisque ambo fidem futuræ amicitiae sanxere. Eum Columbus indusiis, pileolis, cultellis, speculis, crepitaculis & tintinnabulis, donauit: Cacicus contrà satis magno auri pondere eum remunerans, è suis aliquot misit cum lintribus patriis (illi Canoas vocant) qui ad efferendas in terram res & onera fractæ nauis Hispanis operam

*Diomedis
& Glauci
permutatio*

operam darent. Quam quidem illi adeo amico animo & propenso studio præstiterunt, ut si suæ illæ res essent.



*¶ Indi de fœneſto Hiſpanorum in ſuas terras aduentu
dæmonum oraculis moniti. Prima colonia
Hiſpanorum. Columbus in Hiſpaniam
reuerſus præmiis augetur.*

CAP. VIII.

MIRABILEM infulares illi Indi cuiusdamⁱ oraculi memoriam tenebant, inde à patribus traditam, quæ vera & futura prædicebantur: Non multis videlicet ab illinc annis venturam in eas oras barbatam gentem, quæ simulacra deorum terræ allideret, & filiorum ipſorum ſanguinem effunderet. Hoc ſi certè tum illis veniſſet in mentem, non tam feſto cum triumpho & lætitia aduenientes Hiſpanos excepiſſent.

CETERVM quum peteret Columbus vnde metallum illud fuluum nanciſcerentur, illi nutibus & ſignis demonſtrabant, è quibusdam fluminibus mediterraneis peti, qui ex altiffimis montibus decurrerent. Affluebat interea quotidie ex omnibus locis nouæ gentis & copioſa multitudo, ut inuſitatas noſtrorum hominum barbam geſtantium formas cultumque viſerent: fructus, piſces, aurum, panem & alia alimenta, vndique afferentes: ac


*Indi, quan-
quã simia,
semen ta-
men ali-
quod pieta-
tis sibi in-
esse osten-
dunt.* sumiarum more vestigia ritusque Christiano-
rum imitantes, quoties hi genua flexerant,
flectebant & illi: Christiani reuerenter ocu-
los in cælum sustulerant: Indi pariter & ipsi
tollebant. denique quidquid ab Hispanis ad
recitandum Aue Maria manè & vesperi con-
conuenientibus fieri soleret, itidem & ab istis
fiebatur.

*Prime co-
lonie in In-
dia Occid.
ab Hispan-
is condi-
tae rudimen-
tum.* COLUMBUS ipse non mediocri lætitia
affectus propter nouas illas repertas terras,
auri adeo & argenti feraces, quum Hispaniam
repetere & alterius inuenti mundi nuncium
ipse Regi ferre cuperet: cum bona Cacici
gratia domum coctili laterculo exstruit. Eo
loco duodequadraginta Hispanos relinquit,
qui ad reditum suum res insulæ sedulò & ac-
curatè explorarent: præmonitos vt in omni-
bus prudenter & modestè sese gererent. Hæc
prima domus ab Hispanis in India exstructa
est: Columbus cum reliquis soluit, inde se-
cum sex Indos, omne aurum quod à Cacico
acceperat, Psittacos aliquot, Maizij paniculas
(quæ vna Indicarum frugum est) & alia Indiæ
peculiaria & noua referens. Prospero cursu
& incolumibus omnibus in Hispaniam per-
uenit, præterquam duobus Indis qui in itine-
re extincti sunt. Appulsum Rex & Regina
quam honorificentissimè exceperunt, consi-
dere eum coram se iubentes: & in aula qui-
dem Indos ab eo aduectos quòd prorsus nu-
di essent, mirabundi omnes intuebantur: nec
minus ipsi quoque Indi obstupescerbāt, quum
Regem & aulicos vestitos cernerent. Rex
verò

verò Columbum insignibus honorum titulis
auctū summum Oceani Præfectum designat:
(Almirantem vulgò appellant) & ei omnium
regionum ex India redituum decimam attri-
buit. Bartholomæum quoque ipsius fratrem
Hispaniolæ insulæ præficit.


I QVOD de Oraculo illo scribit, ita se habet.
Cacici & Bohity (id est Reguli & Sacerdotes)
penes quos antiqua rerum quondam gestarum vel
dictarum monumenta à patribus sine literis tradi-
ta manent, Christophoro Columbo & Hispanis
narrabant, Garionexy Cacici patri & alteri cuidā
Regulo cupidinem quondam ortam sciscitandi è
Zemibus (id est numinibus suis) quid post sua tem-
pora euenturum fatā portenderent. Id porro, ut
extorquerent ab Idolis, quinque dies continuos ab
omni cibo & potu abstinuisse, tempusque illud per-
petuo in luctu & lacrymis egisse. Ergo his ritè
peractis, tandem respondisse Zemes, Quamquam
fata in occulto teneri à Dijs & futura celari homi-
nes satius esset, moueri tamen se ipsorum religione
ut ventura panderent. Itaque scirent venturam
non multos post annos ad eam insulam peregrinam
gentem: viros vestibus amictos, promissa barba, &
gladijs micantibus accinctos, quibus medium homi-
num uno ictu secarent, qui vetera Deūm simulacra
solo allideret, priscos sacrorum ritus & ceremonias
abolerent, liberos eorum vel mactarent, vel liber-
tate sublata in omne scelerum genus corrumpere-
rent. Tam horribilis oraculi carmen memoriæ ut
proderent, flebilem quandam cantionem (quam
Arcito vocant) velut elegiam, composuere: eam

diebus atris & festis quibusdam tristibus lugubri
& querula voce canebant. Ceterum ita postmo-
dum euenire omnia uti prädixerant Zemes, & ca-
nebant Sacerdotes: sicuti sequentia docebunt.



¶ *Secunda Christophori Columbi in Indiam nauigatio.
Hispaniola sanguine Hispanorum imbuta. Isabella
colonia à Columbo conditur. Indorum
aduersus Hispanos tumultus.*

CAP. IX.

 O L U M B U S omnem Regi itineris
& rerum ab se gestarum successum
exposuerat: & præterea gradu ex ea
insula factò, amplissimas & ditissi-
mas alias oras aperturū se promiserat. Itaque
Rex trium Liburnicarum & quatuordecim
carauellarum classem instrui iubet, & in eam
yltra mille ac quingentos homines imponi,
maximam partem mechanicarum artium opi-
fices, & quidem earum quæ illi terræ maximè
necessariæ essent. Columbus præterea equis,
bubus, ouibus, suibus, capris, feminis mari-
búsque ad propagandam eius generis stirpem:
deinde hordeo, frumento, leguminibus, & o-
mnis generis plantis ac frugibus, in naucis
prouisis & collatis: secum etiam sacerdotes &
monachos abduxit, qui gentes illas Christiana
religione imbuerent. Postremò rebus omni-
bus necessariis munitus instructúsque, anno
M. cccc. xciii, die secunda Septembr. è
portu

portu Calicio soluit.

COLVMBVS, iam Almirans regius, in Indiam renauigans, multo alacrius quàm prius fecabat fluctus, quatuor Indos reuehens quos Rex baptisari curauerat: & Canarias insulas præteruectus, paulo magis læuorsum quàm priore nauigatione cursu in Africam inflexo, Desideratæ insulæ conspectum habuit. Ea prima (vti antè dictum est) illi à Canariis occurrit tellus: sed neque in vllam eius oram egressus, neque vllò eius portu tacto, magna cum alacritate & Hispaniolæ desiderio cœptum iter persequutus est. Eam vbi classe tenuit, longè alio statu reperit quàm reliquerat. quippe omnes Hispanos ab eo depositos Indi ad vnum mactauerant: Almirans cunctis legatis ad Cacicum Guacanarillum missis, sciscitari iubet, quænam causa mortis suis hominibus fuisset. Ille nutibus atque aliis significationibus quibus mentem suam vtcumque exprimere poterat, respondens, multum & grauiter conquestus est: Hispanos post eius discessum, suorum coniuges stuprare, cõsque ipsos fustibus atque indignis aliis modis accipere, cœpisse, neque illos tamen à suis vllò dicto factòve esse violatos: sed venisse quendam nouum Regulum, quales multos potentes haberet ea insula, qui barbatos homines sedes in suis finibus capientes atque ædificia molientes nactus, veritusque ne insulam totam aliquando subigerent, omnes ad vnum trucidasset. Se quidem, quum casam Hispanorum conflagrâtem vidisset, ad opem

*Hispani
maturè In-
diam stu-
pris & la-
trocinis,
mox etiam
suo sangui-
ne, nobili-
tant.*

ferendam pro officio accurrisse. Sed meæ vires (inquit) parum valuerunt: & graui vulnere ictus sum, vt videtis. Simul hæc dicens, crus fascia bombycina inuolutum ostendit. Sed hæc simulata omnia & falsa erant, quemadmodum postea Columbus cognouit, Hispanis eò missis, qui fasciis solutis & inspecto Cacici crure, nullū vulneris aut cicatricis vestigium vidisse se retulerunt. Atque inde illis haud dubia suspicio, Guacanarilli consilio atque opera Hispanos interemtos & casam incensam fuisse, quòd illi, aurum vi extorquendo, feminas constuprando, & alia fœda faciendo, nullis verborum ac rerum contumeliis in Indos parcerent. Plerique Christophoro Columbo suadebant vt hanc iniuriam vlcisceretur: sed ille veritus ne maius detrimentum acciperet, vt qui vires atque opes indigenarum nondum penitus nossent, cohibere se maluit & vltionem meliori occasione seruare.

*Isabella,
colonia.*


INTEREA è nauibus secundò in eam terram egressus, cum suis principium coloniae dedit, quam in memoriam Isabellæ reginae Isabellam vocauit: mox ad Cibauí aurarias (is locus est insulæ vnde aurum effodiebatur) arce exstructa, munimento valido & ad impetus Indorum arcendos idoneo, Bartholomæum fratrem insulæ Præfectum relinquit. Ipse tribus carauellis ad nouas terras vestigandas profectus, Cubæ latus Meridionale, & Iamaicam & alias insulas, aperuit. In aliqua earum litora exscensu facto, à
non-

nonnullis populis æquis oculis visus est: mox inde Hispaniolam repetens, commodum nactus portum S. Nicolai nomine insignem fecit. In eo portu iactis ancoris Almirans constitit, tum vt suis tempestiua quiete refectis, tum vt carauellis instauratis, quæ iam omnibus compagibus multam aquam acciperent, mox inde ad delendos Caribas, & exurendos eorum lintres moueret.

SED tum fortè graui morbo correptus, eam expeditionem omittere in præsentia cogitur, & in Isabellam valetudinis causa portari: vbi multos Hispanos vita functos, alios morbis implicitos reperit. alij quibus valitudo integra supererat, Bartholomei fratris eius imperiis parum obediēter acceptis, non paruum tumultum mouerant. Cacici præterea aliquot propter iniurias, raptus, homicidia, rapinas, ceteraque ab Hispanis multis insulæ partibus perpetrata flagitia facinorâq. sumtis armis rebellionem cœptauerant.

QVINETIAM maxima pars Insularium, *Insulares*
non tantum inculta rura, nulla frugum sua- *Indi Hispanis*
rum sementē facta, reliquerat, sed quidquid *semina*
etiam in agris vsui esse poterat, id omne vast- *relinquunt.*
rant ac corruperāt, vt nudum & sterile solum Hispanis obijcerent: sperantes peregrinam gentem, vbi nihil victui idoneum reperisset, tandem insula excessuram: imò ipsi quoque adeò quum indignis modis habiti tam miserabilem seruitutem pati non possent, abiecta spe & omnibus vitæ solatiis, vulgò inedia se- *Hispanorum tyrannis*
iplos necabant. Columbus, sumto à prudētia *Inois in-
teranda.*

consilio, in omnes Hispanos seditionum auctores & scelerum compertos ultimo supplicio animaduertit, & Cacicos ipsos quacunque ope potuit reconciliare sibi studuit. Ex ea seueritate, tantum Hispanorum in Almirantem odium ortum est, ut quum eorum flagitiis & latrociniiis indulgere nollet, ne nomen quidem eius æquo animo ferrent. Qua ex re factum est ut multi de eo & fratre eius ad Regem dira & atrocia scriberent. itaque Columbus, simulac conualuit, in Hispaniam regressus est.



Inuestigata vis turbinum in Hispaniola. Eius mali causam Indi Hispanorum sceleribus & flagitiis tribuunt. Columbus Hispaniam reperit. Hispanorum ab ipsius fratre secessio, & scelera.

CAP. X.

PER eos dies mirabilis & prodigiosus quidam casus in illis terris interuenit, quem quia consideratione dignus est, non prætermittam. Nonnulli existimabant humani generis hostem, quum sibi eripi e faucibus tot animas, quæ per Baptismum seruandæ essent, agrè ferret, tantos turbinum furores, procellasque emisisse. Alij discordias seditionesque ex Indicis spoliis & opibus erupturas, eo ostento portendi arbitrabantur. Vulgi fermè opinio hæc erat, signo Crucis, quod in vexillum salutis erectum ibi fuerat, ex illis insulis violenter eiici, & earum gent

gentium diutina velut possessione detrahi tartareos spiritus, quos per tot ætates bruti illi homines pro patronis suis & numinibus coluerant. Itaque dum præcipiti fuga ruerent, tantas strages & portenta edidisse.

PORRO casus eiusmodi fuit. Ab Ortu tanta ventorum rabies coorta est, qualem nunquam antea Insulares se vidisse aut auduisse meminerant: in primis vehementissimus quidam Typhon, (quem Hispani Furacanium appellant) tanto impetu irruit, ut cælum simul ac terras rapere secum & miscere velle videretur. Omnes improuiso malo attoniti præsentem mortem imminere sibi ante oculos, confundi elemēta, & finem rerū adesse, vulgò pauidi credebāt. Tum verò ingēti sono cælum strepere, & inter horrēdos tonitruū fragores crebri micare ignes, aer incendi fulguribus, nox interdiu omnibus noctibus nigrior densiorq. adeo ut per obscurū alius alij occurrentes, mutuò intueri non possent. Errabundos homines, defixis præ formidine animis & lymphatis similes per vias perq. auiā discurrere passim ac peruagari cerneret. Tanta vi interea furentium & horrendo cum stridore colluctantium ventorum, ut his ab radicibus erutæ arbores, & auulsæ mōtibus saxa magno cum fragore in planū prociderent: & ea ruina ingēti villarū mapaliūmq. strage facta, multos mortales opprimeret. Solidas verò etiam cum incolis domus furiosi illi turbines sublimè correptas & absorptas dissipauere. Quibus ex malis grauis undique earum gentium plactus

*Indi de
calamita-
tum causis
verius quā
Hispani
inducant.*

& mæsti clamores exaudiebantur: paucis ho-
ris ingentia detrimenta accepta, vt ne tres
quidem naues quæ ad portum secure in anco-
ris stabant, eius calamitatis immunes essent.
Ancoris enim ipsis, quamquam robustis, fra-
ctis, & ancoralibus firmis nouisque truncatis,
cum omnibus nauticis profundo mersæ sunt.
Indi complures speluncis abditi discrimen
effugerunt: inde tamen rei tam nouæ prodi-
gio perculsi adeo & consternati cresserunt, vt
vix animam reciprocare aut quidquam pro-
loqui possent, adeo vocem inusitatus pavor
incluserat. Sed vt se ex tanto terrore college-
runt insulares isti, longè aliter ea de re inter se
disceptantes sentiebant ac Christiani. Quippe
eius cladis causam flagitiosis scædisque Hispano-
rum exemplis assignantes, cælum infestum
in eos ruere, & è suis terris illos eijcere velle
dicebant. Sed hæcne vera fuerit eius rei cau-
sa, an alia quæpiam, sapientiorum potius
quàm meo vel illorum iudiciis existimandum
delego.

QVINCQUE ab illinc annis duæ aliæ eius-
cemodi procellæ inciderunt, sed vltima inter
paucas memorabilis, totam insulam mirabi-
liter conterruit. Quippe omnibus fermè satis
stragem intulit, maximā partem ædificiorum
& torcularia saccarea euertit: armēta quoque
propè omnia & greges scædè interemit. Et iā
Hispani fame periclitabantur, ni Deus eorum
misertus naues ex Hispania opportunè addu-
xisset, quæ farinam, nauticos panes, & ceteros
commeatus abundè subucherent.

CETE-

CETERVM Almirans priore illo turbine fractas Celoces exemplo refici iubet, quū eius rei peritos artifices multos & omnis generis fabros haberet: mōxque vt illæ instauratæ sunt, ipse quā strage illa ventorum, quā Indorum clade stupefactus & confusus, vela in Hispaniam fecit. Quò quum secundo cursu peruenisset, è Calecio portu, per dispositos equos in Regiam profectus, Regi nouas ab se repertas terras exposuit, aurum & alia rara obtulit: & narratis quæ in Hispaniola acciderant, iudicia quoque & processus Hispanorū in quos legibus egerat, exhibuit: simul malignas obtrektorum in se calumnias & falso obiecta crimina diluens. Rex Columbi fide satis comperta, quòd tantum auri aduexerat, vt aliquot etiam palæ librales essent, deinde ex commentariis quæ attulerat actorum eius integritate spectata & probata, cum vltro consolatus gratias quoque pro tantis eius in se meritis atque officiis egit: monuit tamen vt in posterum, pœnarum acerbitate remissa, cum Hispanis, qui tam longinquas terras sui obsequij causa peterent, paulo mitius ageret.

Mox duodecim carauellas armari iubet, easque omni genere commeatus instructas Columbo ad nouam expeditionem attribuit. Ipse confestim duo ex ea classe nauigia ad Hispaniolam rectà tendere iubet, & vt fratrem suum adeant edicit. Illa quum prospero cursu eò peruenissent, fortè ad Occidentalem insulæ partem appulerunt, vbi tum agebat Roldanus quidam Ximenez: quem ex vili & ob-

*Seditionū
& civilium
bellorum
in Hispania
violenta.*

scura persona Iuridicalem prætorem designatum, Columbus extulerat. Sed is tum multis Hispanis in partes tractis, secessionem fecerat: quum arrogantia contumaci Præfecti imperium exuisset, quo licentius omnibus legum frans solutus latrocinia & quælibet flagitia per Insulâ exerceret: quod Præfectus pati non sustinisset. Is appulsis eo ubi tum casu erat duobus illis nauigiis, Hispanos qui in iis erant conuenit, sollicitat, & Insularium opes obuias paratasque ostentans, docet, si secum facere vellent, liberrimè omnia barbarorum mapalia peruagaturos, atque inde, nullo impediēte, egesto auro ac rerum preciosissimis breui ditissimos euasuros. Qua spe labefactatos facilè impellit ut omnem fortunæ ac rerum suarum sortem cum eo miscere vellent. In primis ergo commeatu quem naues attulerant, auidius ipse ac ceteri se explent; inde prædabundo agmine insulam peruagantes, promiscua licentia spoliare, verberare, occidere; denique nullum genus sceleris, libidinis, auaritiæ, in indigenas prætermittere.

CACICVS quidam, Garionexius nomine, quum ditionem suam omni belli clade à Christianis vri & res suas suorumque ante oculos suos ferri agique videret, iunctis cum alio Cacico (Marabonesum vocabant) viribus, defendere se ab eorum iniuriis & latrociniiis statuit. Itaque sæpe cum Indorum manu, quos in societatem adsciuerat, è montibus in plana degressus, ubi Hispani statiuam habebant, quoscunque ex iis capere poterant ipse ac socii

barba-

barbara rabie excarnificantes frustillatim discerpebant.



*Columbus tertio in Indiam nauigat. Cubaguam insulam
Vnionum detegit. Frustra Hispanorum seditiones
componere laborat. Indos per-
duelles domat.*

CAP. XI.

DV M hi tumultus in Hispaniola agitan-
tur, Almirans è portu S. Lucari soluēs *Columbā
tertiā in
Indiam
expeditio.*
cum reliqua classe, anno M. CCCC.
xcviii. vigesima octaua Maij, cursum in Ma-
deram direxit. Ea vna est ex septem Lusitano-
rum insulis quas illi Azorias appellant. Illac
autem nauigare multò tutius duxit, tum quia
belli id tempus erat, tum maximè propter pi-
ratas Gallos, qui iam fama Indicarum opum
exciti, prædandi spe maria illa infestabant. In-
de præmissis recto cursu ad Hispaniolam sex
carauellis, ipse tribus reliquis versus Caput-
vide seu Gorgades insulas deflectens, propius
Æquinoctialē lineam iter suum direxit, & in
ea nauigatione multis malis conflictatus est,
tū ob maris malacias, tū ob immodicos ardo-
res, quos mēse Iunio media æstas intenderat.
Vix tandem quum Indiā attigisset, finum Pa-
riensem ingressus in Cubaguam appulit, quā *Cubagua,
insula
Vnionum.*
ipse Perlaram insulam nuncupauit. Cuius no-
minis origo hæc fuit. Almirans quum eum
finum nauibus percurreret, fortè quibus-
dam Indis qui è lentre piscarentur conspectis,

è nautis suis aliquot scapha propius ad eos accedere iubet, & sciscitari quinam ij homines essent, & quâs terras incolerent. Nautæ raptim lintrem assequuti & in eum transgressi, Indis sese adiungunt: atque illi nil conspectu tunc primùm à se visorū hominum conterriti, eos etiam, vt pulcros viros, summa cū voluptate aspectabant. Hispani ostreas in piscatorio illo lintre conspiciunt: quas, eduleis esse rati, quum aperuissent, plenas vnionibus reperiunt, vnde maior illis lætitia orta est. Peruenerant ad littus: ibi in terram egressi, mulieres Indicas vniones pulcerrimos collo & brachiis gestantes conspiciunt: & illos quidem ei genti adeò viles, vt in vulgaribus & quotidianis feminarum ornamentis simpliciter haberent. Siquidem pro catino fictili, & & eo quidem fracto, quem nauta Hispanus Indicæ mulieri dedit, ea illum contrà quatuor margaritarum fertis seu lineis munerata est. Ille munere lætus & diues ad naues redijt, omnibus vniones suos ostentans. Qua ex re incredibili voluptate affectus Almirans, clara voce ceteras naues circumuehitur, & socios affatus: Nos, inquit, ad ditissimam mundi oram appulimus.

INDE propius terræ succedens, Cumanæ fluminis ostium inuectus est. Indigenæ quum viderent carauellas, tantæ molis opera & tam affabrè facta, deinde barbatorum hominum inusitatam speciem demirantes, inter se vulgò dicebant: Quinam aut vnde sunt isti homines? Supernè, an ex aqua? Mox quibuscumque sciebant

bant aut poterant nutibus ac signis, per legatos ab Admirante contendunt vt in ea litora egressus, cum ipsorum Cacico congredi velit & sui copiam faciat: quippe illum eius videnti ac cognoscendi auidum esse. His auditis Columbus, etsi omnia beneuolentiæ signa atque indicia præ se ferrent, doli tamen aliquid subesse suspicatus, in terram egredi metuebat. Id postquamprehenderunt Indi, multi eorum carauellas ingressi, Admirantis potestati semetipsos vltro permiserunt, puram omnino ac sinceram amicitiam demonstrantes: neque nauigia tātum ipsa, velut diuinæ potius quam humanæ artis opera, intuebantur: sed ad omnia armamenta, ancoras, vela, ancoralia, & singula nauium instrumenta, defixis præ admiratione animis obstupefcebant.

ALMIRANS verò ipsos postquam omni comitate excepisset, abeuntes quoque cultellis, speculis, & tintinnabulis, cæterisque eiusmodi minimi precij rebus muneratus, quā accuratissimè potuit sciscitando exsequutus est, vndenam hæc baccarum & margaritarum decora peterent. Illi oram maritimam quæ Cubaguam spectaret signis indicabant, ibi se conchas vnionum feraces piscari. Itaque Almirans Hispanos aliquot egredi in terram iubet: eos Cacicus domum suam inuitatos vino, epulisque more patrio apparatus, quamquam spurcis, hilariter excipit: quūque ab illis vniones expeti intelligeret, dat magna copia, vt qui illis abundaret, nec pluris ea faceret quàm apud nos fiunt globuli illi vitrei, quos preca-

torios votant. Hispani tantis diuitiis expleti, ad naves redeunt: Almirans mirifice eo commercio contentus inde soluit, & Veli-caput circumuectus, mox traiecto mari breui in Hispaniolam appulit, vbi magnos motus & seditionum turbas inuenit.

*Columbus
frustra se-
ditiones
ab Hispa-
niis excita-
tas compo-
nere niti-
tur.*

IPSE vt omnia componeret, scriptis ad Roldanum Ximenem secessionis autorem literis, monet hominem vt sub imperium præfecti volens redeat, neu delinquere pergat & prauis exemplis Indos ipsos auertere. Quippe nõ his factis neq. ea via sperandum esse vt illi ad fidem nostram adduci possent: neque amplissimam illam Alexandri VI. pontificis bullã quæ Regibus Catholicis ditioni suæ adiicere eas terras permiserit, eò spectare vt nouæ illæ gentes indignis modis habeantur: imò potius vt benignitate & honestis exemplis alliciantur ad amplectendam sanctam fidem Christi seruatoris & redemptoris nostri.

*Calumniæ
Roldani in
Columbos
fratres.*

HÆC Almirantis monita & preces aspernatus Roldanus, sectæ caput ac principem se gerere perseuerauit: mox etiam Bartholomæi Insulæ præfecti actiones apud Regem per literas criminatus est, sæuitiam ei & tyrânicum imperium obiectans, qui videlicet minimis & leuissimis de causis homines in patibulum ageret: imò præfectos omnes illos suos, ambiciosos & superbos esse: neq. se ab illis secessionem fecisse, nisi postquam eos tyrânnos, sæuos, & sanguinis humani auidos expertus esset. Postremò Regem quoque ipsum tandem aliquando re ipsa cogniturum, suæ Maiestatis

&

& dignitatis inimicum esse Almirantē, idque vnum moliri vt Insularum imperium occupet. Et iam aurifodinis solos eius familiares & clientes præesse: ceteris omnibus obseptū esse & clausum earum aditum. Iudicia ipsa pro libidine & gratia, non iure & æquitate, ab iis exerceri. Ad hæc Almirantem quoque de reperta Vnionum insula Regem quantum in se esset, celasse, vt clandestina præda solus ipse frueretur, & circumuento per pactum aliquod Rege, ditissimam illam insulam sibi vni seponeret.

ALMIRANS quoque ipse contrà litteras ad Regem componens, pessimam sceleratorum istorum & flagitiosorum hominum mentem & vitam exponit. Quippe istis nihil prorsus pensi esse, nisi vt quotidianis latrociniis, feminarum stupris & omni scelerum genere, libidinem, sæuitiam & avaritiam expleant: perduellionis quoque ac prodicionis reos, omni Dei metu ac pudore posito, per omnem insulam latronū instar vagari. Postremò duas carauellas quæ ad fratrem suum Bartholomæum ex Hispania missæ essent, cum omni commeatu, auertisse, ac pellectis in suam societatem nauium illarum hominibus, rapiendo & infanda omnia perpetrando certare. Ac tam fœdis facinoribus commotos multos Insulæ Regulos cum maximo omnium damno defecisse, eosq. etiamnum pro commissis pœnas metuentes, si sub imperium redirent, pergere in insania & solutos iugo viuere.

DVM hæc vtrinq. crimina & accusationes in Hispaniam mittuntur, Almirans fratrem

*Columbus
Indos per-
duelles, &
sub impe-
rium rede-
unt, cle-
menter
tractat.*

cum octoginta Hispanis, in ijs equitibus aliquot, mittit aduersus Cacicos perduelles. Illi sex millia armatorum & amplius in acie habebat: sed vbi ad manus ventum est, violēto equorum impetu conterriti, & fusi, in densissimas siluas se abdiderunt. Pugnatum deinde est aliquoties cum Garionexio & quatuor aliis Cacicis: sed breui profligatis omnibus eorum copiis, Cacici montes fuga petunt: mox tamē capti omnes in Almirantis potestatem venerunt. Porro quum promitterent se amicitiam ipsius colentes sub Hispaniæ regis imperio futuros, tum vt clementiam erga eos suam commendaret, tum ne iniuriarum quas ab Hispanis accepissent, autorem ipsum fuisse existimarent, benignè illos in fidem & gratiam recepit, & rebus nostris donatos, in ditionem quemque suam remisit.



¶ Columbus inimicorum calumnijs honore deijcitur. Bombadilla ei succedit. Hic in Hispaniam reuertens, coorta tempestate, cum multo auro mergitur.

CAP. XII.



VVM toti in eo essent Almirans & eius frater vt Regulos & rebelles populos in Regis fidem reducerent, eodem tempore litteræ tum ipsius Almirantis, tum Roldani in Hispaniam perueniunt: quæ res non mediocri dolore Regem

ac Reginam affecit, quum res Hispaniolæ adeo turbatas & miserum insulæ statum intelligerēt. Iam in Aula sparsus rumor auri inter nobiles, & vulgatæ opes quas ingenti copia flumina ipsa vltro funderent, omnes auaritia incenderant. Nemo erat ex ipsis quin talem Præfecturam obtinere ardentissimè appeteret: nemini tamen ad id petendum satis audētiae erat, propter ingentem opinionem quam de Almirante Rex & Regina habebant. Itaq. alia via grassari, & optata ad eum finem cui inhiabant, perducere instituunt. Ergo isti Nobiles per omnem Aulam spargunt Columbum & eius fratrem, iam partis opibus quæ priuatum modum excederent, Insulas vsurpare velle, & nuper repertæ orę omnis principatum inuadere. Idq. non obscuris manare indiciiis, quantum ex multorum & quidem dignorum fide hominum litteris colligi posset: tum videlicet ex ipsa auri effodiendi ratione, tum quòd ex eo pauculum in Hispaniam mitterent. Adhæc, quod multò peius esset, quum Hispanos paulatim specioso prætextu alium alia de causa tollerent, quorsum id spectare, nisi vt iis de medio amotis, soli sine arbitris destinata sua facilius perficerent? Hæc & similia frequentibus susurris ac rumoribus per Aulam adeo increbruerūt, vt ad aures vsque Regis ac Reginae deferrentur: nec deerant inter ea æmuli qui hæc occultis flabellis in Regum animis accenderent, quo grauior criminantium esset autoritas.

Rex ipse, ne quæ ad status sui detrimen-

*Hispani
nobiles Co
lumbo inua
dentes, non
vera virtute
sed astu
& calum
nijs in eum
grassantur*

tum spectarent, lentius accipere videretur, totius rei veritatem cognoscere & Prætorem eò mittere instituit, qui quæreretur cur tātum auri allatum non esset quantum se missurum promississet Almirans. Cuius profectò intermissæ pensionis non alia causa erat, quàm quòd inter domesticas discordias, & sociorum defectiones atque inde exorta bella, aurum effodi non potuerat.

Bombadilla sua potestate aduersus Columbum fædè atque impotenter abutitur.

HIS ita constitutis, Rex nouo Insulæ præfecto Francisco Bombadilla designato, quæstionem de intestinis discidiis decernit, & de causis discordiarum Columbi & Roldani cognoscere iussum, amplaque autoritate & potestate imperii instructum mittit. Is cum hac commissione & mandato Regio è Calicio portu anno M. CCCC. XCIX. quatuor carauellarum classe instructa soluens, in Hispaniolā traiecit. Almirans & Bartholomæus frater, noui Præfecti appulsu audito, ad eum honorificè excipiendum, vt regio missu venientem, reuerenter obuiam egressi sunt. In portum vt peruenerant rati, vt sibi, sic aliis sincerum animum esse, pro amica complexus ac salutationis vice, capti fratres in vincula traduntur. Mox iniectæ utrique catenæ, & sciuncti alter ab altero, quò grauius dolerent, duabus Carauellis in Hispaniam mittuntur. Miserabilis equidem casus, ac mutationis rerum humanarum exemplum memorabile: eum qui paulo antè in maximo honoris fastigio fuisset apud potentissimum Regem, propter repertas illi propria virtute & excelso ingenio adeo no-

uas

uas & diuites terras:cui,si Græcorum aut Romanorum veterum tempore vixisset, aut alterius cuiuslibet liberalis & munificæ gentis, meritò statua fuisset erecta,ac fortè, vt numini,templum & diuini honores decreti essent. Eum (inquam) nunc malignitate atque inuidia hominum afflictum & vinctum adduci: cuique ob tanta in Regem merita vllà satis digna gratia reddi nequibat,eum tam atroci iniuria affici vt nullo nouo beneficio expiari posset. Simulac celoces in Hispaniam peruen-
nerunt, & nunciatum Regi tam claros viros compedibus vinctos adedò fœdo ac miserabili habitu adduci, motus in misericordiam Rex cursore Calicium missio, emitti illos è custodia & leuari vinculis iubet: deinde splendido comitatu cultúq.vt talibus viris dignū erat,in conspectum suum venire. Vt in Regiam peruen-
erunt, comiter excepti & auditi sunt: ac quum ibi obtinuisset veritas, pœnæ in noxios decretæ.

*Regis Hisp.
pudor in-
gratitudi-
nem Hispa-
norū dam-
nat.*

POST QVAM gubernator nouus Bombadilla Columbos captiuos in Hispaniam miserat, Roldanus cum aliis secessionis focis sub imperium rediit. Ibi tum rursus omnes vno consensu miseros insulares in aurifodinis demergere & inmodico labore vexare: quibus videlicet nihil pensi erat, nisi vt horrendam illam auri famem quammaximè exple-
rent & ingurgitarent. Dum ea geruntur, Rex Ferdinandus, cui hæc dudum animo cura infederat, qua maximè ratione res Hispaniolæ Insulæ turbatas, necdum bene sedatas, pace

*Avaritia
semper crū-
delis.*

& iustitia componeret:abrogato Bombadillę
*"Ouantū
alij vocant* imperio,Nicolaum"Olandam Proregis titulo
 & autoritate,eò mittit.Is è portu S.Lucari sol
*Bomba-
dilla pro-
uincia de-
cedit.* uens triginta nauium, partim liburnicarum,
 partim celocium,classe, quadragesimo demū
 die Insulę applicat. Bombadilla vbi maiorē
 potestatem & successorem adeo potentem su
 peruenisse videt, decedere illico prouincia,&
 iisdem illis nauibus quas Prorex adduxerat re
 gredi in Hispaniam, statuit. Ergo, imposito
 multo in naues auro, quod amplius centum
 quinquaginta milliū ducatorum pretium æ-
 quaret: ac multos præterea rudis auri grumos
 in iis vnum inusitatę magnitudinis,& ponde-
 ris trium millium ducatorum, quem Reginę
 seposuerat, secum referens,vela in Hispaniam
 fecit.Eum sequuti sunt Roldanus Ximenez &
 alij aliquot militares duces,cum amplius qua-
 dringētis Hispanis, qui omnes auro graues &
 locupletes cum eo soluere. Hic animad-
 uertere operæpretium est,quantum vindican-
*Iusta Dei
vindicta
in auaros
& crude-
les.* dis hominum sceleribus Dei iustitia polleat,
 ac seriò cogitare omnes thesauros ac diuitias
 nostras,in quibus tantoperè spem ac fiduciã
 nostram defigimus, somnia prorsus vana atq;
 vmbas inanes esse. Ecce atrox in mari tem-
 pestas coorta rapit disiecitq; classem: viginti-
 quatuor fractę naues & fluctibus ita haustę
 sunt, vt nemo in terram enauerit: demersus
 Bombadilla, demersus Roldanus, & maxima
 pars Hispanorum periire: ipsorum quoque
 manubias & thesauros,ac sepositum Regi Re-
 ginęque aurum mare absorpsit:postremo iur-
 gia

gia, lites, & querelæ eorū, quemcumq. exitum habituræ essent, maturè ibi finem inuenere. Insulares Indi, quum naufragium Roldani & aliorum Hispanorum à quibus in eruendo auro durissimè vexati erāt, pro certo accepissent, lætari & hilarescere, vulgò inter se dicentes: Enimuero isti quidem nos deinceps in aurifodinis non detinebunt, neque in tantis ærumnis, quantis solebamus, trahere animam cogent.



Alphonſi Ninni in Indiam Occid. nauigatio. Quam primò fuerit Indicarum gentium de Hispanis opinio. Hispani ſe Chriſtianos & filios Dei eſſe apud Indos vendunt, ſed mox longe aliud reiſſa & factis ſe eſſe produnt.

CAP. XIII.



AM multis Hispaniæ locis de vnionum diuitiis, ab Almirante in Cuba & Cumana repertis, rumor late manauerat: & ea res multorum animos ea viſere cupientium commouerat. Id vbi cognitum Regi, expreſſo ipſe edicto, grauius pœnis conſtitutis, vetuit ne quis nauium magiſter nauclerūſve ꝛc. millia propius (id eſt l. leucas) oras à Columbo repertas, abſq. ſuo permiſſu, nauibus accederet: liberam tamen interea poteſtatē omnibus faciens, quacumque alias terras & Inſulas nondum cognitæ pro arbitrio quærendi.

Edictum regium.

ERGO per eos dies Alphonſus Ninnus, nauē vnā cum triginta quatuor Hispanis, eo conſilio vela in altū dedit. Inter eos Hispanos for-

Alphonſi Ninni nauigatio.

te nonnulli Almiranti adfuerant, quum Cubaguan reperisset. itaq. vt Indiam attigerunt, neglecto Regis mandato, diuitiarum cupidine Pariensem inuecti sinum, Cumanæ, Amaraapanæ & omnem eius tractus oram iam ab Almirante repertam legere instituunt. Ibi etiam Alphonsus cum sociis in terrâ egressus ab ea gente comiter exceptus est: mox inito quoque commercio, quum merces magna vnionum copia permutasset, diues in Hispaniâ regreditur: sed in itinere de vnionum partitione lis inter ducem & milites exorta est. Hispaniam verò vt videre, Hispalis portum fugientes, ne constituta à rege pœna plecterentur, quòd oras à Columbo repertas tentassent, nauē in Galleciâ dirigunt. Attamen simulac in litus exiere, nauales socii aliquot eius prouinciæ Præfectum adeunt, Alphonsum insimulant, nec tantum spreto Regis edicto litora ab Almirante reperta circumuectum referunt, sed peculatus quoq. criminibus vrgent, quòd fraudata Regis quinta, ingentem margaritarū vim interuertisset. Præfectus corripit hominem & custodia claudi iubet: ac tandem, vbi in carcere maximam vnionum suorum partem consumsisset, vinctum cum ad Ferdinandum Regem mittit.

Varia Indorum de peregrina gente opinioniones.

ANTE QVAM vltrà progrediar, age hîc plenè exponere mihi libet, quænam esset eorum gentium de Christianis opinio, vbi primum eos nouis illis terris appulso videre. In primis ergo tenendum est, vbi principîò Hispani in Indiam nauigantes ad eas prouincias

ac præsertim nouæ continentis oram appu-
lerunt, quâ septentrionali Oceano alluitur,
Indos, quum ad eos velut simulacra versi de-
fixis præ admiratione animis starent, vulgò
dicere inter se consueuisse: Vnde aut quibus è
terris gens ista barbata venit? Mox quum en-
ses, vestis & cultus speciem, inde nauigia ipsa,
vela, rudentes, ancoras & cetera nauium arma-
menta, intuerentur, tum planè obstupesci,
postquâ inusitatam rerum speciẽ iterum atq.
iterũ fixis oculis contemplando hausissent, de
illis pro se quisq. alius aliter iudiciũ ferebant.
Nõnulli dicebant tẽpestate aliqua eò fuisse e-
iectos: alij qui bombardarum fragorẽ audiis-
sent, cientem tonitrua in nubibus gentem è
cælo in terras descendisse credebant: alij deni-
que obthurato ore incerti & cõfusi restabāt,
quum de tam nouo hominum genere nihil
affirmare haberent. Quos quidem plerisque
locis æquis oculis indigenæ, velut rem nouam
intuebantur: alij contrà haud fatis libenter
excipiebant, quum ex ipso vultu gentem a-
speram & ferocem esse coniectantes, amicitia
eorum detrimento sibi potius quàm emolu-
mento futuram iudicarent. Itaque sæpenu-
merò vt appulsi & in litus egressi erant, eorũ
locorum accollæ sagittis obuios configebant,
faxis etiam eos & missilibus violenter sum-
mouentes, naues repetere trepida fuga com-
pellebant. At in eas oras quum incidissent
Hispani, vbi aduentus & conspectus eorum
indigenis gratus esset, summissi & supplices
vltro Reguli obuiam illis ad fineis exhibant.

*Barbari ho-
spitales Hi-
spanorum
auaritiā
imitant.* rogabántq. per signa vt suas terras libentes in-
nire vellēt: nemo illic erat qui eos hospitali-
ter in mapalia sua inuitatos appositis epulis
summa cum lætitia nō exciperet. Hispani ve-
rō cōiectis in vniones oculis quos Indi vulgò
brachiis & collo gestabāt, protinus cōcupisce-
re & occulta cura incēdi quomodo iis potirē-
tur: quūmq. præterea Indis nares baccis onu-
stas, cranis, smaragdis, & auro cernerent, pete-
re tandem vltro audebant: & illi simplices ac
parum astuti homines, quum & illa vilia ha-
berent, libenter omnibus & magna copia
dabant.

*Splendida
verba, si
res & fa-
cta respon-
dissent.* D v M hæc amica commercia & congressus
vtrinq. agitantur, alij alios, vt poterant, per
signa & nutus variis de rebus percontabātur.
Indi scire volebant, vnde venirent Hispani,
& qua gente orti essent. Illi adhuc ita respon-
debant, Se Christianos esse, filios Dei creato-
ris cœli & terræ: in eas oras missos à summo
viro Castellæ Rege & à Papa cælestis serua-
toris vicario, vt res magnas & consolationis
plenas per orbem terrarum vulgarent: ac bre-
ui vnde venissent, reuersuros. Indi quum di-
ctis eorum fidē haberēt, & reuera ita esse cre-
derent, rati se eorum aspectu vltius nō frui-
turos, ad eorum spectaculū multi quotidie cō-
currebant, & qui eos cōtingere & aliquo mu-
nere donare poterant, felices se existima-
bant. Mox verò Indi, vt digressis illis, venire
alios, & iam ædificia moliri, commorari in
suis finibus, & infanda in se ac suos facinora &
cōtumelias edere, aurum, vniones & gemmas
infa-

*Indi de ar-
bore ex fru-
ctibus indi-
cū faciunt*

infatiabiliter flagitâtes, viderūt: tū demū queri & dicere inter se: Hæc facta verbis non respondere. quippe illos se filios Dei vocasse: sed apparere haud dubiè illis alium, & quidem malum, dominum ac principem esse: quando ab illis ipsius mandatu & priuarentur libertate, & in seruitutem redigerentur, & interficerentur: neque hæc esse opera eorum qui è cælis descendissent. Postremò non veros & bonos Dei filios esse, qui accepto beneficio maleficio redderent. Illos quidem bonis & commodis verbis vti, sed facinora fœda perpetrare.

ERANT etiam inter eos qui dicerent: *Nomē Dei blasphemat inter gentes, propter Hispanos.*
Qualis, malum, Deus iste est, qui tam impuros ex se filios & sceleratos homines progenit? Si pater quidem ille filiorum similis est, minimè bonum eum esse oportet. Hæc & similia vulgò inter se colloquentes iactabant.

EQUIDEM si Hispani vbi primum eas terras attigerunt, perinde vt crudelitate & auaritia grassati sunt, sic iam inde ab initio benignitate & clementia earum gentium animos sibi conciliaissent, atque eodem tenore perseuerassent in iisdem exemplis: haud profectò dubitauerim futurum fuisse vt agreste illud hominum genus non tantum cum ratione viuere disceret: sed etiam virtutis atque honoris studio, & Christiani nominis vtilitati animum adiungeret: neque sequenti tempore inde tot Hispanorum clades, nec tantæ Indicarum gentium vastitates accidissent, quantas postea memorabimus: sed vt nunc implacabili

Homines non vi malo, vt feræ, sed beneficia domandi sunt.

odio alij ab aliis dissident, ita socialem inter se cum mutua reuerentia amicitiam colerent.



¶ Quarta Columbi in Indiam navigatio. Veraguam & Vrabam Indicæ continentis prouincias detegit, Hispanos rebelles prelio vincit. In Hispaniam reuersus moritur, Posteritas eius.

CAP. XIII.



Vnc ad Almirantem Columbum reuertimur. Is tres annos in Regia mansit, Regi ipsi acceptissimus, & in præcipuo honore habitus. Tandem triennio exacto, Rex ipsius supplicatu atque arbitrio quatuor Celoces instruit, eumque nouas alias terras vestigatum remittit, & fretum aliquod peruium, quod ad mare Australe pertineret. Id postea à Magellane quodam Portugallo repertum, Magellanicum dictum est. Itaque è Calicio portu soluens nona die Maij M. D. II II. cum fratre suo, breui in Hispaniolam appulit. Memorant nonnulli eum à Bombadilla portus aditu prohibitum esse, & ea iniuria non mediocriter offensum Columbum dixisse: Falli Præfectum, si eum à Colonia ab se conditæ ingressu arcendo, gratum Regi obsequium præstare se existimaret.

*Columbi
quarta na-
uigatio.*

Alii portum eum intrasse referunt. Vtrumque ea se res habeat, cursum in Occidentem dirigens, Guanaxiam insulam vicinam continenti reperit, ingenti prouinciæ quæ ab indigenis Iguera, ab Hispanis Caput-Fondurense,

*Guanaxia
insula.*

rense, dicitur. Ibi exscensu facto, benignè à Regulis exceptus est: multæ ei gallinæ patriæ, panes & fructus oblati: nullū tamen ibi auri specimen aut indicium reperit, quamquā inuentis fodinis ditissimis, quarum nullā indigenis cura aut pretium erat. Almirans eos solitis minimi precij mercibus remuneratus, flexis retrò in Ortum proris, oram sequēs Veraguam reperit, & applicatis ad insulas Zorobari nauibus, haud procul continenti, ex Insularibus cognoscit, omnem eam Veraguæ prouinciam abundare auro. Inde præteruēctus & litora legens vsque ad sinum Vrabæ peruenit: vbi in terram egressus, aliquot locis Australis Oceani notitiam habuit.

D v m hæc noua litora perlustrat, duas carauellas amisit: duæ supererant, multam & ipsæ aquam accipientes. itaque inde retrò abeundi signum dat. Regressus primò Cubam insulam, mox Iamaicam, tenuit, amissis aliquot Hispanis, quos ærumnæ & labores absumferant. reliquis etiam ferè omnibus ægris. Ibi Franciscus Poresius vnus carauellæ prætor, cum fratre, & maxima militum pars, cōmota in eum seditione & contractis aliquot Indorum lintribus, in Hispaniolam profugiunt. Insulares quum Christianos inter se discordes, & de toto exercitu quod roboris esset à Poresio abductū scirent, ceteros qui cū Almirāte māsissent propè omnes ægros & imbecilles esse: non solum cōmeatus iis suppeditare nolle, sed de ipsis quoq. interimendis cōsilia inter se inibant.

*Hispani in
Columbum
rebellant.*

ALMIRANS ob hæc ingēti animi ægritu-

*Columbus
astuto con-
silio com-
meatus à
Barbaris
impetrat.*

dine anxius, quum hinc Indos nec gratia, nec prece, nec precio vlllo adduci posse videret vt cibaria exercitui præberēt, nec armis ab se cogi propter infirmitatē suorū: alia via idem aggredi statuit. Atq. id cælesti quodam instinctu ei venisse in mentem, libēs equidem crediderim, prouidente videlicet Deo ne tantus vir fame interiret. Id porro ita factum est. Fortè in propinquo tugurium barbarorum erat: inde Columbus Indos foras euocans, monet ac prænunciat, ipsos, ni vitæ subsidia sibi ac suis suppeditarent, peste à Deo cælitus missa breui omnes perituros: Cuius rei id habituros signi, quòd duos intra dies Lunam sanguine fœdatam visuri essent. Id quum eadem die & hora qua Almirans prædixerat cōspicarentur Indi, (Lunæ autem defectus is erat) subito victi formidine, quæcumque ei ad victum necessaria fuerunt, quoad in ea Insula mansit, benignè præbuere, insuper veniam culpæ orantes, neu ipsis irasci pergeret. Ipse egros socios pau pere illo & misero victu, vt potuit, recreauit.

*Columbus
Hispanos
seditiosos
vincit.*

INTER hæc Franciscus Poresius, quum tam exiguis lintribus impetum maris eluctari & traicere frustra tentasset, in Insulam regressus est, rapturus alteram ex carauellis Almirantis, si facultas daretur, vt si qua noua ope posset in Hispaniolam transfugeret: sed vt portum attigit, vtramque depressam & mersam aqua reperit. Almirans audito eius aduentu, suos cum fratre in aciem educit: ventum est ad manus: cadunt nonnulli, multi vtrimque faucij: Franciscus Poresius cum fratre cāpitur.

tur. Hæc prima pugna inter Hispanos in India commissa est.

E A victoria auctus Almirans, quum nullæ ipsi naues superessent quibus inde solueret, postquam in ea Insula menses aliquot moratus, nulla ope, nisi contracta aliqua ex Hispaniola naue, abire se posse vidit: Didacum Mendez, œconomum suum & decem cum eo Indos lintre vno piscatorio mittit, è monoxylis illis quibus indigenæ uti solent. Ipse insulares illos spe ingentium præmiorum onerat, si Didacum incolumem eò perducerent: illi abeunt, & quò securitati consulerent periti locorum homines, circa scopulorum crepidines nauigium agendo notis sibi vadis traiciunt. Quippe pusilli illi lintres, nisi summa tranquillitate, alto prouehi nequeunt, & vel minimum verberati fluctibus facillimè subuertuntur. Ergo agrè emenso mari Indi, ex Hispaniola extemplo Iamaicam repetunt, & peruectum à se atque expositum Didacum Almiranti renunciant: ipsum pedestri itinere Dominicam petere. Almirans eo admodum lætus, multas illis gratias agit, & cultellis, crotalis & crepitaculis donatos dimittit. Illi, perinde hilares ut si ingens aliquod munus accepissent, domum abeunt.

DIDACVS Mendez, ubi in Dominicam peruenit, ^aCommendatario maiori litteras ab Almirante reddidit. Ille carauellam vnā ad eum reuehendū instrui iubet. Mendez pecunia Almirantis alteram comparat: mox ambas onustas comœatu in Iamaicam traducit.

^a Nicolæ
Onando sc.
Hispanio-
le tū Præ-
fecto.

Vbi cæ appulerāt, Almirās conscēsa nauī breui in Dominicam transuectus est. Mox paucorum inde dierum quiete sumta, quæ primæ naues soluerunt, iis cum fratre in Hispaniam traiecit, & Regi successum itineris sui & quæ nouæ ab se repertæ essent terræ, non sine admiratione totius aulæ regiæ, exposuit.

Christ. Columbus obiit, & posteritas.

SED paucis post hæc diebus, Columbus, fesso ægróque tot itinerum laboribus corpore, in morbum incidit, neque multo post, grauescente in dies eius valitudine, extinguitur. Quū ita honoratæ vitæ suæ cursum clausisset, octaua die Maij, anno M. D. V I, corpus eius, vt testamento cauerat, Hispalim delatum, in cœnobio Fratrum Certosinorum humatum est. Filiam reliquit, Didacum Columbū, qui nobilissimam feminam, Mariam, filiam Ferdinandi de Toletō, magni Commendatarij Legionensis, habere in matrimonio singulari virtute meruit. Ortus est Almirantis Columbus Cucureo Genuensis ciuitatis municipio: maiores eius oriundi Placentia erant Liguriæ vrbe, nobili stirpe Pilistrellorum: ipse prima iuuenta nauiculariam artem exercuit. Iusta statura homo, firma & habili membrorum compage, iudicio sano, ingenio excelso præditus, læto & ingenuo vultu fuit. Acres illi & vigentes oculi, subflaua cæsaries, os paulo patientius: in primis iustitiæ studiosus erat: iracundiæ tamen pronus, si quando commoueretur.



¶ *Monachi & sacerdotes in Indiam Occid. transgressi cœnobia
exstruunt. A Barbaris trucidantur. Didacus Ocampus
trib. mil. Barbaros dolo circumuentos, sup-
plicij coercet. Toletum colonia.*

CAP. XV.

FERDINANDVS rex (sicut antè
retuli) quo tempore ab Almirante
Insula Margaritarum reperta est, e-
dicto prohibuerat nequis propius
terras à Columbo repertas cc. millia pass.
(id est leucas L.) naueis admoueret: sed quum
in edictis atque imperiis suis parum momenti
esse intelligeret, & quotidie multos concur-
rere: Quæstores & procuratores suos eò mit-
tit, qui vectigalia regia colligerent. Hinc pis-
cationis vnionum initium ductum est.

Eo tempore Monachi aliquot vt Indos
Christiana fide imbuerēt, in Indiæ continentē
transgressi, quò etiam multi Hispani permu-
tandarū cum Indis merciū causa cōmeauerāt,
cœnobia ibidem exstruxerunt. Sed Indi, iam
rum Hispanorum commercia & dura imperia
pertæsi, à quibus nimirū violēter correpti fu-
stibus & plagis assiduis ad piscandos vniones
adigerētur, indignas cōtumelias & vim vi ar-
cere statuūt. Itaq. manè cuiusdam diei prima
aurora in Hispanos irruunt, & eorū cruentam
stragē faciūt: mox cum tripudiis & saltatu nō
laicos tantum (vt vocant) sed Ecclesiasticos
ipso & Fratres mādunt. Ex iis tamen aliquot,
quum celocis ope quæ ad Cumanæ fluminis

*Indi nec
Hispanorū
tyrannidē
ferunt,
nec pro
pastoribus
lupos.*

ripam deligata stabat, perniciem effugissent, Dominicam contendunt, & Bartholomæo insulæ Præfecto Cumanensium rebellionem enunciant. Ille trecentorum militum confestim manu scripta, Didacum Ocampum ducem illis præficit.

*Hispanicū
strategie-
ma.* HIC cum suis è Dominicæ portu soluens, breui in Cumanam peruenit, & ad pelliciendo in naues Barbaros tali arte vsus est: suos omnes, exceptis sociis naualibus, in aluum natis conditos sub tabulatis delitescere iubet: vt Indi, quum tam pauci Hispani apparerent, promptius subirent nauim, & persuasum haberent ipsos ex Hispania, non ex Dominica, venire. Indi, conspecta naue, ad ripam fluminis obuiam effusi, Hispanos interrogant vnde venirent. Illi se è Castella venire respondent: simul signis eos accedere ad nauim inuitant. Indis etsi tota res suspecta esset, & Hispanos ex Hayti (id est Hispaniola) venire contenderent, nonnulli tamen eorum vt se eo errore exsoluerēt, haud dubij ex propinquo facillimè cognosci posse vtrum ex Hispania an aliunde venirent, nauim vltro subeunt, margaritas ferentes per simulationem cōmercij. Ibi Christianorum ab istis paucitas cōspecta errorem fecit. itaque quum iam pro certo haberent, venire illos ex Hispania, non ex Hayti, neque ad eos peruenisse famam suæ rebellionis, ac istis se perinde vsuros vt aliis vsi essent, sibi pollicerentur, taciti secum ipsi gaudebant.

Dvx Hispanus subeuntes benignè excipit, fit permutatio vnionum inter eos: ille se eorum

eorum quæ accidissent quidquam rescisse cal-
lidè dissimulat: per signa etiam rogat vt, si
commercium cordi sit, plures vniones & ad
maritimos vsus cibaria & commeatus affe-
rant. Indi in litus regressi, paucos se in nauī
repperisse homines Cacico renuntiant: & o-
mnes facillimè à se interfici posse. Itaq. multo
plures quàm antea Indos nauē ingredi iubet:
iis negotiū dat vt quampaucissimos Christia-
nos in litus exire patiantur, quo facilius desti-
nata exsequerentur. Simul Hispanorum duci
renuncient, eius loci Regulum multos habe-
re vniones, quos cum illo permutare cupiat.
Cum his malè orsis & cœptis consiliis ad na-
uim regressi sunt. Hispanus dux quum præ-
dam opimam in cassibus, neque maturiorem
occasionem vltèrius expectandam esse duce-
ret, signum dat exeundi è latebris militibus:
illi improuiso exorti Indos partim incautos
capiunt, partim interficiunt: pauci in flumen
desilientes discrimen effugere: quotquòt ca-
ptiuos in potestate habuit dux, suspendi ad
navis antennam iussit, quò ceteris terrorem
incuteret, & his peractis in Cubaguam reuer-
sus est. Insulanorum eo spectaculo fracta fe-
rocia est, & attonitis animis hæserunt.

Mox verò Didacus in Cumanam reuer-
sus, milites in terram exponit, & omni sēuitiæ
genere grassatus, miseram illam gentem ac
prope deletā, vltro pacem petere cogit. Quæ
quum ab eo supplicantibus data esset, & fœ-
deris conditiones transactæ, Indi vigintiquin-
que casas è storeis paleisve ad ripam fluminis,

*Indi suis
manibus
compedes
sibi fabri-
cari cogunt.*

Toletum
colonia.

ipso iubente, suis ipsi manibus exstruunt. Id Toletum urbem vocat, vti iam antè dictū est. Inde quidem rursum frequentari Cubagua, & piscatio margaritarum instaurari cœpit.

INTER hæc appulsi cō octo fratres Dominicani, duo monasteria, vnum in Cumana, alterum in Maracapana, exstruunt. Mox inde Christianam fidem per eas gentes promulgatum ibant, Regulorum & primorum filios legere & scribere docētes. Ex eo Indi cū omnibus Hispanis amicè & pacatè viuere: sinere etiā illos passim, quò ferret animus, ire: adeo vt sine vllō metu per oram illam maritimam trecēta amplius millia passuum, aurū, vniones & alia quærentes, liberrimè vagarentur.



¶ Doct̃or quidam è sacerdote tribunus mil. factus, dum Indos piscandis vnionibus conuertere nititur, semet ipse & suos euertit. Iac. Castellio in Barbaros seuit. Lampugnani Mediolan. in piscatione vnionum naufragium fortunarum & vitæ facit.

CAP. XVI.

Doct̃or qui-
dam & sa-
cerdos ser-
uire simul
Deo ac Mā
monæ vo-
lens, infeli-
cem ince-
ptorū exi-
tum habet.



VM hæ in Cumana vicissitudines agitantur, Bartholomæus quidā de Casis, sacerdos idem & Doct̃or, quum fecunditate vnionum & piscatu nobilem Cubaguam esse accepisset, fertilitatis etiam earum terrarum & sequitiæ Hispanorum in eas gētes fama commotus, in Hispaniam trajicit, ad Regiam contendit. Hispaniæ regnorum heres, morte Ferdinandi Regis, tum erat princeps Carolus, qui postea Cæsar designatus Caroli Quinti

Quinti nomen asciuit. Eum adit sacerdos, docet nullū esse sceleris & auaritiæ genus quod Cumanę indigenę à militib. Hispanis passi nō essent. ac propterea illos, quotidianis iniuriis ad rebellandum coactos, rupta fide, quosunque Hispanos in suis terris reperissent, interfecisse. Itaque eius prouinciæ administratio- nem sibi dari postulat: quippe se, simulac eam attigisset, motus omnes breui compositurum: Indos verò etiā tam æquo & moderato imperio habiturū vt omnīū laudem mereri posset: sed in primis reditus regio aucturū, spōdere.

*Optat epi-
ppia bos,
piger optat
arare ca-
ballus.*

D O C T O R Lodoicus Zappata, & alij qui rerum Indicarum curæ præerant, quum eum hominem vanū, ineptū, & tanto incepto minimè parem, nulliūsq. famæ & autoritatis esse iudicarent, adhæc imperitū rerum, morūmq. illius gentis, tali eius proposito obnixè intercedebant. Verūm, ne quicquā contradicentib. tantis viris, Belgarum quorundam procerum & aliorum fauore subnixus, in primis comitis Nansouij, qui Cæsaris cubiculo præerat, quod petebat obtinuit: quòd Christianæ religionis zelum præ se ferret, audacter denunciās se, si quisquā alius, Indos tum ad Dei ipsius cultū, tum ad Regiæ maiestatis obsequium versurū, & vnionum vim magnam missurum in Hispaniam. Mox trecentos rusticos legit, qui piscandis vnionibus operam darent, ne Indos fatigari opus esset: adhæc, quò libentius eam expeditionē susciperēt, Regiæ maiestati supplicat vt eos Equestribus armis atque insignibus in primis Cruce rubra, decoret, qualis equitū

Calatrauæ ordinis esset. Cæsar hoc Doctoris studio & verbis commotus, ei quidquid peteret annuens, naues instrui, cōmeatus ceteraq. expeditioni necessaria prouideri iubet.

ILLE Hispali soluit, & in Cumanam ap-
pulsus, Didaco Ocampo ibi fortè reperto di-
ploma regium exhibet. Is se verò obsequutu-
rum libenter ait: sed inde decedere sibi non
licere nisi commeatu ab Almirante accepto, à
quo coercendis rebellibus & regendæ prouin-
ciæ impositus esset, quoad mitteretur succes-
sor. Ita elusus sacerdos: ac ne ipsi quidem po-
stea satis inter se concordēs procacibus verbis
alter alterum exasperabant. Tandem doctor
vbi Regio mandato apud Ocampum parum
momenti esse videt, & se vltro ludibrio esse,
Dominicam petere intendit, & de Ocampi
contumacia, qui regiis imperiis parere nollet,
apud Almirantem conqueri. Antequam abi-
ret, quòd Toletò vrbe ab Ocampo exclusus
esset, ligneum ædificium raptim exstruit: atq.
ibi depositis impedimentis & omni cōmeatu
quē ex Hispania detulerat, Equites illos suos,
quoad rediret, in præsidio relinquit. Inde abit:
neque multo pòst Ocampus quoque cum
maxima militum parte decedit, quòd spoliis
Indorum onusti ac diuites, in præda & vni-
onibus diuidendis in dissensionem venissent.

CUMANAÆ reguli, quum Ocampum cum
maxima exercitus parte abiisse cognoscerent,
neque vllos superesse simul Christianos præ-
ter eos qui à Doctore præsidio relictī essent:
ceteros palatos & dispersos per eas terras va-
gari

gari vnionibus inhiantes & feminarum stupris, aliáque fœda edentes facinora, sumtis armis rebellionem cœptant. Itaque omnes pariter Dominica quadam die manè Hispanos *Hispani quas seuerè fruges, easdē mox metunt.* adorti, quoscunque in Amaracapana & omni illa ora maritima Occidentem versus reperiunt, trucidant. nullius vitæ parcitur: Fratres ipsi inter sacra mactati, Doctoris domus obfessa & capta: omnes propè Equites noui venenatis sagittis confossi miserabiliter periere. Pauci cum monachis aliquot scapha euasere, qui cum Sacramēto (vt vocant) in Cubaguam raptim transgressi sunt.

POST QUAM exercendæ in homines iræ materia Barbaris defuit, ignem iniiciūt tectis, templa & monasteria diruunt, campanas frangunt, statuas solo allidūt: postremò Crucifixi simulacrum deiectum truncatūque in viam abiiciunt ostentui & ludibrio. Gallinas quoque & canes Hispanorum abolent: ac ne Indis quidem ipsis pepercere, quos vel monachi vel alij Hispani in ministerio habuissent: terrā ipsam feriētes execrātēsque quòd tam dirum ac peruersum hominū genus ferre sustineret.

EA res tantum terroris ac trepidationis Hispanis iniecit, qui in Cubagua commorabantur, vt si continentis accolæ Indi vim paratam lINTRIŪ habuissent, haud dubiè traiectu in Insulam factò, quæ non plus XXII. millibus pass. continenti auulsa est, omnes Hispanos qui in ea erant ad internecionem cæsuri fuerint. Sed quū pauca nauigia essent, quāquā ingēti animo moliri cuperent, inceptū omisere.

REGII procuratores, phaselo confestim in Dominicā misso, rem vti gesta erat significant. Almirās eo nuncio accepto, quadringentos milites scribit & iis Iacobū Castellionem ducem attribuit: in Cumanam soluūt. Doctor audita suorū Equitum cæde, subitò cucullam inducens, in S. Dominici cœnobiū se abdidit: quod cum facere, meo iudicio, præstitit quàm piscatum margaritas in Cubaguam reuerti.

INTEREA Castellio octauo die quàm ex Hispaniola soluerat, Cumanam tenuit, & strenuè cum omnibus militibus in litus egres-
sus, totos quadraginta dies cum Indis pugna-
uit, & magnam eorum stragem edidit. Illi,
quamquam fortiter se defenderent, & Hispano-
rum aliquos interficerent, tandem tamen,
quum neque animo, nec viribus, nec ingenio
pares essent, & omnibus præliis victi discede-
rent, pacem vltro supplices petere coacti sunt
& Hispani ducis potestati se permittere. Ca-
stellio in deditos acerbè sæuii: septuaginta
Cacicōs suspēdi iussit qui rebellionis autores
fuerant: vulgus in naues imposuit, misitque
onustas Indis in Hispaniolam, vbi pro manci-
piis venum darentur. Inde ad tutelam nauium
vti dictum est suprà, arcem Cumanæ fluminis
ripæ imponit: Toletum vrbe[m] dirutam in-
staurat. Mox crescente Hispanorum multitu-
dine, septuaginta domus laterculo coctili in
Cubagua ædificat. Id pusilli municipij instar,
nouum Calicium appellat.

APPELLVNT post hæc è Dominica
quatuor Franciscani, & exstructo monasterio
in Insula sistunt, quum metu Indorum traii-


cere in continentem fugerent. Veriti scilicet ne à Barbaris, quod aliis euenisset, aliquando & ipsi manderentur. Ita de integro piscatio vnionum ab Hispanis frequentari cœpta est, & magna vis eruta. Ceterum Cubagua insula x. millia in circuitu patet, decem gradibus & dimidio ab Æquinoctiali linea distans, omni sui parte plana, sterilis, nuda arboribus, aquæ expers. Itaque tanta plerumque humoris penuria est, quā propter contrarios ventos nihil è Cumana subuchatur, vt sæpenumero cadus vini pari aquæ cado permutetur. Cuniculis, sale & piscibus abundat.

Quo tempore piscatio vnionum feruebat, Lodoicus Lampugnani, eius Lápugnani pro pinquis, qui Galeaciū Mariā Sforciā, ducem Mediolani, interfecit, in eam Insulā applicuit, Cæsareo diplomate & priuilegio fretus: quo ipsi per omnem illā Cubagæ orā tantam vim vnionū, quantam visum esset, piscari absq. vlla cōtradictione liceret. Hic homo ex Hispania quatuor carauellis profectus, omni cōmeatu ad eiusmodi cœptum necessario instructis, qui ei à mercatoribus quibusdā Hispanis spe haud dubia quæstus cōparatus & collatus fuerat: Rastellū seu euerriculū quoddā ea forma fabricari curarat, vt in quācumq. maris partē deiectū esset, quidquid ferè concharum esset facillimè corraderet. Verū Hispani Cubagæ incolæ, omnes pariter ei obistere, neque priuilegiō velle obsequi: dicētes Cæsare de alieno plus æquo liberalē esse. Si largiri quid vellet, de suo largus esset: se omnē eam prouinciā

Franciscani pellicule timentes, loco sibi cauent.

Qui ditescere volunt, in cupiditates incidunt & seipsos transfigunt doloribus multis.

magnis laboribus & periculis subactâ ad eam diem tenuisse. itaque se eorum laborum fructum colligere quàm peregrinum hominem, multo esse æquius. Lampugnanus, posteaquâ priuilegium sibi concessum nullius momenti esse intelligit, tum ne Hispaniam repeteret, partim pudore irritæ spei, partim ingenti ære alieno impeditus est, breui obruentibus eius animum curis in amentiam incidit. Denique quum ex eo vulgò pro fatuo & insano habitus omnibus ludibrio esset, quinto demum anno in ea Insula miserabiliter obiit.



¶ Indi Hispanorum mores pertæsi, amicitiam eorum respuunt. Contra ius gentium, vt insanabiles & Euangelio minime obsequentes durissimæ seruituti addicuntur. idque regio edicto, & suadentibus Missionariis.

CAP. XVII.

PRIVS QUAM cetera exsequi pergam, res admonet expromere causas ob quas Indicæ cōtinentis indigenæ mācipati & in seruitutē addicti sunt.

Hispanitæ diuinitiam suam apud Indos mouent.
Principiò vt ab Almirante Columbo post insulas noua continens inuenta est, eò statim Hispani diuitiarum cupidine confluere, & è prouincia in prouinciam transcurrere, donec crebris itionibus & cōcursionibus inquieti homines apud Indos tædium & odium sui mouerūt. Itaque, quum eos assiduus laboribus fatigarent tractarentque acerbius, aurum, argentum, vniones & smaragdos insatiabiliter flagitan-

flagitantes: neque illi tam graueis ærumnas tolerare diutius vellent aut possent: omnes v-
bique Hispanos tollere funditus atque extir-
pare è finibus suis studebant, ipsi semet exse-
crantes quòd non omnes initio trucidassent.

HISPANI verò tum Ecclesiastici tum lai-
ci (vt vocant) quum morum eius gentis vsu &
peritia, eos neque amicitiam Christianorum
neque Christi fidem accipere velle cognosce-
rent: quinetiam hæc ab eis derideri dicendo,
Eas fortè res Castellanis conuenire, sibi verò
minimè: ob hæc transgressi in Hispaniam Do-
minicani aliquot monachi, ad Regiam cõten-
dunt, & Ferdinando regi barbaræ illius ac bru-
tæ gentis morem fœdæque instituta referunt.
Deniq. multis rationibus, quarum exemplum
infra est, ei persuadēt dignius æquiùsque esse
istos homines pro mancipiis vendi quàm libe-
ros viuere. Earum sententia hæc erat:

INDI continentis incolæ idololatriæ & *Hispani.*
masculæ veneri dediti sunt, vani, mendaces, *postquam*
spurci, bruti, iudicij expertes, consilio vacui, *Indos for-*
rerum nouarum auidi, feroces, inhumani ac *tunis spolia-*
fæui: veneno sagittas perungunt, adeò noxio *runt, liber-*
vt qui iis vulnerantur correpti rabie intereāt. *tate quoq.*
Nudi incedunt, pudoris omnis exsortes: ne pu *exuere co-*
bertatem quidem vllam aut barbam gerunt: *nantur.*
ac si qui fortè pili erumpant, vossellis radicitus
extirpant. Humana carne, & animalium spur-
cissimis ranis, pediculis, lumbricis aliisq. fœ-
dis insectis, vesci apud illos fuetum est. Sum-
mam voluptatem in ebrietate collocant: neq.
in matrimoniis fidem aut iura vlla sancta ha-

» bent : neque ad mutandos mores peruicacem
 » gentem vlla ratione adduxeris. Nulla aduer-
 » sum ægrotos suos misericordia mouentur, &
 » quamuis artificissima cognatione coniunctos de-
 » ferunt : aut ita vt sunt ægros & femiuuos, vt
 » procul à conspectu amoueant, in filuas & mō-
 » tes deferunt & exponunt, vbi ferarum ritu mi-
 » ferrima morte extinguantur. Postremò, vt in
 » pauca conferam quod pluribus exponi posset,
 » affirmo nullam deteriore aut immaniore
 » gentem sub cælo viuere.

HIS Rex tam tetr̃is barbaræ gentis mori-
 bus auditis, magnum Consilium suum (vt vo-
 cant) contocat, & in eo refert illa omnia quæ
 Monachorum relatione ipsum accepisse dixi-
 mus : rogâtque vt quid de tam importuna &
 agresti barbarie statuendum sit, liberè senten-
 tiam dicât. Ibi nō rei certitudine vlt̃erius que-
 sita neq. accuratiori consideratione adhibita,
 decretum fit : Placere Indos continentis in-
 colas in seruitutem addici, nisi equidem gra-
 uissimis erroribus abdicatis, Christiani esse &
 ab Hispanis humanū viuendi morem ediscere
 vellent.

*Hispanorū
 in Occid.
 Indos in in-
 ria, tristi
 S. C. & Re
 gia autori-
 tate com-
 probantur.*

Hoc Senatusconsultum ita factum Rex
 autoritate sua confirmat, & obsignato diplo-
 mate sancit : mox Didaco Niquefæ & Al-
 phonso Hoiedæ, qui primi in eas prouincias
 titulo Gubernatorum missi sunt (Niquefa vi-
 delicet Veraguæ, Hoieda Carthaginis) tradi-
 dit: additis mandatis, vt priusquam bellum il-
 lis gentibus & arma ostenderent, sacrū Euan-
 gelium ante omnia annunciandum curarent:
 mox etiā admonerent vt fœdissimis moribus

flagitiisq. relictis, cum honestis viris compositione & pacatè viuere vellent, & Hispanorū amicitiam sincerè colere. Quas si cōditiones acciperent, & mandata seruarent, Regē Castellæ non tantum suā illis permissurū libertatē: sed eos quoq. pro amicis & vassallis suis habiturū. Sin minus, iubere eos capi & trahi in seruitutem: denique in eorum corpora, fortunas & vitā, ferro, flamma & omni belli clade sæuiri.

E Q V I D E M, credo, si seruator & redemptor noster Iesus Christus, quū sanctos suos Apostolos per Orbē ad promulgandum Evangelium dimitteret, talibus eos instruxisset mādatis, numquam tot regna, tot gentes, tot potentissimos principatus humilitati crucis subiecisset, quæ alioquin vltro verbo eius se summittebant, & diuinam eius legē toto pectore adorabāt. Itaq. vel hinc existimare licet quantum sit discrimen inter Dei iudicium & sententias hominum.



Didacus Niqueſa & Alphoſus Hoieda primi ad Indicam continentem ſubigendam mittuntur. Monachi quod ſuaſerant diſſuadere coguntur & Indorum ſeruitutem damnare. Ea tandem Bulla pontificia & Cæſareo edicto abrogatur. Reclamant diuites Hiſpani. Monachi irritatos malis exemplis Barbarorum animos, fruſtra verbis mulcere conantur.

CAP. XVIII.

D V O iſti Gubernatores, anno M.D.IX. è Calicio portu ſoluētes, proſpero curſu Hiſpaniolā tenuere. Ibi Hoieda cōparatis ſua impenſa quatuor nauibus, & amplius cccc. militib. ſcriptis, è Dominicę portu ſoluit. Prius tamen negotiū dat Martino Ancifo

baccalaureo (qui regio mandatu summus Iuridicialis Prætor amplissimæ illi prouinciæ impositus erat) vt cum reliquis militibus, equis, tormentis, & omni genere commeatus, quamocysimè posset in subsidium veniret. Quum ad Carthaginem appulisset, in terram egressus, Regium edictum publicè Indis per interpretem enunciat, orans vt pacificè viuere & Christianorum amicitiam colere vellēt, & abiectis nefandis suis moribus Christi fidē susciperent. Id si facerent, Regem Castellæ illis clementer vsurum & pro amicis carissimis habiturum spondebat.

Indi Hispanorum amicitiam repudiant.

Duri concionatores Euang.

INDI paucis verbis respondent: Castellæ regis amicitia sibi nihil esse opus. Itaque reuerterentur Hispani vnde venerant. quippe se quidem in suis finibus bonos & mansuetos aduenas ferre posse: sed cum iis qui nihil nisi malè agere sciant, nec inferendis iniuriis vquam satientur, nullum sibi esse commercium. Hoc tam abscisso responso accepto, Gubernator milites omnes in litus exponit: illi omnem eam oram peruagati, quotquot Indos reperiunt obtruncant.

CETERVM promulgato per omnes eas prouincias Regio illo Edicto, ne cuiquam ignotum esset, omnes omissa & seposita Euangelij prædicatione, capiendis Indis quos minus obediētes deprehendissent, & mancipiis contrahendis intendere: ac quamquam ea lex solos Caribas, humanis vescentes carnibus, constringeret, promiscuè tamen in aliis Indiæ partibus, vbi feralibus illis moribus locus non erat

erat, Hispani Indis ad metalla effodienda, ser-
uiles operas & vsuum necessaria omnia pro
mancipiis abutebantur. Inde gliscere barbaris
seruitus, & ea vsquecò progressa est, vt nisi
monachi aliquot obstitissent, qui zelo studio-
que charitatis incensi infelicissimæ gentis li-
bertatem procurarunt, breui genus omne
Indorum interiturum fuerit.

MONACHI illi Dominicani erant, qui *Monachò
vulnus ab
se illatum
sanare co-
nantur, sed
serò.*
quum in noua Hispania commorantes, quàm
acerbis & indignis modis Indi ab Hispanis
assiduè haberentur, palàm ipsi cernerent, &
tantas eorum iniurias tum pro concione tum
priuatim vbique reprehenderent, monentes,
venire aliquando ipsis in mentem debere, tã-
tæ immanitatis, quantam erga Indos exerce-
rent, reddendam Deo esse rationem. Itaque
imponerent modum sæuitiæ, & Indos dein-
ceps mitius tractarent, quo videlicet illi Euā-
gelij iugo libentius se submitterent. Hæc
(inquam) & talia quū monachi Hispanis sub-
iicerent, parum proficiebant, vltro irridenti-
bus illis dicentibusque, quum nihilo segnus
in consuetudo perseverarent, Barbaros istos esse
indignos Christianismo canes. Ita verba &
monita odium, non fructum pariebant.

QVARE coniuncti isti Patres, quum eorū
scelerum plenam & authenticam inquisitio-
nem egissent, eam Romam ad Pontificē mit-
tunt per F. Rodericum Minaiam Dominica-
num, eique negotium dant vt exposito Indicæ
seruitutis præpostero & pudendo abusu, quæ-
que inde damna consequuta essent, Bullam

*Indorum
seruitus a-
brogatur.*

à Papa edi procuraret, qua Indi pristinae libertati restituerentur. Apostolicam sedem tum regebat Papa Paulus III. Is causa & iniuriis Indorum auditis, verâq. iis de rebus inquisitione comperta, Bullam concessit qua Indos suæ libertati reddi iuberet. Eam secum in Hispaniam Rodericus referens, cum aliis monachis Regiæ maiestati earû rerum initium, ordinem, finem, vt gestæ erant, exponit: docens, Indorum peccata ab ignorantia expressa & pura, non à malitia, proficisci: illos quidem creatos esse à Deo homines, non bestias: liberos, non seruos: & ad fidem Christianam adduci debere bonis exemplis, non sæuitia aut tyrannide. Itaque cogitaret regia maiestas, provincias illas sub imperio & pedibus suis subiectas esse: ac proinde pium fore prouidere, ne intolerandis malis atq. iniuriis quas paterentur ab Hispanis, breui ad vastitatem & solitudinem redigerentur. Quippe nullum pudorē esse Hispanis, miseros illos homines sub oneribus gemere & exspirare cogere, terrâ è fodinis assiduè egerere, aliisq. seruilibus & parû honestis operibus illaborare: adeò vt multorum, tædium & miseras fugientes, dilapsi in siluas sibi met ipsi gulâ desperati frangerēt.

CAESAR, ea relatione audita, doctorem Figueroam in Indiam mittit, eique mandat vt ex monachis & præfectis sedulò verum inquirat. Ille abit, mandata exsequitur, quæ cognouerit refert. Cæsar extēplo, nullo præterea adhibito consilio, Indos liberos esse iubet, grauissimis pœnis in eos constitutis qui illis deinceps pro seruis vterentur. Lex profectò

sanctissima, & illustrissima, ab optimo Imperatore & clementissimo profecta.

ANNO M. D. XLIII. quum in Hispaniola essem, licentiatuſ Ceratuſ pro præſide in Inſulam venit, Ediſtum illud Cæſareū afferens: idq. mox per omnes indiæ Inſulas & prouincias, magno indigenarum ſolatio gaudióq. & ſummo Hiſpanorū dolore, promulgatum eſt. Nec difficulter in Hiſpaniola, Cuba, Iamaica, San-Ioannis inſula, & in vniuerſum omni illa ora quæ vulgò à nauticis Terra firma dicitur à Nomine-dei uſque ad Parienſem ſinum ediſtū illud obtinuit. Sed in Mexico haud perinde acceptū eſt, ditiffimis quibuſdam viris, quorū omnes propè fortunæ in mancipiis ſitæ erant, ei legi parère abnuentibus. Quippe contrà afferebant, Indos à Ferdinando rege publicè ſeruituti addictos fuiſſe, idq. poſtea à Cæſare confirmatum, & illis quintæ vectigal pēſum eſſe: proinde ſi vellet Cæſarea maietas Indos libertati reſtituere, eadē opera ſibi nūmos redderet, quos in id merciū genus erogafſent. Hæc & ſimilia omnes vulgò querebātur exſecrātes monachos damni illius ſui autores.


Ea in re tum Antonii Mendozzæ proregis *Mendozæ ſollerti* ſingularis prudentia apparuit: qua niſi oppor- *conſilio Hiſpanorum auaritiā eludit.* tunè uſus eſſet, res haud ſatis feliciter caſuræ videbantur. quippe ſe quoq. ei legi aduerſari & iſſis aſſentiri ingenti ſollertia ſimulans, de ea abroganda ſcribere & ſupplicare eos Cæſari iubet: vero tamen eum officio functum exituſ demonſtrauit. Neque enim Cæſar aut ſententiam mutare, aut eorum voluntati obſequi, voluit: ſed debere eos dicto ſuo audien-

tes esse rescripsit. Itaque Prorex, Mexicanæ ciuitatis primoribus conuocatis, nouum Cæsaris edictum exhibet: sed vbi locupletes dominos duriores, neque seruos manumittere velle animaduertit, ne turba inde aut tumultus oriretur, legis rigorem prudentia temperauit, eamque omnes tali forma acceperunt: nimirum vt quicunque seruos haberent, quotannis pro rata portione, viginti ex omni numero manumitterent. Qua ex re factum est vt omnes Indi breui in libertatem vindicarentur. Equidē si Blasus Nunez Vela, quum Regiis illis mandatis instructus, Peruanam prouinciam Prorex iniit, ad eum modum sese agitaſſet: nec quæ vitæ exitum nactus est, habuisset; nec, quot postea exponentur, inde euenissent mala.

*Monachi
Barbaros
allicere ad
fidem præ-
dicatione
conantur,
sed frustra,
nam malis
Hispanorum
exemplis
exaspera-
tos.*

RESTITUTIS in libertatem Indis, monachi supplicat Cæsari, & potestatem illò cōmeandi fieri sibi postulant: vt quādo Indicam linguā didicissent, eas gentes benignitate alliciendo, prædicationibus & concionibus conuerterent: sibi enim quidem satis esse animi, vt iuuante gratia Spiritus sancti eos ad fidem adducerent. Id concessum illis: quin etiam tum vetuit Cæsar vllas deinceps prouincias vi & armis subigi: sed bonis potius operibus ad Christianismum allici. Cum eā autoritate & mandatis octo monachi in Indiam profecti, ad Floridā appellunt: quatuor ex iis in terrā egressi concionari cœpere. Indi iam antè ab Hispanis malè habiti, monachos fustibus excipiunt, & interfectos pro suo more comedunt. Duo alii ad fineis Gattimalæ profecti

uincia appulsi, ad prædicandum exscenderāt: sed idem istos, qui & priores illos, exitus habuit. His experimentis deterriti ceteri, incertum illud commodiori tempori reseruarunt. Verum equidem si iam inde ab initio pro turpitudine ac flagitio conciliandis eorū animis adhibita esset benignitas, non dubito quin prosperè cessura fuerint omnia: quippe fœdas illas & atroces iniurias, veluti exempla ad male agendum non habuissent.



*Hoieda & Niqueſa Gubernatores ferro & flammâ in Indos
continentis incolâs ſeuunt. Hoieda vulneratur. &
ſame è prouincia eiectus, ex vulnere
in Hiſpaniola moritur.*

CAP. XIX.

DV M circa nouam Carthaginem moratur Hoieda cum Indis bellum gerens; ecce Niqueſa ſuperuenit liburnicæ uenius, ſeptem carauellarum, & duorum phaſelorum claſſe inſtructus, & cum amplius ſeptingentis militibus prouinciâ ſuâ petens. Is ſocium ſuum Hoiedam infauſto quodam caſu ictum & afflictum reperit. Ille paulo antè à Carthagine x i i. millia in mediterranea progreſſus, ingentis prædæ ſpe & cupidine illectus, genti cuidam infeſta arma intulerat, quum Indis credidiſſet affirmantibus eo loco magnam vim auri reperturum. Sed ex ea expeditione nihil præter vulnera &

detrimentum ingens retulit. Eius enim populi Cacicus, haud dubius aduentare Hispanos, Indorum multitudine excita, paratus in armis hostium aduentum exspectabat. Qui ut apparere, tanta in eos vi irruerunt Barbari, ut Hoieda fugam capeffere, amissis septuaginta quinque militibus, & ad mare regredi coactus sit.

His auditis qui superuenerant, consilium ineunt, & iunctis viribus in eius gentis finis impetum facere ac suorum cædem vlcisci statuunt. Itaque sub vesperam maxima militum pars silentio è castris profecti, modico ac suspenso gradu medio itinere confecto, sub auroram Indos securos & somno torpidos opprimunt. Illi excitati vulneribus & ad necopinatum tumultum pauentes, in super etiam mapalium incendio perterriti, præcipiti fuga velut cæci euadunt: sed obseptis à milite itineribus incidentes in armatos cæduntur alij, alij incendio perire quàm Hispanorū manib. præoptantes, in igneis semetipsi præcipitant. Erant ei populo centum ferme casæ contextæ arundinibus & folijs palmarum contextæ. Omnes ferro flammæque absumti sunt, præter paucos, quos dubiæ adhuc lucis obscuro, fuga discrimini eripuit. Sex modò capti sunt & Hoiedæ in seruitutem traditi: victores, quum frigefactis cineribus aurum quærentes perpauillum inuenissent, elusa avaritia nec præda pro spe inuenta, male alacres Carthaginem regressi sunt.

INDE soluens Niquefa, & directo in Occidentem

videntem cursu oram præterlegens, Prouinciam suam quærere institit. Hoieda quoque & ipse præter oram nouæ Carthaginis uentus, ducenta ferè millia à Carthagine sinum Vrabensem ingreditur, & ibi equis, machinis, omniq[ue] commeatu in litus exposito, ædificia moliri & crebris excursionibus eas gentes infestare cœpit. Indi satis gnari quid Christiani quærerent, rudis auri massas & monilia per vias spargebant: mox intentis arcibus abdi Hispanos, simul vt sese ad colligendum aurum demiserant, venenatis sagittis figebant.

*Barbari
Hispanos
auaritiâ
eludunt.*

Dum eius prouinciæ fineis Hispani populantur, Indi cuiusdam reguli uxorem fortè inter ceteros captiuos abduxerant. Is Gubernatorem adit, aliquot amicis comitantibus, uxorem se redimere velle simulans, & dare quidquid ille peteret: sed vt in eius conspectum venit, magnificè exorsus, non eum tantum contumeliosis verbis, sed re ipsa quoque violat, & sagitta venenata cœnfigit. Milites audito clamore accurrunt, & circumfusi Regulum cum coniuge & sociis obtruncant. Gubernatoris femur faucium, igni (vt fieri consuevit) medicatum est, & veneno non satis valido utcumque sanatum.

*Magnanimi viri exemplum
& minime barbare virtutes*

HISPANI tantam in hostibus animi magnitudinem demirantes, & ab illis dum animosè libertatē suam defenderent, multos iam ex suis interfectos: alios ex intemperie calidiusculis morbis quotidie interire, de Guber-

natore conqueri incipiunt: Se videlicet ab eo in eum locum deductos, vbi propter impeditos saltus & densissimas siluas nequicquam arma & vires experirentur.

PER eos fortè dies ex Hispaniola nauis viris & commeatu onusta eò appellens, recreandis omnibus plurimum profuit: nec propterea tamen fremitus militum & seditiosi clamores leniebantur. Quinetiam quum vehementius quàm antea ardescerent, Gubernator circumiens omnium vicem consolabatur, bono animo eos esse iubens: breui Ancisum baccalaureum ex Hispaniola cum subsidiis & commeatu adfuturum. Sed verba frustrà erant, & surdis hæc canebantur, metuentibus videlicet ne tandem Indos pascerent. Itaque maxima eorum pars phaselis inde fugere clanculum moliebantur.

HIS auditis Gubernator, tum vt seditioni obuiam iret, tum ne irritò incepto ditissimâ prouinciam relinquere cogeretur, nauem quæ venerat conscendens, legatum in sui vicem Franciscum Pizarrum reliquit: pollicitus breui se ex Hispaniola cum commeatu & recentium militum supplemento reuersurum: ac nisi quinquagesimum intra diem redisset, potestatem sociis faciens vt quomodocumque visum esset rebus suis consularent. Is fuit ² Pizarrus, qui postea cū Didaco Almagro amplissimum ditissimūque regnum Peruanum reperit & subegit. ³ Hoieda multis conflictatus laboribus vix tandem Hispaniolam tenuit, vulnere nuper accepto admodū grauis: vnde

paucos

paucos intra dies summo cū dolore moritur.

1 DE venenatis Indorum sagittis: & remedio vulnerum, vide suprà hoc libro cap. 3. pag. 14.

2 HIC fuit Pizarrus, qui postea Carolo v. imperium noui eius orbis Peruanis prouincijs amplauit, Attabaliba Rege capto & interemto: mox Marchionis titulo auctus & consortis impatiens, Didacum Almagrum, quicum fortunarum & periculorum societas ei erat, Ferdinandi Pizarri fratris sui opera, de medio sustulit: ac vicissim ipse ab Almagri filio, Ioannis Rada & aliorum coniuratorum opera, Lime domi sue interfectus est, Anno M D. XLII. De eo fusius lib. 3.

3 HOIEDA iste, postquam in Hispaniolam peruenit, seu dolore vulneris recensus, seu deficientibus ad reditum necessarijs: tandem, abiecta & prouincia & vite spe, Franciscanorum ordinem subisse (velut ultimum desperatorum perfugium) & in eo cultu mortuus, fertur.



¶ Franciscus Pizarrus Hoieda legatus, è continenti India cum suis fame expellitur. Ab Anciso Prætorè reuerti cogitur. Ancisus, victoria aduersum Indos positus, coloniam condit. Palboa, tractis in partes Hispanis aliquot, ab Anciso secedit.

CAP. XX.



AM duo præterierant menses, nec redibat Hoieda. Itaque Pizarrus, subigēte fame, cum LXX. Hispanis (qui ex trecentis reliqui erant) duobus inde nauigijs soluit. Sed quum circa eius ora itora erraret, sicunde alimenta expedire pos-

Hispani fame ex India continenti expelluntur.

set, mox repetendæ Hispaniolæ proposito, ingruente procelloso ventorum turbine, è duobus phaselis alter, cum omnibus qui in eo erant, id est, dimidia sociorum parte, haustus aquis periit. Nonnulli ab inusitatæ magnitudinis pisce eius gubernaculum frangi & excuti viderunt.

Fortis, insula.

INDE Pizarrus in Insulam Fortem eiectus est, in cuius litus quum aquatum egredi vellet, etsi pacis amicitiaque signa ederet, ab Insulanis prohibitus est. Itaque desperabundus, quum super omnia sæua atque aspera, cælo ac terra infestis, fatigatos etiam sitis exureret, litus aliquod tutum quò exscenderet quærebat.

SED iam mitiore & mutata in melius fortuna, ecce in baccalaureum Ancisum incidunt, qui liburnicam vnam & phaselum viris com meatuque onusta Hoiedæ subsidium ducebat. Pizarrus eo occurso mirificè lætus, ei primum suos casus, deinde vt quò ire vellent per misisset Gubernator, exponit. Ancisus primò non credere, istos ob maleficiū profugisse ab Hoieda suspicans: mox vt ea vera esse comperit, ingemuit, & illos ponè subsequi iussit. Pizarrus ad hæc supplex orare vt has infelicis exercitus reliquias afflictas & agras in Hispaniolam perducì à se sineret. Quod quum Ancisus abnueret, tum infirmi milites idem precari, & L. auri libras offerre: quas haud grauatè accepisset, ni crimini id sibi verti mueret. Ergo gratias agens munus repulit:
ipso

ipfos vtique consolatus, breui redituras illis vires & pristinam valitudinem, noui sui com-
meatus ope : quum non aliunde morbos con-
traxissent quàm ex miseriis & fame. Ita haud
procul Carthagine naueis applicans, in Co-
magræ litus ad aquandum egreditur.

INDI quum nec Niquefæ nec Hoiedæ *Hoc nimis*
eas naues esse agnoscerent, aquari Hispanos, *rum nescie-*
ceteraque inde sumere quæ necessaria essent, *bant Indi,*
multum mirantibus omnibus, permittunt. *Ex vno no-*
Mox inde soluens Ancisus in Vrabam venit, *scie omnes.*
vbi quum in eundem locum appulisset, in
quem antè Hoieda exscenderat, Naucleri im-
peritia, naus prætoria scopulo illisa est, &
ea mox aquis hausta, equi ceteraque anima-
lia periere : milites ipsi ægrè, nulla propè re
præter vitam incolumi, euaserunt, quam &
ipsam ne breui fame amitterent, omnes me-
tuebant.

IPSE Ancisus, naue amissa & haustis com-
meatibus, quum iam milites herbis & agre-
stibus pomis, quæ in maritima ora reperie-
bant, vefcentes cerneret, in mediterranea
progredi statuit, satius fortiter pugnando oc-
cumbere dictitans, quàm turpiter fame tabe-
scentes mortem expectare. Itaque cum cen-
tum Hispanis profectus est : sed vix quatuor
millia pass. progressi erant, quum occurrens
sagittatorum agmen Hispanos audacter in-
uadere & sagittis configere incipit. Itaque
illi subacti terga vertere, & terram ipsam &
gentem, tam lethales sagittas mittentem,

exsecrantes, trepida fuga litus repetunt.

Mox quum nulla inde alimenta expediri posse Ancifus videret, cognouissetque è captiuis ex aduerso, non procul sinu, campestem esse planiciem, frugibus, fructibus aliisque vitæ subsidiis abundantem, cum centum Hispanis & duobus phaselis in aduersam sinus partem traiecit. Indi primò aliquandiu nouam gentem & eorum consilij euentum quieti spectabant. Mox verò vt apparuit illos ibi sedib. locum legere & ædificia moliri, ad eos arcendos arma capiunt. Altera parte quoque Baccalaureus aciem instruit, nilque barbarorum audaciam & sagittas metuens, impressionem facit, numcupato prius voto, se sacram ædem è Cacici domo facturum. Manus conferunt, fit atrox pugna, vtrisque fortiter dimicantibus: tandem Indi, quum hostium vim sustinere non possent, in fugam vertuntur. Ea res Hispanis iam fame cæcis robur & audaciam accendit: fusos hostes persequuntur & omnia cædibus complent.

*Egregium
votum sc.
quasi Deus
præda &
manubijs
delectetur.*

*Avaritia
sagax.*

HISPANIA ea victoria potiti, eius gentis pagos inuadunt: vbi panis, fructuum, radicum aliarumque rerum copiam nacti, barbaricis cibariis corpora strenuè reficiunt. Post hæc vicini fluminis ripam sequentes, in arundineto lodices, stragulas, fistilia & lignea vasa & amplius duo mille & quingenta pondo auri laborati reperiunt, quod Comaccus, eius populi Regulus, ne in manus Christianorum veniret, abdiderat. Neque profectò ab illis reper-

reperitum esset, nisi ubi lateret Indos tormen-
tis fateri & prodere coegissent. Baccalaureus
multas de victoria Deo gratias agens, locum
¹Antiquam Darienis appellat: mirificè quoq. *Antiqua
Darienis,
colonia.*
latis militibus ob tantam auri copiam reper-
tam, quippe sine eo malè alacres & parum
expleta cupidine reuertebantur.

INTEREA Baccalaureus missis phaselis *Factiones*
Hispanos, quos in aduersa sinus parte relique *inter Hi-*
rat, arcessit. qui ut venerāt, breui in factiones *spanos etiā
in mediis
calamita-
tibus.*
discessere: quum videretur Baccalaureus in
diuidendo auro & spoliis partium magis &
priuati emolumenti curam agere quàm Iudi-
cem deceret. Itaque ²Vascus Nunez Valboa,
procax homo & seditiosus, cum factionis suæ
popularibus secessit in partes, ac se Hoie-
dæ iurisdictioni non vltra subiici dictitans, li-
cere omnibus Præfectis esse contendebat:
nec se Baccalaureo pariturum, qui in Iure di-
cendo priuato magis quæstui quàm commu-
ni omnium vtilitati consuleret, nihilque præ-
ter litterati nomen haberet, reipfa vulpem
astutissimam referens.

DVM Ancifus & Valboa ita inter se alter-
cando & iurgiis tempus terunt, ex Hispaniola
soluit Rodericus Colmenares, duabus cara-
uellis nouum hominum supplementum &
commeatus subuehens, Hoiedæ militibus au-
xilium, quos in summis rerum omnium angu-
stis versari acceperat. Inde continentis oram
tenuit ad prouinciam Carthaginis, & aquæ
penuria laborans, ad fluminis ostium appli-
cuit. Simul quinquaginta milites, qui nauticis

aquantibus præsidio essent, in litus exponit. Illi egressi in terram, ut si in tuto & pacato essent, veluti per iuuenilem lasciuiam saltare alacres & vitulari cœperunt. Sed Indi, qui carauellas fluminis ostium subeuntes conspexerant, frequētes cum arcubus & sagittis, subire filuas, atque inde in Hispanos in litore securos ac solutos de improviso impetum facere, tanta ac tam festinata vi, ut ne vni quidem ad euadendum quidquam spacij relinquerent. Eodem vestigio scaphas confringunt, ferociter etiam aliis qui in carauellis erant minātes, procul significant, quantopere illis potiri cuperent.

Indi Hispanis formidabiles.

COLMENARES Indos adeo acres bel-latores expertus, sitim aliquamdiu pati quàm Barbarorum manibus interire præoptans, sublatis ancoris, inde in Vrabam properè vela dat. Ibi, repertis tantum quibusdam coloniæ ab Hoieda positæ vestigiis, multum obstupefactus, ac ne omnes à barbaris laniati essent metuens: tandem ad naueis regressus, sub noctem, ut si fortè aliò migrassent, suum ipsis aduentum significaret, tormentum vnum dis-plodi iubet. Quo signo edito Hispani, qui in Antiqua erant, præfectum suum adesse rati, crebris & ipsi extemplo ignibus excitatis in montium & collium speculis, se non procul abesse admonent.

ORTA luce Colmenares, quàm fumum euolutum conspexit, eò flectens ad Antiquam appellit. Tum inter eos ingenti lætitia consalutatio facta, & mutuò alij alios amplexantur, diuersis

diuersis vtrinque cupidinibus, illi ciborum desiderio, hi auri fame ardentes: & (sicuti dictum est) Indi maximam colonorum partem trucidauerant: ceteri petere ab indigenis cibaria, aut procul quæritando victum expedire non audebant, tantus sagittarum timor incesserat. Itaque tegminibus laceris, seminudi, strictis arborum frondibus, agrestibus pomis, & herbarum radicibus, aliisq. similibus, ægrè inopiam sustentabant.

I *Vouerat Ancisus Virginis simulacro, quod sub nomine B. Mariae Antiquæ Hispali sacratum est, non tantum aurea argenteaq. dona è manubiis: sed se eadem quoque illi sacram è Cacici domo, & Coloniam mox eo loco exstruendam ipsius nomine insignem, facturum. Ergo voti damnatus, impostam ripæ fluminis coloniam (quod Darien vocat) Antiquam Darienis nuncupat. Ea, quum Ancisi auspiciis Hispanis colonis frequentari cœpisset, paulo post pestifero paludum halitu & insalubrium aquarum potu infamis, ab incolis desertæ est.*

2 *Hic postea Mare Australe (vulgò Mare del-Sur) primus reperit: moxq. eius ora Præfectus designatus, à Petro Aria, socero suo, seditionis reus peractus, & capitali supplicio affectus est. Vide infra hoc libro, cap. 24.*



¶ Didacus Niqueſa in Veraguam provinciam ſuam tendens aberrat à curſu, & naufragium facit. Reuectus ad ſuos Veraguam, vi inſauſtam, relinquit.

CAP. XXI.

*Niqueſa
errores.*

RIVS QVAM enarrandis iſtorum Hispanorum diſcordiis finem faciã. Didaci Niqueſæ errores & caſus exponere hîc me neceſſe eſt. Is quum Carthaginis ora ſoluens in prouinciam ſuam tenderet, carauella vna & duabus biremibus præuectus ceteras naueis ponè ſubſequi iuſſit. Sed dum nauigat, noctu coorta tempeſtas biremes diſiectas à carauella abripuit. Luce orta quum biremes in vnum coiſſent, nec carauella in conſpectu eſſet, & ignota regio, quò aut quà irent, incertum faceret : tandem retro proras vertere rectores ſtatuunt. Ita terræ applicant naueis, & oram præterlegentes vſque ad os Ciagri fluminis, ceteram ibi claſſem & ſocios reperiunt. Vbi quum nihil certi de claſſis Præfecto cognouiſſent, eum tãdem ſe inuēturos rati, omnes inde abeunt. Centum millia emenſi, quum vltèrius progredi non placeret, iaciunt ancoras, & explorandi aditus gratia & quã commodè terra prehēdi poſſet, ſcapham ad vltus & octo nauticos mittunt. Sed quum fortè cōmotum mare eſſet, & nauæ remis pertinacius euerberantes vndas ſuperare contenderent, obruta gurgite ſcapha cum ſeptem nautis demergitur. Octauus flu-
ctibus

atibus sese strenuè euoluens, nando ad terram euasit. Nauium magistri, scapha in omnium oculis amissa, dum omnis pelagi furor caderet, expectant: mox sequenti die, æstu posito, phaselis & biremibus, equos, machinas, & commeatum omnem, in litus exposuere.

INDE Lupo "Olando, dum Niqueſa redi-^{"Olanum} ret, summam imperij deferūt. Is quò omnem ^{alijs vocat.} sociis spem fugæ tolleret, naucis fluctuantes temerè ad litus ferri atque allidi finit: mox, nimis festinati consilij errore animaduerso, è fractarum nauium tabulis carauellam vnam, ad subitos & necessarios vsus fabricari iubet. Inde casas moliri, Maizium seminare, & aliquot eius oræ loca peruagari, cœperunt: sed omnes fermè pagos incolarum fuga desertos reperiiebant. Quippe Indi formidine in mon-^{Indi famē} tes refugerant: & eæ profectò gentes, quum ^{quàm se} id sibi minus conducere arbitrentur, elici ad ^{aduersus} certamen nequeunt, neque cum nostris ho-^{Hispanos} minibus manum conferere curant: nuda vi-^{pugnare} delicet ac sterili terra satis pro ipsis aduersus ^{malunt.} aduenas pugnāte, quibus nihil præter famem relinquunt.

DVM hæc Olandus agit, ecce tres nautæ scapha cò appellūt, qui ab Niqueſa præfecto aufugerant. Illi de Niqueſa interrogati renunciant, illum, carauella amissa, in Zorobarensem quādam insulam erectum, & iam tertium mensem per montes siluosos, & solitudines auias sine vllò humani cultus vestigio, errantem, victu infelici, siluestribus pomis, & vulsis herbarum radicibus vitam trahere. Olandus

*Niquefa
quam in
Veragua
pro thesau-
ro carbones
reperiſſet,
inde exce-
dit.*

extemplo biremem ad eum aduehendum mittit: ea vbi Inſulam attigit, nauim conſcendit Niqueſa cum paucis illis qui ſupererant militibus, & ad exercitum ſuum venit. Ibi plurimum de Olando conqueſtus, proditionis cum inſimulans, quò neglecta præfecti ſui ſalute & omiſſa eius veſtigandi cura, naues li-
tori illiſſet, vt ſummum eius prouinciæ imperium inuaderet: mox ſe ex illis ſedibus excedere velle militibus denunciat. Illi haud procul abeſſe maturitatem frugum quas ſeuerant monentes, paululum ſpatij ad metendum orabant: ſed ipſe frugum iacturam quàm vitæ facere malle reſpondit, neque diutius tam infelici terra conſidere velle.

PLACET nonnullis ita loquutum Niqueſam vt Olandi gloriam minueret: verum opinor cuiſcemodi ſcriptores, ſi eam prouinciam perambulaffent, vt à Niqueſa & aliis multis, & à meipſo quoque, peragrata eſt, nunquam fuiſſe ſcripturos eam editam à Præfecto vocem, velle ſe inde excedere, vt alterius gloriæ officeret. Sed ne ſi velim nunc plenam horridæ illius & aſperrimæ prouinciæ deſcriptionem edere, longius ab inſtituto abſtrahar, eam commodiori loco referuo. Quippe id
Lib. 2. cap. 10. & ſeq. mihi propoſitum, breuem hanc meam Hiſtoriam quam accomodatè fieri poterit, pro exiguo ingenij mei modulo contexere, quò facilius res maximè memorabiles viſas à me, aut quomodocumque cognitæ, quæ illis in terris accidere, ordine exſequar: tum peregrinationis meæ caſus & errores exponam, quæ mihi

mihi quatuordecim annorum spatio per infrascriptas prouincias exacta est. Primum enim in Insulam Vnionum appulsus, mox Pariensis sinus tum orientalem tum occidentalem partem perlustravi. Inde Insulis Margarita, S. Ioannis, Hispaniola & Cuba peragratis, in continentem regressus, ad prouinciam Carthaginis applicui: & oram sinus Vrabensis præteruectus, in Achlam: vnde Australi mari traiecto Panamam (quæ prouincia ab Hispanis *Castella aurea* dicitur) & ex Nomine-dei Veraguam, & nouam Carthaginem, Costam-riccam, Caput-Fondurense, Vallem Olanchiam, prouinciam Guattimalam, & Nicaraguam adij. Pòst denuo in Panamam transf-
 gressus, regnum Peruanum ad extremum obij aliasque præterea Insulas, vt quouis loco planum faciam.

Summa

Indice peregrinationis, à Bethone confecta.

De eius nominis ratione, vide huius lib. cap. 23.



¶ *Niquesa Veraguarelieta, Nominis-dei colonie fundamenta ponit. A Darienensibus colonis ad componendas rixas arcesitur. Mox ob inconsultè iactas voces probrosè expellitur ab Anciso & Valboa, factionum ducibus. Mors eius.*

CAP. XXII.

POST QUAM Niquesæ sententia stetit Veragua excedere, tanta militum & nautarum multitudine, quam tam carauella noua & duæ biremes capere poterant, conscendere iussa,

ceteros fortunæ arbitrio permisit, fide tamen illis data, se simulac idoneum coloniæ condendæ locū nactus esset, illico ad eos arcessendos missurum. Sed postea rebus illi vndique improsperè cadentibus, id præstare non potuit.

*Portus-
bellus.*

INDE soluens, portum tenuit, cui Bello, id est Pulcro, nomen est, sic antè ab Almirante Columbo nuncupatum, quòd amœno & opportuno situ pulcherrimæ condendæ vrbi sedem præbeat: sed Indi Niquesam eò appulsum, maxima militum parte amissa, regredi ad naues coegerunt. Itaque ad promontorium Marmoris prouectus, feliciorem sibi rerum cursum quàm antea promittens, In nomine Dei (inquit suis) egrediamur in terram. Inde nomen postea loco mansit: ipse quò se aduersus Indos infestantes defenderet, propugnaculum è ligno raptim exstruit.

*Nominis-
Dei colo-
niæ origo.*

INTEREA dum Niquesa, circa ea loca variis ærumnis molestiisque conflictatur, inter Hispanos Darienis colonos discordiæ studiis accensæ in dies magis ac magis crescere, alijs ad Valboam, alijs ad Baccalaureum Ancisum imperium trahentibus. Alphonso Hoiedæ milites omnia ita agitari miscerique ægrè ferentes, priusquam res ad vltimum discriminis certaminibus veniret, mittere in Veraguam ad arcessendum Niquesam statuunt, qui imperio suscepto, donec à Rege alius præficeretur, simultates Hispanorum & seditiones finiret. Itaque, quamquam ne id quidem nisi ægrè obtineri potuerit, intercedentibus aduersariis neq. assentiri volentibus, honestorum tamen

*Niquesa
finiendis
Dariens.
colonorum
simulatib.
arcessitur.*

aliquot

aliquot virorum pacisq; ac quietis publicæ
amantium interuentu effectum, missusq; ad
Niquefam arcessendum Colmenares.

Is duobus phaselis oram præterlegens,
eum tandē debilem, squalidū, seminudum &
victus egentem ad Nomen-dei reperit. Ni-
quesa, qui quiduis sibi potius euēturum quàm
illud auxiliū sperasset, magnā vim lacrymarū
profundens Colmenarem amplectitur, & tāti
beneficij ingentes gratias agit: mox infelicem
hactenus suam sortem miseratus, mala & æ-
rumnas quib; conflictatus erat, exposuit. Col-
menares vicissim sui ad eum itineris causam
& quibus moti Antiquenses eum accirēt, aper-
rit: deinde spe eum solatur & bono animo esse
iubet: quippe ditissimam esse prouinciam in
quam vocaretur, ibiq; eum superioris tempo-
ris damna & incommoda futuri prouentu fa-
cillimè farturum.

ITA QVE Niquesa cum septuagintaquin-
que Hispanis, quos ex omni exercitu reliquos
habebat, nauim conscendit: & dum nauigant
multa vana de Baccalaureo, de Valboa aliisq;
multis stolidè iacere cœpit, haud dubiè præ-
se ferens, simulac prouinciam attigisset, ani-
maduersurum in eos, aliosq; abdicaturum
dignitatibus, alios auro & pecuniis multatu-
rum, quippe id habere ipsis nō licere sine suo
vel Hoiedæ permissu, qui à Rege Gubernato-
rum titulum atque in vtramque prouinciam
imperium acceperant. Multa præterea alia in-
consultè effudit, quæ plurimum auditu excepta,
exitium ipsi attulere. Nam vt in Antiquam

*Temerè in
iste voces
Niquesa
exitium
afferunt.*

*Niqueſæ
exitus.*

appulerant, ſubito egreſſi in terram aliquot Hiſpani ad Conſiliū ciuitatis verba & minaces Niqueſæ in eos voces referunt. Inde maxima fermè omniū aduerſus eū indignatio coorta. itaque vix naui egreſſum, certatim minas probraque ingerentes præcipitem Antiqua expellunt, & inhumaniſſimè cum ſuis LXXV. Hiſpanis, ſoluere cogunt. Ipſe multū mœrens abiit, & eam oram præternauigans quum ad aquandum fortè in littus exſcendiſſet,¹ ab indigenis cæſus cum omnib. ſociis & comeſtus eſt. Hūc Didacus Niqueſa vitę & ſuſceptę in Veraguā expeditionis cum exercitu exitum habuit.

I NIQVES A iſte, lingua & ira impotens, quam mala exaſperauerant, Dominicam rectā petere, atque ibi apud Regia curia Indices Vaſcum & Anciſum de vi reos agere, in animo habebat. Creditur in itinere merſus fluctibus, cauſam omnē & ſua inſta ſecum ad piſces tuliſſe. Prodidere alij, quum Veraguam iterum cogitaret, applicuiſſe ad quendam eius ora fluuium: mox aduerſo flumine inuectum & in terrā egreſſum cum omnibus ſociis, à Barbaris maſſatū eſſe: atq. ex eo caſu inditū flumini nomen, quod nō procul Zorobarenſibus inſulis Fluum Perditorum, vulgò Rio de los Perdidos, vocāt. Cui opinioni cauſam præbuit, quòd in huius fluuij ripa hæc verba arbori inſcripta reperta ſunt:

HAC, MISERO ERRORE FESSVS, DIDAC. NIQVES A INFELIX TRANSIIT. In tanta prodentium varietate, nihil habeo quod affirmē. Sed vicumq. ea res ſit, iſte, cum collega ſuo Hoieda, infelici exitu inſigne documētum prodiſ mortalibus, quantum malum ſit Auaritia.

Anciſus



¶ Ancus à Valboa in vincula conijcitur. mox solutus in Hispaniam concedit. Valboa Australe pelagus detegit. Petrus Arias Gubernator ex Hispania in Antiquam mittitur. Is auarè & crudeliter habitos Indos aduersus Hispanos odio implacabili inflammat.

CAP. XXIII.

POST discessum Niquesa, inter Antiquenses colonos renata subito fœdior priore seditio est. Valboa satis ^{Hispanorū} gnarus se viribus Baccalaureo ^{sedda inter} superiore ^{se certamina.} esse, vespera quadam in eius domum irrumpens, hominem corripit iubet, & pecunias eius fisco addicit; Prætoriam potestatem priuato cōsilio sine autoritate regia vsurpasse infimulans. Neque Baccalaureus Regij diplomatis & mandati exemplum profetre poterat: quippe amissum inter alia quum prætoriam eius naus in sinu Vrabensi frangeretur. Valboa verò postquam aliquādiu Baccalaureum in custodia habuerat, tandem emisit: moxque discessum apparantem, summissis qui rogarent, oblata summi Prætoris iuridici dignitate, retinere conatus est. Ille verò remisso stomachosē beneficio, in Hispaniam concessit; libellum accusatorium plenum querelarum in Valboam secum ferens: quem quum Indico senatui obtulisset; atrox in Valboam sententia lata, sed cuius nulla exsequutio post sequuta est; propter mare Australe ab eo repertum.

BACCALAVREVS abierat: Valboa auri cupidine in mediterranea progressus, cum aliquot regulis amicitiam contraxit: in iis cum Panchiaco quodam, à quo¹ pelagi Australis notitiam habuit, & ab eodem illo deductus est. Eum postea, quum baptisandum curasset, Carolum nuncupauit. Is ipse Cacicus quum Valboæ grandem auri vim dedisset, ortæque
Barbari Hispanorū auaritiā castigant. fortè inter Hispanos in eo diuidendo rixæ essent, libram & lances pugno ita feriit vt omne aurum humi dispergeret, simulque addidit: Non parum equidem vos miror, Christiani, quòd de re adeo vili tanta inter vos oriantur certamina, perinde vt si ea res esui aut potui esset utilis. Verum quando vilis metalli tanta cupido vos tenet, in eum locum deducere vos volo, vbi auri sitim abundè expleatis. Secundum hæc dicta, eos ad mare Australe deduxit. Valboa ingentes in ea prouincia opes nactus, Castellam auream ex eo nuncupauit, in qua nunc sita est Panama ciuitas.

INDE varia eius prouinciæ loca perambulans, felici semper successu, sæpenumero per iuris speciem sæuitiam aduersum Indos auri cupidine exercens, magna cum auri & vnionum vi Antiquam Darienis regressus est: ibiq. decretis supplicationibus, propter repertum ab eo ingentib. cum diuitiis Australe pelagus, festo apparatu & sollenni pompa à colonis obuiam egressis exceptus. Mox naui in Hispaniam missa & scriptis ad Regem litteris, rerū à se gestarum successum simul & præsentem statum exposuit: Australe iam mare ab se apertum:

apertum: proinde suppliciter ab ipsius Maie-
tate petere eius prouinciæ præfecturam sibi
concedi & mille homines mitti, quò facilius
eas gentes subigere & regere possit: ceterum
policeri se breui ingentem vim opum reper-
turum, vt facilè ex ipsis initiis ac documentis
colligi posset. In cuius rei specimen viginti-
quinque ingentis magnitudinis vniones ad
eum mittit, & triginta millia ducatorum, col-
lecti auri quintam Regi debitam, aliâque præ-
terea munera: quum iam antea quoq. magnâ
pecuniæ vim misisset, sed naus qua ea defere-
batur, cum hominibus omnibus demersa
perierat.

REX munus, & vectigal quintæ & Valboæ
litteras, læto animo accepit, ex quibus quum
intellexisset repertum ab eo Anstralem Ocea-
num, sententiam aduersus eum latâ antiquat,
eique attributa noui maris præfectura, mille
Hispanos in supplementum mittit. Ceterum
Antiquæ Darien² Petrum Ariam Abulen-
sem præficit: episcopum verò designat fra-
trem " Gobatum, ordinis Franciscanorum, *"Io. Cabe-
dum vocat
alijs.*
cõcionatorem suum. Inter alia verò quæ Præ-
fecto in mandatis dedit, disertè edixit vt cle-
menter ageret cum Indis, pacemque illis ante
arma offerret. Deniq. ex præscriptis Hoiedæ
& Niquefæ mandatis ageret: semperque præ-
dam ac res quæsitæ cum sacerdotibus & mo-
nachis participaret, qui ad eas gentes conuer-
tendas comineabant.

HIS mandatis atq. imperio instructus Pe-
trus Arias, è portu S. Lucari, anno M. D. XIII.

quatuor nauibus & carauellis vndecim soluit, cum mille & quingentis Hispanis. Ad Antiquam vt appulit, Valboa cum omnibus amicis obuiam egressus, eum summa alacritate excepit, & apud se in hospitio habuit. Mox quæcunque animo incepta destinabat ei penitus aperiens, simul qui prouinciarum status esset exposuit. Latissimo animo audiuit Gubernator, maximam earum gentium partem Hispanorum amicitiam colere: itaque in Tumanama ædificia moliri cœpit.

*Pāchiaci
humanitas
indigna
mercede
ab Hispanis
pensatur.*

*Christianū
nomen ob
Hispanos
male au-
dit.*

INDE Ioannem Costam cum quadringentis Hispanis in Comagram ad quærendum aurum duabus carauellis dimittit. Is non tantam copiam nactus, quantam insatiabilis ipsius auaritia concupisceret, quotquot regulos in potestate habuit, omni genere cruciatus vexare institit: vt cogeret fateri vbinā aurum abdidissent. Quinetiam ne Pāchiaci quidem subditis pepercit: & spoliis ac manubiis in eos grassatus, socij reguli animum adeo ab Hispanis alienauit, vt tantū illis infensus esset, & quidem meritò, quantum antè amicus fuerat. Præterea quum magnam eius clientium partem lapidibus obruisset, Indos rei indignitas adeò accendit vt concursu facto & ingenti sublato clamore in Hispanos irruerent, subinde iterantes, Impij isti, scelerati, ac perfidi Christiani pereant, indigni quos terra viuos sustineat. Simul Hispanos complures trucidant. Tribunus ipse cum reliquis militibus & spoliis carauella vna imminentem pestem effugiēs, Antiquam repetit, non sine maxima

Guber-

Gubernatoris culpa, qui tanta scelera inulta atque impunita omitteret.

IPSE postea alios Tribunos militares & duces per diuersa eius oræ litora dimisit: in iis Bartholomæum Vrtadum in Achlam, qui egressus in terram, per simulationem pacis, quotcumque Indos assequi potuit, rapuit & pro mancipiis vendidit. Fernandus Valesius in Caribanam cum octoginta militibus profectus est: sed vix in litus exscenderat, quum ecce Indi audaciter impetu in Hispanos facto, quinquaginta interfectis, ceteros regredi ad nauim & inde excedere cogunt.

ITA Hispani, propter aduersam famam atque opinionem quam de se ipsi apud omnes commouerant, tanto vbique odio flagrabant, ut ne eorum quidem conspectum indigenæ ferre possent: & vtrunque quidem, dum Hispani Indis libertatem eripere student, Indi eam acriter defendunt, ad extremam propè perniciem atque internecionem ventum est. Ac, quamquam omnis eius fermè oræ accolæ humanis carnibus vesci consueuerint, ex iis tamen nonnulli, Hispanorum cadauera qui prælio ceciderant, ceteris mandentibus, à tali cibo abhorrebant³: veriti nempe, ne etiam tum eæ carnes corporibus suis aliquid damni adferrent.

QVOS EVNQUE capiebant viuos, militares præsertim duces, reuinctis manibus pedibusque proiciebant in terram: mox auro

Barbari
Hispanis
captis, cum
fœda ex-
probratio-
ne avari-
tiae, aurum
in os infun-
dunt.

in os iacentis infuso, cum hac exprobratione
avaritiæ, E D E, ede aurum Christiane: ad ma-
iorem cruciatum ac probum cultellis lapi-
deis alius brachium Hispani, alius humerum,
alius crus, absceindebant, & subiectis prunis
torrentes cum cantu & tripudiis mandebant:
ossa verò suspendebant in delubris & princi-
pum ac Regulorum domibus, tropæum &
monumentum victoriæ.

1 *Australe pelagus hîc intellige, non quo rectè
in Austrum navigatur, aut quod polo Antartico
subest: sicut nec per Septentrionale intelligi debet
mare Glaciale, & quod Arctico vertici subiectum
est. Sed quum Indica continens duplici utrinque
alluatur oceano: qui in Meridiem & Occidentem
vergit, Australis, vulgò Mare del-Sur: qui in
Orientem & Septentrionem, Septentrionalis ap-
pellatur, vulgò Mare di-Tramontana.*

2 *Hic Arias, Segouiensis ciuis, gladiator erat,
sèu (ut Petrus Martyr Mediolan. vocat) hasti-
lusor. Itaque nihil mirum, si eo lanista, ab eius le-
gatis Indi crudelissimè vexati sint, quando ne ge-
nero quidem suo pepercit.*

3 *Indi quum infinitos Hispanos trucidarint,
eos tamen esui satis aptos negant. quippe duriore
& exsucca carne, nisi trucidati tres aut quatuor
dies prius macerentur. Cuius rei epistola à milite
quodam ad medicum Hispanum è Lima in Peru
missa, anno M. D. LXVIII. testis est.*

Petrus



Petrus Arias & Valboa dissidentes, domestico fœdere conciliantur. Mox male coherens amicitia dissilit. Valboa criminibus à socero structis circumuentus, securi percutitur. Petro Ariæ imperium abrogatur.

CAP. XXIIII.

EX eo quum omnia Petri Ariæ incepta fœdum atque improsperum exitum haberent, Valboæ risui aperte & ludibrio esse: quæ res in eum Gubernatoris iram adeò accendit, vt mox in rixas & iurgia erumperet. Episcopus fœda inter eos dissidia ægrè ferens, ad reconciliandos eorum animos omne studium adhibet, tantumque perficit, vt firmandæ concordia Gubernator filiam, Valboæ matrimonio iungeret. Eo connubij fœdere pacto, nemo erat qui pacem inter eos firmam ac stabilem fore non crederet.

PERFECTIS nuptiis, Valboa consensu foceri, cum dimidia parte Hispanorum quos ex Hispania adduxerat, ex Antiqua in suam prouinciam concessit: neque ei per quosdam improbos homines, gloriæ ipsius inuidentes, ea diu frui licuit. Illi enim falsis in eum structis criminibus Gubernatoris aures occupant, deferuntque Valboam occultè per amicos tentare animos militum, & partem exercitus Ariæ subductam in suam prouinciam pellicere. Id vbi Ariæ cognitum, literas ad Valboam componit, quarum hæc summa erat: Vt iis vi-

Ariæ & Valboæ dissidia parum efficaci fœdere conciliantur.

sis, nulla interposita mora ad se veniret: consultandum maximis super negotiis, quæ ad utrosque pertinerent.

VALBOA, qui tum ad maris Australis oram nauigiis moliendis intentus erat ad novas vestigandas terras, his litteris acceptis, cum quinquaginta militibus in Antiquam festinat. eò ubi peruenit Gubernatoris socii sui iussu correptus in custodiam traditur. Mox recitata accusatio, & crimina eius morte quoque Niquefæ & Baccalaurei Ancisi vinculis onerantur: ad hæc seditiosum, sceleratum & aduersus Indos immitem, esse obiicitur. denique reum peragit Gubernator & capitis damnat. Valhoa contrà obiecta negare, ac deierare de pellectis ad secessionem militibus falso & immeritò se accusari. Itaque videret etiam atque etiam Gubernator, quid de se statueret: se quidem, si eius rei tentatæ sibi conscius esset, numquam in eius conspectum fuisse venturum. Cetera quoque crimina, ut poterat diluebat: sed ubi vis plus potest, parum in iure & ratione præsidij est. Postremò audire ulteriorum hominem negat se velle Gubernator, & peracto iudicio abduci cum quinque aliis Hispanis ac securi percuti iubet.

FINXERE nonnulli Valboam magnum quendam & illustrem victoriis ducem fuisse, felicitate etiam armorum quolibet Romanorum imperatorum præstantiorem, propterea quòd omnium quæ cum Indis gessit bellorum semper victor extiterit. Sed immodicæ illæ eius laudes risum magis quàm admirationem merentur.

Sacer generum, capite damnatus, securi percutitur.

merentur. quippe Romani quondam cum bellicosissimis & ferocissimis Orientis gentibus bella gesserunt: Hispani verò in Occidente nihil præter bruta animalia & bestias subegere.

Quod quidem eques quidam Hispanus optimè intellexisse videtur. Is quum in Africa ad Argeriam Carolo Quinto Imperatori militaret, essetque vnà cum aliis aliquot equitibus, in iis Ferdinando Cortesio (is est *Ferd. Cortesio* *faciles de Indis vñ* *etoria.* qui regnum Mexicanum aperuit & subegit, quod ab indigenis dictum Themestitan, ipse nouam Hispaniam nuncupauit) quum inquam vnà esset, ac fortè Maurorum globus hominum multitudine superior in eos irrueret, ipsi verò ad resistendum hosti se impares esse cognoscerent, dant sese in fugam. Ibi Cortesius clamore fugientes sistere, & hortari socios vt in hostem versi eum strenuè exciperent. Tum Hispanus ille eques, Belua isthæc, inquit, putat sibi rem esse cum suis Indis, quorum viginti quinque millibus fundendis decem equites suffecerint.

ALLATO in Hispaniam de Valboa nuncio, grauitè mortem eius Indicus senatus tulit propter præclara eius in se officia ac merita, & opes Regi ac Regno Castellæ ab eo paratas, reperto videlicet Australi Oceano, & inde ingenti auri & vnionum copia in Hispaniam missa. Quamobrè tum ob id, tū maximè quòd Antiquenses coloni præter hæc multa ad regē in Petrū Ariam scripssissent, abrogatū ei imperium est: etsi Nominis-dei & Panama

coloniis originis suæ initia dedisset, patefacto ex altero loco ad alterum itinere.

I ETSI enim Niqueſa primus Nominis dei conditor fuerit, & Panamam Indi incoherent: tamen utramque coloniam Arias Hispanis replevit, & quinquaginta millium pass. ſpacio, à mari ad mare iter, ante ſiluis, lamis, rupibùſque inuijs obſtructum, & leonibus, tigribus, urſis & ſimijs infeſtum, primus aperuit.



Hispanorum præſectorum in Indiæ continenti clades. Alſingeri & Georgij Germanorum cædes. Colonia ab Hispanis in Caſtella Aerea condita. Hispaniolenſes Indi Hispanicam tyrannidem pertaſſi, ſibi met ipſi mortem conſciſcunt.

C A P. XXV.

*Avaritia,
vt meretur
inſelix.*



MULTI præterea alij Gubernatores & duces eas Indiæ continentis prouincias adiere, omnes vna quærendarum opum & diuitiarum cupidine incenſi. ſed eorū nonnulli ab Indis comēſti ſunt, alij ab ipſis Hispanis trucidati, quòd ipſorū aduerſus Indos rapinis & latrociniiſ indulgere nollent. Non pauci quoque fluctibus hauſti: & aliqui præterea longius à mari progreſſi auri fame, in mediterranea adeo ſeſe immerferunt, vt in locis auſis & vaſtis terræ ſolitudinibus deprehenſi, quum eius cæli naturam & tempeſtatum morem ac præſagia ignorarent, quæ illis in regionibus cum

cum atrocissimis imbris hieme ruere consueverunt, neque verò progredi ulterius aut regredi possent, cum omni exercitu interierint.

CETERVM Hispani in ea ora continentis infra scriptas vrbes condidere, Nomen-dei, Antiquam, Carthaginem, San-martham, Caput-veli, Valentiolam, ditissimæ prouinciæ oppidum, quam Cæsar anno M.D. XXVIII Velzaris mercatoribus Germanis oppigneravit. Illi primum in eam prouinciā Gubernatorem Ambrosium Alfingerum misere, qui auri reperiendi cupidine crebras in eas gentes excursions, multa sæuitiæ exempla, edidit. Sed eo tandem ab Indis occiso, suffecere alterum stirpis suæ Præfectum, cui Georgio nomen erat. Hunc Hispani qui ei aderant, noctu per insidias incautum in lectulo adorti vulneribus confoderunt: mox excarnificatum & domo extractum, multis cum pro-

Hispani sæuitiam in Germanos in India persequentibus

bris ac contumeliis per viam raptarunt: postremò eius cadauer in proximum saltum abiecere: donec orta luce humaretur. Verùm haud ita multo post, Cæsaris mandatu, noxij vt nouissima exempla meriti, exquisitissimis poenis affecti sunt.

IAM quum breuem hanc meam Historiam quam accuratè & commodè fieri poterit con texere pollicitus sim, redeundum cò vnde deflexeram, & siquæ de Hispaniolæ & vicinarum insularum rebus supersunt, exsequenda mihi hoc loco iudico: Almirante Columbo mortuo, Ferdinandus Rex Didacum filium eius,

*Hispanorū
in Christ.
Columbi
filium in-
gratitudo.*

eadem autoritate auctum qua patrem orna-
uerat, Proregis titulo Hispaniolę præfecit: sed
imperium ei haud diuturnum fuit. Quippe
Hispani, quum sibi imperari à peregrino pa-
ti non possent, multa in eum ad Regem scri-
bunt. Itaque Rex exutum magistratu in Hi-
spaniam reuocat. ibi de suis priuilegiis mul-
tos annos cum Rege litigans, tandem penden-
ti adhuc lite & incerto euētu iudicij moritur.

*Barbari
Hisp. tyrā
nide oppres-
si, vim vitæ
sue affe-
runt.*

P o s t hæc alij Gubernatores, tum Eccle-
siastici, tum laici, in Hispaniolam missi sunt:
sed Insulani, postquam se vndique perpetuis
atque intolerandis laboribus opprimi sentiūt,
neque vllum finem adesse malis, aut spem re-
cuperandæ libertatis, in planctus omnes &
suspiria effusi crebris votis vltro mortem op-
tabant. Itaque multi abiecta omni spe, abeun-
tes in siluas ex arboribus semet ipsi suspende-
bant, interfectis prius liberis, dicendo: Multo
optabilius esse illis semel mori quàm adeo mi-
serè vitam trahere, cuiuscemodi latronibus te-
rerrimis & ferocissimis tyrannis seruientes.
Feminae, postquam herbæ cuiusdam succo fo-
tus sibi ipsæ abegerant, ne videlicet Hispanis
mancipia pàrent, virorum vestigia sequutæ
laqueo vitam finibant. Denique quum per o-
mnes leti vias mortem lacefferent, alius ex e-
dito monte iacto in præceps corpore, alius in
mare, alius in profluentem demersus: nonnulli
etiam voluntaria inedia vitæ finem inuenere.
Erant etiam qui acutissimis è silice cultellis,
aut mucronatis vallis pectora & latera trans-
figerent.

QVIBVS

QVIBVS tandem malis effectum est vt ex duobus Indorum millionibus, id est vices centenis capitum millibus, quibus ea Insula incolebatur, alijs sua manu interentis, alijs sœuitia Hispanorum & acerbitate operum enectis absumentisque, vix hodie centum quinquaginta supersint. Hoc cine est barbaras gentes ad Christianam fidem conuertere? Nam ne quis putet cum aliarum Insularum incolis mitius actum esse quàm cum Hispaniolensib. idem planè in Cuba, Iamaica, Portu-ricco & alijs locis, contigit: immo quæcumque postea vindicandis ab solitudine insulis deportata sunt è continenti mancipia, quamquam incredibili multitudine, ad extremum tamen propè omnia ærumnis & miserijs confecta interiere. In summa hoc affirmo, quibuscumque locis Hispani vexilla sua & signa fixerunt, ibi ingentibus sœuitiæ exemplis editis, æterna implacabilis in se odij monumenta indigenis reliquisse.



Indorum Occid. religio & ritus. Medendi mos.

*Matrimonij leges. Avaritia inde
ocular.*

C A P. X X V I.



QVOD ad Religionem earum gentium attinet, non solum in ea insula, sed & in alijs omnibus noui illius Orbis prouincijs, adorabant atque

*Indicatio
gentium
pertinax
idololatria.*

etiam nunc plures & diuersos deos colunt, depictis simulacris signisque, quorum alia è creta, alia è ligno, nonnulla ex auro & argento, ficta sunt: & quibusdam Indiæ nouæ locis, maxime in Peruano regno, effigie auium, tigrum, ceruorum aliorumque animalium expressa videntur: immo etiam quædam deformi specie, cauda ad pedes usque promissa, quales vulgò apud nos pingi solent dæmones aut lemures nocturni. Ac quamquam sacerdotes & monachi omni ope conati sint & quotidie conentur ea idola abolere, multa tamen eorum sacrorum antistites defossa in specubus subterraneis asseruant. Quibus clam sacrificantes assidue supplicant, petuntque qua ratione & via Christianos in perpetuum è suis finibus expellere possint.

QVIN ETIAM deorum suorum nomine quemque proprio inuocantes, singulis sua officia tribuunt, & huic huius rei, alteri alterius procuracionem, assignant: vti olim factitatum Ethnicis, qui vulgò victoriis præesse terra Martem, mari Neptunum: Æsculapium medicinæ, Herculem diuitiarum atque opum arbitrum esse credebant, illique decimam fortunarum suarum vouebant, quò cetera tueretur atque augetur. Ad eum modum nihil ferè à suis numinibus petunt hæ gentes præter largam ciborum & potus copiam, bonam valetudinem, & de hostibus victoriam. Sæpe numero illis illudit Satan & alia atque alia specie visendum se præbet, sacerdotibus nonnulla eorum quæ precibus exposcunt annuens ac promittens

promittens. Ac si fortè promissis successus non responderit, illique de eo conquerantur, *Satane Libidia, quibus Barbaros fuscinas* continuò excipit: Mutasse se sententiam propter grauissimum aliquod peccatum ab ipsis commissum: ita fallaci excusatione miseros eludit pater ille mendacij.

QUVM Cacicorum Hispaniolæ aliquis præcipuo suo numini sacrum & festum diem celebrare institueret, omnibus subditis & *Sacrorum ritus apud Indos Occid.* clientibus suis, tam viris quàm feminis, diem ad conueniendum edicebat: illi vbi vndique ad solenne illud, consueto loco, confluxissent omnes aptè in ordinem sese disponebant. Cacicus ipse agmen antegressus, princeps templum inibat, vbi sacerdotes adorando idolo intenti erant. Ingressus vt confederat, tympanum pulsabat: mox sequebatur vniuersa multitudo præeuntibus viris, qui nigro, rubro & flauo distincta corpora, versicoloribus etiam psittacorum & aliarum auium pennis ornauerant: colla, brachia, crura, coronis, torquibus atque armillis ex concharum marinarum testis redimiti: feminae puro corpore & nullis pigmētis fucato, virgines quidē prorsus nude: quibus viri erant, peplis aut castulis muliebria velata, sicut in sinu Pariensi & aliis continentis prouinciis fieri solet. Tali cultu habitūque saltantes & patria quædam carmina in laudem Idoli canentes templum subibant: Cacicus tympani sonitu ingredienti saluabat: mox demisso in guttur bacillo vomitum ciebat: vt Idolo palàm ostenderent, nihil

se in pectore mali occultum gerere.

HIS tam absurdis ceremoniis peractis, omnes complicatis pectinatim cruribus humi confidentes, alios quosdam hymnos cum murmure quodam lugubri concinebant: ac tum superueniebat aliud seminarum agmen canistra gestantium, popanis & panibus plena, & rosis floribusque odoratis conspersa: illæ ceteris canentibus circumfusæ orationes quasdam illis insufurrabant. Alij vt inuicem responderent, sese erigebant: donec cantionibus illis peractis, mutato concentu nouam quandam in Reguli sui laudem ordirentur: postremò panem Idolo offerebant¹. Eum sacerdotes acceptum & ritè faciaturum diuidebant inter omnes, velut sanctum aliquid, & fausti ominis reliquias. Peraçto sacro, omnes admodum alacres atq. hilares domos quisque suas reuertebantur.

*Absurda
de solis &
Lunæ origi-
ne opinio.* CREDEBANT præterea Solem & Lunam è quodam antro prodiisse: & cucurbitam velut sacrum monumentum habebant, vnde dicerent mare & pisces profluxisse: Duo simulacra lignea colebant, velut omnis abundantia largitores & præsidēs deos, quorum delubra quotannis Indi peregrinabundi frequentare consueuerant.² Erat insuper illis Idolum quadrupes instar canis, quod (vt fertur) quoties illi bilis commota erat, in saltus ac montes aufugeret: ipsi verò sollenni pompa, sollicitè quæsitum atque inuentum, humeris in fanum reportabant.

IN hac Insula, vt & aliis noui eius Orbis prouinciis, arbutta quædam nascuntur modicæ magnitudinis, arundinum fermè specie: folia vt nucis habent, aut paulo maiora, quæ ab indigenis (apud quos hic mos inoleuit) plurimi sunt, & ab ipsis quoque mancipiis, quæ Hispani ex Africa eò deuexere. Vbi maturum est, ea folia stringunt & in fasciculos collecta ligatæque in fumario suspendunt, donec inaruerint: quumque illis vti volunt, spicæ patriæ folium vnum eius herbæ vni folio innectunt, eaque simul fistulæ aut tubi instar compingunt: & eius capitum altero igni admoto, alterum ori inferunt, & spiritum flatumque ad se retrahunt.

DENIQUE tantum fumi sorbent, vt ora, guttura & capita impleant: tantam interea patientiam præstantes durantésque quoad voluptatis quam inde percipiunt non pæniteat: seque immiti illo fumo adeo inebriant, vt penitus sopito omni sensu è mentis potestate exeant. Reperiuntur etiam qui adeo auidè ac furenter eum hauriant, vt tamquam exanimés in terram concidant, ibique maximam diei partem aut noctis, velut stupefactis sensibus & capti mente, iaceant. Nonnulli temperantius & hætenus tantum sorbent, quoad vertiginè capitis corripiantur: neque vltèrius progrediuntur. Quàm pestiferum, obsecro, & noxium hoc Tartareum venenum est? Mihi quidem persæpe vsuuenit per Guatimalam & Nicaraguam prouincias iter facienti, vt domum Indi alicuius ingrederer,

Fumus inobrians.

qui eam herbam degustasset (quæ Mexicano idiomate *Tabacco* dicitur) & simulac fœtor acutus tetri illius & verè diabolici fumi nares meas cõtigisset, cogerer præproperè inde excedere, & aliò migrare.

Medici ijdem & sacerdotes apud Indos. IN Hispaniola atque aliis insulis, quum eorum medici aliquem ægrotum curandum susciperent, ad fumigandum, vti diximus, ingrediebantur. Quumque eo ad satietatem inebriatus esset, tunc præcipua curatio fiebat: donec ad se reuersus mille rerum species sibi obiectas, & se ex concilio deorum rediisse referret. Deinde illi ægrotū ter aut quater circumeuntes, corpus illius, maximè renes, manibus leniter demulcebant: multiplici interea oris habitu gestūque, os lapidē in intra buccas tenentes. ea ossa & lapillos feminæ, velut sacras reliquias, studiose condebant, persuasæ iis amuleti adiuuari puerperia. Si æger medicum rogaret, quid se futurum esset, breui ægritudine liberatū iri respondebat: si fortè ex eo morbo eum mori cõtingeret, non deerāt excusationes, sed hæc longè omnium optima, Mortalis nempe erat. Siquis medicus omisis illis rebus & consuetis ceremoniis ægrotum inuiferet, in eum grauissimè animaduertebatur. Quasunque provincias adire mihi licuit, quantumque intellexi, iidem medici sunt & sacerdotes: & in aliis earum terrarum oris ita se habere faciliè equidem crediderim: eos patrio idiomate *Bohitios* appellant, maximæ vbiq; illos autoritatis: quorum tamen opera & arte nulli ferè, præter primores, vtuntur.

APUD illos vxorum indefinitus est numerus: quàm multas libuit, ducunt: vnam tamen præ ceteris eximiam habent, quæ in ceteras *Indorum* imperium obtinet. Quum Regulus aliquis *Occid. por-* ne liberis moritur, in principatum succedunt *lygamia.* sororum filij non fratrum, quum sui sanguinis haud dubiam stirpem planius constet esse quos sorores peperere, quàm hos non satis certa origine genitos. Cuius rei causa est, quòd illis parua pudicitiae cura & plerisque locis filiae & sorores inuiolatam castitatem vix retinent, quum permixti virginibus pueri, vt galli gallinacei cum gallinis, nullo pudore tum humi, tum suspensis in aere cubilibus, iaceant. Feminae partus enixæ, ad mare aut ad flumen deferunt, abluuntque, & deinceps sine vlla cura liberos educant.

NONNULLI istos maximè latrociniis deditos esse, ac minima furta legibus eorum suspendij pœna coerceri dicunt.³ Verùm quis credat istos furari, quando neque auari sunt, neque diuites, nihilque vilius ducunt quàm argentum & aurum? quibuscumque si habere libitum esset, liceret quantum vellent è fodinis, velut aquam è fonte, nullo impediante petere. Quod ad cultum attinet, nudi omnes incedunt: quod ad victum, nemo est qui petenti & domum suam ineunti vltro non det. In sollennibus verò ac festis quibus conuenire illis mos est, cibaria vulgò conferunt, simulque omnes & promiscuè epulantur, cantant & saltant ad ebrietatem & lassitudinem vsq. Ita dum liberi essent, inuicem se his ludiciis *Indi. neq. auaritie, neq. furto dediti.*

oblectabant. Quamobrem inducere in animum non possum vt credam vlla inter eos esse latrocinia, nisi fortè furari didicerunt à primis, secundis & tertiis Hispanis, qui principio eas terras coloniis occuparunt. Vtinam à Deo nobis concessum esset, ne magis bonis temporalibus affixi essemus quàm illi sunt: equidem Christianum nomen per omnes terras celebre & cæleste esset, si à nobis exularet Auaritia.

I VETERIS & purioris religionis fugientia veluti quadam vestigia & imitamenta. Iussit Deus in lege offerri sibi panes, vt eo symbolo admoneret Patres alimenta quibus sustinetur hominum vita, sacra esse ipsi Deo. Exod. 25. Atque ita primi homines, tradito diuinitus ritu, è fructibus suis sacrificia Deo obtulerunt, vt profiterentur se eius esse, & omnia illi sua accepta ferrent. Genes. 4. Cuius rei mox adulterina imitatio etiam inter barbaras Gentes propagata est. Sed, præterquam quòd illæ erant inanes absque fide ceremonia, longè aliud est Deo viuo, aliud idolis sacrificia offerre.

2 REGVLVS quidam, Gamaretus nomine, Zemis idolum bombycinum habuisse fertur (Corocottum appellabāt.) Hic Corocottus è summo domus culmine, vbi vinctus asseruabatur, sæpenumero exire atque inter feminas regis pagi ac totius circa viciniae, Satyri aut Incubi instar, oberrare, & cum ijs etiam ludere familiariter, epulari & coire, consueuerat. Mox quum ab eo congressu femina partus gemina corona aut alia illustri nota insignes eniterentur, nemo ex Corocotti stirpe or-


eos esse dubitabat. Interdum etiam indignabundum delitescere ferebāt, quòd à Cacico aliquid ex quotidiano eius cultu & sacris pratermissum esset. Alteri praterea cuidam Cacico (ut serè singuli peculiaria numina habebant) Zemen fuisse lignèū memorant, quadrupedem (Epilguanitam appellabant) qui subinde, quoties irritaretur, in siluas se proriperet. Moxque ut eum abesse senserat Cacicus, multos è suis mittebat qui eum studiosè conquisitum & placatum venerabundi humeris referrent. Ita nimirum inter miseras illas Gentes delicias faciebat Satan. Donec Christianis in Insulam aduentantibus, & iste & ceteri Zemes aufugerent, nec quesiti reperirentur. Quibus rebus mutationem status & peregrina gentis dominatum portendi auguratos fuisse Insulares, scribit Petrus Martyr Mediolanens. Decad. i. lib. 9.

3 Gonz. Oniedus Histor. Ind. lib. 5 cap. 3. ita scribit: Grauiſſimum peccatum, & à quo huius Insula (de Hispaniola loquitur) indigenæ vehementius abhorrerent, quòdque acerbius vindicarent, furtum erat. Itaque vel minimo in furto deprehensus, adactò per medium corpus stipite (familiari Turcis supplicio) ibi affixus tandiu relinquebatur, quoad inter cruciatus vitam finiret.

Haftenus Oniedus, cui suffragatur Gomar. Hist. gener. lib. i.

*

h. iiii.



*Indorum Occid. fruges. Panis faciendi mos.
Potus. Pomorum & fructuum
variae species.*

CAP. XXVII.

*Sementis
faciendae
in India
ratio.*



E GENTES frugem suam vulgò *Maiz* vocant (quæ ab Insula Hispaniola, prima à Christianis reperta, conuechitur) vt vinũ Chichia: lintres Canoas: enses Macanas: regulos Caciccos, nominant. Ad sementes faciendas terram non arant: sed modicæ altitudinis scrobibus effosis, tria quatuorve grana in vnam demittunt, terræque operiunt. Singuli culmi tribus quatuorve paniculis onusti adoleseunt, quarum singulæ grana centum & amplius fundunt. *Maizij* scapus hominis altitudinem exsuperat, & quibusdam in prouinciis bis in anno colligitur.

Panis faciendi mos.

FEMINAE pistrices, quæ *Maizij* coquendi curam habent, prius sub vesperam frigidæ eius frugis quantæ visum est mensuræ affundunt: ita maceratam, manè sequentis diei duobus silicibus paulatim tundunt & frangunt, quædam erectæ in pedes, quædam flexis humi genibus: sedulo interea cauentes nequid pilorum aut pediculorum in opus decadat. Massa confecta, postquam aqua paulatim consperferunt, panes modicos aut longa aut rotunda figura vt libet faciunt, & foliis arundinum.

dinum inuolutos, rursusque leuiter asperfos, coquunt. Hic vulgaris panis est, & post duos dies mucescit.

NOBILES verò ita parato vescuntur: Maizij grana in pilis feminæ tundunt & frangunt: mox aqua calida macerata ita folliculis deglubunt vt solus farinæ flos remaneat. Eam quoad fieri potest subigunt, pinsuntque, & massa confecta atque in pastillos distributa, liba aut farracea modica conficiunt: quæ testo rotundo imposita lento igne percoquunt. Genus id testuacei panis operosum est, quum recenti subinde sit opus: atque vt calidus, ita vetus & frigidior, parum utilis sit: medio verò temperamento salubris, quum neque nimium recens nec vetus est. Quum per earum terrarum inculta & deserta iter facerē, necessitate magistra pinsere id frugis genus didici, ne illud videlicet crudum aut tostum deuorare cogerer. Sed durissimi eius grani pistura molituræque immensi laboris est: ac quum sæpe ad satietatem mihi non superesset, Indorum nobilium more corticem non eximebam, neque verò ad illud multum pinsendum lacerti mei fame debilitati pares esse poterant.

ALIUD etiam genus panis habent, quod Cazabi vulgò appellant. Id ex Iucca conficitur: radix est napi crassitudine, quæ nullum ex se semen fundit, sed cannas tantum quasdam nodosas & solidas, viridibus foliis, vt cānabis. Eas cannas, vbi maturitas adest, in taleas duos palmos longas exsecat, quas in tumulos quosdam (Conuchos appellant) digestas, terra

*Cazabi,
secunda-
rius panis
Indorum.*

obruunt. Ex illis intra biennium radices miræ amplitudinis crescunt: quoties verò id genus panis conficere volunt, earum radicum quantum visum est eruunt, paucas tamen vnaquaque vulsione, quia breui corrumpuntur. Mox purgatas, acutis filicibus, quos ad litus maritimum legunt, velut cultellis, exsecant: ac ex iis segmentis panno inuolutis succum exprimunt (id præsentaneum venenum est, si bibatur) deinde Iuccam ita subactam inferentes foco, ingenti testæ fictili, velut libum faraceum, impositam igni tamdiu torrent quoad omnia cohæreant. Postremò inde sublata massam ad solem exsiccant, eamque in modicos & maiores veluti pastillos distribuunt.

Id cibi genus, meo iudicio, admodum asperum atque infelix est: si loco sicco & sudo recondatur, tres quatuorve annos incorruptum durat. Sed ferè quum estur, guttur humore aliquo collui necesse est: alioqui propter asperitatem fauces angit atque ægrè deglutitur. Mihi quidem quum eo sicco & minimè humecto vterer, videbar terram mandere: si iure carniū diluatur, iucundius est, sed ne ita quidem multò melius. Omnes naues quæ ex Hispania in eas oras traiciunt, reddituræ eius panis commeatu onerantur, præter eas quæ à Vera-cruce, nouæ Hispaniæ portu, soluunt: siquidem in omnibus Septentrionalis Oceani oris, insulis & prouinciis quæ ab Hispanis incoluntur, ne vnum quidem frumenti granum colligitur. Nauigia verò farina &

" De eo
 mari vide
 supra pag.
 104.

& biscoctis seu nauticis panibus instructa è Mexico veniunt: atque inde ducentorum ferme millium spacio mulis & carris varias in partes exportantur.

Dvo præterea radicum genera illis sunt, quarum alias Battatas alteras Haias vocant, *Battata et Haia radicum species.* indiscreta propè specie similes, nisi quòd Haiæ minores & sapidiores sunt alteris. Porro plantantur, & sextum intra mensem fructum edunt: ceterum sapore quidem aliquantulum dulci, sed satietatem mox & fastidium inducente, exigui etiam admodum succi sunt, ventosque ac superuacuos flatus gignunt: & vulgò sub prunis coctæ edi solent. Sunt qui dicant eas radices panem sacchariten (vulgò Martium seu Marzapanem vocant) aut castaneas saccharo conditas gustu repræsentare: verum mei palati iudicio, vel sine saccharo meliores sunt castaneæ.

QVANDO in eum sermonem de Indico pane incidi, haud alienum erit de eorum quoque vino agere, ac præsertim de eo potu quem ex Maizio moliuntur. Feminæ illæ panificæ, de quibus antè, eius frugis quatum visum est pro modo vini quod facere instituerunt, capiunt. *Indici potus conficiendi ratio.* Id ubi triuere & pinsuere, in ampla quædam vasa aquæ plena demergunt: tum illæ quæ potus eius faciendi curam habent grana aliquot depromunt, & in ollâ infusa aliquantulum macerant atque emolliunt: mox aliis feminis quibus id muneris commissum est, tradunt. Illæ ea grana in os accepta, paulatim conficiunt, comminuantque. deinde vi quadam & veluti tussiendo excussa

folio ad id comparato aut fortè scutella exci-
piunt: tum in amplū vas coniecta reliquo hu-
mori admiscant, nempe ꝓ sine hoc velut fer-
mēto nulla ei cæliæ vis inest, & tres quatuorve
horas igni sufferuefaciunt: postremò inde su-
blatum liquorem postquam deferbuit, refri-
xitque, linteolo colatum in vasa infundūt, ita
perfectum ac temperatum vt non minus suc-
cus ille quàm verum vinum inebriet.

*Æne agre-
stes apud
Indos.*

ALIA præterea potus genera excogitarūt
ex melle, pomis, radicibus, sed quæ, vt hoc,
non inebrient. Magnam etiam arborum vim
habent eæ terræ, quæ vuas quasdam agrestes
ferant. earū acini, prunorum siluestrium spe-
cie quæ è spinis & arbuſtis nascuntur, nigro
folliculo vestiuntur: sed quia multum illis li-
gni, parum pulpæ, inest, ex iis indigenæ vinum
non faciunt. Sunt & ibi arbores oliuarum
feraces, sed quæ insuauis odore, tum sapore e-
tiam peiore sunt.

*Varie po-
morum &
fructuum
species.*

VARIAS fructuum species, & eas abundè
habent: quales sunt Houi, Platani, Pineæ,
Guaiaua, Mamei, Guanauanæ. Houi pruno-
rum damascenorum crassitudine, pauca car-
ne, grandiore ligno: vbi maturuere flauescunt,
subacidi saporis. Arbor cum fructum ferens,
magna est, folia verò modica. Platani longio-
res quàm crassiores sunt: minores multum
maioribus præstant. Arbor ipsa folia sesqui-
palmi latitudine, quatuor palmorum lon-
gitudine porrigit: inter quæ ramus enasci-
tur, qui centum ac plures platanos minores
fundit: sin verò maiores, viginti quinque aut
paulo

paulo amplius. Tenera est hæc arbor, nec nisi semel fructū fert qui annuo spacio perficitur: & ex ipsis radicibus alij stolones fruticāt. Vbi maturuit fructus, legunt: immaturū adhuc & acerbū non decerpunt, sed excissam arborē loco calido reponunt: ibi platani celeriter maturescunt flauescuntq. Corio vestiuntur obtusa cultelli partis crassitudine: quod superest, pulpa est, sapore in dulcedinem vergens. ¹ Pincæ arbusculis quibusdam proueniunt, flauī coloris vbi maturuerunt, iucundi odoris, & saporis longè optimi. Itaque in deliciis sunt: mihi certè contigit, sicut & multis aliis, vt æger ceteros omnes cibos fastidirem præter hunc: &, mea quidem sententia, haud quisquam fructus alius per omnes terras hoc amabilior suauiorque est. Demto cortice, quidquid subest pulpa est: dulcis in vniuersum sapor, subaustero aliquantulo temperatus.

GVATIAVVS arbor Persici aut Armenij specie, foliis vt lauri, sed crassis & lōgioribus, *Arbores frugifera* celerrimè senescit: fructus eius, mespili similitudine, sed multo crassior, pendens in arbore maturescit: nisi maturus decerpatur, vermes gignit. Hi fructus multa semina & grana clausa habent: purpurei candidis præstant & optimi saporis sunt. Mamei arbor est mediocris nucis magnitudine, lōgiore quàm latiore folio. fructus eius in insula Hispaniola rotundi: in continenti verò longi & crassiores, & gustu iucundiore, sunt. tres quatuorve acinos, seu interiora ligna, habent, pulpa in spadiceum *Indica, nobis ignota.*

colorem vergente, tenui tunica; sapore aliquantulum dulci.

GVANAVANVS arbor modica & gracilis, fructum fert cordis effigie, corio viridi & subtili squamarum in morem vestitum, introrsus candidum. Exstant etiam, paulo diuersæ ab his formæ, orbiculares eius arboris fructus, crocei coloris & prioribus illis longè meliores, omnes verò intus acinos exiles spadiciei coloris gerunt.

I PINEA, fructus Indici genus, specie, odore, & sapore omnium longè nobilissimum: cardui altius, aut nucis pineæ figura, unde nomen accepit: mediocris melonis crassitudine. Odorem ex se fragrantissimum fundit: gustum mali cotonei, persici, & pyri muschati, simul referens. Estur sublato illo, quo, veluti strobili, squamatim compacto, (quamquam non ligneo) cortice includitur. Gonzall. Ouiedus *Historiæ Indicæ* lib. 7. cap. 13. Eundem planè fructum esse puto cum eo quem Brasilienses Indi Ananas vocant, quantum ex descriptione D. Ioannis Lery, amici mei, colligo. *Historiæ Nauig. Brasiliensis*, nuper ab eo Gallicè edita, capite 13.

Indicæ



*India Occid. peculiaria injecta. Hispaniolæ brevis descriptio.
Cur vino & tritico propè inepta sit. Sacchari ferax est.
Mercaturæ, quæ hodie ibi exercentur.*

CAP. XXVIII.

IN omnibus suprà memoratis insu-
lis nullum quadrupedum anima-
lium genus repertum est, præter
exiguos quosdam cuniculos, cani-
bus haud absimiles. Sed pestiferis insectis
maximè infestantur: inter alia Niguæ, magni-
tudine pulicis, citra vllum sensum inter car-
nem & vngues, præsertim pedum, sese immer-
gunt, alunturq. in puluere. Sæpenumero ac-
cidit vt nullus ex iis dolor sentiatur, donec in
magnitudinem cicerum aut lentium excreue-
rint: ac tum iam ingenti lendum copia fruti-
cante, acu aut spina agrè euelluntur: atque id
mali cineribus calidis sanatur. Porro Numi-
dicâ mancipia, quæ Hispani in familiis ha-
bent, quòd non habeant vnde calceis pedes
muniant, ea pestis peruicacissimè infestat:
tantâque copia eorum pedes appetit, vt nulla
cura aut arte, præterquam igni aut ferro,
arceri queant. Itaque multi ex eo digitis pe-
dum aut pedibus integris mutilatis superfue-
re. Ego verò etiam in ea Peruani regni pro-
uincia, quam Portum-veterem appellant, præ-
terquam quod, propter immodicos labores
terra marique perpeffos, totum corpus &
crura fœda porrigine obsessa agrè trahe-
bam, sæpe intra pedes meos tantam vim

*Indici pu-
lices, in-
festi &
noxij.*

Niguarum istarum reperi, vt necopinata ea res non parum formidinis mihi incuteret. Ac certè, nisi summa sollicitudine abluendo corpori flumina subinde adiissem, malè haud dubiè rebus meis prospexissem: quemadmodum plerisque Hispanis vsuuenit, qui ter quaterve in die abluendi aqua corporis & eluendæ eius pestis pigritia, exesa mox & truncata membra circumtulere.

*Hispaniola
descriptio.*

I A M à me suprà dictum est, insulam Hay-tin ab Almirante Columbo Hispaniolam dictam fuisse: quæ mille & ducenta millia passuum in circuitu patet. Ea portubus, fluminibus, piscibus & sale abundat: sed in ea duo celeberrimi lacus, vnus falsas, alter dulces aquas egerens. Ceterum omnium fluminum quæ ab Hispanis in ea insula reperta sunt, vnus maxime auro abūdat Cibaús. Præcipua insulæ vrbs San-dominica est, à Bartholomæo Columbo condita, & ab eodem ita appellata, quòd quum litora insulæ perlustrás tutum aliquem & commodum portum appulsis eò ex Hispania nauibus quæreret, ad eum fortè locum S. Dominici die applicuit: atque ex eo tota etiam insula San-dominici nomen retinet. Sita est ea vrbs in planicie maritima, & meo tempore quingentis focus & domibus constabat. Ædificia ibi bene structa neque aliter quàm in Hispania sunt. Ad Occidentalem eius partem "Ozonea fluuius in mare delabitur, atque ibidem bonus & tutus portus est, ac multarum nauium capax: ibidem profundissimæ & latissimæ filuæ: in circuitu mille & ducenta passuum

*"Oxamam
aliq vocāt.*

passuum millia excedēs, latitudine ducenta & viginti implet. Arcticus polus ei gradus xxii. & dimidium: Antarcticus vnde viginti & paulo amplius, eleuatur. Longitudo eius ab ortu in occasum porrecta sexcēta circiter passuum millia patet: & totius in vniuersum insulæ forma folij castaneæ figuram exprimit.

NON NVLLI dicunt in ea insula frumentum faciliè nasci, parum tamen colligi propter nimis luxuriantem vbertatem foli: deinde abundantia Maizij & indigenarum frugum fieri vt de seminando tritico non multum laborēt Hispani. Verùm ego dico, ibi nec parū nec multum frumenti colligi. Atque huius rei causam quum ex Hispanis quibusdam natu grandibus sciscitatus essem, responderunt mihi, Immodicis caloribus fieri vt generandis nostris frugibus illud solum ineptum sit. atque id toti insulæ commune est. Principiò quidem, quum primùm ab Hispanis incolæ cœpta est, coloni aliquot in montibus Cibao vicinis paululum frumenti seminarunt. Inde, quòd planis locis montana frigidiora sunt, circiter medimnos quatuor retulere: sed quia in asperis illis & mōtosissis saxetis agricolarum cultus cum vberissimo prouētū elaborare non poterat, in iis sementem facere deinceps cura non fuit. Itaq. ex Hispania farinæ annonā sibi prouidēt, quæ folliculis & cadis cōuehitur. ac si fortè tardātibus nauib. panis defecerit, Cazabi Indico pane vesci Hispanos colonos necesse est, quum non multā Maizij copiā seminare soleant ob aduectitiæ illius farinæ spem.

*Comara
Hist. Gen.
lib. 1. ca. 35.*

*Cur Indicum solum
frugibus
nostris in-
eptum sit.*

Vites in Hispaniola agere coalescunt. E A R V M arborum quæ ex Hispania eò transportatæ sunt, paucæ coaluerunt: Maius Punica videlicet, Aurantia, Citria, Medica, & aliquot fici duntaxat. Vites ibi plantatæ exiguas quasdam vuas malignè fundunt, quarum libra dimidio ducato æstimatur. Ipse Didaci Equitis secretarij vineam vidi multis vitibus & palmitibus confitam: quam quum vel optimè coleret, vix ad XL. vuarum libras colligebat. Ac ne ipsi quidem botri admodum iucundi saporis sunt, & ferè Febuario & Martio vindemiari solent. Æstatis enim initium à Ianuario vsque ad exitum Aprilis: Hiems incipit à mense Maio, Decembri desinit. Neque

Qualis hiës in Hispaniola.

ea tempestas anni Hiems dicitur, quia tum frigus ingruat: sed propter imbres continuos. alioqui enim æstate ipsa calidior est. Quippe tum remittentibus ventis, terra humidi calidique vapores exhalant, & multos morbos afferunt. Æstate contrà insulam Aquilones continuè perflant, perpetuæque cæli serenitas conspicitur.

H O R T E N S I A olera, quales brassicæ vulgares & capitatæ, raphani, lactucæ, cucurbitæ, & melones, magna copia ibi luxuriant: sed cepæ & allia vix vnquam bona euadunt. Itaque eorum olerum vim magnam naues ex Hispania deuehunt, cum aliarum rerum com meatu, id est fabis, ciceribus, lentibus, amygdalis, nucibus, ficis, vuis passis, oleo, oryza, melle, caseo, ampullis, catinis, scutellis, aromatatis, pannis, sericeis, aluta, vino, pane biscocto, aliisque eiusmodi rebus quæ ea tellus

tellus non fert.

IBIDEM omne genus quadrupedum, pecudumque ex Hispania transuectum ad propagandam stirpem, magno prouentu sobolescit: & Hispani nonnulli sex octóve millia animalium in pecuariis atque armentis possident. Quàm multa visum est eorum cuilibet in suum vsum mactare licitum est, modò pelles ad dominum referat.

IN ea præterea insula magna Sacchari copia fit, ac dum ibi commorarer triginta quatuor machinæ siue torcularia eliciendo saccharo occupabantur. Duæ quidem hæ res Saccharum videlicet & Coria, seu pelles, præcipuæ sunt eius insulæ merces: ac mercatores qui hodie ex Hispania eò nauigant, redeuntes nihil ferè præter hæc inde reuehunt. Quippe Hispani effodiendis metallis, argento & auro, adeo feruidè incubuerunt, vt vix iam granum vnum reperiatur, & maximi precij moneta, quæ hodie in San-dominici oppido percutitur, quatuor tantum marauedis valet, id est solidum nostratem. Itaque si mercatoribus aurum & argentum comparare libeat, ex eo licet quod nunc tantum è Peruana & Cap-fondrensi prouinciis, aduehitur à negotiatoribus, qui ad equorum, mancipiorum, & mulorum mercatum in Hispaniolam veniunt: ex eo, inquam, auro possint emere, nisi intertrimentum ingens & iactura eos à tali mercatu deterreret. quippe² ducatus ex auro puro putoque duorum alterius monetæ premium æquat. Itaque non aliis ferè mercibus quàm

*Hispaniola
sacchari
ferax.*

*Negotiatorum in
Hispaniola
mercatura.*

*Aurum iam
rarum in
Hispaniola*

coriis, saccharo, casia, & ³ Guaiacano, id est ligno sancto, naueis onustas reuehunt.

1 **HOBVS**, seu *Houus*, procera & pulchra arbor: umbræ quidem salubritate adeo commendata, ut quoties Indi in militiam aut peregrè euntes, aut greges in pecuariis pascētes, cubare sub dio necesse habent, *Hobum* semper, umbræ tantum gratia, expectant & querant. quippe sub ea dormientibus caput nunquam grauari, ut aliarum arborum umbraculis, ferunt. Mirum præterea de hac arbore proditur. Si fortè in squalidis siccitate cāpis, aquarum penuria peregrè euntibus sitim accenderit: atque illi casu in *Hobum* inciderint, ablaqueato arboris pede, è radicibus eius taleam excindunt. Mox alterum taleæ caput ori inferentes, velut gutti aut ampullæ epistomium, altero manu elato, tantam inde humoris vim exsugunt, ut facillimè sitim restinguant. Guttatim videlicet primò inde stillante aqua, mox tractim & continuo veluti filo defluente, ut quamuis sitibundos expleat. Id se expertum scribit *Ouiedus Hist. Ind. lib. 8. cap. 2.*

2 **AVRI**, etiam in illis terris, raritatem hodiernam & precium his verbis designat. Quum enim aurum primæ notæ (quale illud Peruanum est) ignobilioris notæ moneta (qualis est nostra) non pari pretio, sed ferè duplo contrà rependatur, nihil lucri aduentitij facere possunt mercatores ex auro illo promercali, carius videlicet emto, sicut ex aliis mercibus.

3 **GVAIACAN**, à nostris lignum Indicum, seu lignum Sanctum, ob mirabiles effectus, dictum: magna est arbor, Ilicis magnitudine, ramosa,

ramosa, matrice magna, nigricante, materie quàm
 Ebenum duriore: cortice crasso, gummoso seu pin-
 guis, & quum siccum est lignum, facile decidente:
 foliis exiguis & duris, flore luteo, quem subse-
 quitur fructus rotundus, solidus, semina in se con-
 tinens Mespili modo. Frequens in insula San-
 dominici. Eius usus primum ea ratione innotuit.
 Magnis doloribus luis Indica (malo enim sic vo-
 care quàm, ut nonnulli, Morbum Gallicum: quādo
 hæc lues primum ex cōsuetudine Hispanorum cum
 Indicis mulieribus, mox Italorum cum Hispanis,
 orta est: unde mox in Germanos quoque & Gallos
 mali contagione serpsit) eo ergo morbo, quem ab
 Indica concubina contraxerat, Hispanus quidam
 torquebatur. Eius famulus Indus, in Hispaniola
 medicum agens, aquam Gayaci illi propinauit, qua
 non solum magnis illis cruciatibus liberauit: sed
 pristina etiam sanitati restituit: eius exemplo, plu-
 rimi alij Hispani simili morbo infecti, curati sunt.
 Eius morbi cura Hispani statim euulgata est, ab iis
 qui ex ea insula redierunt. Hinc per totam Hispani-
 am, & inde per vniuersum orbem quem hæc sca-
 ties occuparat. Hodie passim in pratulis & viri-
 dariis Cœnobiorum cum virilium tum mu-
 liebrium plantatur, ob frequentia
 iis in locis pruriginis & por-
 riginis venerea contagia,
 ex voto perpetue
 castitatis.

*

i. liij.



SECUNDI LIBRI SUMMA
ET ARGUMENTVM.

SUPERIORE libro repertam à Columbo Hispaniolâ aliâsq. Indiæ Occid. insulas seu itieq. & auaritiæ exēpla ab Hispanis in iis edita, Benzo exposuit. Nunc ut ex Insulis in Continentem gradum sibi fecerint, cœptum iam priore libro opus, pertexit. Interea obiter, quomodo non tantum auarè & superbè imperium in Barbaros, sed etiam crudeliter in Nigritas seruos suos, exercuerint: & ipsi vicissim, alienarum fortunarū raptores, aliis raptoribus, Gallis videlicet, præda interdum fuerint, exponit. Multas præterea in varias Indiciæ continentis prouincias expeditiones ab Hispanis susceptas exsequitur (verbo, ut Christiani nominis finis propagarent: reipsa, ut inexplebilem auri sitim, qua ardebant, explerent) atque inde pœnas in eos humanitus & calitus congestas. Postremò nihil tot Hispanorum laboribus profectum esse perspicuè docet: nisi ut Barbari splendida verba & doctrinam cum rebus ipsis & vita Hispanorum, & ipsorum quidem Ecclesiasticorum, componentes, Christianos omnes, & fidem adeò ipsam, summo Diuinæ maiestatis & Christi gloriæ ludibrio, vel rideant, vel oderint.

NOVAE



NOVAE NOVI ORBIS HISTORIAE,

LIBER SECVNDVS.

*Hispani Indicis mancipijs consumtis, alia ex Aethiopia inde
vsque adsciscunt. Seruiles tumultus in Hispania
ex seuitia Hispanorum oriuntur.*

C A P. I.

EX quo eius insulae indigenae, nimis enecti laboribus, ad miserandam cladem & paucitatem labi coeperunt, Hispani è Nigritarum prouincia quondam à Rege Portugalliae subacta (vulgò Guineam vocant) mancipia sibi prospexere. Ergo magna inde seruorum multitudine aduecta, quum exercerentur adhuc fodinae, illis ad aurum & argentum elaborandum operis utebantur. Verum ubi illae finem inuenere, ad multiplicandas sacchari fabricas artificiaque se conuerterunt. In eo hodie sese exercent, tum in armentis ac pecuarijs curandis aliisque necessarijs ministerijs operam heris suis praebent.

*Hisp. seru-
is, non mi-
nus quam
liberis ho-
minibus,
crudelissi-
me abutun-
tur.*

PORRO quando inter Hispanos non crudeles tantum sed crudelissimi quoque nonnulli reperiuntur, quum eiusmodi forte aliquis

*Avaritia
comes cru-
delitas.*

in feruum animaduertere vellet siue ob admissum maleficium, siue ob non lucrifactum & redditum diarium, vel quacunque alia de causa bilem illi mouisset, vel ob pensum non peractum, nec eam auri aut argenti vim effosam, quantam solebat: vesperi domum reuertentem, loco cœnæ, exuei e indufium iubebat, siquo fortè esset amictus: & in terram prostratum, manibus pedibusq. reuinctis transuerso ligno alligabat (id ab Hispanis Lex Baionæ appellatur, quam equidem legem ab immani aliquo dæmone scriptam crediderim) mox recte aut scutica tantisper cædebat, donec sanguis ex omni corporis parte deflueret. Sub hac libram vnā picis feruefactę aut olei feruentis scutellā vnā guttatim in vniuersum miser corpus instillabat. inde pipere patrio, sale & aqua temperato, perfusus infelix mastigia, tabulæ alicui superiacens, & linteo aut stragulo inuolutus, tamdiu relinquebatur quoad ipsi hero reddi laboribus posse videretur.

ALIIS scrobe effossa, mancipium eò tam altè demittunt vt solo capite ab terra exstet, & totam ibi noctem consistere cogunt. ceterum ea se medicina vti dicunt Hispani, quòd terra liuidum & corruptum sanguinem exsurgens, verberum vulnera & vibices obliterat, carnemque conseruans nequa plaga vlceretur, celerius persanat. Attamen si quis vehementia doloris fortè moriatur (vt sæpenumero accidit) non alia pœna multatur eius herus ex legibus Hispaniæ quàm vt pro eo alterum Regi persoluat.

OB tam immanem Hispanorum sæuitiam Nigritæ serui aliquot principiò è potestate *Domestici* dominorum elapsi, insulam peruagari, velut *hostes ad-* desperabundi, cœperunt. Mox eandem ob *uersus Hi-* causam affluentibus vndique aliis, in tantam *spanos coop-* multitudinem excreuerunt, vt Hispanis colonis terrorem & multa negotia facefferent. Ac quia reges & populi Æthiopix assiduè inuicem certaminibus hostiles inimicitias exercent, quales sunt Quinei, Manicongri, Gialopi, Zapi, Berbesi, & belli iure captos mutuò alij alios Lusitanis vendunt: idcirco in illis etiam terris intestino aliquo odio alteri ab alteris dissident, non ita tamen vt ipsi se aliqua iniuria mutuò violent: immò si fortè ab Hispanis vis inferatur, inuicem sese auxilio subleuent & alij pro aliis propugnent. Attamen singulæ gentes Reges suos aut gubernatores habent, qui secretos ab aliis populos suos continent: qua ex re fit vt non tantum damni Hispanis inferant, quantum possent, si consociatis in vnum animis viribúsque pugnarent.

AT Præsides & Adseffores insulæ quum in dies magis ac magis Maurorum fugitiuorum manum multiplicari intelligerent, & quocumque Hispanorum in eorum manus inciderent, omni cruciatus genere ab iis lacerari atque interfici, exercitum conscribere instituant, pèrque omnes insulæ partes, quacumque isti commorabantur, militè spargere. Ac primò Hispanis incepta feliciter procedere: quippe Mauros aliquot, spe libertatis ac pro-

missis illectos, qui fugitiuorum statiuæ & receptacula nossent, ducendo secum in agmine noctu incautos adoriebantur: quumque sine ullo metu hostium dormientes & humi velut pecora fusos ac solutos opprimerent, multos vel capiebant vel trucidabant. Verum posteaquam periculis moniti excubias agere & vigili statione castra tueri cœperunt, omnibus ferè excursionibus ac præliis Hispani inferiores abiire: atque exinde aucto in immensum numero feri isti homines adeo multiplicati sunt, vt quum in ea Insula morarer, pro certo fama ferret eorum agmen plus v l. millibus hominum constare.

*"Christ. Co
lumbi ne-
pos.*

A N N O quidem XLV. quum in continenti essem, auditum est Cimaronos (sic ab Hispanis alienigenæ illic vocantur) vniuersos sumtis armis excitos rebellasse, raptimq. omnem Insulam peruagantes nullum iniuriæ aut sceleris genus, quod edere possent, prætermittere. Itaque Lodoicus Columbus Almirans & Præsides Adfessoresque Dominicæ, legatos vltro ad eos miserunt, oratum ac supplicatum vt pacificè viuere vellent: Se quidem idem pro se præstituros polliceri, neque ipsis vltèrius molestiam exhibituros: imò amicitiam eorum se vltro appetere, ac si vellent sacerdotes aut monachos ad se mitti, à quibus Christianæ doctrinæ capitibus erudirentur, se verò multo libentissimè missuros. Ad hæc postulata ab alienigenis responsum est, Sibi quidem hæc placere, & se Christi legi credere: sed eorum amicitiam nolle, quum in
eorum

eorum promissis nihil fidei collocarent.

MULTI quidem ibi sunt Hispani, qui eam Insulam breui ab istis Mauris & Nigritis occupatum iri pro certo habeant. Quamobrem eius Gubernatores, quum naues aliquæ inde soluere & in alias Indiæ prouincias vela dare paratæ sunt, summa cura & vigilantia cauent nequis Hispanus, sine suo permissu, insula exeat, etiâ si sit mercator. Attamen quû licentia-

*Hispani
iure me-
tuunt ne
inde à ser-
uis expel-
lantur, unde ipsi li-
bertatem
eiecerunt.*

tus Ceratus Præses in eam Insulam missus est, Edictum regium de asserendis in libertatem Indis secum in Indiam ferens: omnibus iter apertum est, & cuilibet liberè commeandi potestas facta quocumque sui quemque usus ferrent. Quûmque ipse ea de re à nonnullis Dominicæ ciuibûs reprehenderetur, ira incensus, Quando, inquit, Cæsarea maiestas Indos libertati restituit, æquum mihi non videtur ut Hispani præter Cæsaris voluntatem eos pro seruis porrò detineant. Itaque ex eo mandata eius omnes exsequi, & ipse in ea sententia esse ut bene factum crederet, si Indi liberè, quocumque vellent, abirent.

«
«
«
«

VERVM postquam intellexit Insulam paulatim redigi in solitudinē ac deferri in tantum imminuto Hispanorum numero, ut vix mille & centum superessent: peregrinorum vero multitudinem ac vires adeo in dies augeri, ut si aliquis fortè motus aut tumultus ingrueret, non satis Hispanorum foret quantum ad propulsandam vim esset opus: ac periculum haud dubium esse ne simul & Insulam & vitam amitterent: Hæc, inquam, postquam ei

*Hispani paulatim ver-
ras deserunt
ubi solitudinem sece-
runt.*

subiecta sunt, semet ipse repressit, & velut occlusa porta solutam illam licentiam compe-
scuit. Verum hodie ex omnibus Hispanis, qui
ab Hispania in Indiam haud satis certo & ex-
plorato cursu nauigant & ad eam fortè insu-
lam applicant, perpauci omnino reperiuntur
qui in ea æquo animo permaneant. siquidem
plerique omnes qui eò traiciunt, diuitiarum
spe iter suscipiunt: neque in ea insula eius rei
copia hodie aut facultas est, sicuti olim fuit.



*Galli piratæ Hispanas naues ex India redeuntés excipiunt.
Hispanorum in armandis nauibus parcimonia
& negligentia.*

CAP. II.



QUANDO in certaminum, quibus
Mauri Hispanos in India exercue-
runt, mentionem incidi, non alie-
num videtur huic loco ingentia da-
mna, Hispanis ibidem à Gallis terra marique
illata, exponere. Non multo post quàm hæ
terræ primum inuentæ sunt, ingenti diuitia-
rum fama excitati Galli piratæ complures, belli
tempore Oceanum infestare aggressi sunt, &
naues ab India remeantes excipere. Neque
illis incassum labor: plurimas cepere, & in-
ter ceteras quas ditissimas deprædati sunt,
quo tempore inæstimabilis Peruanæ regiae
gaza

*India opū
fama Gal-
los piratas
munitat.*

gaza in Hispaniam deportabatur, vnam abduxere tanta auri vi onustam vt vel singulis nauium calonibus & caculis octingenti aurei ducati cuique in partem venirent.

SE D præcipua causa, cur Galli tot Hispanas naues inuaserint, nulli rei magis quam *Auaritia* ipsorum Hispanorum avaritiæ assignari debet. *caca & impronida* Quum enim ab Hispania soluerent, *Hisp.* tanta & tam præceps erat magistrorum seu patronorum nauium festinatio, cupidè de mercibus & vectoribus in naues imponendis fatigentium, vt bellicis tormentis, quantum satis esset ad propulsandum hostium impetum, siqui fortè occurrerent, munire eas non curarent aut meminissent: imò ne ea quidem saltem copia quanta Indici senatus consulto iubebantur. Is enim edixerat, ne naues nisi duobus æneis tormentis, sex ferreis maioribus vt minimum, tum aliis minoribus, ad eam expeditionem instructæ soluerent: deinde pulueris tormentarij cadorum numerum & aliarum machinarum definiuerat. Præterea certos huic muneri Commissarios siue Inspectores præfecerat, quorum ea procuratio esset vt paratas ad soluendum è portu San-lucari naues inspicerent, viderentque an præscriptis munimentis com meatuque iusso instructæ & perarmatæ essent.

SE D magistri nauium, iniectis in manum aureis aliquot nummis, Commissariorum fidem redimebant, perficiebantque vt testificarentur omnia rectè atque ordine esse instructa. Quippe Commissarij Hispalim reuersi,

in domo Indicæ contractationis ¹apud regios magistratus per Dei nomen iurabant, naues omnibus rebus abundè atque ita uti deceret munitas esse, adeo ut quælibet earum sola quatuor Gallicis nauigiis ad certamen par esset. Ad hunc modum comparatæ Hispanæ naues tres, interdum quatuor, simul soluebant: & quæ earum instructissima erat, duo triæve tormenta ferrea portabat, dimidia ferè ex parte rubigine exesa, & cadiscum vnum pulueris pyrij non valde boni.

IN reditu aliqua earum fortè incurrerat in celocem vel myoparonem Gallicum egregiè armatum. Piratæ Galli, iam satis gnari quàm malè & negligenter instructi nauigarent Hispani, etiam si obuia naus mille ac quingentorum aut duùm millium doliorum capax esset, intrepidè tamen eam adoriebantur: ac primum per altum bombardæ globum vnum mittentes clamabant, Adduc adduc pro rege
 2 Gallia. Verùm si illi in demittendis suppliciter velis longiorem morâ facerēt, tum piratæ maioribus tormentis in mediam ipsam nauim fulminabant. Quo terrore perculsi Hispani, quum nullam propugnandi sui viam cerne-
 2 rent, & omnes vitæ suæ metuerent, Gallorum fidei ac potestati semet permittebant. Gallus extemplò Magistrum nauis demittere in mare scapham, eumque ipsum cum Nauarcho & Scriba venire ad se iubebat. Mox exactis ab eo rationibus auri, argenti, vnionum, smaragdorum aliorumque pretiorum, quæ naues illæ exportare solent: è suis mittebat qui ea omnia
 conuerre-

conuerteret: deinde suis quoque in captiuam nauim transfiliendi potestatem faciebat, siquid fortè, præter eam quæ redacta esset, residuæ prædæ inuenirent. Illi ut auidè transgressi erant, vectores nautasque ipsos spoliare, & si qua illi meliore veste amicti erant, eam laccris suis & detritis tegminibus commutare, ac *Piratarum comitas.* dicere, Hoc aptum est tibi, & istud mihi: parumque ibi aut virtus Hispana, aut militaris scientia proderat. Quippe isti omnia ferre atque agere, scrinia mouere ac reuoluere: denique omnes angulos scrutabantur & foraminum abdita, siquid fortè ibi auri delitesceret.

NON NVLLI Archipiratæ satis habuere si merces manubiasque Hispanis eriperent: naues ipsas relinquebant. Sed plerique eas quoque in Galliam captiuas abduxerunt, & expositis in terram Hispanis, ac velut miserti illorum, erogatis in viaticum aliquot nummis, eos in patriam remisere. Neque ulli ferè sunt Patroni, Præfectique nauium & Scribæ classarij, ex iis quidem qui in Indiam nauigant, qui eo quo diximus modo, à Gallis ut minimum semel aut bis capti ac spoliati non fuerint.

MITTO loqui de aliquot pagis & populis, quos iidem Galli in Insulis *Canarie insule dicitur* Canariis fortè à Gallis *ptæ à Gal* tunis spoliatos atque euersos in vastitatem redegerunt: mitto etiam de nauibus quas pannis *lis.* saccharo, vino & aliis mercibus onustas inuolarunt. Sed ea postquam ad Senatum Indicum relata sunt, apparuitque secordiam suam malamque administrationem tam licenter præ-

dandi Gallis audaciam facere; is Senatusconsultum eiusmodi facit, Placere vti omnes naues quæ toto anno pluribus comitati-
bus ex Hispania in Indiam nauigarent (erant autem eæ cum minores tum grandiores circiter sexaginta) vbi onustæ instructæque essent aliæ alias expectantes omnes vnâ soluerent: tum vt mercatores ipsi tres aut quatuor bellicas naues armarent, quæ classẽ usque ad Canarias Insulas prosequerentur, quia usque ad eum locum ex Hispania in Indiam comitantibus periculum est. Id si ita sedulò atque ordine curaretur, haud dubiè Gallos prædandi finem facturos.

*Hispani
ipsi Gallis
ad prædan-
dum viam
sternunt.*

CETERVM quod ad ea damna attinet quæ Galli Indicis quoque populis intulere, non aliis eius rei culpa assignanda est quàm Hispanorum quibusdam; eius nauigationis peritis, qui Gallos eò ipsi deduxerunt, vel sola malitia, vel inuidia impuls; vel iniuriæ viciscendæ cupidine. Galli quidem, primò Hispanis ducibus vsi, eos cursus ex eo ad eò exactè perdidicerunt, vt Hispanis ipsis nihil cederent: quumque initio circa Hispaniolæ & S. Ioannis insularum tantum litora vagarentur, vbi ex iis locis non tantum proueniebat prædæ quantum solebat, progredi vltèrius, & ad alias usque insulas, ipsasque ad eò continentis prouincias excurrere ausi sunt. Ergo non mare tantum latrociniis infestarunt, sed infrà scripta quoque oppida & Hispanorum colonias populati sunt. Primùm in Hispaniola Portum-argenteum, Azuam, Iaquannam &

& Maquannam diripuerunt exinanieruntque multis inde abductis nauibus: fecissentque idem ipsi San-dominici ciuitati, nisi arx munitissima ripæ fluminis imposita & æneis tormentis validissimis munita, eorum conatus repressisset: vt eam tentare ausi non fuerint, quamquam duces aliqui Galli id etiam comminarentur. Itaque Hispani metuentes ne alia aliqua parte in urbem Galli aliquando irrumpant, quippe nullis cinctam muris, semper tempore belli diligentes excubias agunt: imò quum ibi morarer, ciues aggere aut cespitibus circumdare instituisse eam pro certo ferebatur: quod tamen Maurorū & Nigritarū fugitiuorum potius quàm Gallorum metu facere velle videbantur.

I Quum inuentis nouis Insulis & mox continenti, facile appareret rem operosam & magna mōlis suo proprio egere Consilio & magistratu, cui regionum vectigalium & reddituum cura, cui prouincialium causarum arbitrium, omnium denique expeditionum rerūque Indicarum regimen & cognitio subiceretur: iam inde ab initio Ferdinandus & Isabella Catholici reges, Cameram seu collegium Hispali delectorum hominū instituere, quorum opera & autoritate colonorum & militum supplementa, com meatus, ceteraque ad classes instruendas necessaria, Præfectis ac Prætoribus, regis auspicijs in Indiam Occid. nauigantibus, supeditarentur. Tum etiam apud eos negotiatores omnes, mercium, quas ex Hispania in Indiam portabant, genus & summam professi: inde quoque

reuerſi, auri aduecti, unionum ceterarumque rerum quas ex India reportarent, rationem redderent. Eam Cameram, Indica contractationis domum vulgò vocabant. Poſtea anno M. D. XXIII. Carolus V. Caſar Indicum ſenatum, ſtatum & ſollemnem, publica ſcriptura & ſigillo regio inſtruetum, conſtituit: atque omnium Indicarum cauſarum ſupremam cognitionem, criminum animaduerſionem, poenarum & uenia diſcrimen, denique omnium rerum quæ ex India in Hiſpaniam deferrentur, ius atque arbitrium ſub eius magiſtratus ditione eſſe voluit.



Anzullus Hiſpanus prælio nauali à Gallis funditur. Galli ab Hiſpanis capti. Auana Cuba inſula colonia à Gallis diripitur.

C A P. III.



INNO M. D. XLIII. Petrus Anzullus tribun. mil. è colonia Nominis-dei duabus nauibus & carauella vna vela in Dominicam fecit, cum opibus quæ centum millium ducatorum præciū æquarent. In itinere quum ad Iaquannam applicuiſſet, comperit vix ſex antè horis inde Gallicam nauim ſoluiſſe, quæ depopulata ciuitate ignem tectis iniecerat. Petrus qui, gloriæ impenſè auidus eſſet, omni auro & argento in eo portu depoſito, ſublatis dolonibus altum petere intendit, & Gallicam nauim quæ
rere

*Hiſpani à
Gallis fuſi.*

rere. Quam vbi adeptus est, expedire arma
vtrique, & magna vi infestis rostris concur-
rere. Aequo Marte & paribus vtrique ani-
mis per quadrantem horæ pugnabatur, quum
ecce in medio æstu certaminis Petrus cum
nauticis aliquot ictu tormenti percutitur. Hi-
spani, fractis duce ipso cæso animis, fugam
arripiunt, breuîque in Dominicæ portum se
condunt. Gallicæ naui Prætor insequi fufos
negligens, cœptum iter peragere institit.

ANNO supradicto, Gallicæ naues duæ
vsque ad Dominicæ viciniam prouectæ, ca-
rauella vna capta, quæ onusta mercibus ad
Caput-veli tendebat, ad orientale¹ Monæ in-
sulæ latus ancoras iecere, prædam aliquam
expectantes. In earum vna Cantabri aliquot
(Biscaynos vulgò vocant) vehabantur. Post-
quam eius rei certus nuncius ad regios Præfi-
des, qui iuri dicundo in Dominica præerant,
allatus est, liburnicas duas, quæ in portu stâtes
onera & discessum in Hispaniam parabant, ce-
loces duas, & myoparonem vnum armant, ci-
que classiculæ Carionem Trianam præfici-
unt. Ille soluit. Galli sequenti die Prætoriam
naui, cum celoce vna ceteræ classi præeun-
tem, prospectantes, ratique naui aliquam
onerariam esse quæ in Hispaniam commea-
ret, læti admodum sese ad pugnam compa-
rant.

*Hispani,
Galli du-
cis secordia
Gallos vin-
cunt.*

Verum vbi mox propinquior conspectus
duas alias naucis & myoparonem aperuit,
videruntque eas naueis rectâ ad se tendere.

tum Cantabri, qui in Gallicarum altera erant, veriti ne de se captis, tanquam subditis Regis Hispaniæ & perduellionis proditionisque manifestis, graue supplicium sumeretur: quòd milliari amplius adhuc ab hoste abessent & commodiore nauigationis cursu vterentur, omisso omni sociorum respectu curaque, vela subrigunt & fugiunt.

ALTERIVS nauis Prætor vbi se desertū ab sociis videt, & iamiam sibi imminere Hispanam nauim prætoriam cum celoce, neque alias superuenientes procul, neque vllam fugę viam patere, penitus consternatus deditio- nem facere instituit. Itaque milites ponere arma iubet: quippe amentię fore non prudentię dimicare velle: quando nulla spes esset, se solum aduersus quintuplicem hostium aciem pugnātem posse vincere: deditis verò (sicut ipsi, quum vincerent, solerent) Hispanos clementer vsuros ex mutuis belli commercijs. Hęc Prætoris verba iracundę repulit Tormentarius quidam, Enimuero sibi quidem, inquit, deditio- nem non esse faciendam sed pugnandum videri: & eundem, suo iudicio, ceteris esse animū. equidem malle fortiter dimicando mortem honestę oppetere, quā trādentem se vltro in manus inimicorum vitam inglorium trahere. Si paueret Prætor, cur ad bellum iret? etiāsi quintuplices hostes essent, & ipse solus, se tamen ipsos ne pili quidem facere. quippe Hispanos in iis oris militarium artium, maximē in naualibus præliis, planē rudes atque imperitos esse: in primis tractan-
darum

darum machinarum haud satis gnaros. Itaque
 fidenter spondere se quatuor tormentorum
 ictibus Prætoriam eorum nauim perfractam
 demersurum : neq. dubium quin, ea depressa,
 ceteræ fugam caperent. Certè si Prætor huic
 Tormentario fidei atque auctoritatis aliquan-
 tum præstare sustinuisset, ipsorum rebus me-
 lius consultum foret. Quum enim iudicassent
 omnes magnifica hæc eius verba rebus ipsis
 & factis comprobanda esse, iamque Gallicæ
 naui imminens Hispana, disploso tormento,
 clamaret, Adduc adduc pro Imperatore, velu-
 ti iam captæ insultans: illi extemplò tam hor-
 rendo tormenti fulmine responsum est, vt pa-
 rum abfuerit quin perfringeretur.

GALLICÆ prætor, à pugnandi animo
 alienus, confestim è foris desiliens, ignem è
 tormentarij manu abripit, alterum fulmen
 iam displodere parantis. Equidem si tum i-
 gnem tormento ille immisisset, globumque
 perinde periculoso hostilis naus loco, vt pri-
 mum, intulisset, Hispana prætoria, vti dixe-
 rat, haud dubiè demergebatur. Immò nisi &
 ipse Hispanus præfectus mouendis scrinijs a-
 liisq. oneribus intentus, foramen à globo fa-
 ctum stipare atque explere properasset, credo
 vel vno eo ictu perituram fuisse, multa iam ac-
 cepta aqua. Itaq. sine certamine capitur naus
 Gallica, & Dominicam abducitur, tam effu-
 sa ciuitatis lætitia vt si ipsa Gallia capta esset.
 Galli in custodiam traduntur, maximè qui re-
 rum maritimarum periti erant: Prætor ipse in
 Almirantis domo propè assiduus erat : nauim

*Hispanide-
 captis ali-
 quor Gal-
 lis trium-
 phant.*

tormentis, rudentibus, velis, ancoris ceterisque armamentis spoliata & prouectam in altum, Hispani iniecto igni cremarunt. Ipsi mihi, quum amicum quendam meum qui in vinculis erat inuiferem, cum Gallis illis sæpe sermo erat. Illi verò Prætorem suum probris & diris lacerabant, qui turpem adeo deditionem fecisset: vnde duriter & inclementer habiti grauissima incommoda paterentur. Paulo post diuisi in naucis quæ ex India soluebant, in Hispaniam missi sunt: in itinere quinque eorum qui carauella vna vehabantur coniurant in Hispanos, eosque de improviso adorti in altum præcipitant. Ita potiti carauella, onusta saccharo & quindecim millibus ducatorum ex vectigalibus regiis, cum tam opima præda in Galliam aufugiunt.

*Hispani
coloniæ
suarum in-
columitatē
à Gallis pe-
cuniā redi-
munt.*

ANNO M. D. XXXVI. in Cuba insula, portum Auana inuectus myoparo vnus Gallicus perexiguus (à Gallis vulgò dicitur *Patax*) qui tempestate à Prætoria naui disiectus & eò delatus fuerat, oppidum ipsum cepit. Hispani quòd eius oppidi domus ferè ligneæ & palcantum tectæ essent, metuentes ne id Galli incenderent, septingentis aureis ducatis, incolumitatem municipij ab illis pacti sunt. Galli eo precio contenti, abeunt. Postridie quum tres maiores naues è noua Hispania profectæ eò appulissent, Ioannes de Roias Præfectus eius oppidi eas aurum, argentum & quæcumque alicuius precij essent, in terram exponere, Gallorumque vestigia subsequi, iubet. Illæ confestim singulæ ordine portu egressæ, præeunte Prætoria, scaphis ad pup-

pes religatis, haud procul oppido, in flexu promontorij cuiusdam, ad ostium vicini fluminis Gallos assequuntur. Prætoria nauis in Gallicum myoparonem sola inuehi non ausa, impetum sustinebat donec ceteræ naues adessent. Galli ubi hostem cunctari vident, neque illi satis esse ad laceffendam pugnam animi, aliquot tormentorum globos displo- dere incipiunt. Inde Hispanis tantus terror in- iici, vt nulla defensione tentata, turpiter in fu- gam versi, & scapha etiam amissa, milites per- misti nautis ingenti cum tumultu in terram euaderent. Aliarum nauium vna, quæ non pro- cul sequebatur, vbi à Prætoriæ nauis militib. effusam fugam fieri videt, proram vertit & i- psa, & qui in vltima erāt deinceps fugiendi ex- emplum sequuti sunt. Ita Galli primò territi ac propè certi captiuitatis, repentè fufis præ- ter spem Hispanis, summa cum voluptate tres eorum naues corripunt: ac denuo ad Auanam regressi, quum nummorum alterum tantum, quantum prius, vt parcerent oppido, à ciui- bus extorsissent, inde porrò abiire.

Ex eo Hispani domus è lapide struere cœ- perunt, arcemq. imponere portus litori, aduer- sus incursiones Gallorum bombardis & ma- chinis ingentibus munitâ. Situm est id oppidū *Auana sit-
tur.* in planicie mari vicîna quâ orientem spectat: domus instar, cuius porta optimè clausa cetera omnia circum nuda atque aperta sint, nullis cinctum muris, vt cuilibet quacumque velit eò pateat aditus. Itaque eius arcis quam Hispani in ore ipsius portus immoliti erant,

certiores facti Galli, ad ostium Chioreræ fluminis (id sex millibus pass. ab vrbe abest) applicant: & circiter mediam noctem in terram egressi, de improviso sub primam auroram magno tumultu urbem inuadunt. Hispani nec opinato hostium aduentu & fremitu excitati, desilire è cubilibus & quà quisque poterat alius alia porta in siluas diffugere. Ita Galli ædificatam ab Hispanis in ea insula coloniam diripuerunt.

1 *MONA insula inter Hispaniolam & insulam S. Ioannis-de Portu diuite, 17. gradibus ab Æquinoctiali linea Septentrionem versus, ab est: exigua, depressa & plana: sex millibus pass. id est tribus leucis, circiter in circuitu patet. Paucis Christianis & Indis habitatur. Piscinis abundat, aqua dulci & cancris optimis. Est & alia Mona insula Britannia proxima.*

2 *Auana, Cuba insula colonia & portus, in septentrionali eius litore sita.*



¶ Hispani per speciem colloquij Gallos circumuentos trucidant. Galli eorum perfidiam grauissimè vlciscuntur, & Hispanicas colonias in Cuba, San-Ioannis & Iamaica insulis diripiunt.

C A P. I I I I.

A N N O LIV. flagrantibus inter Carolum v. & Henricū Gallia regem bellis Gallica vna nauis ad San-iacobum, Cuba insula, caput cum octoginta militibus, appel-

appellens, ciuitatem diripuit & exinaniit. Atque inde euestigio ad Auanam tendens, expositis ad Chioreram militibus, hora vna antè lucem oppidum ingressi Galli, aliquot Hispanos spoliarunt: alij fuga se proripuerunt. Galli singulas municipij domus irrumpentes, optimam se prædam inuenturos rati, manibus propè vacuis reuersi sunt. Quippe Hispani quum sæpius iam Gallorum populationibus vexati essent, veriti ne idem quoque deinceps accideret, facultates omnes suas in prædiis & villis habebant. Interea verò, dum Galli scrutandis & exhauriendis domibus intenti sunt, duo Hispani à senatu Coloniae ad eorum Prætorem mittuntur: primùm qui quàm multi illi essent, per speciem legationis propiùs explorarent: deinde pretio cum illis paciscerentur ne oppido ignem iniicerent. Quum de redimenda colonia & captiuis qui in Gallorum manus venerant inter eos ageretur, Gallus prætor sex millia ducatorum pretium statuit & flagitat. Hispani se inopes esse dicere, & omnes suas facultates eius summæ pretium æquare non posse. Itaque ea de re sibi adeundos & docendos esse magistratus, sine quorum & senatus ipsius sententia nihil transigere ipsis per se licitum esset. Quare potestate abeundi à Prætore impetrata, fidèque data se postera die cum certo responso reuersuros, vrbe excedunt.

*Hispani
per simulationem
compositionis
Gallos circumueniunt.*

LEGATI ad suos reuersi, rem ad Ioannem d'Ories ceterosque ciuitatis gubernatores referunt. Illi multitudine hostium cognita &

quantam pecuniæ summam peterent, in diuer-
sas sentētiās abiere. Maior pars, enim uero pa-
ctiōnem omnem cum eo hoste abnuere: Gal-
los ferro potius quàm auro arcendos: nec pe-
cunia, sed hastarum & tormentorum ictibus
explendos esse prædones istos pridem nouis-
simæ exempla meritos, qui latrociniis tantum
& rapto uiuerent. Neque multitudine formi-
dabiles esse, neq. ut altero tanto plures essent,
vel teruncio esse æstimandos: ac vel paucos
illos equos, qui sibi superessent, ad eos prote-
rendos sufficere. Alij contrā sentiebāt, Tutius
videlicet esse, sæuienti necessitati summittere
animos & seruire tempori, quàm sese ac sua
omnia fortunæ arbitrio permittere: qui aliter
censerent, facile eo imprudentiam suam pro-
dere, quòd hostē contemnerēt. Quamobrem
placere iterum mitti legatos ad Gallum præ-
torem, qui certiùs de pecunia ipsius volunta-
tem explorent: quòd si de pecuniæ impetratæ
summa nihil prorsus remittere velit, attamen
obligatæ fidei liberatione utique illi satisfac-
tum iri. Postremò ubi hæc ita præstitissent,
nisi conditiones placerent, tum alio consilio,
quodcumque optimum visum esset, non in-
tempestiuè vsuros. Sed multorum incon-
sulta opinio plūs quàm paucorum prudens
consilium valuit. Itaque aciem instruunt, &
familias, id est Numidica seruitia, armant His-
pani, centumque & quinquaginta circiter mi-
litum manu collecta, noctu apud Gallos o-
mnia soluta & sopita inuenturos rati, in vr-
bem irrumpunt, vociferantes. San-iacobus,
San-

San-iacobus, & emissis pilulis plumbeis quatuor Gallos interimunt, in iis Prætoris ipsius nepotem. At ceteri Galli, nihil defixis aut percussis pauore animis, stratis excussi pedibus sese excipiunt, & raptis confestim armis animosè propugnant. Nec tulere impressionem ex aduerso factam Hispani, sed ad primum glandium plumbearum nimbum, quem Galli effudere, turbati vertunt terga & siluarum latebris sese sepiunt.

PRAETOR ipse Gallus totam eam noctem, statione circa urbem disposita, in excubiis pernoctauit, ira supra modum incensus propter cædem suorum ac sui maximè nepotis, semet ipse ultro incusans, quòd Hispanorum fidei & promissis credidisset. Vt illuxit, à militum suorū parte, quidquid picis reperiri posset, colligi iubet (erant autem in oppido multæ picis capsulæ eò ex Hispania conuectæ ad ferruminandos nauium textus) eaq. inungi domuum portas, fenestras, laquearia, denique ubicunque materiæ & lignei operis aliquid esset: mox ignem tectis iniici, & parietes ipsos solo æquari, atq. à fundamentis erui. Iamque domus conflagrare cœperant, quum ipse ad templum profectus, ne ei quidem pepercit. Id spectaculum flagrantis urbis eminus è propinqua silua Hispanus quidam conspicatus, equo utique fretus, Gallorum ducem suppliciter ac demissè adiens, Fortissime Prætor, inquit, non te satis habuisse ad explendum animum tuum vniuersam ciuitatem solo equasse, nisi templo Dei etiam ignem iniiceres? Ad

Galli perfidiam Hispanorum atrocissimè vlciscuntur.

*Frustra
Pietatem
Vendit,at,
qui fide so-
ciali caret.*

hæc verba Prætor arroganter respondit, Homines, inquit, quibus nulla fides est, ne templo quidem indigent. Tandem verò dirutis domibus omnibus, arcem quoque ipsam direptam solo tenus deiiciunt: & dux, naue portum inuehi, omnemque egestam ex vrbe prædam eo stipari iubens, ferociterque Hispanis pestem minitans, inde excessit. Paucos post dies quàm hæc acciderant, ipse cum portum ingressus, deformeis adeo ruinas illas conspexi, ut vix vlla tectorum vestigia & situs dignosci posset.

SAN-GERMANVM colonia est in insula S. Ioânis de portu-diuite exstructa. eam quum mari vicinam Galli sæpe diripuissent, Hispani translata ex eo loco in siluam quandam sex mill. pass. procul à litore introrsus in mediterranea retraxerunt. ita se nimirum tutiores & extra periculum futuros rati. Sed ne sic quidem ipsi satis delituerunt. Id enim vbi rescivissent Galli, ad siluestrem vsque illum nidum progressi sunt. In 2 Iamaica insula Hispalim seu Seuilliam, viginti quatuor ferinè tectorum oppidum, octo passuum mill. distantem à mari, diripuerunt.

*Carthago
noua, Hi-
spano duce
præeunte,
à Gallis
diripitur.*

PER eadem hæc tempora Carthagine (ea est vrbs & prouincia Indicæ cōtinentis) Iudex quidam fortè nautam, cui aliqua de causa infensus esset, virgis cædi iussit. Ille mox liberatus in Hispaniam atque inde in Galliam transgressus, contractis quinque nauibus postmodum Indiam repetiit. Iactisque in Carthaginiensis portus ostio ancoris, centum milites

in

in scaphas nauium transgressos in litus exponit. Illi vna ante lucem hora egressi in terram, Hispanos omnes sopitos opprimunt, domosque vi irrumpentes, quæ partim ligneæ, partim ex arundinibus contextæ sunt, omnes palmarum foliis contextæ, omnia tumultu & clamore miscent. Nauta cum aliquot Gallis Iudicis domum ingressus, qui ipsum virgis cædi iusserat, eum repetitis sicæ ictibus confodit; alij aliò ad prædā discurrent. Hispanorum maxima pars fuga sese proripuit, nonnulli interemti, alij captiui facti sunt. Ita direpta est & incensa Carthago noua, unde Galli ex manubiis & prætiis captiuorum amplius centum & quinquaginta millia ducatorum tulerunt.

ALIAE naues Gallicæ ante & post hæc omnem illam oram præteregentes San-Marthæ & Capitis-veli colonias, & alia loca diripuerunt. Postremo, vt aliquando de his Gallorum gestis agere desinam, quo tempore in Cubagua vnionum piscatus florebat, Gallica vna nauis eò fortè applicuit. Hispani, ea prospecta & agnita, lintres duos patrios quinquaginta Indis onerant, eosque arcibus & sagittis armatos, aduersus eam nauim mittunt, persuadentq. qui in ea erant pædicones esse, quos nisi perdere occuparēt, egressuros in terram multisq. eorum captis, tamquam feminis, ad nefandam venerem abufuros. Indi prorsus ita esse rati, nihil intermittunt donec nauim assequantur.

*Hispanick
strategem
main Galla
los.*


GALLI sine vlla periculi suspitione aut

metu, nudos homines otiosè contuebantur, rati fortè, opinor, illos spectatum eò & sui visendi gratia confluere, aut ad commercium vnionum. Sed vt naui propinquarunt barbari, pro margaritis sagittas in Gallos emittere, & eorum aliquos transfigere. Galli qui vnionum, qui ibi capiuntur, peritiores essent quàm venenata illius herbæ, cuius succo Indi sagittarum aculeos tingunt, postquam se saucios & letales esse eas sagittas animaduertit, nulla interposita mora, sublati velis, abeunt. Neque deinceps, quantum intelligere potui, nauis vlla Gallica eò applicuit. Ea arte atque astu Hispani iam pleni formidinis infestas Gallorum manus effugerunt.

1 SAN-IACOBVS, primaria Cuba insula colonia & Episcopatus sedes: tuto & tranquillo portu nobilis.

2 IAMAICA insula, ad Orientem Hispaniola, XXV. ab ea leucarum intervallo discreta, XVII. gradibus ab Aequinoctiali limite distat. Eius caput nona Hispalis, & titulo Abbatia primaria sedes: cuius primus Abbas fuit Petrus Martyr Mediolanensis, is cuius exstant tres de rebus Oceanicis Decades.

Cartha-



¶ Carthaginensium & San-Marthensium Indorum mores,
& commercia. Hispani smaragdos & aurum ab illis ex-
torquent: & pro beneficio, bella, seruitutem & rapinas
reponunt.

CAP. V.

VND ECIMO post aduentum meum
in Hispaniolam mense, nauim in In-
dicam continentem vela facere pa-
rantem conscendēs, è San-dominici
vrbe solui. Sexto post discessum die, ¹ ninosi
San-marthæ montes nobis sese aperuere,
breuîque inde ad Carthaginem appulimus,
quam ² quòd insulam ipsis portus faucibus
obiectam habeat, vt Carthago noua in Hispa-
nia, ita Hispani nuncuparūt. Hæc insula, octo
millia pass. in lōgitudinem, tria in latitudinem
patens, quo primū tempore Hispani eas
prouincias attigerunt, tota Indicis piscatori-
bus habitabatur: nunc verò vix vlla mapalium
reliqua vestigia exstant. Neque id mirum vlli
esse debet: quando & aliis omnibus in prouin-
ciis tum maritimis tum mediterraneis, quas
Hispani transcurrerunt, vix miseræ vllæ Indi-
carum gentium reliquiæ reperiuntur. Tanti
mali causa est, quòd illi populi, quandiu vires
suppeditarunt, Hispanorum amicitiam acci-
pere numquam sustinuerunt, propter intolera-
bilem eorum sauitiam atque atroces iniurias
in se ac suos ab istis editas.

*Indi Hi-
spanorum
amicitiam
repperunt*

FRVCTVVM, piscium, rerūque alia-
rum vitæ tuendæ necessariarum copiam ha-

bent. Pudenda bombycino velo contegunt. In bellis nō minus feminæ³ quàm viri præliantur: sagittæ venenatæ, tela sunt: hostes captos & cæcos mandunt, & multos quidem Hispanos eo modo carnes & frustra fecere, ceterisque omnibus ita, si possint, vtantur. Sollennia sua olim celebrantes, quammaximè festo & pulcherrimo cultu poterant corpus ornantes, bullis armillisque ex auro, vnionibus & smaragdīs, brachia, crura, faciem, reliquasque omnes corporis partes impediabant.

PRÆCIPUÆ eorum merces, sal, pisces, piper⁴, quæ in ea continentis loca deferunt, vbi ea deficiunt, & aliis rebus permutant. Prosperis suis quondam temporibus pulcherrimos & nobilissimos frugum, fructuū, bombycis seu gossipij, pennarum, monilium, auri, multiplicium vnionum, smaragdorum, manicipiorum, aliarumque suæ terræ commodorum, mercatus insitnebant: ac mutuo inter se

Indica in commercio quibus quisque egebat ea capiebat sine vlla cupiditate aut auaritia, & Cape, aiebat alteri, hoc, & tu inuicem mihi istud dato. Neque quidquam ferè magis apud eos in pretio est quàm esculenta & cibi. quamquam hodie maior pars earū gentium, quod à nobis hausit, iam temporalia quoque hæc bona carissimarum habere & venerari didicit. Sed vel in hac corruptela non pauci reperiuntur, qui non ea tanti nunc, quanti paulo antè, faciunt.

Hic quod mihi aliquando vsuuenit referam. Quum fortè esuriens in domum cuiusdam Indi incidissem, petissemque ab eo an pullum

pullum gallinaceum venalem haberet: respondit ille, Se verò habere, sed quid vellem contrà ipsi dare, petiit. Ego monetæ nummum vnum offero (Regalem seu Realem vulgò vocant) ille nummo è manu mea sumto, quærit quid pullo facere vellem: Comedere, inquam. Indus me contrà in faciem intuens, Regalém-
Pecuniaribz contentus apud Indos.
 que inter dentes tenens, velut demorsurus, Christiane (inquit) si tu me vis dare tibi quod edas, præbe tu mihi vicissim quo ipse vescar. nam quod tu hîc mihi das, nullius vsus est. Quòd si nolis, recipe tuum Regalem, ego verò pullum meum comedam. Ita elusus ab isto, alterius domum me contuli, qui mihi pullum dedit.

INTER Carthaginem & S. Martham ingens & rapidum flumen occurrit, quod tanto impetu instar torrentis in mare deuoluitur, hieme præsertim, vt retroactò æstu præterlabentes illac naues, facilè inde aquam dulcem capere possint. Gonzallus Ximenez doctor, Petri Lugî eius prouinciæ præfecti legatus, quum ditescere cuperet, cum XLV. Hispanis & myoparonibus duobus flumen illud subire aduersum aggressus, dum per circumiectas
smaragdibz apud Indos Occid. inuenti nam auaritiæ Hisp. materiam & flammam subdunt.
 ripæ gentes vagatur, smaragdos aliquos reperit: quumque ex ipsis intellexisset vnde illos fumerent, progredi vltèrius statuit, neq. prius finem facere quàm cautes aut fodinas reperisset, quæ eas opes gignerent. Tandem quum aliquot prouincias peragrandò emensus, in Bagottam principè ditissimam (ex falso vulgi Hispanorū iudicio) incidisset Doctor, partim

gratia, partim rapina magnam auri vim ab eo extorsit, mox petiit vnde smaragdos fumerent. Bagotta Christianorum immodicam auaritiam deprehendens, vt eos suis finibus expelleret, illósque à se amoliretur, in valle Tunia effodi eas respondit. Hoc audito Doctor cum suis ab eo digressus, superatis montibus quibusdam quos Indi obtinebant, in vallem Tessucam peruenit. Eius prouinciæ regulus erat Simandoca. is quum Hispanos modestè & sine vllò detrimèto per fencis suos

Fraus fide in paruis sibi prestruit, vt quum opere precium sit, cū mercede magna fallat. iter faciētes videret (quippe vetuerat Doctor seuerè nequis quidquam sine permissu indigenarum capere aut attingere auderet, idque vt gratiam & bonam famam inter eas gentes sibi conciliaret) ille, inquam, eos nihil transitu prohibere conatus, hospitaliter etiam & comiter excepit. In primis verò Doctor ab eo de smaragdorū fodinis sciscitatus est. Regulus peramicè eum ad locum deduxit. Vigin tiquinque circiter millia pass. ab ipsius ditio-

Barbari necessaria pulcris anteposunt. ne gigitur, nempe qui ea parui faceret, plurisque duceret falis lancem vnā quā aurum omne & totum illum smaragdorū montem.

Cum hoc pulcerrimo & ditissimo munere ad San-marthanam coloniam Doctor reuersus, nuper inuentæ prouinciæ famam spargit, quæ

quæ adeo auro & smaragdis abundaret. Omnes visendi cupido incessit: in primis Petrus Lugus ceteris audior, arma, nauigia, equos, ceteraque ad eam expeditionem necessaria comparat: quumq. paucos circa se haberet milites, Carthaginem ad delectum habendum mittit. Ut libitum instructus, quum ad Bagottæ finium limites peruenisset, & ad illum vicinósque regulos Christianorum aduentus fama perlata esset, scelerumque ac facinorum quæ vbique nefanda ederent, sumtis armis illi arcere vim aduenarum & libertatem suam propugnare properant. Sed ubi ventum ad manus, barbari omnibus ferè præliis vincebantur. Itaque quum & iam multis ipsorum cæsis res ad internecionem gentis spectare videretur: Christianis verò noua subinde auxilia Carthagine & San-martha summitterentur, fessisque ac fauciis recentes succederent: spem omnem pellendi eos à suis finibus exuunt, victique metu ne cladibus attriti ad vastitatem tandem redigerentur, abiiciunt arma & pacem exposcunt. His artibus Hispani maximam eius prouinciæ partem subegere.

PETRVS Lugus leuibus aliquot præliis Indos expertus, & transcursis gentibus multis omnia igni, ferro, latrociniis, quacumque ibat infesta faciēdo, cū magna auri & smaragdorum copia San-martham reuersus est. Hæc prouincia ab Hispanis Granatæ-nouæ regnum dicta est, & Georgius Robledus Trib. mil. quum

*Dimitiā
admiratio
auaritiā,
auaritia
bella & cæ
des gigni.*

ibi coloniam condidisset, Carthaginem eam nuncupauit, propterea quòd omnes ferè eius oræ perdomitores ac coloni, qui ibi erant quum ipse eò applicuit, Carthagine noua Hispaniæ vrbe orti erant. Illi magnam inde smaragdorum copiam effoderunt & porrò etiam nunc effodiunt.

I SAN-MARTHAE portus in continenti India, undecim tantum gradibus ab Aequinoctiali linea in Septentrionem distat, sub altissimis montibus, qui, mirum dictu, inter tantos ardores, opaci fidique niuib, primi nautis ex alto prospectantibus ea litora aperiunt.

2 MOX sub finem huius capituli aliam eius nuncupationis rationem videtur reddere. Sed hîc loquitur de ipso portu seu tota ea ora, quam obiectu insulae sitû Carthaginis nouae, quae in Hispania est, referentem, sic vel Columbus vel primi Hispani nominarunt. Illic verò agit de colonia, quae à Carthaginis Hispanica ciuib, in noua Granata prouincia XL. pass. millibus à San-martheni portu, condita est. Porro obiectam Carthag. portui insulam Barbari indigenae vocant Codego, vti Carthaginenses Hispani suam Scombriam appellant. De cuius siti vide T. Linium Annal. lib. 26.

3 ANNO M. D. IX. Martinus Ancisus aduersus Zenuenses eiusdem orae accolae bellum gerens, unam cepit 20. annos natam, quae viginti octo Christianos sua manu interfecerat. Gomara Hist. Gen. lib. 2.

4 TOTO continentis tractu in quo Nauta,
Carthago,

Carthago, etiam in Nouo regno, magnus est vsus piperis cuiusdam obtongi, quod maiore acrimonia præditum Orientali, magisque aromaticum & iucundiorẽ odorem sptrat quàm Axi seu Capsicum, id est Piper Indicum vulgare. Nic. Monard. de simpl. medicam. India Occid.

4 QVO liquidius appareat quanto in contemtu diuitiarum viuāt Occidentales Indi, hîc ex Ioannis Lery, amici mei, libro quem nuper Gallicè de suis peregrinationibus edidit, bona fide transcribam ipsius cum Brasiliensi barbaro colloquium: Mirantur (inquit) non mediocriter nostri Tououpinambaulty (de quadam Brasilia gente agit quicum Gallis societas erat) quum vident Gallos aliòsque aduenas è procul remotis terris venientes, tantum laboris sumere vt Araboutano suo (id est Brasilio seu coccineo ligneo) naueis onustas reuehant. Itaque magno nau quidam ex barbaris hunc in modum me super ea re aliquando interrogauit: Quid sibi vult, inquit, quòd vos Mair Peros (id est Galli & Portugalli) tam procul petatum ligna veniatis? Nullane vobis ligna ad focum tellus vestra suppeditat? Tum ego: Suppeditat, verò, inquam, & quidem magna copia: sed non ex eo genere arborum quales vestre sunt: Brasiliu in primis, quod hinc nostri non ad urendum, vt tu existimas, sed ad tingendum exportant: sicuti & vos eo funiculos vestros bombycinos, pennas, aliàque rerum inficitis. Hîc ille protinus excipies: Verum tantane eius ligni copia vobis opus est? Enimuero inquam. quum enim (vt hominis animu admiratione suspendorem) apud nos vel unus

» mercator plures coccineos pannos, plures culiellos,
 » & forfices (nota ipsi & familiaria exēpla subiiciēs)
 » plura specula possideat, quàm quanta huc ad vos
 » umquā allata sunt: solus ille omne Brasiliū coemet,
 » quo plures hinc naues onusta redeunt. Ah! (inquit
 » Barbarus) mira planè mihi narras. Mox eorum
 » quæ audierat memor, percontari ultrà perrexit:
 » At, inquit, vir ille adeo locuples, quem tu refers,
 » non moritur? Moritur, moritur (inquam) ut &
 » alij homines. Ibi tum ille (ut isti Barbari commen-
 » tari amāt, & cœptū sermonem nullis interruptum
 » diuerticulis, ad finem usque haud absurde perie-
 » xunt) querere ex me: Ergo, inquit, eorum quæ iste
 » moriens bona relinquit, quis heres est? Liberi
 » eius, inquam, si habet: si non habet, fratres, sorores,
 » aut proximi eius adgnati. Quum hac dixissem,
 » Equidem (inquit meus ille haud sanè ineptus se-
 » nex) facile hinc animaduerto vos Mair (id est
 » Gallos) esse insigniter fatuos. Nam quid traicien-
 » do mari tantopere vos fatigari necesse est, in quo
 » superando (sicuti nobis quidem huc appulsi dicitis)
 » tantum malorum exhauritis? Nempe ut liberis ve-
 » stris, aut superstitiibus cognatis, opes queratis. Tel-
 » lus quæ vos aluit, non illis quoque alendis sufficiet?
 » Nos quidem, & liberos & propinquos habemus,
 » eosque, ut tu vides, summa caritate amplectimur:
 » sed quum confidamus fore ut post mortem nostram
 » terra quæ nos aluit, eadem & illos quoque exutiat,
 » in eo acquiescimus.

Hactenus ille.

Germani



Germani aliquot, Hispanorum exemplis edocti, Indos
vexant. Illi iniuriarum pertæsi, quæsitâ
morte intereunt. Vallē-tuniensium
religio, arma & mores.

CAP. VI.

VELZARI (id est Velzarorum, ij
Germani mercatores sunt, procura-
tores seu mancipes) audito tam in-
genti lucro oblato, è Valentiola pro-
fecti & ipsi, ac terrestri itinere asperrima loca
& niuosos San-marthæ montes, ducibus Indis ^{supr. huius}
gnaris locorum prætergressi, tandem in Sma- ^{lib. cap. 5.}
ragdorum prouinciam perueniunt. Inde ex-
cursionibus factis & direptis aliquot gētibus,
spoliis onusti in suam prouinciam remeant.
Sed Indi vbi se assidujs iniurijs vexari & vindi- ^{Indi vi-}
que opprimi à peregrina gente animaduer- ^{tam fuge-}
tunt, pertæsi tot laborum & miseriarum, diris ^{re, quam}
exsecrantes & blasphemantes Christianū no- ^{Hispanicæ}
men, vulgò siluas ingressi informem exitum ^{tyrānidem}
deligebant. Feminae pariter ac viri certatim ^{perferre}
eò confluentes suspendia quærebant, & qui- ^{malunt.}
bus frangendæ gulæ laquei decrant, vt in gen-
te plerumque nuda, alij alios adiuuantes,
deligatis ad ramos arborum comis, iactō-
que in præceps corpore, acerbissimis lamen-
tis hōrendo cum stridore atque vlulatu
cælum ac terras implebant, donec miserrimæ
vitæ finem tandem inuenirent.

VALLIS Tunix & finitimorum locorum

incolæ¹ Solem vt præcipuum numen, colunt.

Barbari etiam clarorum virorum exemplis ad virtutem accenduntur. In bellicis expeditionibus, pro vexillis & signis, clarorum hominum & bellico aliquo facinore illustrium ossa arundinibus alligata circumferunt, quo ceteri ad eorum virtutem imitandam, & pugnam cum hoste alacriter capeffendam, accendantur. Arma eorum & tela,

lanceæ è ramis palmarum, & enses lapidei.

Regulos suos cum aureis monilibus, smaragdus, pane & vino sepeliunt: & in multa eiuscemodi ditissima sepulcra incidere Hispani.

Accolæ ingentis illius suprà memorati fluminis² Caribes sunt, sicut & San-marthenfis

oræ indigenæ. Herbarum succo venenato

sagittas inficiunt: & ante aduentum Hispanorum capitales cum Bagotta inimicitias &

assidua bella exercebāt. Strenui sunt, feroces,

ultionis cupidi: ad bella secum Chiappem

numen suum, velut victoriæ arbitrum, secum

deferebant. eique priusquam expeditionem

inirent, lectas humanas victimas vel ex capti-

uæ alicuius feminæ liberis, vel ex hostibus

captis, mactantes, pluribus sacrificiis litabant:

totumque ipsius simulacrum sanguine obli-

nentes, carnes inter se ipsi epulabantur.

SI victoriam domum referret, effusa cum

lætitia cantantes, saltantes, & sese ad ebrietatem

vsque potu inuitantes, hostium sanguine

quos bello captos adducerent, Idolum similiter

vngebant. Victi verò, mæsti & confusi novis


sacrificiis Chiappem placare studebant,

vt

vt deinceps propitius ac volens adesset ipsis & victoriam daret. Multa præterea alia à me de earum gentium moribus referri possent: sed ne fastidium legentibus pariam, ad sequentia propero.

I SOLEM vsque adeo venerantur, vt eum contrà intueri non audeant. Luna verò etiam, vt Soli, diuinos honores tribuunt. Gomara Hist. gen. lib. 2. cap. 72.

2 Caribes propriè dicebantur quondam, Boriguena, Dominica, Matitini, Cibucheira (hodie S. Crucis) insularum incolæ: qui canois, id est lintribus monoxylis, vecti, Hispaniolensibus Indis bellum inferebant. Creduntur Caribes illi insulares originem duxisse è Caribana, Vrabensis sinus orientali ora, in continenti Indiæ Occid. Caribes autem homines strenui & fortes, Indico idiomate appellantur. Vulgò hodie omnes arcu & sagittis infestos Barbaros Indiæ continentis accolæ, ita nuncupant. Caraibes verò apud Brasilienses, sacerdotes seu vates, dicuntur.



Indiæ continens multis locis desolatur. Indi Hispanicam seruitutem presidio & difficultate locorum effugiunt.

Hispanis agrè commeatus præbent. Pecuniam aspernantur.

CAP. VII.

IAM, vt ad meam peregrinationem reuertar, quum ad Carthaginem applicuissem: quòd nauis qua vectus eram, multam aquam accipe-

ret, nec inde soluere maturè posset, necesse
me fuit aliam opportunitatem ad traicien-
dum expectare. Quadragésimo quarto de-
mum die myoparonem ad Nomen-dei ten-
dentem conscendi. Nos oram semper præter-

*Achla, por-
tus & colo-
nia*

*Vide sup.
pag. 91.*

legentes primùm in Vrabensem sinum, mox
in portum Achlæ inuecti sumus. Oppidum id
est, tantum à mari remotum quantum balliste
telo bis adigi potest: ac tum ibi fortè octo e-
rant domus Hispanis habitata: quamquam i-
nitio quum ibi condita colonia est, plures vi-
ginti erant: sed vt res eorum semper in peius
lapsæ sunt, atque etiamnum labuntur, quòd
mutuis cladibus & Indos & seipsos attriue-
rint: maior ferè pars ad meliores sedes quæ-
rendas alius aliò dilapsi sunt. Ac propè idem
Antiquæ Darienis & aliis eius oræ coloniis
accidit, ynde ab Hispanis vulgò demigratum
est.

O C T O antequam portum illum Achlen-
sem attingerem, diebus, eò appulerat vna na-
uis, quæ onusta mulabus San-dominica ad No-
men-dei vela fecerat. Ea quum ad oram con-
tinentis applicuisset, nec regionem calleret
navis Gubernator, pro certo habens se infe-
riùs ad fines Veraguæ esse, signum soluendi
dedit. Quumque ratus se Nomen-dei versus
nauigare Carthaginem tenderet, ad os por-
tus Achlensis applicuit. Gubernator quum
nec quò iret neque vbi esset sciret, & suspen-
sus animi terram prospectaret, fortè accidit
vt Hispanus quidam illac propter litus inam-
bulans, nauimque in portus faucibus stantem
conspi-

conspicatus, aberrasse eam à cursu regionis ignorantia suspectaret. Itaque confestim domum recurrens arreptum mantile hastæque alligatum è litore sublimè erigit. Qui in naui erant, signo conspecto, portum intrant mulasque in litus exponunt.

CETERVM mercatores, si eas rursus in nauim imponent, penuria pabuli & incultu haud dubiè perituras rati, nauem ad Nomen-dei mittere, & ipsi mulas terrestri itinere Panamam deducere, instituunt. Ergo sese comparant, commeatus prouident quantum ad iter sufficere videbantur. Interea me rogant ut comitari se vellem: discedimus, præeunte nobis Hispano quodam non admodum perito duce itineris, & viginti Æthiopicis mancipiis quæ ex mercatorum familia erant. Singulis securis in manu aperiendo itineri erat: quippe absque eo nulla transeundi spes, quum densarum arborum rami alius alio implicati & concutescentes ut perpetuam sepem obicerent.

IAM XIV. dierum spatium emensi eramus, vixdum dimidia itineris parte & paulo amplius confecta, neque vlla earum gentium vestigia cõparebant quibus eæ terræ antea frequentibus habitari consueuerant, quum prosperis rebus vterentur. Iamque mercatores, deficiente anno-na, mulam vnam ad vescendum mactare cõstituerant, quum ecce vesperi sub occasum solis è vertice montis cuiusdam, summa cum omnium voluptate, ingentem fumum euolui prospicimus: dux viæ Indici alicuius mapalis id signum esse monuit: sibi tamen haud festinandum videri: sed secundam noctis

*Hispani cõ-
meatus &
hospitia nõ
reperiunt,
vbi ipsi so-
litudinem
fecere.*

vigiliam expectandam esse, qua Barbari nec opinantes & sopiti opprimi possent. quippe (aiebat, optima ratione quod dixerat confirmans) si nos euestigio rectà ad illos iter capessimus, simulac nos conspexerint, nihil ulterius cogitantes quàm nos eò venisse ut ipsos in servitutem redigamus (vti fieri solebat priusquàm ex Hispania Edictum Cæsaris de eorum libertate allatum esset) fuga se proripient in silvas: nos verò vnde commeatus inopiam subleuemus ad peragendum iter non habebimus. Sic dictum, sic factum: atque ut tutius lateremus, degressi è summis iugis vsque ad medium montis, magnam ibi noctis partem substitimus. Mox egressi latebris ad mapalia tendimus. Quatuor erant, & quidem permodica: quæ ut ingressi sumus, & Indi tumultu irruinentium excitati nos agnouerunt, horribili cum ululatu vociferari incipiunt, *Guacci Guacci*.¹ Id genus quadrupedis est apud eos, quod noctu illic vagari & rapto vivere assuevit. Eo nomine Christianos scilicet vocant.

*Hispani
Christiani
nomen in
tantum cō
semeum ad
duxerunt
apud In-
dos, ut se-
ris compa-
rentur.*

Nos interea ingressi omnes ferè qui in mapalibus erant comprehendimus, & ibidem perpetem eam noctem pernoctauimus. Id verò mihi affirmare licet, numquam me talem planctum vidisse aut audiisse, qualis ea nocte ab illis, maximè à feminis, editus est. Quum enim pro certo haberent nos eò venisse ut omnes in servitutem abduceremus, desperabundos caput Manadum ritu agitantes cerneret, tum inter se flebiles voces & questus miscentes: mox capita terræ allidere, ferire

*Servitus
etiam bar-
baris odio-
sa.*

manibus

manibus: dentibus etiam, instar ferarum frendentes morfu pannos appetere, ac despuere in faciem. Denique, nisi furorem eorum cohibuissemus, haud dubiè nonnulli sibi vim attulissent.

TANDEM luce orta & finitis horrendis illis clamoribus, quam commodissimè fieri potuit spiritus eorum mitigauimus, signisque & nutibus docuimus, non aliam ob causam ad eorum mapalia venisse, quàm vt alimentis repertis ad alterum mare cum mulis perueniremus. Neque verò etiam in posterum illis de seruitute esse metuendum. siquidem Edicto vetuisse Castellæ regem, ne ultèrius pro mancipiis abducerentur. His aliisque multis eiusmodi à nobis auditis recreati aliquantulum & acquiescere visi sunt, fraudem tamen subesse aliquam semper utiq. suspectantes. Itaque ab illis pane, piscibus, fructibus, & aprugna carne (Apri autem illi Indici, ² seu agrestes sues, umbilicum in dorso gerunt) donati, vicissim illos cultellis aliquot, & salis paululo, remunerati sumus: quumque insuper illis nummos aliquot, ex eorum specie quos regales vulgò vocant, dare vellemus, non spernunt. *Indi magno animo pecuniam spernunt.* luerunt accipere, dicentes eos sibi nulli vsui fore.

INDE, quum dierum quatuor quiete recreati essemus, abeuntes nos Indus vnus ultro comitatus, tamdiu prosequutus est, quoad nos in rectam viam sisteret. Quum ab eo percontati essemus, numquæ Indorum præterea mapalia aut pagi in itinere nobis occurrerent,

Nulli prorsus, respondit. quippe Guacci, inquit, partim populationibus, partim cædibus omnia hæc vasta fecerunt. Hoc edito responso Indus domum suam repetit: nos octauo de mum die maximis cum laboribus Panamam peruenimus.

I E ANDEM esse hanc feram puto cum ea quam in Noua Hispânia Tecoani appellant, quam tamen illius prouinciæ indigena usque adeo non expanescunt, ut noctu ingredientem domos nil auerfati, nihilque timidiùs ad eius conspectum eloquuti, quàm Tecoani, Tecoani, deligere etiam ex omni familia, quem velit, ad pastum sinant, felicemque eum existiment quem illa corripuerit. Optimum autem maximè quemque illa & pinguisimum ferè pignerari consuevit. Id ex Hispano quodam olim in Mexicana prouincia episcopo, postea verò ad veram religionem conuerso, auditum à drastantissimo viro accepi.

2 Idem confirmant, qui in Noua Hispânia agrestes suos videre. Idem de Nicaraguensibus aoris scribit Gomara Hist. gener. lib. 5. cap. 204.

Neque dispares Brasilienses sunt, quos Barbari Taiaffou vocant, de quibus
Lerius Nauig. Brasil. cap.

10. agit.



Panamensis & Veneti emporij collatio. Quæ mercatura ab Hispanis in India continenti exerceantur. Hispanorum cum Italis duellum.

CAP. VIII.

DICUNT

DI CVNT nonnulli eius vrbis, Panamæ
 videlicet, emporium & negotiationes *Panamæ*
 penè tantas esse quantæ sunt inclytæ *sis & Ve-*
 ciuitatis Venetiarum. Absurdè id adeò, vt ab *neti empo-*
 istis scriptoribus illustrissimam & magnifi- *ri impar-*
 cam ciuitatem Venetiam numquã visam esse *collatio.*
 existimem: quæ quidem neque opibus, neque
 imperij maiestate, neque mercatu, neque di-
 uitiis, neque iustitiæ splendore vlla earum ci-
 uitatum quascumque sol ambit, inferior est.
 Atque haud dubiè decem tantum mercatores
 Veneti mercibus omnibus quotcumque toto
 anno Panamam importantur coemendis, i-
 psaque adeò solida etiam ciuitate, facilè suf-
 fecerint. Porro nequis me id eleuandæ glo-
 riæ Hispanorum dicere ac per inuidiam pu-
 tet, eius emporij integram descriptionem,
 simulque Nominis-dei prodere volo. Sita
 est hæc ciuitas in septentrionalis Oceani li- *De eo vide*
 tore, vulgò mare Tramontanæ nominant. *sup. pag.*
 104.

PORRO quotannis ferè quatuordecim
 aut quindecim naues, maiores & minores, ex
 Hispania ad Nomen-dei commeare solent. *Nominis-*
 quarum maxima mille & octingentarum am- *dei empo-*
 phorarum est. Aliæ aliis onustæ mercibus, *rium.*
 quales ferè hæ sunt: vinum, farina, panis bis-
 coctus, oleum, panni, sericum, denique aliæ
 res quascumque tum ad vsum domesticum,
 tum ad tuendam vitam, ferre solet Hispania.
 Ac nonnumquam vsuuenit tantam earum co-
 piam eò importari, vt vel maior in ipsa Hispa-
 nia non reperiatur. Ipse quidè vidi nonnullos

qui conuectas eò merces vt oliuas, ficus, vuas passas & alia eiusdemmodi, quum nullum earum pretium reperirent, pro nauulo & vectura Magistro nauis relinquerent. Sæpenumero contrà tantam rerum omnium penuriam ibidem esse accidit, quòd naues à commeando metu Gallorum impedirentur, vt omnia contrà auro æstimarentur & venderentur, vt vulgò dici solet.

CETERVM appulsis ad Nomen-dei nauibus, Mercatores onera & merces per flumen Chiaram exiguis lintribus mittunt in locum cui Crux nomen est (is xv. millibus Panama abest) ibique omnia Hispano cuidam consignant, qui rerum aduectarum custodiæ præest, donec à mulionibus Panamam deuehantur. Atque inde aliis nauibus ad¹ alterius illius maris oram stantibus, maior pars merces in Peruanam prouinciam, atque in omnes ingētis illius regni ciuitates Hispanis hodie habitatas, dimittunt. Si verò Panamæ simul & Nominis-dei ciuium & inquilinorum censum agere numerumque inire libeat, vix, vel vt quum maximè abundarunt multitudine, quatuor millia capitum vnquam habuere. Ex quo Lectoribus facillimè colligere est, an meritò Panama emporij & mercatus amplitudine ditissimæ & illustrissimæ ciuitati Venetiæ æquare se possit.

*Hispanica
iactantia
censura.*

SED in iis prouinciis Hispani reperiuntur nonnulli adeo vaniloqui & gloriosi, vt suimet laudandi nullum finem faciant, ij præsertim qui Italiam viderunt. Nonnulli dictitant se
hanc

hanc aut talem arcem expugnasse: se singulari certamine congressos ex hoste victo semper decus tulisse. Alij, sollertia sua atque astu ingentem & celebrem ciuitatem captam ac direptam fuisse: Vnum Hispanum quatuor Germanis, tribus Gallis, duobus Italis, contrà valere. Quingenti certè illorum haud dubiè, Venetiæ depictæ capiendæ facillimè suffecerint, perinde vt si ea casale aliquod esset è stipulis aut lignis compactum, viginti quinque aut triginta fortè casas seu mapalia continens, quales ferè sunt maximam partem ciuitates & coloniæ ab illis in India ædificatæ. Præter hæc plerique eorum, ex Hispania transgressi non modò in has Indiæ oras sed & in alias prouincias quascumque sub imperio tenent, vento tumidi iactant se ex stirpe Gotthorum, Gufmannorum, & Mahricorum, originem ducere: mox verò vt patuit veritas, deprehenduntur in Hispania aut ¹subulci aut opiliones fuisse.

Hic locus admonet vt Hispani cuiusdam (Montanesio nomen erat) insignem historiam referam. Hic quum paulo ante memorabile ad Rauennam commissum prælium, Senis, magnifica Hetruriæ ciuitate, esset, ac fortè in circulum multorum inter se cōfabulantium, cum nobilium tum ex plebe hominum, incidisset, magnificè superbèque virtutem efferre Hispanorum, ac ceteros præ illis despiceret atque obterere cœpit: inter alias quidem raras eorum dotes, non alios mortalium rotandi ensis peritia ante Hispanos esse. Hæc

*Hispanis
militaris
virtutis
laudem nō
quam eripi-
am. vti-
nam cete-
ra ad hunc
modum.*

verba paulò arrogantius iacta adolefcēs quidam Romanus (Iulianum vocabant) Parionē-
 si vrbis regione, in medium progressus, excep-
 pit, & Si libet, inquit, tibi ô Montanefi, singu-
 lari certamine & paribus armis mecum con-
 gredi, faciam vt cognoscas nullum externum
 militem, nec bello meliorem nec valentio-
 rem Italo esse. Hoc responsum generosum & mo-
 destè factum omnes qui aderant vna voce ap-
 probant.

*Hispanorū
 cum Italis
 duellum.* Conuenit inter eos vt succenturiatum sibi
 quisque militem & socium legeret, & ad cer-
 tamen solo gladio Hispanico, & chlamyde vi-
 ce clypei vterentur. Montanefius socium sibi
 adlegit iuuenem quendam Cordubensem si-
 bi notum, qui gladiatoria artis & tractandi
 ensis peritissimus erat. Romano non defuit
 Tiracoscia Castellanus, adoptatus ab eo &
 amicè inuitatus ad participandum Italici no-
 minis decus. Vbi dies dicta aderat, ad præcla-
 rum illud spectaculum tota propè Hetruria
 concurrat. Senensis magistratus liberum cer-
 tamini locum concessit, celeberrimum vrbis
 campum, ei rei aptum & ad Theatri similitu-
 dinem factum. Ibi tantis vtriusque animis
 concursus est, tantisque huic vel illi parti
 fauentium studiis res celebrata, vt publicum
 decus ita præproperè ac temere in priuatorū
 manibus collocasse propemodum pœniteret.
 Hispani tandem, veterum gladiatorum ritu
 dimicantes, priores defatigati & victos se fas-
 si sunt, iam decem & septem ingentibus vul-
 neribus tum in facie, tum aliis corporis
 partibus

partibus acceptis exsanguis : quum Italis no-
uem duntaxat imposuissent. Hæc ludicra
pugna non lætis tantum passim vulgi ser-
monibus celebrata, sed & doctè à Poetis de-
cantata est, quorum semper in Hetruria ma-
gna copia est.

I FRANCISCUS Pizarrius, qui ditissimū
Peruanum regnum subegit, & Marchio fuit,
primum pro spurio expositus, ac vix tandem à pa-
tre agnitus, suus puer quondā in Hispania pavit.
Almagri verò, eius socij, natales adeo obscuri
fuere, ut eius adhuc ignoretur pater. An autem
hic Benzo falsò vanitatem ementienda stirpis &
nobilitatis in Hispanis reprehendat, testari pos-
sunt, qui in regno Siculo & Neapolitano primum
aduentantes Hispanos vidēre, cum calceis, aut
sculponeis, è sparto, reticulato opere consutis, sen-
tos, squalidos, & planè albis, ut inquit ille, pedi-
bus. Postquam enim degustatis Italiae delicijs &
vestiti serico, repentè velut Circeo poculo in alios
mutati, se subulcos aut opiliones fuisse

obliti sunt, quæsitis titulis, Dom-

Diego & Dom-Fernan-
do vocari se

iubent.

* La obediencia

m.ij.



*Panamæ & Nominis-dei Hispanicarum coloniarum situs,
Æthiopes fugiui, Hispanorum nego-
tiationes infestant.*

C A P. IX.

*Panamæ
situs.*



VNC vt Panamam, vnde deflexerā,
reuertar, sita est ea ciuitas in plani-
cie permodica ad Australis Oceani
oram, mari adeo vicina, vt plenilu-
niis æstus in domos quæ in eam partem versæ
sunt facillimè restagnet. Eæ ferè partim arun-
dinibus, partim materia compactæ & propè
omnes tegulis contactæ, quum ibi essem cen-
tum & viginti numerum non superabant. Cō-
modum & tutum portum habet, sed exiguū:
æstu affluente, naues portum ingrediuntur:
remeante exeunt, leuius tamen onustæ, ne vi-
delicet tenuiori aqua destitutæ in vadis hæ-
reant. Ceterum ita mare reciprocatur, aquis in
suum fretum recurrentibus, vt duorum am-
plius milliarium spatio paulo antè profundo
salo mersa æstuararia reddat detegátque, & cre-
bras tantum alluuias & stagna relinquat. Pau-
lo longiùs naues tutæ in ancoris stant, & sca-
pharum ministerio ad merces accipiendas aut
exonerandas vtuntur.

ILL O autem mari ea ferè Panamam adue-
huntur: Maizium, farinæ nonnihil, quod ex
Peruanis prouinciis eò deportatur: gallinæ
& mel. Vaccarum verò, suum, aurantium
malorum, limonum, brassicarum, ceparum,
lactuca-

lactucarum, metonum, aliarumq. hortensium herbarum ibi summa copia est. Hæc prouincia Panamensis multis Indicis populis habitari & frequentari quondam solebat, eiusque omnia flumina aureas arenas voluebant: sed omnia ab Hispanis exhausta & consumpta sunt.

E Panama ad Nomen-dei usque terrestri itinere L. milliarium spatium est. Primo die iter satis facile & commodum reperias: mox verò excipiunt silvæ, quæ usque ad Nomen-dei pertinent. Medio fermè viæ intervallo flumen intercedit, quod propter multiplices mæandros & tortuosos flexus vix trium horarum spatio traicitur. Hispanis verò etiam aliquot euenit vt hiberno tempore deprehensi in medio eius fluminis aluco, quum repente fuso ingentibus procellis imbre excreuisset, neque illi locum opportunum quò se reciperent haberent, aquis haurirentur. Hispanum quendam ipse cognoui, qui in traiectu illius amnis, quum iam imbre auctus intumesceret, neque illi quidquam ad traiciendum superesset præter vltimum euripum, seu brachium fluminis, mulam inequitans & auro monilibusque quatuor millium ducatorum precij onustus, prærapida profluentis celeritate abreptus est. Fortè tamē quum ad ramum arboris adhæsisset, ipse incolumis ad terram euasit, rebus omnibus amissis, & solo thorace vestitus Nomen-dei venit.

Hæc ciuitas, porrecta ab ortu in occasum longitudine, ad mare posita est, in vmbi-

m. iij.

*Nomen-
dei celo
solo graui
colonia.*

lico ingentis siluæ: insalubri & pestilenti solo, hieme præsertim, tum ob ingentem calorem & humorem terræ, tum ob paludem quæ ab occidentali parte cingitur. Ergo colonorum ibi crebra funera: domus quales Panamæ, quumque in ea prouincia essem, in ea vrbe habitabant quindecim aut viginti negotiatores magnarij, qui mercimonia in solidum vendebant: ceteræ domus & tabernæ propolis, aromataris, nauticis, cauponibus aliarumque aliquot artium necessariarum opificibus, occupabantur. Omnes mercatores qui Nomine-dei domum habent, habent etiam Panamæ, ibique tandiu commorantur quoad diuites euaserint.

IN Septentrionali eius vrbis parte portus est multarum nauium capax. E rebus ex Hispania cò translatis pestilens illud solum has producit: limones videlicet paucos, aurantia mala, raphanos caudæ muris crassitudine, brassicas, lactucas, sed eas perexiguas, perpauca, nec admodum bonas. Cetera ex Hispaniola, è Cuba, Nicaraguæ prouincia, cò importantur, Maizium nempe, Cazabi panis, caro salita, porci, battatæ radices: è Panama vaccæ, quum non ferè aliunde carnis recentis illis copia sit. cetera, vti antè dixi, ab Hispania subuehuntur.

*Ut Hispani
seruos sic
serui Hispani
nos vexat.*

NON procul Nomine-dei, ad Orientem, siluas tenent aliquot fugitiuorum Æthiopum populi, qui multos Hispanos à Præfectis prouinciæ in suam perniciem missos trucidarunt. Illi quum ad ripas fluminum, quæ siluas illas interflu

interfluunt mapalia Indis habitata fortè reperissent, cum illis foedus atque amicitiam pepigere. Veneno tinctis & ipsi sagittis vtuntur, multique eorum iter quod Panamam fert obfidentes, quoscumque Hispanos capere possunt, omnes barbarum in morem lacerant & necant. Adhæc quum hiberno tempore propter reflantes ventos, lintres quibus merces per flumen Chiaram deuehi solent, ad "Cru-^{"Supr. pag.} cis stationem tardius sæpe perueniant, merca^{176.} tores moram pertæsi, terrestri itinere mercimonia aliqua mittunt: vbi si obtigerit (vt sæpe fit) agasones in Æthiopas illos fugitiuos incidere, tum illi mercibus omnibus ereptis, Numidas seruos qui mulas agunt, intactos abire sinunt, si sese ipsis adiungere noluerint. Hæc in summa negotiatio est, hoc commercium emporij Panamæ & Nominis-dei.

IAM verò quum^{"Lib. I.} superius asperrimi & sæuissimi soli Veraguæ prouinciæ descriptionem^{cap. 21.} exsequi promiserim, reddi commodè hoc loco puto: idque vt iudicent Lectores quantum intersit aliqua de re ex ore & iudicio alieno, an propria experientia, disserere.

I ÆTHIOPICOS seruos designat, quos Hispani è Nigritarum prouincia in Indiam deuexere. Ii enim iniquis laboribus & intoleranda Hispanorum sæuitia oppressi, tum in Hispaniola aliisque insulis, tum in Continenti tumultus aduersus Hispanos mouent. Nonnulli etiam Barbaris iuncti, in totum Hispanicum iugum excussere. &c. de sup. huius lib. cap. I.



Veragua asperissima provincie descriptio. Did. Gottierez Præfectus eam inire audent. Eius regulos beneficijs demulcet. A militibus famelicis deseritur: alios Nomine-dei arceßi curat.

CAP. X.



A NNO Salutis nostræ M. D. XL. Didacus Gottierez Mātua Carpetanæ ciuis (Madritium vulgò vocant) à Cæsare Carthaginis nouæ, prouinciæ ditissimæ, Gubernator dictus, ex Hispania soluit. Appulsus ad Nomen-dei, phaselo per remissarium seu alueum lacus Nicaraguâ petit ad delectum militum habendum, quibus stipatus prouinciâ suâ iniret. Eius orę Præfectus erat Rodericus quidam Contre-ras: ibi propter similitudines inter eos exortas Didacus duos circiter annos tempus frustra terit. Tandem interuentu Episcopi reconciliata inter eos amicitia, quum Roderico sermo apud Didacum institutus esset de ipsius Præfectura, monet horribilem illam regionem propter asperissimas siluas & inaccessos montes nulla ratione posse subigi: neq. equis tantum imperuiam esse, sed pedites quoque ipsos intolerabili cum labore vix eâ iter facere posse. Omnes porro duces ac præfectos, qui eam intrare ausi essent, partim fame absumptos, partim ab Indis trucidatos omnes ferè Hispanos qui eorum auspicia sequuti essent destituisse. Itaq. si eò ire sententia ipsi staret, cōsulere se vt c. Hispani statiuus ad mare positus ter quater ve in anno per æstatem modò in hanc modò in
illam

*Veragua,
asperissima
regio.*

illā partem populabundi excurrerēt, prædāsque agerent ex iis populis qui omnes auro abundarent. Se verò fidem suam iureiurando obligare, si in manubiarum partem veniret, ipsi exercituique eius res omnes ad victum necessarias suppeditaturum, qualis in India institui solet. Ad hæc verba Didacus respondet, Enimuero eam prouinciam à Cæsare non ea lege sibi attributam, ut eam exinaniret latrociniiis, sed ut coloniis impleret: quòd si aliis fortuna aduersa fuisset, sperare, Deo fauente, eam sibi fore propitiam: inceptum quidem omittere non esse sui animi, multo verò etiam minus cum quoquam labores participare aut societatem coire velle.

Hic ita constitutis, iter apparat: Maizium, salem, suillas carnes, mel, gallinas, & alia comit: rebusque omnibus satis instructus cum sexaginta Hispanis, duabus myoparonibus Granata soluit, & secundo emissarij lacus alueo per quem venerat defluens, breui ad mare peruenit. Inde L. millium spatio oram præteruectus ad orientem, Suere flumine aduerso subiens, prouinciam suam ingreditur. Sex milia progressus inde à mari, ad eius ripam fluminis mapalia aliquot desolata & semirutaprospiciens in terram egreditur, & ut eius loci ac temporis necessitas ferebat, præsidium & hospitium sibi molitur.

Hic obuiam ei progressi Indorum reguli, ignobilioris notæ aurum quod septingentorum ducatorum pretium æquaret, offerunt. Gubernator eos multa cum comitate & be-

*Hispanio
à salute a-
nimarum
facto in
aurum de-
fuit.*

nigno vultu excipit: quumque neutri alteros intelligerent, variis nutibus significat, se eò venisse vt Salutis animarum iter rationemque ipsos doceret. Mox illos sphæularum precatoriarum ex vitro linea vna seu seroto, crotalis, tintinnabulis, & aliis eiusmodi minutiis, muneratur. Inde sciscitando exsequitur vnde aurum peterent: illi longinquis è regionibus sibi peti respondent, ibique inter arenas fluu- uium ex asperrimis montibus decurrētium legi. Hoc edito responso dimissi & ad suos reuersi, subditorum aliquos interdum cum piscibus, fructibus, carne aprugna fumo dura- ta, ad Gubernatorem mittebant.

*Milites
Hispani præ-
fectum de-
serunt.*

Ipsæ multis iam diebus elapsis, quum pro- pter incommodum anni tempus (hiems enim erat) vltius progredi non posset, & Nicara- gua subuecti comitatus iam deficerent, cœ- pit à Cacicis illis petere, vt se Maizio ad di- es paucos iuuare vellent: se enim propediem vltius progressurum. Illi quamquam nihil vehementius cuperent, quum cogitarent non alia re magis Christianos quàm alimentorum penuria & fame è suis finibus eiici posse: ami- citiam tamen Gubernatoris sibi cordi esse si- mulantes, Maizium, sed quamparcissimè, ei summittebant. At milites quibus suo arbitrio vefci non licebat, tam anxie & miseræ vitæ pertæsi, noctu omnes ex composito fugiunt, quumq. terrestri itinere propter litus ad emis- sarium lacus Nicaraguensis peruenissent, post- biduum phaselos fortè repertos, qui à No- mine-dei veniebant, conscendunt, & Nicara- guam repetunt.

Gv.

GUBERNATOR desertus à suis militibus, nec quoquam comitatus præterquã vno suo nepote, quatuor famulis & remige vno, cauo in terram factò, defossa ibi vasa salis & mellis plena superaggesta humo obruit. Mox phaselum conscendens ad mare peruenit, Nicaraguam petendi animo: iamque oram soluebat, quum ecce trib. Barientus myoparone vno commeatu virisque onusto inuehitur, qui è Nicaragua in ipsius subsidiũ veniebat. Hoc nouo supplemento auctus Gubernator restitit: myoparonem verò Nomen-dei petere iubēs, ei Alphonsum Pisanum nepotem suum præficit: cui traditis muneribus quæ à Cacicis acceperat, mandat vt quammaximè multos milites conscribat & adducat.

ILLE, vt ad Nomen-dei peruenit, de eius prouinciæ diuitiis dispersa illico fama, viginti septem milites conscribit: quumque per eos dies fortè in ea vrbe essem, eorum vnus esse volui, quamquam ab Hispano quodam iam prouectæ ætatis viro ea de re correptus. Is quum Carthaginensem prouinciã, S. Martham & alia eius oræ loca permessus quindecim annorum vsu calleret, monebat ne ad eam expeditionem vllò modo abduci me sinerem: neq. ipsius adeò Præfecti verbis ac pollicitis persuaderi: quippe illis mētiri & fallere nihil pēsi esse dū res suas agāt. Sin mihi eundi staret animus, saltē in aliud tēpus differrē: interea rebus ipsis patefactū iri, quorsū ea incepta euaderēt. Apud me, qui tū iuuenis & viuido ingētis animi vigore plenus essem, tū ditescēdi cupidus,

*salubre
& senile
consilium.*

*Spes diuini-
tariū ceca.*

parum fidei atque autoritatis ea verba habuerit: itaque proficisci statui. Abimus, & quarto inde die ad ostium Sueris fluminis appellimus. Sed quum mare intumescens subire nos alueum fluuij sine præsentis periculo non sine-
ret, retrorsum vela dantes Zorobarense insulas perlegimus, quæ in confiniis Carthaginis nouæ & Veraguæ prouinciæ iacent. Quum verò illa prouincia informis & aspera solo sit, hæc multo etiam peior est. Hæ insulæ exiguæ sunt & desertæ ab Indis incolis, qui in montes ex aduerso in Continenti sitos profugerunt.

IB I propter contrarios ventos (quippe tum mensis erat Iunius, iis locis initium hiemis) septuaginta duos dies morati, toto illo tempore vix quatuor horas Solem conspeximus: quum assidui ferè & maximi imbres, tonitrua, fulgura, aerem adeo perturbarent, vt cælum ac terras misceri ac ruerè crederes. Fulgetri radius in myoparonem delapsus, Æthiopem vnum & duos Hispanos exanimauit, ceteri afflati & attoniti resistere. Prætor myoparone ad continentis littus applicari iusso, tantisper progredi statuit, quoad in loca Indis culta & habitata peruenisset, vnde alimenta expediri possent. Sed quum totos octo dies per siluas, paludes & montes adeo præruptos, vt vel solo aspectu horrorem incuterent, absumsisset, peractum iam spatium relegens, terrestri itinere propter litus ipsum ire instituit. Ea via summis cum laboribus (quum nullo cibo propè vesceremur, præterquam

quam cochleis, & agrestibus pomis, quibus cercopitheci aluntur, assiduè in illis silvis ex arbore in arborem desultantes) tandem nos ad eum locum tulit ubi erat Gubernator.

VIGESIMO die postquam eò veneramus, myoparo noster portum subit: cum Gubernator illico in Nomen-dei remittit ad plures milites aduehendos: nos interea aliquot dierum quiete corpora refecimus. Inter hæc multas testudines inusitatæ magnitudinis cepimus, quarum ingens copia quatuor mensium spatio per ea litora diffusa est. quippe illæ in terram egressæ in arenis pariunt ova, ut crocodili solent: quæ mox vehementi solis calore maturantur. Nos detracto earum cortice & sublato adipe, quum eò ingentia fictilia vasa implesemus, carnis quoque aliquantum saluimus: sed ea breui corrumpebatur: quum recens quidem saluberrima & esui iucundissima esset.

Testudines inusitata magnitudinis

I NICARAGVENSIS lacus ab Australi oceano X. aut XII. tantum pass. millibus distans, in mare Septentrionale, à quo C. leucarum spatium abest, navigabili alveo sese exonerat. Quidam ex voce Hispanica Defaguadero, quæ Emissarium sonat, fluuium vel solo nomine terribilem, Xaguatorem, fecit.

2 NIQVESA primus infelicitè eam tentavit, de quo lib. I. Philippus Guttierrez Madriciensis, quum eam provinciam cum quadringentis amplius militibus inisset, anno M. D. XXXVI, omnes partim fame, partim venenatis herbarum succis,

consumptos amisit. In quibus agri & seminiui duo à sociis, fame in rabiem versis, mactati & comesti sunt. Anno M. D. XLVI. Christophorus Pega à Lod. Columbo Almirante, ad deducendas colonias eòdem missus, nihilo mitiorem exitum habuit. Itaque Hispani eam prouinciam vt infaustam, & indomitam reliquere. Gomar. Histor. gen. lib.2. cap.56.



¶ Did. Gottierez, regulos Suerensis prouincie primò verbis delinit, mox vinctis onerat, & aurum ab ijs extorquere nititur. Cacicus vnus custodia elabitur.

CAP. XI.

Quo primùm die portum ingressi fuimus, Gubernator benignè me mēsa suā adhibuit: quùmque summa cum voluptatē mecum confabularetur, maxima pars ipsius sermonum de auro & argento erat: tum de bellis ac cladibus quibus misera Italia attrita fuerat, ac Mediolanensis ciuitas maximè: sed **quum** deprehendisset me haud satis libenter hæc audire, ex eo me adeo abhorruit, vt conspectum meum ferre non posset. Ceterum his quæ antè dixi prouisis, Gubernator inde soluēs cum omnib. militib. phaselo suo, & quatuor Indicis lintrib. aduerso flumine subuectus, circiter xxx. millia procul à portu, breui in Sueri fluminis fines progressus est. Hospitium ei præbuit casa, quam
eius

eius prouinciæ Regulus amœnitati dicauerat, quum piscatum ad illud flumen ventitaret. Hæc casa oui figuram referens, longitudine in XL. passus patebat, circumplexa arundinib. & palmarum foliis contecta, quæ singulari opere nodis in semetipsos implicatis intexta erant. Erant & alia ibi mapalia, verum haud sanè à vilioribus vulgatîsque abhorrentia. Gubernator hunc locum Ciuitatem S. Francisci nominat, quod eo die fortè illò appulisset.

Mox ei obuiam venere Sucræ & Chiuppæ Cacicus, aliique minores reguli, & fructus tantum nonnullos ei obtulerunt. Ipse comiter eos excipit, multum tamen demiratus quòd nihil auri attulissent: ac per interpretem Hispanum, qui cum Indis aliquamdiu versatus erat, & eorum linguam mediocriter didicerat, significat se eò venisse vt rem summæ ipsis consolationi futuram aperiret. Porro quum prandij hora adesset, eosque vesci secum vellet, mensæ adhibentur cum sacerdote & interprete. Sed quum ibi nihil appositum esset præter gallinas & suillam salitam, neque Indorum regulis is cibus satis gratus esset, parcè admodum comederunt: ac plerique eorum cibaria, vt adposita erant, seruis suis humi recubantibus porrigentes aspernari: quæ mox & ipsi per ludibrium obiiciebant canibus.

PERACTO conuiuio, Gubernator sermonem de fidei rebus iniiciens, in hunc ferè modum exorsus est: IN has terras vestras, fratres & amici mihi carissimi, veni, vt æ

*Egregia
verba, nisi
Avaritia
omnia fec-
daret, que
et ipsa Idololatria
est.*

Idololatriam expellerem, qua ad hoc usque tempus blandis dæmonum illecebris vincti ac constricti fuistis. Deinde ut verum & ad salutem animarum vestrarum ferens iter perspicue vobis exponerem. Nempe Iesum Christum Dei Filium descendisse è cælis in terras ut genus humanum redimeret. Neque
 22 aliam ob causam equidem sacerdos hic me-
 22 cum usque ab Hispania profectus est, nisi ut
 22 vos Christianæ religionis rudimentis imbue-
 22 ret. Quamobrem ut Diuinæ legis obsequium,
 22 & Caroli Quinti Cæsaris, Hispaniæ regis ac
 22 totius orbis Monarchæ, imperium subeatis,
 22 animos & studia parate. Indici Reguli hac oratione audita, ne verbum quidem respondere, sed demittere caput, quasi ad omnia tacite se assentiri annuerent. Ita è mensa confurgentes, domos quisque suas repetunt.

*Hoc scilicet
ceterat In
dos conuer-
tere.*

SEQUENTI die Gubernator Hispanum vnum duobus stipatum Indis mittit ad duos Cacicos, qui in aduersa fluminis ripa manebant, ut illico fide ipsius freti, sine vlla formidine ad se venirent. Ut illi, quamquam ægrè, venerant, Gubernator in cellam penariam intromissos, catena quemque propria onerat: mox in cubiculum deductos ad lectum suum properè alligari iubet: vbi humo substratis foliis cubile, ligneo trunco puluini usum præbente, ut ipsis mos est, somnum caperent. Hi duo Cacici, illi ipsi erant, qui quo tempore primùm Gubernator prouinciâ inierat, septingentos ducatos aureos ipsi obtulerant, uti superius diximus. Inde ab illis sciscitando
 exsequitur

exsequitur, vbi essent ea falis & mellis vasa quæ ad mare descendens defossa reliquerat. Quippe quum misisset qui quærerēt, vacuum locum repererat. Illi se nescire respondent, neque iis certè indigere quibus ipsi abundarent. Sed Gubernator hoc responso nequam acquiescere, immo vtrique minari malum, ni prorsus ipsi satisfacerent. Itaque iunior (Camachiren vocabant) ei amplius duomillia ducatorum, nempe auri massas, quamquam ignobilioris notæ, in formam suam, tigrum, piscium, auium, & aliorum animalium elaboratas dedit.

GUBERNATOR paruum auri copiam cernens præ ea quam spe ac cupiditate præceperat, ingentem ignem accendi iubet, adductoque in conspectum solo Camachire, grandem cistam ante pedes poni. Mox illi seuerè interminatus, ni quatuor intra dies tantum auri adferret, quantum sexies implendæ cistæ sufficeret, fore ut igni cremaretur: à misero illo regulo, oblato præsentis mortis metu, promissum extorquet. Is ergo quum id se facturum recepisset, seruos suos ad comparandum pretium dimittit. Ceterum per omnem Indiam indigenis bis terte in die ablui aqua mos est: quem morem quum quotidie seruaret Regulus captiuus, fortè accidit ut Gubernatoris famulus, cui deducendi illius ad flumen lotum cura incumberebat, domum reductum non satis fideli custodia includeret. itaque noctu quæ eum diem sequuta est, euadit. Hinc Gubernator doloris vehementia ægri-

tudinem contrahit:& quoties cistam illam videbat dicere consueuerat,vice auri,quod sperarat, stercore implendam & percacandam esse.

ALII Cacici Sueræ & Chiuppæ, quum captiuos socios ita malè accipi à Gubernatore intelligunt, mapalibus ignem iniiciunt, frugiferas arbores fruticésque cædunt, fruges & grana è campis in tuta loca deferunt, & vastatis agris vt hosti solitudinem facerent, in montes perfugiunt.

*Avaritia
ne malis
quidem mi
uitur.*

IN hoc rerum statu, Gubernator, etsi morbo aliquantum impediretur, nihil tamen propterea intermittere quominus alterum Cacicum, qui adhuc in vinculis supererat, flagitando vrgeret, dictitans se ab illo certam auri summam expectare. Sed quamuis illum diu multumque omnibus machinis oppugnasset, minareturque sæpenumero se occisurum, ni ab eo aurum acciperet, Cacicus tamen quum sibi aurum non esse affirmasset, in eo ad extremum vsque constanter perseuerauit. Tandem Gubernator ira incensus, nisi aurum adferri sibi maturè procuraret, raptari se illum & canibus obiici iussurum, apertè denunciat. Ad hæc Cacicus intrepidè, Mirari se, ait, Gubernatorem adeo vaniloquum & mendacem: quando toties cædem ipsi minatus, re ipsa nondum patraisset. Sibi quidem mori optabilius esse, quàm ita in vinculis anxiam vitam trahere. Se fidei eius credentem, vltro in potestatem eius venisse, quum ab eo comiter se acceptum iri, nihil verò minus quàm ita fœdè cruciari,

*Ingenue
& magna
numa liber
tatis in Bar
baro exem
plum.*

cruciari, speraret. Ad vltimum addidit, se non posse imaginari quod genus hominum Christiani isti essent, qui tot ac tam nefanda scelera per omnia quæcunque adiissent loca ederent. mirari se, quomodo tellus adeo patienter tam immanes beluas alere & ferre sustineret. His verbis Gubernator perculsus, & ab ingenti iracundia defixus in silentium, nihil respondit nisi, Iure captum illum à se custodia attineri, vt, sublato sale & melle, furti compertum.



¶ Did. Gotierex, rebus parum ex voto fluentibus, paulatim contabescit. A Barbaris interficitur. Indis equitatus formidabilis.

CAP. XII.

INTER has rerum vices Gubernator sex Indos scapham ad mare miserat ad quendam suum clientem, vt ab eo ballistas, clypeos, aliasque sarcinas acceptas adueherent. Illi rebus omnibus acceptis & scaphæ impositis, cursum auertunt, neque postea aut visi, aut de iis nuntius vllus ad Gubernatorem allatus est. Ipse scapha amissa, Cacicis fuga creptis, myoparone non remeante, quum etiam penuria commeatus maior pars militum fugam spectaret, anxius mœrore & tristitia contabescebat. Postremò quum nihil iam

Indi toties ab Hispanis decepti eos aliquando fallunt.

melioris spei aut remedij superesset, velut amens & consilij inops in mediterranea progredi statuit. Itaque quum militibus iter pronunciari iussisset, & quidquid frugum supererat, quod exiguum erat, inter omnes diuississet, infirmos & ægros ad mare dimisit, ac cum iis vnum ex domesticis suis, qui Alphonsum Pisanum moneret, vt simulac ad portum myoparone applicuisset, ipsum sequi maturaret. Se verò, vt ille præeuntem vestigiis consectari posset, crucibus per interualla dispositis itinera signaturum.

IAM verò omnibus ad expeditionem accinctis, Cacicus vbi intellexit se cum aliis suis Indis & impedimentorum parte à Gubernatore abduci onustum ludibrio atque ostentui: tantum ex ea re mærorem animo accepit, vt puerilem in modum crebros gemitus & planctus ederet. Tandem à Gubernatore precium pro libertate paciscens, si solueretur, intra quatrimum magnam auri copiam pollicetur. Gubernator ei libenter vincula exmisisset, nisi à familiaribus quibusdam prohibitus esset: quum illi dicerent eum ab Indo deludi & pollicitationibus vanis lactari. ac si quatuor præterea dies discessum differret, cōmeatus ad iter defore. Semper illi fore sui redimendi copiam, in præsentia verò præstare expeditos milites, hac ipsa nocte ad diripiendum eius populum mittere, quàm promissorum eius fidem opperiri. quippe ita & alimenta exercitui prouisurum, & Indica
mancipia

mancipia ministeriis apta capturum. Id consilium Gubernatori displicuit, metuenti videlicet ne Hispani, si quos mitteret, eo deserto aufugerent.

ERG O iter ingredimur, vixque è tabernaculis egressi, eramus quum præfagiens ego, quid nobis tandem fieret, Hispanum quendam his verbis affatus sum: Nos ad lani- « nam proficiscimur. Ille verò mihi respon- « dens: Tu, inquit, vnus eorum es, qui vole- « bamus isti vel inuito Principatum vnum ac- « quirere. Quum quinque aut sex dierum iter « emensi per siluas & montes effemus, nullo humani cultus vestigio nec tugurio reperto: atque inter ceteros montem vnum superassemus xv. millia pass. admodum in altitudinem in descensu abruptum, adeo iniquis & arrectis faxis, vt virgulta & radices arborum circà eminentes sæpe retinere necesse esset, ne fallente instabili gradu in præceps deuoluermur: tandem ad ingentem amnem peruenimus, & ad eius ripam casas aliquot desertas inuenimus, quas venatoribus hospitium præbere consueuisse, repertis intus ossibus & capitibus ceruorum, tigrium aliorumque animalium, cōiecimus. Ibi Gubernator biduum moratus, ac reperta magna copia eorum fructuum quos vulgò Mamei vocant, & propter exiguum flumen multis eiusmodi radicibus quales sunt in Hispaniola eæ, ex quibus conficitur secundarius ille panis quem Cazabi vocant: optimi tamen illis saporis & quæ sub prunis incoctæ stomachum non læderent:

*De hoc fru-
ctu supra
pag. 125.*

his,inquam,alimentis repertis strenuè famem expulimus.

*Indi in tor
mentis mori
quàm suos
prodere ma
lunt.*

VLTERIVS progressi, post triduum in biuium incidimus: quumque Gubernator in eo viarum diuortio hereret vtram eligeret dubius, Indum vnum ex iis quos secum captiuos ducebat interrogat, Vtra certius rectiusque ad aliquem Indorum pagum ferret. Is quum se nescire respondisset, Gubernator eum ab Æthiopicis suis mancipiis abstrahi ad capitale supplicium iubet. Illi eum, vt erat imperatum, iugulant, dicendo, Malos homines hunc in modum tractari. Quum idem à Cacico percontatus esset, dixissetque & ille se nescire: ab Æthiopibus corripit hominem, & alterius exemplo interfici iubet. Ille vbi eos tendere ad se videt, deposito quod ferebat onere, caput mirabili cum tolerantia ad mortem inclinat. Barbari hominis constantia victus Gubernator, pœnam ei se remittere & vitam concedere, dixit.

Eo loco tres Hispani fame adeo debilitati vt stare non possent, relictî: postea ab Indis trucidati sunt. Sub eius diei vesperam Gubernator animaduerso nobis nihil ad vescendum superesse, quum eorum alimentorum quæ ipse reliqua haberet, nihil cuiquam impertiri vellet, canes mactari & inter omnes diuidi iubet. Ego tamen partem meam paulo post alteri dedi, quod ex illis carnibus vermes efferuescerent. Inde Gubernatorem adiç, sperans fore vt aliquid ab eo obtinerem: sed

sed ille me ad radices arborum delegans, iis me vesci iussit. Itaque Hispanus quidam co-
 responso cum aliis audito, Domine Guber- *Hisp. mili-*
 nator, inquit, quando prosperæ & aduersæ *tis libera*
 fortunæ sortem nobiscum subire non vis, so- *vox.*
 lus bellum gerito. His verbis Gubernator,
 simul Tribunorum precibus, permotus, etsi
 malè libenter, casei trilibrem quadram in tri-
 ginta quatuor partes dissectam inter omnes
 distribuit: ita vesperam illam utcunque tran-
 segimus.

E A D E M illa nocte Gubernator coquo *Fames sa-*
 suo mandauerat ut frustum vnum suillæ car- *gax.*
 nis coqueret: quumque excubiarum agenda-
 rum circa gallicinium meæ vices essent, illac
 fortè præteriens, ad ignem accedo. vbi quum
 dormientes omnes & sopitos offendissem,
 arreptum confestim lignum cultello exacuo,
 demersumque in ollam veruculum illud li-
 gneum in suillam defigo: extraho, & in pe-
 ram meam recondo. Mox ad stationem
 meam & vigilias reuertor, multo lætior
 quàm si in ingentem aliquem thesaurum in-
 cidissem. Gubernator ut rescivit, quan-
 quam admodum iratus, nihil tamen gra-
 uius eloquutus est quàm, Scilicet id tem-
 pus esse ollæ sine custodia relinquendæ: ego
 verò, valedicens radicibus arborum, suillam
 comedi, etsi paulo falsior esset.

B I D V O inde quum ad siluam quan-
 dam peruenissemus, in ipso ingressu Indum
 repentè conspiciamus ponè arborem stantem,

Speculator is erat, qui simul vt nos animaduertit, mirabili pedum pernitate ceruum æquans, ad prouinciæ regulum aduentum nostrum significatum abiit. Itaque sequentis diei summo manè Indorum agmen repētè in nos ingruit. Fortè Gubernator illa hora naturæ requisitis parens, ab ea parte erat quâ hostes aduenere: itaque primus ab illis interfectus est. Illi facto vltèrius gradu, horrendis cum clamoribus, simul terribili strepitu buccinis & tympanis excitato, omnes purpureo & nigro distincti corpora, pennisq. coruscantibus insignes, & monilibus ac torquibus colla circumdati (qui mos bella ineuntibus Indis est) tumultuosè in nos irrumpunt.

Ego quum ensẽ & clypeum arripere vellem, ad galeam cuiusdam commilitonis mei offendi, quam sub foliis latentem ille accipere non meminerat: eam casu ita repertam capiti meo impono: atque eius quidem præsidio, per Dei gratiam, illius prælii discrimini ereptus sum. Quum enim nos Indi lapidum nimbo obruerent, eam galeam crebris ictibus adeo signarunt, vt fabili malleo contusam diceret. Quum vtrinq. semiquadrantis horæ spatio æquo ferè marte pugnatum esset, tandem multis interfectis Indis, ceteri terga vertere. Sed quum recentes alij subsidio fessis venirent, nouus de integro labos nobis obici: & nostrum magna pars inedia magis quàm prælii labore confecti, furentiumque hostium tantæ multitudini impares, breui saxis

Hisp. In-
dos vexan-
tium præ-
sentia.

Indorum
de Hispania
victoria.

laxis sudibúsque mactati, & palmeis contis in vtrumque latus transfuerberati sunt. Ipse quum Tribuni nostri lateri hærens, cum saxo percussus extra siluam & moribundum ad terram collabentem vidissem, iam solus post arborem delitui. Ibi quum recenti clade confusus & consilij planè inops starem, duo Hispani cruore oppleti ad me veniunt, & „
 Quid hîc facis Mediolane, aiunt: quando nostri omnes occubuerunt, quin iter quâ venimus retexentes vitæ nostræ consulimus? Progre- „
 dior ipse & alij, ac per medium viginti- „
 quinq. amplius Indorum agmen erumpimus. Omnes ij reguli aut primores erant, quibus lancea tantum in manu erat, amictus nodo ex humeris dependens: corpora, vt ceteris, nullis coloribus picta. Eorum vnus telum mihi in guttur adigit: sed irritò ictu ob thoracem bobyce suffultum quo indutus erâ. Tandem euadimus, nec procul inde in vertice montis sacerdotem nostrum reperimus, qui eò cum duobus militibus sub initium pugnæ aufugerat.

D V A B V S inde pòst horis Alphonsum Pisanum trib. mil. obuium habemus, qui cum vigintiquatuor Hispanis Gubernatorem vestigiis persequabatur. Inter hæc amplius centum Indi necopinantibus nobis superueniunt, gladiis, clypeis & ballistis, quas nostris eripuerant, armati: circumfusi que saltando ac tripudiando ex iis nonnulli Hispanica lingua clamabant, Accipe aurum, Christiane, accipe aurum. Vbi tamen nos haud spernendo numero esse viderunt, terga vertère.

*Indi Hispā
 nis auaritiā
 am expra-
 brant.*

Hispani de Indis victoriam, equis magis quam ipsis debentur.

Nos inde intolerandis cum laboribus & periculis vix tandem ad mare erepsimus: duo illi Hispani, qui mecum prælio excefferant, quum propter vulnera viæ laborem ferre non possent, fessi ad radices montis cuiusdam substitere. Venere postea duo adolescentes, qui in iis filuis, ubi prælium commissum fuerat, tamdiu delituerant, donec Indi abiissent. Egressi referebant se rei præsentis intuitu comperisse, Indos caput, pedes & manus Gubernatoris truncatas, simulque duorum Æthiopum, extulisse: ceteros spoliatos nudatosque in præterlabens illac fluentum abiecisse: atque omnes manubias & spolia legisse præter saponē & oleū. E nostris xxxiiii. Hispani & duo Æthiopes cecidere, sex tantum superfuimus: ex hostibus multo plures cæsi sunt. Quatuor ferme millia Indorum erant in acie, quantum æstimari potuit: ignavi tamen illi & timidi adeo, ut si quatuor tantum equos habuissemus, numquam nos illi aggredi ausi essent. Indi enim ferocissimum illud animal vehementius formidant¹ quam omnia Hispanorum arma: neque illud occultum habent, imò palam dicunt non Christianorum virtute, non armis, tormentis, hastis, gladiis aut ballistis, se victos & subactos esse, sed equorum ferocia & furore perterritos. Idque adeo experientia ipsa & præsens rerum effectus docet. Quæcumque enim loca pedestres adiere Hispani, quò equi penetrare non potuerunt, in iis semper ab Indis victi sunt. In Mexico quidem, quum primum ea prouincia ab Hispanis tentata est, hominē equo

equo infidentem vnicum & indiscretum animal esse Indi vulgò credebant.

I INDIS Occid. vsque adeo formidabiles sunt equi, ut & molossi, quum videlicet metuant ne ab illis vorentur, ut mille eorum pedites à tribus equitibus in fugam vertantur. Relat. Nun. Gusman. sect. 7. Vide sup. lib. I. cap. 24. Itaq. multo post occupatam à Ferdinando Cortesio Mexicanam provinciam, Barbari quum pratererunt illac Hispanos equites honorificè exciperent, tum maximam curandis eorum equis diligentiam studiūq. adhibebant. Primum enim, ingenti hydria plena aquæ equo adposita, nō vulgari pabulo sed Maizio cum viridi tum sicco implebant præsepe: mox equili multa herba constrato, rosas de super & alios flores spargebant: idque non tam benevolentia quàm metu, quem iam inde ab initio conceperant, quum à Cortesio domiti iugum accipere coacti fuerant: cuius rei ipsi præcipuam causam equis magis quàm Hispanis tribuerent.



¶ Hispani quo consilio expeditiones in Indiam susceperint. Ferdin. Sorti & Pamph. Narnæz infausta expeditiones. Ferdin. Cortesii in Mexicanos seuitia & perfidia.

CAP. X.

AM ex iis quæ diximus colligere possunt Lectores quo animo consiliòve Indicas eas gentes subactas Hispani sub imperium egerint. Etsi enim ferè in Historiis quas edidere, virtutes suas laudibus in cælum ferant scribantque se assiduè in illis terris pro Christiana fide pugnasse: res tamen ipsa perspicuè

demonstrat eos, in illis maximè prouinciis, sola auaritia incensos tot expeditiones & bella suscepisse. Id verum esse argumento est Præfectorum & Gubernatorum, qui eò traiecerunt, varietas. Vbicumque enim aurum & opes non inuenere, ibi morari noluerunt. Eius rei exempla aliquot afferam.

*Ant. Sede
gni expe-
ditio insau-
sa.*

PRIMUM Antonius Sedegnus sinum Pარიenssem inuectus cum amplius septingentis Hispanis, & auri famam sequutus, postquam diuersas prouincias per triennium peruagatus, diuitias pro spe ac cupiditate sua non reperit, ibi habitare noluit. Ad extremum aduersa valetudine correptus, breui desperatione magis quàm morbo extinctus est: & ex tanto militum numero quos secum circumduxerat quinquaginta quinque tantum ad sinum regressi sunt.

*Ferd. Sotti
in Floridā
expeditio.*

FERDINANDVS Sottus cum quingentis Hispanis in¹ Floridam cum imperio & Gubernatoris titulo missus est. Hæc prouincia à Ioanne Pontio Legionensi primùm inuenta erat: eoque nomine ab eo insignita, quòd eò Resurrectionis die appulisset, quem vulgò Pascha floridum appellant. At Sottus simul vt prouinciam attigit, per varia loca discurrere, & incertis vagari sedibus, quum pro certo haberet se ingentes gazas & thesauros reperturum. Ita oberranti quum aliquot Indi aureis fortè bullis redimiti occurrissent, sciscitatusque esset vnde aurum fumerent: responderunt illi se ex longinquis regionibus petere. Ille ratus eos ita dicere vt eum finibus suis

suis arcerent, iam satis gnaros quid Christiani per eas oras quæ situm irent: cruciare aliquos cœpit, & tormentis fateri subigere vbinam aurariæ essent. Inter alia sæuitiæ exempla ab eo edita hoc vnum insigne est. Quindecim Cacicos captos iam in potestate habebat: nisi *Auaritiæ crudelis exemplum.* locum vnde aurum sumerent, indicarent, minatur se omnes crematurum: miseri illi metu mortis oblato consternati, securi de facilitate credentis, nec quid dicerent satis scientes, promittunt se intra octiduum in eum locum deducturos vnde aurum magna copia sumeret. Iam duodecim dierum iter peregerant, nec vllum auri vestigium aut indicium exstabat. Itaque elusus Gubernator & multum indignatus, truncatos manibus dimittit.

H A V D ita multo pòst quum vnus ex principibus eius prouinciæ regulis ad Gubernatorem visendum venisset, munera ei Psittacos duos & cristas pennatas afferens, sciscitatus ex eo est, quis esset, vnde domo, quidve quærens venisset in eas terras, tot ac tam fœda facinora perpetrans. Gubernator per interpretem respondet, id quod ferè alij omnes duces & Præfecti, Se Christianum esse, Filium Dei, creatoris cæli & terræ: venisse eò vt diuinæ ipsius legis notitia eas gentes imbueret. Ad hæc regulus: Si Deus tuus (inquit) iubet vt alienas terras latrocinando, vrendo, trucidando, nec vllum sceleris genus prætermittendo, *Indi à Christi. religionē ob Hispanorū scelera abhorrent.* perambules, tibi maturè denunciamus, fieri non posse vt vel ei vel ipsius legi credamus. Hoc responso percussus Gubernator abiit, & modò in hanc modò in eam partem errans,

*Auaritie
merces.*

spe ditissimæ alicuius fodinæ reperendæ, om-
missa condendæ coloniæ cura, quinto demum
anno sanguinis profluuiο periit. Ita miser vi-
tam pariter & auri sitim amisit, & quidquid
è regia Attabalipæ Peruani principis gaza ma-
nubiarum collegerat.

*Pamph.
Naruaez
expeditio
ad Fl. Pal-
marum.*

²PAMPHILVS Naruaez cum sexcentis
Hispanis ad fluuium Palmarum tendens (qui
in eadem Floridæ ora, centum millibus pass.
septentrionalior Panuco est) cum dimidia par-
te exercitus in litus ignotum egressus: post-
quã aliò se appulsum, periti alicuius naucleri
penuria, quàm quò sperabat, intellexit, neque
ibi ullũ auri specimen inuenit: Coloniã inlit-
tuere neglexit. Interea quũ ad vestigandũ flu-
uium Palmarum naues & alterã militũ partẽ
misisset, ingenti infortunio ictus est. Naues
tẽpestate ad prominentia litorũ elisæ: Hispani
propè omnes, hausti fluctibus: pauci ali-
quot eiec̃ti in litus, aliquot annos per eas
oras latitabundi oberrarunt. Ad extremum³
duodecim ex iis fame in rabiem versi, alij a-
lios morsu dilacerarunt. Denique è sexcen-
tis illis Hispanis quos duxerat, vix decem re-
duces annotati sunt. Isti quum Mexicum per-
uenissent, publicè dicebant se in ægrorum
tantũ ora insufflantes, plurimos sanasse, &
quod maius, ⁴tres mortuos reuocasse ad vi-
tam. Sed mihi, quæso, ignoscat eorum sancti-
tas: ego facilius crediderim necatos ab illis
quatuor viuos quàm vel dimidium mortuum
fuscitatum.

*Hispani mor-
tuos à se in
India sus-
citatos re-
ducunt.*

IAM quid dicemus de Ferdinando Corte-
siō? qui quum nouam Hispaniam subigeret,

vbi Mexicum regis ipsius Montezumæ spon-
te ac voluntate ingressus est: atque inde fran- *Fer. Cortes-*
gendis Pamphili Naruaez conatibus obuiam *sui perfidia*
ire necesse haberet (qui cum nongentis Hi- *in suos,*
spanis ad Veræ-crucis coloniam appulerat: *seuitia in*
Barbaros.
Didaci Velasquis Cubæ insulæ præfecti mis-
su & mandato, vt eum opprimeret vel expel-
leret è prouincia, quòd Velasqui rerum à se
ipsius auspiciis gestarum & nuper inuentæ o-
ræ rationem non reddidisset, vt legatum par
erat à summo Præfecto ad eam ipsam rem sus-
cipiendam missum) quum, inquam, ipsum
Cortesium Pamphilo aduentanti occurrere
oporteret, Mexico egrediens Petro Aluarado
trib. mil. cum ducentis & quinquaginta Hi-
spanis, præsidium ciuitatis & collectarum ma-
nubiarum custodiam committit.

Qv v m fortè incidisset, vt plures Indi &
plebeiis permisti nobiles, festo quodam ipsis
die, canentes carmina cum tripudiis & follēni
saltatu per urbem irent, accurrunt ad pompæ
celebris spectaculum Hispani. Ibi simulac au-
ro & variis monilibus fulgentes ciues conspi-
cati sunt, victi effreni auaritia milites, victus *Impuden-*
& ipse Aluaradus, pudore omni pessūdato, ho- *tis & ef-*
stili rabie in pompam irruunt & turbam incr- *frenis aua-*
mem promiscuè cædentes, multis vulneratis, *ritia exem-*
multis interfectis, omnes omnibus illis orna- *plum.*
mentis spoliant. Sed mox ab Indis tā indigno
facinore ad rebellionem & vltionē accensis,
maxima pars eorum Hispanorum cæsa est.

Hi c parū lætus nuncius ad Cortesiū alla-
tus, eū, debellato Pamphilo, Mexicū properè

reuerſi coegit: vnde breui, non ſine maxima Hiſpanorum clade, ab Indis eiectus eſt. Illi poſtquam Montezumam regem ipſi ſuum, qui Cortefij partes fouebat, lapide grauiter iectum interfeciſſent, regē alium nomine Qualtimoc creant. Cortefius poſtea multis exhaustis laboribus, multisque ſubactis populis, nouo Hiſpanorum ſubſidio auctus, & ingens Indorum agmen ſecum trahens, Mexicum obſidione cingit, & tertio demum menſe vrbe poſtitur. Eminebat inter cetera ſumma militum alacritas, pro certo habentium ſe ingentibus theſauris diutina auri famem abundē expleturos. Sed hiantes eorum cupiditates Barbari eluſere. Illi enim omne aurum argentūque ex publico priuatoque collatum, deſperata vrbs tutela, in lacum, in quo vrbs ſita eſt, proiecerant. Itaque Hiſpani ſpe irrita conſuſi & frendentes, pleroſque ciuium, ira in rabiem verſa, torquere crudeliter incipiunt, ſubinde quærentes vbinam aurum eſſet. Sed illos, non verbera, non ignes (quamquam multi inter dolores exſpirarent, aut diſſolutis membris mutilarentur) peruiçere quin conſtanter ſe ſcire negarent.

*Avaritia
Hiſp. ab
Indis eluſa.*

CORTESIUS ipſe, nihil auri argentive ac ceterarum rerum quas vrbe excedens reliquerat, comparere vehementer miratus: nec ipſam adeò regiam Montezumæ gazam, quā ingentem eſſe fama tulerat, nec quæ ad ornatum templorum & cultum deorum dicata fulſerant: poſtquam ea vbi eſſent, nulla vi exprimi à plebeiis nobilibuſve indigenarū poſſe comperit

comperit: Regem ipsum & regium scribam corripere, ratusque impares dolori aliquid de thesauris certiùs passuros, tormentis subiici iubet. Sed illi quoque tortorum manus constantia fatigauere, nec quidquam ab iis extorqueri potuit. donec ipse Scriba, quum lento igni ambureretur, Christianorum scuitiam increpans, miserabili cum gemitu sex intra horas vitam inter cruciatus finiret.

Indi constantius mori malunt quam Hisp. auaritiâ explere.

CORTESIUS quum regem quoque ipsum obstinato animo & superante patientia dolores mortem potius appetiturum quam quidquam proditurum cerneret, tormenta remoueri iussit. Verum haud ita multo post, quum catenis onustum per varias prouincias aliquandiu velut ad spectaculum circumduxisset ei laqueo gulam frangi iussit. Proditum fama est indicio Indi cuiusdam atque accusatum, clam sollicitasse regulos quosdam ut manu facta Cortesium & Hispanos omnes necopinantes trucidarent. Tradunt alij Cortesium ut se eius custodiendi sollicitudine liberaret, iussisse interimi: quumque is apud Cortesium tanti criminis argueretur, ille reum læsæ regiae maiestatis videri eum dixit & iudicauit, quod suos ad cædem ipsius atque Hispanorum clanculum conciuisset. De tormentis verò sic apud eum excusauit, id nimirum à se præter morem ac naturam suam, Quæstorum regionum postulatu, factum, quod intellexisset ei cognitum esse ubi Montezumæ gaza asseruaretur. Et Quæstor ipse regius qui aderat, adiecit, Id non à se alio consilio factum quam ut

Perfidia Cortesii scuitia & ludibris mulata.

regia vectigalia augetet.

I A M, vtrum hæc quæ nunc edidi & innumera eiusmodi alia quæ à me proferri possunt sint hominum pro fide Christiana pugnantium officia & facinora, an non, nemo adeo hebes est quin facillimè iudicet.

I FLORIDAM primus inuenit Ioannes Pontius Legionensis, eamque hoc nomine insignè fecit. De cuius expeditione vide infr. in nostro De Gallorum in Floridam navigatione libello, cap. I.

2 Pamph. Naruaez, is est quem Didacus Velasquez, Cubæ præfectus, cum nongentis circiter Hispânis in nouam Hispâniâ misit, ut inde Cortesium vel viuum vel mortuum expelleret. Anno M. D. XX. Sed is ut prouinciâ attigit, fallacibus verbis à Cortesio circumuentus, & præter spem in Cempoala vrbe captus: dum resisteret ac se manus defenderet, alterum oculum, & mox exercitum, amisit. Diu in custodiâ habitus, ac tandem liberatus, anno M. D. XXVII. ad Flumi palmarum prouinciâ expeditionem instituit, infelici exitu.

3 Fortè in ea ora adeo fœda tempestas & intoleranda vis frigoris inciderat, ut Indi quibus Hispani ad radices eruendas & piscandum utebantur cibaria expedire non possent. Itaq. Hispani fame ad tantas angustias redigi, ut quinque eorum in Xamo eius ore litore, consumtis omnibus alimentis alij alios manderent. Neque ex ijs ullus, præter unum, supersuit, quem non haberet à quo manderetur. Digni visi scriptoribus quorum nomina proderentur: Sierra, Didacus Lopez, Gonzallus Ruiz, Corral & Palacios: quamquam, ut iam horren-

horrendum nefas premat Gomara, suo more, ab ipsis Indis comestos scripserit. Eo quidem adeò conturbatos offensosque ipsos Barbaros fuisse constat, ut si id maturè cognouissent, quotquot ibi erant Hispanorum cede tam execrabile facinus expiaturi fuerint. Relat. Aluar. Nun.

4 Id scribit de seipso Alvarus Nunez in sua Relatione: Indum videlicet quendam, quem multis signis verè mortuum esse constaret, ab se & sociis suscitatum. Penes autorem fides esto.

5 Didacus Velasquez, Cubæ Gubernator, Ferdinandum Cortesium ad nouam Hispaniam, à Grisalua nepote suo nuper repertam, occupandam miserat. Cortesius, iam continentis parte subacta, muneris sibi commissi Velasqui rationem reddere neglexit: sed rectè ad Cæsarem Relationem seu Commentarium prouincie repertæ & rerum ab se gestarum cum multis & preciosis muneribus misit. Id ubi renunciatum Velasqui,

Cortesio, perduellionis damnato,
magistratum abrogat & Nar
uaen ad eum prouincia
expellendum
mittit.

*

o.ij.



*Qua Crocodilorum edulia. Iguannæ lacertarum genus. Manati
pisces. Suerensium mores. Animal gemino vtero insigne. Ve
spertilionum dirum genus.*

C A P. XIII.



ARTHAGINEM nouã redeo, vn-
de in hæc oratio diuerterat. Post-
quam ad mare, eo quo suprà dixi mo-
do, peruenimus, ibi nos aliquot dies
aduersa tempestas & tumidum mare deti-
nuit. Sed dum ibi moramur, parua res sed iu-
cunda auditu, mihi cum milite quodam in-
tercessit. Ille canem fortè ad mare relictum,
quum Gubernatorem in mediterranea pro-
gredientem sequeremur, inedia subactus ma-
ctauerat: quúmque eius partem igni torruif-
set, me ad prandium inuitauit, quòd ipsi de
quadra casei (quam ab Alphonso Pisano trib.
mil. emeram) defectam particulam liberaliter
paulo antè elargitus eram. Sed quum accu-
buissem eoque cibo ita iucundè vescerer, vt
nihil vmquam suauius edisse viderer in vita,
ille repentè quæ ante me posita erant tollere
& dicere, Frater mi, tu nimium comedis: ego
» vetulus sum & infirmus, tu iuuenis & ætate
» integra. Abi hinc, fodes: oh nolo te meo ca-
» ne vltius vesci. Hic ego, quamquam non fa-
» tis æquo animo, patienter tamen demissis au-
riculis abij.

*Fames pu-
dore caret.*

TRANQVILLATO tandē mari, soluimus &
ad emissarium Nicaraguensis lacus vela feci-
mus

mus, ibi Lusitanū quendā assequuturi (Francisco Calato nomen erat) quem Gubernator noster, ob acceptos ab eo mutuò ter mille & quingentos ducatos aureos, legatum suum & Proprætorem designauerat. Sed per contrarios ventos, qui ad Nomen-dei nauigantibus afflabant, ibi vltra bimestre spatium summis omnium rerum angustiiis & fame obfessi *Oua Crocodilorum.* substitimus: ac nisi oua Crocodilorum nobis summa copia suppeditassent, quæ ad ea litora in arenis reperiebamus, certè maxima pars nostrū inedia miserè contabuisset. Ea oua, anserum ouis magnitudine paria, si saxis allidantur cōtunduntur quidem, nec tamen franguntur. Itaque cultello ea recludi necesse est. Sapor eorum qualis muschi semiputridi, & principiò quum ab eorum esu abhorrerem, necessitas & penuria me ad aliorum exemplū imitandum adegit.

ANIMALIVM præterea genus quoddam quadrupes ven. bamur. ¹ *Iguannas* vocant, *Iguanna, serpens.* la- certulis nostris forma haud absimiles: quibus palea quædam è mento velut barba dependet, vertice etiam capitis crista, instar gallinacæ, insigni: in dōrso eminentes pinnas quasdam, velut spinas, subrigunt. Feminae masculis præstant: oua earum carniū saporem vincunt: & ancipiti victu non magis terræ quàm aquæ afflueuerunt.

IN eo Nicaraguensis lacus alueo multi & grandes pisces sunt: in iis vnum eorum genus qui ab Hispaniolæ indigenis vulgò ² *Manati* *Manati* appellantur. Neque enim dicere possim quo *pisces.*

nomine eum notent eius quondam loci accolæ Indi. omnes enim propter nefandas iniurias quas ab Hispanis perpetiebantur, in vicinas filuas se abdiderunt. Hic piscis Lutræ propè formam referens, xxv. pedes longus, xii. crassus est: capite & cauda bouem referens: exiguis oculis, pelle dura & pilosa, coloris veneti, pedes duos elephantinis similes habet. feminae eius generis, vt vaccæ, catulos pariunt, eosque gemino vbere alunt. Eorum piscium aliquot ipse vidi in perexiguis quibusdam insulis, tum etiam in carectis ingentis huius fluiui: in vrbe verò Nominis-dei sepe eorum carnibus vsus sum, salitis videlicet: earum sapor vt suillæ est. Scribunt nonnulli carnē eius piscis gustu vitulinę quam simillimā esse, vnde è duobus alterum existere necesse esse colligo: nempe aut Hispanum istum eam carnē tam auidè appetiisse vt multò suauior quàm esset videretur: aut certè vitulinam numquam degustasse.

Gomara
Hist. nat.
lib. i. cap.
31.

Suerensium
mores.

Q U O D ad mores Suerensium Indorum attinet, à supradictis parum differunt, nisi quòd humana carne non vescuntur: eorum lingua discentibus facilis: Terrā *Ischa*: homines *Cici*: morbum *Stasa*: aurum *Chiaruchla*, vocant. In ea prouincia aprorum montanorū, & ferocissimorum tigrum ingens copia reperitur: leones etiam, sed timidi, qui viso homine fugiūt. Serpētibus quoq. abundat inusitata magnitudinis, sed veneno carentibus: & cercopithecis.

Cascuij animal.

Aliud quoque ibi est animal (quod ab indigenis ³ *Cascuij* dicitur) nigri porci specie, pilosum, durissimo corio, exiguis oculis, auribus

bus patulis, vngulis fissis, breui promuscide munitum, vt elephas: barritu adeo terribili vt homines obsurdefaciat: ceterū carne ad csum suauī.

PRODIGIOSVM præter ea ibi aliud³ animal viuit, cuius ventri natura alterum ventrē *Animal gemino vtero infigne.* marsupij instar affinxit. quoties demigrat, catulos in eum loculum recondit & gestat. Id animal corpus & rostrum vulpis: manus ac pedes cercopithecī: aures vespertilionis habet. Ibi etiam pauones, phasianī, perdices & alia auiū genera varia visuntur, sed longè à nostris discrepantia.

VESPERTILIONVM quoq. dirum genus eam prouinciam infestat, qui noctu dormientium corpora morsu appetunt & rostro pertundunt: neque vsquam alibi, per omnem eam oram quàm longè patet vsque ad sinum Pariensem, infestiores sunt eæ volucres quàm in ea prouincia. Mihi quidem aliquibus eius oræ locis, Nomine-dei præsertim, vsuuenit, vt eiusmodi striges nocturnæ dormientis pedum digitos adeo leniter pungerent vt nihil persentiscerem: mane verò culcitā & toralia sanguine fœdata perinde mirarer vt si ingens aliquod vulnus accepissem: sed in hac prouincia, numquam me rostris foderunt, quin sensu vulneris excitarer, & duabus tribusve post horis grauiter ex plaga dolerē. Quinetiam alis sæpe ora euerberātes, si pedibus calcatis quiescerē, manus ipsas rostro feriebant. Itaq. quū arcendē illi pesti nullā cōmodiorem opē reperirē, parata semper in cubili ligamēta

& fascias vulneribus habebam:& simulac ro-
strum defigi in me senferam, vulneratum lo-
cum fascia inuolvebam: is nullo præterea ad-
hibito remedio triduo aut quatrinduo sanaba-
tur. Atque hæc hæctenus de Didaci Gottieris
gubernatione.

I IGVANNA seu Iuanna, commune terra
& aquis animal, non tantum immergit se fluviiis,
sed etiam in arbores erepit. Horribile visu, ijs qui
eius naturam non norunt: sed adeo mite ac taci-
tum, ut nec stridens, nec ingemiscens, nec vinctum
strepitum ullum aut clamorem edens: decem imò
viginti dies, sine ullo cibo permaneat. Carne gustu
& esu suavisissima, ac propterea in delicijs: nisi quod
qui lue Indica laborarunt, si ea vescantur, recru-
descences & rebellantes pristini morbi dolores sen-
tiunt. Serrata ei in dorso pinna inest: cauda præ-
longa, in tenuitatem desinens, & implicans se vi-
perinis orbibus. Oua quadradena aut quinquage-
na singulis foetibus edit, rotunda & nucis crassi-
tudine, luteo albóque intus varia, qualia sunt
gallarum, eaque edulia: sed quæ in sartagine
non oleo aut butyro, verum sola infusa aqua vice
olei, frignantur. Lacerti speciem habet hoc animal:
itaque serpentibus annumeratur, sed innoxius.
Quiedus Histor. natur. Indic. libro tertiodécimo,
capite tertio.

2 Manati piscis, ab Hispanis, sic in Hispani-
ola nuncupatus, quod pinna ad caput & velu-
ti binas manus habet. Animal id gemino in terris
& aquis victu, & amicum hominis, ut tali expe-
rimento patuit. Caramataxius Cacicus parvulum
unum

unum quondam captum XXVI. annos in Guainabo lacu suis edibus vicino, velut in vinario, panis fragmentis aluit. His allectus piscis adeo cicur euasit, ut Delphinus veterum scriptis celebratos vinceret. Nam quocumque diei tempore inclamatus ab reguli domesticis, Matto, Matto, (ea vox Indis magnificum aut generosum sonat) velut ad familiare signum ex imo aduolabat, pastusque è manu praebebat ascensuro dorsum: adeo ut egressus in ripam pastum in ades ventitaret, & cum pueris colluderet. Siqui fortè animi gratia lacum transmittere vellèt, decem nonnumquam dorso exceptos indefessus transuehebat. Eo ludicro diu oblectati sunt Indi: donec iniuria fugatus, per aliquot dies hominum conspectu caruit. Quum enim Hispanus quidam, experiri volens an corio tã duro esset quàm vulgò fama ferret, seu per lasciniã, iaculum in eum intorsit. Piscis etsi ab ictu imperforatus mansit, infestam tamen sensit cuspidem: & ex eo simulac barbatos homines aut vestitos more nostro animaduenterat, frustra vocasset: nec vocatus, nec inuocatus veniebat. Tandem quum fortè Attibunicus fluius in insolitam altitudinem creuisset, & extra ripas effusus Guainabo lacui sese immiscuisset, eius alueam sequutus facetus ille & sociabilis Matto mare & natales aquas repetijt. *Martyr Ocean. dec. 3. lib. 8.*

3 DE utroque hoc animali agit Pet. Mart. *Ocean. decad. I. lib. 9. & 2. lib. 9.*



¶ *Franc. Fernandis & Franc. Montegij in Iucatanam expeditiones. Iucatanensium de Hispanorum dominatu querele. Fondurensis prouinciæ desolatio, & indigenarum implacabile aduersus Hispanos odium.*

CAP. XV.

NOS è Nicaraguensis lacus alueo egressi, duabus præterea comitati celocibus quæ è Nicaragua onustæ commeatu decurrebant, decimoquinto die ad Nomen-dei appulimus. Ex ea ciuitate in occidentem nauigantibus & eam oram præterlegentibus, quæ tota deserta est, mille fermè milliarium spatio, prouincia Fondurensis occurrit: & trecentis millibus ulterius, in eadem illa ipsa ora, Iucatana prouincia aperitur. Eam Hispanorum ducum primus reperit Franciscus Fernandez Cordubensis, qui vixdum in terram egressus pessimè ab indigenis acceptus est. Ergo viginti duobus vulneribus perfossus, & multis Hispanis amissis, ad San-iacobum Cubæ metropolin spe irrita reuersus est.

NON ita multo post, anno videlicet
Fr. Montegij in Iucatanam expeditionis. M. D. XXVII. Franciscus Montegius, audito Iucatanam ditissimam & quæstuosissimam esse prouinciam, è noua Hispania soluit, cum titulo Gubernatoris. Is vbi primum suæ prouinciæ litus attigit, cum quingentis amplius Hispanis, multis equis & copioso commeatu: conuenere eò velut ad eum visendum aliquot Reguli. Illi quum amicitiam ipsius appetere simula-

simularent, diu apud eum manserunt: donec occasione exsequēdi facinoris oblata, eorum vnus dereptum è latere armigeri Æthiopis acinacem in Gubernatorem strinxit. Interfecissetque ni ille rapto properè ferro strenuè vim propulisset. illi nullo alio neque accepto neque illato damno ad suos sese proripiunt. Ab eo Gubernator instructa suorū acie, plurēsq. in manus dispersa, Indos pluribus simul locis aggredi: & quæcumq. caperet igni ferróq. vastare. Indi quoque & ipsi fortiter pro focis pugnabant. Sed ad extremum, postquam continuis nouem annorum cladibus attriti, iam propè omnes regulos & duces amiserant, fractæque cum animis vires erant, tandem arbitrio & potestati Hispanorum semet permittunt. Itaque Montegius prouinciam perdomitam & pacatā, iuxta mandata regia, inter suos distribuit, & vnicuique eorum quorum ope Indos debellauerat, Indicæ vnus gentis ius ac ditionem assignat. Inde ad condendas colonias conuersus, Hispalim, Emeritam, Salmanticam & alias vrbes, exstruit, quarum maxima vigintiquinque aut triginta fermè domibus habitatur.

HIS ita compositis, partim sua, partim militum opera, Gubernator quum fortè cum Cacico eius prouinciæ quodam congressus (Alquino tep is erat cētum amplius ac decem annos vitæ egressus, qui tametsi baptisatus esset, sæpe tamen crebris suspiriis & planctu testabatur quantū ex eo dolorem caperet quòd patriā Hispanorum armis subactam cerneret)

Is ergo in familiari sermone cum Gubernatore instituto: Montegi, inquit, quondam, me iuvene, pestifera quædam lues has terras inuasit adeo sæua vt vulgò homines incredibilem vim lumbricorum euomerent. atque eam calamitatem tanta pestilentia excepit, vt neminem nostrum cladi superfuturum credere-

Hispanorum aominatio Indis quauis alia calamitate grauior.

mus. Præterea non multo ante aduentum tuum tempore, nos cum Mexicanis cruenta duo prælia commisimus. quibus amplius CL. millia hominum cecidere. Sed hæc leuia fuerunt præ intolerandis sæuitiæ & auaritiæ exemplis, quæ tu ac tui milites in nos edidisti.

Ea regio aspera & ferè saxosa est, fertilis tamen, & piscibus, fructibus Maizióque abundans. Humanis victimis litant, earum tamen carnibus non vescuntur: apud eos nullæ auri aut argenti fodinæ repertæ sunt: vulgò magna apum examina alunt: bombycis seu gossipij copiam habent: eo penulas sindonum aut lintheorum instar texunt, & subuculas sine manicis. Id præcipuum vectigal patronis & principibus suis pendunt: cuiusque generis merces Hispani in Mexicum, Cubam insulam, Fondurensem prouinciam, aliásque Indiæ regiones distrahendæ dispertiunt.

Hispani, absuntis, aut exactis incolis terras inanes in India obuiant.

PORRO prouincia Fondurensis (vt paucis eam absoluam) quum primum Hispanorum armis tentata est, quadringentis amplius Indorum milibus habitabatur: quum verò ibi ego essem vix octo mille supererant. Nam ab Hispanis partim cæsi in præliis, partim in ferui-

seruitutem abducti & venditi, & intolerandis laboribus in fodinis exhauriendis consumti, & propè in solitudinem redacti sunt. Pauci quoque illi qui hodie supersunt (vt & ab aliis gentibus quæ Hispanis seruiunt ferè fit) vbi-cumque locum aliquem asperum, ad habitan-dum vtcumque commodum, inuenerunt, ta-met si ægrè, eò tràslatis rebus suis omnes com-migrauerunt, vt Hispanorum declinato conspe-ctu quamminimè ipsis oculi doleant: tan-tam illi earum gentium gratiam & beneuolen-tiam sibi conciliarunt.

IN ea prouincia quinque coloniæ ab His-panis conditæ sunt, quæ omnes simul vix cen-tum & viginti domus continent, easque ma-ximam partem compactas arundinibus, sto-rea & palea contectas, malèque & infrequen-ter habitatas, iam videlicet propè exinanitis aurifodinis, quæ colonos allicerent. Caput ea-rum Trugilium seu Turris-Iulia est, episco-patus sedes, colli modico imposita, vicino ma-ri quâ Septentrionem spectat. Centum milli-bus inferiùs Portus est, quem vulgò Porto de Caualli appellant. Ab eo portu diei vnus iti-nere abest San-Petri ciuitas in plano sita, mon-tibus vicino, nec procul inde flumen Vllua, & lacus, in cuius medio tumuli quidam terrei, insularum instar, herbis & virgultis confiti, spirantium ventorū arbitrio modò huc modò illuc vagi & instabiles feruntur.

OCTOGINTA millia pass. vltèrius Co-maiaga & Gratia-dei occurrunt, duæ coloniæ à se inuicem amplius centum mill. interuallo

discretæ. Is ager frigore aliquantum temperatus, frumenti mediocriter ferax est. Inde pulcherrima & amœnissima, sed iam desolata, vallis Olanchiana sequitur: in qua Hispani San-iacobū urbem condiderūt. ea viginti circiter domus eāsque male habitatas cōplectitur.

*Indi Christianos ut
intestabiles,
abominantur.*

Hic ut legentium animis cogitandum subiiciam, quā æquis oculis eæ gentes nos intueantur, hīc rem quæ mihi cum Indis quibusdam interuenit, lubens referā. Comaiagua fortè comite vno Hispano egressus, ad modò dictam ciuitatem tendebam: iamque quatruidui iter cōfeceramus, nullo humanæ habitationis aut cultus reperto vestigio: quum consumptis cibariis omnibus quæ ferebamus, ad exiguum quendam Indorum pagum peruenimus. Ibi quamamicissimè fieri potest eos rogamus ut comineatu aliquo nos iuarent: sed neque precibus, neque gratia, neque pecunia ab illis impetrari potuit, ut hospitaliter quidquā nobis facerēt aut darent: sed diras imprecātes nobis, quum etiam velut conspectum nostrum abominati in terram despuerent, ut abiremus denunciabant. Ita excepti, discessimus, & eadem die sub vesperam in urbem peruenimus. Vbi quum nullum diuersorium esset, in ipsius coloniæ ingressu casam desertam nacti eò succedimus, & incœnati substratis pro cubili arundinibus ad capeffendam quietem vertimur.

Mos habebatur in illis regionibus (quo tempore Hispani pro arbitrio, vel potius sine arbitrio & ratione, viuerent, priusquam Indis sua reddita Edicto esset libertas) Hispanos colonos

lohos triumphantes atque exultantes gaudio, quum videlicet perpetuam eam tēporum ac rerum felicitatem sibi desponderent, obuiam ultro egressos viatorum aduētum opperiri: simulque vt peregrinum aliquem aduentātem prospexerant, concurrere omnes ad eum certatim, & de eo excipiendo pugnare. Nemo erat quin eum comiter salutatum, sexcentis beneuolentiæ signis editis, in domum suam deducere & hospitio accipere cuperet. Nunc verò, longè alia rerū & hominum facies, quoniam non is est Indiæ status qui esse consueuerat. Vbi aliquem peregrè venientem conspexerint, abdunt se in propinquas filuas: aut certè iubent dici, Se domi non esse.

Hisp. primo de alieno liberales, mores cum fortuna mutant.

ENIMVERO Hispanos quidem etiam reperias, non tantum in ea vrbe, sed & in plerisque aliis, qui quamquam clientes & vassallos sibi habeant subiectos, ad eas tamen angustias redacti sunt vt vix vel panem ad vescendum habeant. Quum enim Indi nullum vectigal pendant patronis & senioribus suis, nisi ex eorum rerum genere quas possident: si quis fortè Hispanus populum suum cogere vellet, vt aliud aliquid præter ea pendat, aut subditos duriter haberet, illico à Gubernatoribus, subditis illis suis & omni in eos iure priuaretur.

IDEM scribit Gomara *Histor. gen. lib. I. cap. 54.* nisi quòd pro Alquinotep Alquimpechum vocat, & quidem eius pagi Antistitem, in quem postea ab Hispanis Emerita colonia deducta est. Porro pestiferam eam luem, octoginta ante aduentum Hispanorum annis, per eas terras in homines

grassatam, tanta vi exundantibus lumbricis ut viscera ventrémque ad exitum rumperent. Bella autem hæc quadraginta antè annis accidisse: atque ob id maximè leues illis eas calamitates visas præ Hispanorum imperio, quòd eos è suis finibus aliquando excessuros minimè sperarent.



¶ Indus quidam mores Hispanorum depingit. Cur Hispanicum iugum Indi acceperint. Nicaraguensis provincie descriptio. Eius incolarum potus. Saltandi ratio. Mons flammiuomus.

CAP. XVI.



GRESSIS è prouincia Fonduren-
si, & ea via peragratis Chiuluteccæ
fodinis, subit prouincia Nicaraguæ,
ad Australis Oceani oram versa.

Eam regionem quum primum peregrinabun-
dus obij, apud vnum è primoribus eius oræ
regulis in hospitio fui. Gõzallus is vocabatur,
annos iam septuaginta natus, & Hispanicam
linguam apprimè callens. Is matutino quo-
dam, quum ipsi fortè assiderem, defixis
in meum os oculis, his me verbis affatus est:

*Indorum
de Hispani-
cis senten-
tia.*

CHRISTIANE, quidnā rei sunt Christiani?
Flagitāt Maizium, mel, bombycem, penulam,
Indicam mulierem ad concubitum: aurum,
» argentū petunt. Christiani operari nolunt, lu-
» dicatores sunt, aleatores, prauī & blasphemī.
» Quum ad Missam audiendam tēplum ineunt,
» de absentibus detrahunt: & alij aliis plagas &
vulnera

vulnera imponunt. Ad extremum eò euasit, vt *Indi ex*
 concluderet Christianos minimè esse bonos. *Hisp. malis*
 Quùmque excepiſſem, malos, non autem bo- *exemplis,*
 nos, ea facere: tum ille, Vbinam sunt illi boni? *de omnib.*
 inquit. quippe ipſe quidem nondum vllos, *Christia-*
 niſi malos, cognoui. *nis indi-*
cant.

TANDEM finito ea de re ſermone, ſciſci-
 tari cœpi ex eo quomodo & quamobrem
 Chriſtianos in ſuos fines ingredi paſſi eſſent.
 Is mihi in hanc ſententiam reſpondit: VIR &
 bone (inquit) de eo ſic habeto: Quum ſparſa &
 de Chriſtianorum ſæuitia, per has prouincias &
 fama, qui quæcumque adiſſent loca cædibus, &
 incendiis & latrociniis infeſta facerent, ad nos &
 quoque perueniſſet, & eos in fines noſtros ir- &
 rumpere velle audiuiſſemus: conuocato o- &
 mnium amicorum noſtrorum & ſociorum &
 concilio, ſociatiſq. conſiliis omnes vna voce &
 decreuimus, potius mortem ſtrenuè pugnâdo &
 oppetere, quàm pati nos à Chriſtianiſ ſub iu- &
 gum mitti. Eo conſtituto, haſtas, lapides, ſa- &
 gittas & quæcumque alia poſſumus, compa- &
 ramus. Quùmque iam Chriſtiani finium no- &
 ſtrorum limites pulſarent, vltro illis armati &
 obuiam imus, & bonam diei partem fortiter »
 pugnamus. Ad extremum tamen plerique no- &
 ſtrûm impetu equorum perterriti, in fugam &
 vertuntur. Itaq. legatos duos ad Chriſtianorû »
 ducem mittimus veniã & pacem orantes: ne- &
 que id tamen alio conſilio, niſi vt inſtaurandis &
 viribus quies & otium ſuppeteret. Ille nos in &
 amicitia accipit: noſtrûm inde cõplures, diſſi- &
 mulato vero animo, cû cantu & tripudiis, pro &

» iure amicitiae Christianis familiariter assuef-
 » cere, inuifere, & multa auri aliarumque rerum
 » munera illis ferre incipimus. Inde, iis ita inc-
 » scatis, domos nostras regressi, intra triduum
 » manu facta in Christianos de improviso ir-
 » ruimus. Sed breui, ut primò, nostri terga ver-
 » tere.

» I T A de integro, eadem mente & consilio
 » quo prius, pacem denuò petimus. Qua impe-
 » trata, gentium omnium nostrarum indicto
 » conuentu, communi consilio decernimus,
 » Prius occumbendum esse omnibus quàm ut
 » Christianos dominos acciperemus: eiusque
 » sine vlla veniae aut gratiae spe caput morti de-
 » uouemus, qui ex acie fugeret. In huius consilij
 » effectum rursus arma & tela aduersus Chri-
 » stianos comparamus & acuimus. Verùm con-
 » iuges nostrae, hoc nostro proposito audito,
 » lacrymis perfusae ad nos veniunt, supplicesque
 » rogant ut Christianis seruire malleamus, quàm
 » ita foedè occumbere. Sin nobis sententia sta-
 » ret, consilia nostra in rem vertere, ut ipsas
 » primùm cum paruulis suis liberis interficere-
 » mus, ne orbatæ viris in barbatorum istorum
 » & crudelium hominum potestatem incide-

*Cur Indi
 Hispanicū
 ingū subie-
 rint.*

rent. Hæ vxorum nostrarum mixtæ lacrymis
 preces fregere omnium animos. Itaque victi
 vltro arma ponimus, & rapacissimis Chri-
 stianorum manibus nos nostraque permit-
 timus.

» M O x tamen propter iniurias & indigna
 » exempla quæ in nos quotidie edebant, aliquot
 » populi in eos rebellionem moliri ausi sunt:
 sed

sed tam graues eius pœnas Christiani ab ipsis
 expetiuerunt, vt ne infantium quidem ætati
 parcerent. Neque eo contenti, alios etiam, *Hispania*
 quamquam infantes, captiuos factos, præte- *bus in In-*
 xentes nimirum illos quoque aduersus se re- *dos domi-*
 bellionem cœptare, cruciabant & pro man- *natus.*
 cipiis sub hasta vendebant. Nos per ea tem-
 pora neq. coniugum nostrarum, neque libe-
 rorum, neque vlius rei nostræ domini ac pos-
 sessores eramus. Itaque multi rerum tædio,
 filios ipsi necare, alij laqueis semet suffocare,
 alij abstinentia cibi vltro vitam fugere. Do-
 nec Edictum à rege Castellæ factum, quo nos
 in libertatem restituti sumus, tot ac tam in-
 tolerandis miseriis ærumnisque finem tan-
 dem imponeret. Hic Cacicus ille institu-
 tum sermonem clausit.

N I C A R A G V A E regio non ita ampla, sed *Nicaragi-*
 fertilis & amœna est: ceterum intolerabili æstu *provincia*
 adeo flagrans, vt æstate, feruido & fabuloso *dotes.*
 exurente vestigia solo, nemo nisi noctu iter
 facere possit. Sex ibi continui menses pluuij,
 à Maio pluuiarum initio facto: reliqui sex
 menses planè sicci sunt, diēsque æquales no-
 ctibus. Mellis, ceræ, ¹ balsami, gossipij, satis
 ferax tellus, & suorum fructuum: in quibus
 pomi quoddam genus ei regioni peculiare
 est, neque Hispaniolæ, neque vlli alteri Indiæ
 parti concessum. Pyri nostri specie ferme est:
 ligno interiore rotundo, nucis crassitudine,
 & dimidio amplius: optimi & iucundissimi sapo-
 ris. Arbor eius generis procera, exiguis foliis

vestitur. Paucae vaccae & suum copia est, ex iis
 quae ex Hispania propagandae stirpi transfusae
 sunt. Multi ibi Indorum pagi sed exigui, casas
 arundineas stipula operatas, modicae amplitu-
 dinis habent. Nullius illic metalli fodinae sunt:
 quamquam sub primum aduentum Hispano-
 rum indigenae auro, sed eo ignobilioris notae
 & aliis e provinciis allato, abundarent. Incre-
 dibilis ibi multitudo Psittacorum, seminibus
Psittaci sa- tis inest. infecta: ac ni Priapeia quaedam terricula quae
 Indi ex arundinibus fabricantur, & excussi fun-
 dis lapides absterrent eas aues, multo plus
 detrimenti adferrent.

HISPANI quum primum eam provin-
 ciam subegerunt, propter vberissimam omnium
 rerum ibi repertam copiam, eam Paradisum
 Mahumetis nuncuparunt. Duo inter cetera
 fert haec tellus, nulli praeterea Indiae regioni
 concessa, exceptis Guattimalae, Fondurensis
 provinciae & Mexici finibus totoque Nouae
 Hispaniae tractu. Vnum, Pauonum quoddam
 genus est, qui in Europam translati, vulgo
 Gallinae Indicae vocantur. Alterum, id quod
Cacauate fructus, mo- neta Nica- rague sum. *Cacauate* vulgo vocant, quod monetae usum
 illis praebet. Id fert arbor modicae magnitudi-
 nis, nec nisi calido loco & opaco viuit. Simu-
 lac sole tactum est, contabescit. itaque ferè in
 filuis umbrato & humido loco feritur: neque
 id satis, sed iuxta eius generis arborem, aliam
 editiorem plantant: quae simulac adolescere
 coepit, eius cacumen ita concinnant aptantq.
 vt adulta ea arbor Cacauatam inumbret de-
 fendatque ita ab aestu vt solis radiis laedi non
 possit.

possit. Fructus amygdalorū speciem referēs, siliquis quibuscūq; velut cucurbitis, includitur, crassitudine & latitudine cucumeris: annuo spatio maturescit. Maturas eas ubi legere, excussum folliculis fructum super stercis expansum ad Solem exponunt, donec humorem exsudauerit.

ROTVM ex eo confecturi, in testa fictili ad *Potio Ni-*
focum exsiccant: mox lapidibus quibus pin- *caraguen-*
situr panis contusum & cōmolitum, fustumq; *sum.*
in pateras (quæ cucurbitæ specie è certis arboribus per omnem Indiam enascuntur) paulatim aqua temperant, atq; interdum paululo pipere, quali vulgò vtuntur, condiunt, eoque in potu vtuntur. Porcorum ea veriùs colluies quàm hominum potio. Quum eam provinciā peragrarem, plusquàm integrum annum ab tali lora abhorruī: & quum pagum aliquem prætereūtem Indus me fortè aliquis ad bibendum inuitaret, ego verò aspernarer, multum mirans, ridensque abibat. Sed quum mihi vini copia non esset, ne semper aquam bibere cogerer, alios imitari didici. Ea cælia sapore aliquantū amaro, satiat & refrigerat corpus, minimè tamen inebriat. Hæc præcipua & carissima merx earum regionum est: neque quidquam aliud Indi maiore in pretio habent, ubi quidem in usu est.

HARVM gentium mores à Mexicanis nihil propemodum differunt: humana carne vescuntur: penulis & subuculis sine manicis vestiuntur: duorum lignorum mutuo attritu ignem accendunt, & hic mos per vniuersam

*Nicaraguē
sum mores*

Indiam inoleuit. Etsi illis ceræ copia esset, nullius tamen ad rei ministerium ea vti nouerant: & ad nocturnum lumen tēdas ē pinu agrestī recisas vrebant. Quatuor earum prouinciarum sunt idiomata: sed Mexicanum in primis elegans, cuius vsus amplius mille & quingentorum mill. spatio patet, & facillimè omniū discitur. Regulos & principes *Tutruane* appellant, Panem *Tascal*: Gallinas *Tōtoli*: & *Occomaia*, valet, Expecta paulisper: Morbum, *Mococoua*: Saltare, *Mitote*.

*Saltandi
ritus apud
Nicara-
guenses.*

SALTANDI porro hic illis ritus & ratio est. Confluunt in vnum ducenti, trecenti: nonnunquam etiam ter & quater mille homines, pro modo & amplitudine prouinciæ, & pro indigenarum vel modico vel magno numero: tum vt conuenere, campum in quo saltaturi sunt, verrunt & quammundissimè perpurgant. Mox vnus eorum progreditur & chorum ductare incipit, plerumq. retrorsum corpus inflectens: interdum circumagens: ceteri omnes, inconditos illos motus imitantes, præfultorem ordine terni & quaterni sequuntur. Choraulæ qui tympanorum sonitu interim ludum incendunt, carmina quædam & cantus patrios ordiuntur: choragus primus respondet, mox exceptum ab aliis carmen per omnes in orbem decurrit. Alium, flabellum manu gestantem, alium cucurbitam lapillis plenam, alium caput cristis & pennis decorū, alium brachia crurāq. concharum lineis & corollis redimita cerneret. Illi hoc, alij alio modo corpus variè circumagūt: nonnulli crura attollunt,

attollunt, aliqui brachia: alius cæcum, alius surdum effingit: rident alij, alij plangūt. Cum his aliisque variis gestibus & motibus corporis, interea sese illo suo Cacauate largè irrigantes, totum diem & sæpe noctis partem tripudiantes, sollennes illos choros exercent.

NAVES quæ per mare Australe Nicaraguam petunt, angustum fluminis cuiusdam alueum inuectæ spatio xxv. mill. pass. ad quendam pagū appellunt (Realegio ei nomen est.) Ibi duodecim circiter mapalia sunt, ex cannis contexta, & Hispanis habitata: eò autem diuertūt naues, propter opportunam stationem & lignationem commodissimam. Ab eo loco in Orientem diei vnus itinere abest ciuitas Legionēsis, Episcopatus sedes, ad lacus ripam posita. ² Franciscus Fernandes eam condidit, sicuti & Granatam, quæ l. vltèrius millia ad eiusdem lacus ripam sita est, non procul ab illius emissario seu alueo, quo se lacus in Septentrionalem oceanum exonerat. Hæ duæ vires simul vix octoginta domibus constant, quæ partim materia, partim laterculo coctili constructæ sunt.

*Legio, &
Granata,
coloniæ.*

*De hoc al-
ueo, p. 189*

TRIGINTA quinque mill. interuallo abest Legione ³ mons flammiumus, qui per ingentem craterem tantos sæpe flammarum globos cructat, vt noctu latissimè vltra centū millia pass. incendia reluceant. Nonnullis fuit opinio intus liquefactū aurū esse, perpetuam ignib. materiem. Itaq. Dominicanus quidā monachus, quum eius rei periculū facere velleret, ænū & catenam ferream fabricari curata

Mons flammiumus.

*Empedocles Domi-
nicanus.*

moxque in montis iugum cum quatuor aliis Hispanis ascendens, catenam cum aëno in caminum demittit. ibi ignis feruore aënum cum parte catenæ liquefactum est. Monachus non leuiter iratus Legionem recurrit, fabrum vehementer incusans, qui catenam tenuiorem multò quàm iussisset ipse, esset fabricatus. Faber aliam multò crassiolem excudit: Monachus montem repetit: catenam & lebetem demittit, res priori incepto similem exitum habuit: nec tantum resolutus lebes euauit, verumetiam flammæ globus repente è profundo exiliens, propemodum & Fratrem & socios absumsit. Omnes quidem adeo perculsi, in urbem reuersi sunt, ut de eo incepto exsequendo numquam deinceps cogitarent.

*Sacerdos
metalla-
rius.*

IN ea ipsa ciuitate cognoui sacerdotem, qui Quæstoris regij interuentu à rege Hispaniæ per literas petiit ut sibi ducentos seruos dari iuberet: pollicitus perfosso illorum opera aureo illo monte, ingentes se inde diuitias eruturum. Isti Rex rescripsit, montem, si vellet, suo sumtu aperiret. sibi enim non esse mancipia quæ ad eas fodinas mitteret. Ita inceptum illud omissum est.

I BALSAMVM (ut inquit Plinius lib. 12. cap. 25.) uni terre Indæ concessum, pridem perisse creditur. Nunc verò, quod ex India Occid. adfertur, primum in Hispaniola inuentum est, Indica mulieris indicio. Arbor unde hic liquor elicetur, Goaconax ab indigenis vocatur. Onie. Hist. nat.

nat. Ind. lib. 10. cap. 3. Elicitur quoque hodie in Noua Hispania ex arbore Punica malo maiore, cuius folia urtica similia serrata & tenuia sunt. Indi Xilo vocant. Elicitur autem duobus modis. Primum multis incisuris vulnerato arboris cortice. Altero ramis & truncis eius arboris assulatim & minutim concisis, & in lebetē amplissimo feruefactis: mox oleo supernatante collecto. Id priore ignobilius est. Monar. de simpl. medic. Indic.

2 Is est qui Iucatanam primus aperuit. Suprà huius lib. cap. 10. Quem postea Petrus Arias Abulensis, post Castellæ aureæ imperium abrogatum ob Valboæ mortem, Nicaragua Gubernator, capitali supplicio affecit, quod clandestino fœdere cum Fer. Cortesio inito, occupatam, sponte ipsius, prouinciam armis retinere uellet, Sed oblato falso crimine infontem oppressisse visus est, sicuti & generum suum antea, ut sublato æmulo, vacua prouincia solus potiretur.

3 Montis illius flammini nomen Gomara Masaiam, Dominicanus F. Blasius de Ynnesta, edit: scribitque nouum istum Empedoclem & præterea duos Hispanos sciendæ eius rei causæ auidos semet ipsos tribus corbibus in Vulcanium illum craterem demisisse, quoad eius fieri potuit: atque inde lebetem, catena ferrea reuinctum, ad CXL. vlnas deiectum, tandem ubi ad flammam peruenit liquefactum esse cum aliquot catenæ annulis. Illos stupefactos tali naturæ miraculo, irritò labore inde profuissse. Ceterum anno M. D. LI. Ioanni Aluarez Doctori & Decano à Rege concessum esse ut recluso eo monte metallum erueret. Gom. Histor. gen. libro 5. capite 203.



Petri Aluaradi in Peruanum regnum expeditio. Eius mors, & conscientia in morte dolor. Vxor eius Deum ipsum increpans, miro eius iudicio absumitur.

CAP. XVII.



Pet. Aluarado, iam partis opibus, per auxilium & ambitionem frui non licet.

De his lib. 3. cap. 1.

Nicaragua in occasum tendentibus, tercentum mill. à Legionē, numquā longius ab ora maritima abscedendo quā ut ipsum mare conspici possit, peruenitur ad Guattimalam. Eam urbem Petrus Aluaradus, postquam eam provinciam subegerat, inter duos montes condidit, è quibus semper fumus euoluitur; ac duas præterea, San-michaelē videlicet & San-saluatorem, quæ centum mill. pass. inter se distant. Iamque hic Aluaradus, perdomita & diuisa ea provincia, cæque vrbe condita, cum magna pace ac tranquillitate in constituta à se ditione partis opibus fruebatur, quum nuncium accipit, Franciscum Pizarrum & Didacum Almagrum, in Peruanum regnum transgressos, incredibiles ibi diuitias reperisse. His permotus, per amicos literas à Cæsare & potestatem transmittendi in illud Regnum, ac cuiuscumque vellet eius partis, quam modò alij Hispani non infedissent, in ditionem redigendæ coloniisq. occupandæ, impetrat.

IN DE anno M. D. XXXIII. septem nauium armata classe è provincia sua soluens, septuagesimo quarto die ad oram Peruanam appellit. Mox in litus Mantæ egressus, ad eam oram quæ ab Hispanis post Portus-vetus dicta est, ducibus Indis regionis peritis assumtis, ulterius

rius in mediterranea progreditur. Tandē superatis montium quorundam frigidissimis iugis & perpetua niue obrutis (vbi multi Hispani frigore diriguerunt, alij penuria victus cæsis equis famem tolerauere) in prouinciam Quiton peruenit.

Id vbi Francisco Pizarro allatū, extemplo Didacū Almagrum cum CL. Hispanis aduersus eum mittit: qui si posset, vel eum aditu prohiberet, vel exercitū quem ille adduceret, precio ab eo licitaretur. Almagrus Tombesiū per uenerat: ibi audito Aluaradum numero militum multò se esse superiorem, hostiliter eum inuadere nō ausus est. Ambo ad Liribambam flumen conueniunt: ibi licentiatus Caldera pacem inter eos & amicitia concilians, iubet Aluaradum tradere quas adduxisset copias Pizarro & Almagro: illos verò vicissim dare Aluaro centū millia aureorum ducatorum, ea lege ac conditione vt ipse ex eo regno excedens, numquā deinceps eò regrederetur. Hæc pactus Aluaradus cum quatuor famulis Peruo decedit, & successu letus Guattimalā reuertitur. Paulo pòst perlustrandæ eius oræ in Occidentem, & nouas terras quærendi consilium capit: & eò decem liburnicas, myoparones quatuor, instruit.

Eodem ipso tempore quo Aluaradus *Fr. Marcus de Nix* classem adornabat, venere Mexicum Domini *cus de Nix* cani quidam monachi, peragratis ad Occiden *ta cum a-* tem terris mille amplius milliarium spatio: *lys, anno* qui vt ex longinquo reuenerant, de illis re- *1539. eam* gionibus mira narrabant. Vulgarunt inter *peregrina-* alia, Sibollam prouinciam aliasque terras *tionem o-* *bijt.*

fertiles, diuites, auro, cyanis, vulgò Turquinis, gossipio, aliisque dotibus, abundare. Ea relatione moti Antonius Mendoza Nouæ Hispaniæ prorex, & Ferdinandus Cortesius eodem in regno summus Præfectus-militiæ, suscipiendæ per se aut per legatos eius expeditionis consilia inter se agitant: sed discordibus inuicem animis, quum neuter alteri satis fideret, diuersi alius aliò abiere. Cortesius Hispaniam petiit: Prorex Petrum Aluaradum è Gattimala arcessens, quam celerrimè posset, cum suis copiis venire ad se iubet. Is breui soluens ad Trinitatis portum appellit: & terrestri itinere Mexicum profectus, de suscipienda in Sibollam expeditione cum Prorege tráfigit. Inde, septingentis militibus conscriptis, armisque, equis, & aliis ad iter necessariis rebus, prouisis, Mexico ad naues tendit.

IN itinere nuncius ei affertur, Indos Xallisci prouinciæ incolas aduersus Hispanos rebellasse: itaque inde cum maxima copiarum parte ad ferendam suis opem festinat. Vt venit Petrum Zunicam Hispanorum complurium cæde recenti confusum & tristem ibi nactus, ambo ad collem editum, quem Indi munitū manu infederant, obsidendum properant. Munimentum id erat eiusmodi: totas arbores ramis inuicem implicatis & cœuntibus cum ingentibus saxis colligatas, quodam veluti nexu continenti opere iuncto, perpetuam sepem hosti obiecerant. Simulque vt Hispani erigere agmen in collem & ferociter discurrere cœperunt, Indi horribili clamore sublato, cæsis arborum

*"Didacum
Lopez de
Zunigua,
vocat Co-
mara.*

arborū ramis, compagē operis soluunt. Tum verò prorutis arborū & lapidū cumulis, omnia ingenti cum fragore in præceps deferri, & ingentis magnitudinis saxa per montis prona de uolui tanto impetu vt maximam subeuntium Hispanorū partē obtererent. Aluaradus pro-
uoluto in eum equo præceps datus, duos intra dies vita concessit. Petentib. à decūbente quid ei maximè doleret, Anima, inquit, vehemēter mihi dolet. Mediocri homo statura fuit, lo-
quax, perfidus, sæuus aduersum Indos, benefici-
ciorum immemor atque ingratus vsque adeo vt vulgò etiam de eo sui dicant, Eum nulli a-
micorum fidem vñquam præstitisse. Postre-
mò incestis nuptiis infamis, quum duas simul
sorores in matrimonio habuerit.¹

*Ambitiose
& auare
anime cra-
ciatus.*

*Gomara
Hist. gene-
lib. 5.*

ALVARADO mortuo, breui, Proregis missu, Mexico ad eam expeditionem abiit Franciscus Velasques Coronatus cum octin-
gentis militibus, iisque equitibus plerisque
quum nauibus ad eam prouinciam subigendā
& habitandam ire abnueret. Vt eò peruenit,
pro omnibus diuitiis niuis copiam & com-
meatus penuriam reperit. Itaque multi equi,
& Indicorum seruitiorum plerique fame ab-
sumti sunt. Dux ipse, quum se maiores opes
inuenturum speraret, progredi vltèrius statuit
Iàmque CL. milia pass. emensus, animalium ge-
nus quoddam mediocris magnitudinis, vaccæ
forma reperit. Hispani in eorum animalium
armenta irruentes, multa mactant & famem
expellunt. Inde Velasques, multo frustra eius
oræ peragrato spatio, postquam leuib. ali-

*Velasques
in Sibollè.
si expedi-
tione pro
thesaura
carbones
reperit.*

quot præliis indigenas expertus esset, libertatem suam acriter propugnantes, eorū aliquot incensis ac direptis pagis: tandem spe irrita fatigatus, probrāque ac diras in monachos illos iaciens, qui de eius prouinciæ opulentia tā lætam famā vulgassent, multis amissis Hispaniis, pauper & nudus Mexicum regressus est.

Diuini iudicij in superbam & blasphemam vi-duam exemplum.

N V N C, vt ad Aluaradum redeam, postquam eius mortis nuncius Guattimalam allatus est, Beatrix de Cucua vxor eius, femina equidem animi impotens, vana & superba, quū Dei opt. max. omnipotentiam cum gratiarum actione agnoscere, & immensam eius bonitatem laudare deberet, in blasphemias voces erupit, dicens, Nihil peius grauiusque à Deo mali inferri sibi potuisse, quàm quod viro orbata esset. Simul atrari ædes & nigro pingi iubens, non cibum, non somnū capere, non solatia vlla admittere, sustinuit. Adhæc laceratis crinibus humi corpus abiicere, multāque alia dicere & facere quæ mentis compotem non decerent. Inter hæc tamen magnificas & pompæ plenias exsequias viro duxit: neque luctu aut funebribus lamentis impedita est quominus primorum ciuitatis cœtu conuocato, se eorum suffragiis Gubernatricem prouinciæ designari curaret, omnēsque sacramento in verba sua adigeret.

Ambitio ne luctu quidem minuitur.

S E D paulo post quàm ea gesta erant, ecce die VIII. Septembris, qui Virgini vulgò sacer est, anno M.D.XLI. imber ingentibus procellis effundi incipit: adeo vt circiter secundam noctis horam quæ alterum ab eo diem sequuta est,

est, Indi quidam Episcopum prouinciæ adeuntes (Franciscus Maroquin is vocabatur) ei significarent, se ad radicem eius montis qui vrbi proximè immineret, terribilem quendam sonum & insolitum fragorem auribus accepisse. Episcopus obiurgat eos, Non vos scire (inquit) monui, ne eiusmodi rebus aures præberetis? Iam paulo ultra medium nox processerat, quum repentè magna vis aquarum ex eo monte tanto impetu & violentia, torrentium instar erupit, vt saxa ingentis magnitudinis deuolueret, quæ mox incussa subacentibus petris, maiore vi quidquid obuium esset protrebant. Simul audiebantur per aërem lugubres ululatus & stridores horrendi: & furuam quandam vaccam multa inferentem damna, & ea loca peruagantem, supersunt qui viderunt.

Inter multas ædificiorum strages, quas ea eluuiò aquarum dedit, primam Gubernatoris domum rapuit: & ea clade periit Beatrix ipsa gubernatrix cum iis omnibus quæ cum illa orandi causa (vt fertur) in abditum conclaue seu sacrarium aliquod penetrare, cōcesserant. Ad eum modum breui submersa & concussa repentina vi tota propè illa ciuitas, prostrata est. Centum circiter ac viginti Hispani vtriusque sexus eo casu periere: nonnulli qui sub initium ruentis tempestatis vrbe cesserant, perniciem effugerunt. Luce orta, postquam procella conquieuerat, vicinis vrbi campis Hispani nonnulli debilitati, plerique obtriti, alij brachiis, alij cruribus fractis,

*Gattimala
reinstauratur.*

iacentes reperti sunt: inter ceteros puellula quædam illæsa & sine vlla noxa, sublata est, quæ ex Indica muliere Aluaradus susceperat. Neque ex ea stirpe quisquam, præter istam, remansit. Post eâ ruinâ Gattimala in modica planicie, vbi nûc sita est, instauratur, triû mill. spatio à veteri disita, ad Ortum: constatq. septuaginta quinque aut octoginta domibus la terculo coctili exstructis, quæ magnam partem tegulis contactæ sunt.

IN ea prouincia frequentes existere terræ-motus experientia ipsa didici. Quum enim fortè aliquando essem in cœnobio, veteri Guattimalæ vicino (locus is vulgò Almologadi-Basso appellatur) & cum monacho colloquerer, super exiguo quodam tumulo, terra adeo contremuit, vt campanæ sua sponte sonitum dederint: maceriæ quibus circumseptus erat cœnobij hortus magna ex parte corruerint: subterranei tubi, per quos aqua ad fontē deducebatur effracti: sacellû maius duobus locis fissum hiaret, & aliquot tegulæ in terram deciderent: terramque ipsam omnes hiatu profundo discessuram crederent. Durauit hic terror quantum recitando Symbolo Apost. temporis satis est.

CETERVM ea prouincia, quia cælo miti ac temperato subest, frumenti satis patiens est: sed omnium arborum quæ eò ex Hispania translatae sunt, nulla coaluit præter ficos & Armeniacas malos: verùm & ipsarum quoque fructus quum maturescere incipiunt, sub initium videlicet hiemis, tum insipidi existût.

Duorum

Duorum à Gattimala dierum itineris spatio, loco maritimo quem vulgò Izalchi appellant, magna vis Cacauatarum colligitur. Et hæ hodie ferè sunt Hispanorum qui eam prouinciã *Guattimalenſium mores.* incolunt, opes: earumque maximam partem per Nouæ Hispaniæ prouincias distribuunt, in quibus, quòd id regnum frigidioris quàm calidioris temperamenti sit, id genus fructus non ſufficienti copia colligitur.

P O R R O iſti Guattimalenſes Nicaraguenſibus & Mexicanis moribus ex æquo ferè participant. Itaq. negotiantur mercatufque & contractus inuicem exercent. Ac plerique eorum artes etiam mechanicas didicere: ſunt enim inter eos fabri materiarij, carpentarij, pictores, aurifices, aliarumque opifices artium: & hos Hiſpani quondam in ſeruitiis habebant, eoſq. ære emtos varia opificia docuerant: ſed quum heri ipſi aliquod laboris ſui præmium & fructum ex eorum opera decerpere vellent, tum in libertatem reſtituti ſunt. Quotidie venalitia ſua fora & mercatus exercere conſueuerunt. merces, ferè ſunt eſculenta & poculenta, qualia ſal, piſces, fructus, cucurbitæ, battatæ, incocti cū ramis ficus indi genæ, & ex iis facta potio ita ſcitè & honeſtè miſta, vt ſolus eius conſpectus nauſeam mihi cieret. Præterea goſſipio, penulis, interulis, criſtis pennaceis aliſque eiufcemodi, commercia inter ſe agitant.

I P E T R V S *Aluaradus*, vt *Franciſci de los-Conos*, qui à ſecretis & intimis conſiliorum

Cæsari erat, gratiam & fauorem quareret, duarum simul sororū incesto matrimonio semet polluit, idque permissu & indulgentia Papa. Gomara Hist.gen.lib.5.cap.209.



Indicarum gentium color. Vinum & Ferrum in precio habent. Legendi & scribendi in nostris peritiam mirantur. Hispanicum iugum excutere cupiunt.

CAP. XVII.



Q UOD ad colorem Indicarum gentiū attinet, in vniuersum ferè cereo aut buxco, & fusco seu rauo quàm cuiquam alteri propior est: omnium que quoscumque in amplissimis illis prouinciis videre mihi licuit, pulcherrimi sunt Pარიენსის sinus accolæ & Valentiolæ prouinciæ indigenæ: ij nempe qui in mediterraneis opaca montium incolunt. Cuius rei causam eam esse arbitror quòd ea loca minus solis vapore torreantur quàm plana: siquidem maritimæ oræ accolæ subfusco, & velut carnis sole flagranti ambustæ, colore sunt.

CETERVM omnium rerum quas Hispani in Indiam transtulerunt, nulla Indis gratior acceptiorque extitit quàm vinum: & quamquam ipsi è Maizio atque aliis rebus factitia vina & potus moliantur, vti suprà diximus

Vinum &
Ferrum apud Indos
rara &
cara.

ximus, vulgò tamen dicunt non ita iis quæ ipsi faciunt, villis ali vires vigorémque animi, recreari spiritus, ventrem excalefieri, nec somnos ita dulces suauésque conciliari, vt illo Castellæ. Ferrum præterea ad ipsos inlatum carum habuerunt: quum nihil ferè olim fabri carentur præter æneas secures, & cultellos è filice. Sed super omnia noster legendi & scribendi vsus, Indis miraculo fuit. Itaque quum Hispani literas Indis ad aliquem perferendas dabant, nusquam cogitando assequi poterant qua ratione charta alba nigro distincta cloqui posset.

Indi legendi & scribendi vsus mirantur.

CETERVM omnium gentium ac prouinciarum in quas Hispani subactas hodie imperium obtinent, frequentissimæ & hominum multitudine abundantissimæ, hæ sunt, Noua Hispania, & ab ea Iucatan, Guattimala, Nicaragua, & nonnulli Peruani regni tractus.

PORRO quum nouum illum orbem quatuordecim annorum spatio, vt suprà dixi, perlustrauerim, ac legerim Historias quas Hispani de rebus à se in illis regionibus gestis & suis aduersus Indos victoriis scripserunt: plerisque in rebus illos laudibus suis enarrandis modum egressos fuisse exploratum ac compertum habeo. Atque in eo maximè, quum iactant se summa laude esse dignos, quod omnes à se subiectos in India populos conuerterint, & Christianos fecerint. quod quum dicunt, illos nèpe populos à se factos esse Christianos, perinde esse videtur ac si quis, exempli

Hispani laudibus suis tum immodici prædicatores.

Com. lib. 5. Hist. gen. cap. 7. l.

gratia, dicat, Panem à pistore bene esse coctū. Attamen quum Christi Domini nostri & seruatoris doctrinam attentè considero: equidē comperio plurimū interesse inter nudum nomen, & rem ipsam: id est, Christiani tantū nomen gerere, & Christianum re ipsa esse, latè inter se differre.

*Peruani
Hispanos
pro Chri-
stianis &
filijs Dei
agnoscere
nolunt.*

Q V O magis id credamus, vel Barbaros ipsos ea de re sententiam ferentes audire operæpretium est. Nam in Peruano regno alijsq. multis locis, quantumuis Hispani passim vulgarint se Christianos esse, Dei ipsius & parentis cælestis filios: tamen ob intolerāda sæuitiæ exempla quæ aduersus Indos ediderunt, nulla ratione vinq. effici aut extorqueri potuit vt id nomen Hispanis tribuere & agnoscere vellent. Ea nimirum gens multò accriore ac sollertiore iudicio quàm quælibet aliæ Hispanis subiectæ dotata est. Mexicani quidem & finitimi alij populi, ex quo Hispani primū in eas terras transgressi Christianos se esse dixerunt, eos quoque & ipsi semper ex eo illos hoc nomine numcuparunt. Id verò vt faterentur & dicerent, numquam adduci potuere Peruani, sicuti antè dictum, & suo loco fusius exponetur.

*Indi Hispanicum
iugum excu-
tere cupiunt.*

Q V A R E, quum extra controuersiam sit quamlibet nationem peregrinæ gentis imperio subiectam, si semet in libertatem vindicare possit, id verò cupidissimè & sine vlla dubitatione facturam: ita Indi haud dubiè, Mexicani præsertim, assiduè dissimulantes excubant

cubant, sedulò semper aspectantes an solitæ naues ex Hispania veniant. Ac siquid casu Hispaniæ infortunij accideret, sicuti fieri potest (quippe Imperia omnia quantumuis magna & potentia, omnes gentes, populi, ciuitates & regna, humanorum casuum varietati atque inconstantia, quam vulgò Fortunam vocant, obnoxia esse in perspicuo est) si clades inquam aliqua memorabilis Hispaniam affligeret, nec naues commcare in Indiã possent, vt solent: vniuersa quàm latè patet India, iugo excusso, rebellaret, atque omnibus Hispanis mactatis sollenne agitarer epulum: atque, vt à quibusdam monachis accepi, illi ipsi Fratres primi omnium funebre istud conuiuium suo sanguine imbuerent, quòd peruersis indigenarum moribus perpetuò aduersentur.

Id verum esse vnius rei exemplo probasse sufficiet. Anno M. D. LIII. quum Guattimalæ essem, eo ipso tempore quo Galli cum Hispanis bellum gerebant: nec, ob metum piratarum, per omnem eam oram spatio quatuordecim mensium appulissent vllæ naues, præter phasclos duos (Galeones vulgò vocitant) Aluari Bazani, quorum alter ad Nomen-dei, alter ad Villam-riccam, Nouæ Hispaniæ portum, applicuerat: iam Hispanorum animos vehemens formido incesserat, ne Indi ad res nouandas spectarent, quòd iam ex Mauris audiuiissent Gallos cum Hispanis bellum gerere, multaque iam illis damna intulisse. Ipse quidem per eosdem hosce dies, quum in eo loco quem Almolongam vocant, paulo

*Indi Gallo-
rum in In-
diam expe-
ditionem
peroptant,
vt ab Hi-
spanis libe-
rentur.*


infra Guattimalam, vbi quondam sita erat ve-
tus Guattimala, cum quibusdam Indis collo-
querer: sciscitari ex me vnus cœpit, An Galli
haberent equos, & ea quæ faciunt Tau Tau,
quû vellet quærere an Gallis essent bôbardæ,
nec posset. Tum ego excipiens, Habent verò,
inquam. Ibi ille suspirium ex imo pectore
petitum ducere: & Deo notum est quid tum
haberet in votis. Certè, tametsi monachorum
assiduis vocibus illorum aures circumsonent,
monentium nequid nouare aut mouere ag-
grediantur, quia videlicet Cæsar è Castella
innumeram vim Christianorum aduersus i-
psos emissurus esset, à quibus multo inclemē-
tius, quàm antea vnquam, haberentur: attamen
ne his quidem toties iteratis & inculca-
tis minis impediuntur, si idonea & opportuna
occasio sese obtulerit, quominus omnes Hi-
spanos è suis finibus si possint, exterminent.

I INDIS principio persuasio erat, epistolas
quas Hispani mutuò ad amicos mitterent, anima-
tas esse & loqui. Cuius rei lepidam historiam nar-
rat Gomara. Mittebat Hispanus quidam ad ami-
cum duodecim Hutias (id est, cuniculos Indiae
Occid. peculiare) assos, ne aestu corrumpere-
ntur. Indum qui deferebat, quum vel obdormisset fes-
sus de via, vel interquiesset, diutius morantem in
itinere fames corripit: tres Hutias absumit. Re-
ueritur, litteras ab amico illo ad herum referens,
quibus ille de nouem Hutijs ad se missis gratias
amico agebat. Hispanus perlectis literis irascitur
seruo: ille duodecim reddidisse se affirmat. Sed
quum

quum epistola indicio proderetur, rubore perfusus verum aperit: & suos ea de re populares commo-
nesfacit, ut sibi à folijs & chartis eiuscemodi loqua-
cibus cauere.

NEC dispar est quod de Brasiliensibus scribit
Lerius: Quum primò (inquit) in eas terras ve-
nisssem, verba & sententias aliquas, ut sermoni
eorum assuescerem, scribebam, easque mox coram
ipsis legebam. Illi, prestigias id esse rati, inuicem
his verbis alij alios alloquebantur: Non mirum!
istum qui heri ne vnum quidem verbum idiomatis
nostri callebat, nunc vi & ope huius chartæ, quæ
illum nostra eloqui docet, ita peritè ea sonare ut à
nobis intelligatur? Nauig. Brasil. cap. 16.

Ceterum apud aliquos Indorum Occid. popu-
los literarum vsum esse, allati inde libri prodidere,
Iuris peritus quidam, Corales, Darienēsum prator
urbanus, ad Regem Catholicum scribens, inter a-
lia retulit, Ad se adductum Indum quendam,
qui ab hero fugerat ex interioribus Continentis ter-
ris versus Occidentem. Is legentem aliquando lit-
teras Pratorem conspiciens, mirabundus accurrit
ut videret; dixitque Patronum suum & populares
etiam libros habere, sed è folijs arborum simul con-
surtis compactos. cuiusmodi à Cortesio è Colluacana
in Hispaniam missi sunt. Petr. Mart. Mediol.
Ocean. dec. 3. lib. 10.



¶ Indi Christianorum iudices. Sacerdotes & monachi in India
Occid. auaritiæ dediti. Indi Hispanorum consuetudine dete-
riorēs sunt, & Christ. religionem ludibrio habent.

CAP. XVII.

q. iiii.



M NIVM eius gentis rerum, quas
 maximè in India laboravi vt scirem,
 id inprimis intelligere conatus sum,
 quid nimirum de Fide nostra illi
 sentiant. Itaque quæcumque ea de re tum
 ex publicis Monachorum & sacerdotum quo-
 rundam sermonibus didici, tum ex iis quæ i-
 pse vidi & ab ipsismet Indis audiui, ea nunc
 exponere operæprecium duco: vt Lectores
 inde sibi subiiciant, quantum mala nostra o-
 pera exemplaque scandalorum apud illos pa-
 riant. Prudentes verò ac sobrios Lectores an-
 te omnia rogo vt æquum huc & attentum a-
 nimum afferant, sciântque se verè aurea dicta
 sententiâsque in primis memorabiles sum-
 mæque admiratione dignas hîc audituros.

INDORVM pleriq. ac potissimum Regu-
 lorum & principũ filij, qui legere & scribere
 didicerunt, atq. adeò Præcepta ipsa Dei, quæ
 bona esse fatentur, idcirco plurimùm miran-
 tur nos ipsos à quibus hæc habent, ea non ob-
 servare, & vulgò ita loquuntur: HEVS tu Chri-
 stiane. Vetat Deus ne quis per nomen suum
 in vanum iuret: at tu omni & quidem leuissi-
 ma de causa, assiduè iuras & peieras. Iubet
 Deus ne falsum testimonium dicamus: vos
 verò Christiani nihil ferè aliud facitis, & alij
 aliis detrahitis & maledicitis. Iubet Deus vt
 proximum tuum tamquam teipsum diligas:
 ei que sua debita remittas, vt tua tibi metip-
 sî cõdonari vis: vos verò planè cõtrà facitis. nam
 & à vobis malè tractantur qui minus opi-
 bus valent, & si quis quid debeat vobis, vos
 eum

barbari
 surgent in
 Iudicio ad-
 versus Chri-
 stianos
 multos, &
 condemna-
 bunt eos.

eum in vincula trahendum & coniiciendum
 curatis: ac quanquam facultatibus careat, ta-
 men vt persoluat vrgetis, & rigidè æs vestrum
 exigitis. Si inter vos sit pauper aliquis Chri-
 stianus, ne de vestris facultatibus illi crogetis,
 remittitis eum ad casas nostras, vt ei eleemo-
 synam largiamur.

SUNT præterea etiam Indi, qui immodi-
 cam auaritiam nostram & furiosam cupidita-
 tem pertæsi, aureum numisma aut bracteam
 in manus capiant & dicant: EN Deum Chri-
 stianorum: propter hoc è Castella in terras
 nostras venire: propter hoc nos subegerunt,
 vexarunt, pro mancipiis vendiderunt, & mul-
 ta in nos nefanda ediderunt: propter hoc bel-
 la & prælia inter se agitant, & alij alios mutuo
 interimunt: propter hoc perpetuò inquieti,
 alea ludunt, blasphemant, diris se deuouent,
 litigant, furantur, alij aliorum vxores rapiunt.
 denique huius gratia nullum sceleris aut libi-
 dinis genus prætermittunt.

IPSE sacerdotem cognoui, Guattimalensi
 episcopo in primis acceptum, qui per illos In-
 diæ pagos venale vinum circumferens (quan-
 quam id Præsidium & Gubernatorum edictis
 prohibitum esset) breuiore quàm sex mēsum
 spatio viginti quinque millia Regalium lucra-
 tus esset. Sunt præterea monachi qui palam &
 interdum ea flagitia committunt, quæ alios vel
 noctu perpetrare puduerit. De vitiosis, non
 de probis hîc loquor: quamquam etiam Fran-
 ciscanus quidam publicè clamaret, nec sacer-
 dotem, nec monachum, neque episcopum in

*Barbari a-
 uaritiam
 Christiano-
 rum grauis
 sime notat.*

*Monacho-
 rum nefan-
 da libidi-
 nes in In-
 dia.*

*Veritas o-
dium parit.*

tota India vllum existere viri boni nomine dignum. Quippe omnes se dedere avaritiæ, atque vbi Indos diuitiis abundare intelligerent, eò omnes confluere certatim: vbi verò inopes essent, ea loca omnes fugere. Monachus ille, quum San-petri esset, Capitis-Fondurenfis vrbe, proximum nauium traiectum expectans, vt in Hispaniam transmitteret: propter hæc verba, Superioris sui mandato, captus & Guattimalam abductus est. Ipse quoque sacerdotes inter se confabulantes & profitentes audiuisse me memini, Se ad quæstum faciendum, non aliam ob causam, ex Hispania in Indiam traiecisse.

Indi Hispanorum consuetudine corrumpuntur.

N V N C quod ex Monacho quodam, quum Comaiaguæ essem, auditum habeo, referam. Is mihi retulit cognitum à se Indum reguli cuiusdam filium, acutissimi ingenij hominem, qui quum adolescens in ludum itaret, ibique legere ac scribere disceret, nemo erat qui non existimaret eum ita virtute ac doctrina præstantem inde euasurum, vt ceteris vitæ exemplo præiret. Sed vt trigessimum ætatis annum attigit, contra quàm omnes expectarent, inde impurus, nequam & sceleratus, rediit. Interrogatus cur è bono improbus euasisset:

- » Ex quo (inquit) Christianus sum factus, per
- » Dei nomen iurare, & per Crucem, & per verba sancti Euangelij: ac per Dei vitam blasphemare didici: eumque abnego, nec credo. Aleari præterea didici, & verum numquam eloqui: ensem insuper mihi cōparaui ad ciendas

rixas:

rixas: denique, vt planè ritu Christianorum
 viuam, nihil iam mihi præter concubinam
 deest, quam breui me domum ducturum
 spero.

QVOD mihi ipsi vsuuenit, commemorabo. Reprehenderam fortè Indum aleæ & blasphemis deditum. Ille mihi confestim: Nos, inquit, ex vobis ipsis hæc exempla didicimus. Ac certè qui ita flagitiosè viuunt Indi, ex iis ferè sunt, qui apud nonnullos Hispanos educati, quibus nullum studium est, præterquam alea ludere, blasphemare, & eiusmodi alia facere, domestica consuetudine eorum moribus facillimè assueuerunt. Atque hæc ferè sunt miracula & prodigia, quæ Hispani apud Indos edidere.

MULTI præterea Indi alij reperiuntur, quos si interroges, An Christiani sint: Respondent, se esse: quippe Episcopum signaculo Crucis eorum faciem signasse, & benedictionem suam ipsis impertiuissè: se templum ædificasse, atque intus B. Mariæ imaginem collocasse, postremò campanam comparasse. Fortè aliquando ipse quum ab Indo sciscitatus essem, An Christianus esset: tum ille, Num tu vis me, inquit, per decem aut duodecim annos seruum esse Episcopi, & curare suam mulam?

ALII eadem de re interrogati dicunt, Sibi quater aut quinquies caput aqua à sacerdote conspersum. Isti tales, simul vt sacerdotem aliquem aut monachum venientem conspiciunt, tum confestim obuam accurrentes,

*christianismum in
 frigidis
 ceremoniis
 sitū etiam
 Barbari
 ipsi ridet.*

» Pater, inquiunt, irrorate mihi caput aqua,
 » quia volo esse Christianus, etiamsi iam aliàs
 » baptizatus fuero. Ita initio ab vno facto,
 cetera plebs quò pergat ignara, vniuersa con-
 currit. Id ferè vsuuenit iis locis vbi Indi pauci
 & pauperes sunt, & inter quos nulli nec sacer-
 dotes nec Fratres resident. Ceterum inter
 monachos nonnulli etiam reperti sunt, qui
 istos baptizare nollent, quum dicerent, Perin-
 de esse Indū baptizare, vt brutum aliquod ani-
 mal. Alij è Castella in Indiam transgressi, ibiq.
 moribus & exemplis tum Hispanorum tum
 Indorum inspectis, vtrosque pariter miseran-
 tes, retro in Hispaniam ad sua cœnobia re-
 uersi sunt.

Nauig.
 Brasil.
 cap. 16.

I QVOD facile inter omnes constat, omnium
 propè Indorum Occid. maximè ab humanitate alie-
 ni sunt Brasilienses barbari. Quæ tamen sit eorum
 de Deo notio, quæ laudum & preceptorum Dei
 admiratio, ex Lerio nostro cognoscere opera pre-
 cium est. Is ergo de Tououpinambaultiis America
 gente agens, ita scribit: INTER cetera, (inquit)
 dicebamus illis nos credere in vnum Deum, crea-
 torem cali & terra, qui vt orbem & quacumque
 in eo sunt, condidit, ita omnia pro arbitrio guber-
 nat. Illi vbi hæc audierant, alij alios intuentes, &
 in hanc vocem (quæ admirationis nota ipsis fami-
 liaris est) erumpentes, Teh! defixi & stupefacti
 hærebant. Et paulo pòst: Quum fortè aliquando
 inquit, cum alijs Gallis aliquot in quodam barba-
 rorum pago essem, (Okarentin ipsi appellant) &
 in aperto ac propatulo cœnaremus: confluentes
 Barbari

Barbari eius vici incolæ, maiores natu præsertim, cum multis benevolentia signis, circumfusi, neque vel minimo verbo dicentes interfati, nos attentè & tacitè intuebantur. Donec peractò conuiuio, magno natu quidam, quum observasset nos ab hymno cibum auspicatos, hymno quoque cœnam clausisse, accedens, ita inquit: Quid sibi vult hic ritus quo vos modò vti estis, quum sublati pileis omnes, præter unum qui loqueretur, silentiū tenuistis? Ad quem pertinebat ea oratio quam ille habuit? Vestrūne præsentium ad aliquem: an ad absentium? **I B I D** ego opportunè oblatam eam occasionem arripies, ut apud eos de vero Dei cultu loquerer: quum præter eius pagi amplitudinem & frequentiam, Barbaros etiam solito attentiores animadverterem: rogare Interpretem nostrum ut suis verbis, meum illis sermonē, quoad capere ipsi possent, explicaret. Tum à quæstione senis exorsus, Preces nostras ad Deum dirigi respondi: eūque, etsi sub ipsius conspectum non caderet, non tantum liquidè audiuisse nos, sed etiam quidquid pectore occultum haberemus, id perspicuè cognoscere. Inde ad Creationem mundi delapsus, in primis laboravi ut docerem, hominem nobilissimum inter creaturas à Deo esse conditum, ut eo magis celebranda opificis sui gloriæ studeat. Ac nos quidem, quod ipsum coleremus, eius manu infinitis periculis longissimæ navigationis in tam vasto mari eripi: eiūsdemque ope fratros, ab omni prorsus Aignan metu (Demonem ita appellant, à quo subinde vexantur) tum in hac tum in ventura vita esse liberos. Quare si Caraibum suorum imposturas, & barbarum mandenda humana carnis morem, abicere vellent, eadem prorsus Dei dona

» consequuturos, quæ nos habere cernerent. Multa
 » præterea de humani generis labe ac ruina, ut eo-
 » rum animos ad Christum præpararemus, subieci-
 » mus: quoad eius fieri potuit accommodatis ad eo-
 » rum captum rationibus & exemplis, quæ in præ-
 » sens fusius exsequi supersedeo. Illi quum nos in-
 » genti cum admiratione duas amplius horas per-
 » attentè auscultassent: tum unus ex ijs auctoritate &
 » ætate gravis, in hunc modum disseruit: MIRA,
 » equidem, optima & nobis non antè audita, hîc di-
 » xistis. Ac vestra quidem oratio mihi in memo-
 » riam redigit, quæ nobis sæpe auos nostros narrantes
 » audiuiamus: Nempe iam inde à priscis temporibus
 » & tam multis abhinc Lunis quot iam meminisse
 » non possumus (quippe illi Lunarum numero aut
 » vicibus, non mensibus atque annis, temporum spa-
 » tia definiunt) venisse in has terras quemdam Mair
 » (id est Gallum, seu qualibet alia è gente aduenam)
 » vestro more vestitum & barbatum. Atque eum,
 » ut ipsos sub Dei vestri obsequium duceret, eadem
 » oratione apud eos esse usum, quæ nos hodie affami-
 » ni. Sed, ut nobis quoque à Patribus per manus tra-
 » ditum est, eos illius verbis fidem adhibere noluisse.
 » Itaq. mox successisse alium, qui Ensem, symbolum
 » maledictionis, illis traderet. Inde sequuta inter
 » nos bella, neque ex eo mutuis cadibus alij in alios
 » scire destitimus. Nunc verò, postquam diuturno
 » usu his assueuimus, si nunc repentè autum morem
 » exueremus, apud vicinas gentes ludibrio & deri-
 » sui essemus.

» HIC nos summa contentione ac vehementia
 » testari, tantum abesse, ut finitimorum ludibriis mo-
 » veri eos oporteret, ut contrà, si summum illum cali-

& terra opificem serio colerent, de omnibus, qui ob
id ultro molesti essent, victoriam referrent. Postre-
mò eam verbis nostris efficaciam addidit Dominus,
ut non multi tantum Barbarorum, ad eam quam
ex nobis didicissent legem, deinceps vitam compo-
situros, nec cæsorum hostium carnes ultrà esturos, se
promitterent: sed secundum hoc Colloquium, posi-
tis humi genibus, nobiscum Deo gratias agerent.
Ea oratio, quæ ab uno è nostris clara voce in medio
eorum cœtu ad Deum concepta fuerat, mox illis
per interpretem exposita est: nos ab illis in pensilia
è bombyce cubilia, dormitum deducimur. Sed non-
dum nos somnus corripuerat, quum ecce istos can-
tantes & conclamantes audimus, Sumendam de
hostibus ultionem, & plures quàm antea esse man-
dendos. En inconstantiam miseri huius populi, &
humana natura triste exemplar. Mihi tamen
equidem persuadeo, si Villagagno numquam à
vera Religione descivisset, & nos diutius in illis
terrīs morati essemus, fore ut aliqui tandem Christo
lucrifierent. Hactenus ille.

Unde perspicuè apparet, semen aliquod Reli-
gionis inesse illis gentibus, sed eas à Principijs
illis naturalibus ad absurdissima commenta &
fædos mores partim insita vanitate, partim malis
Christianorum exemplis, facillimè deficere.



*Indorum pertinax Idololatria. Didaci Lopez epistola;
Ecclesiasticorum & Iuridicorum Hispanorum
in India Occid. mores ac vitia
graphicè depingens.*

CAP. XIX.



VVM Guattimalæ essem, ac sæpe in S. Francisci monasterium commearem, amicitiam cum quodam monacho contraxi (Franciscus Betanzus is vocabatur, experiens homo, & multo omnium earum prouinciarum vsu, tum Guattimalæ tum Nouæ Hispaniæ, peritissimus, qui etiam duo Indica idiomata apprimè calleret & loqueretur.) Quum ab eo aliquando suam ea de gente opinionem percontarer, præsertim in iis quæ ad Fidem nostram spectarent: mihi respondit, Eorum ferè tum natu grandes, veteri suæ Idololatriæ pertinacissimè esse affixos, tum maximè Sacerdotes: ac sæpe numero se suosque collegas superuenisse illis victimas & sacrificia diis suis facientibus. Itaque necessariò eorum filios, vt temporis spatium Religionem nostram imbiberent, à parentibus atque auis suis segregandos esse, & ab eorum consuetudine quamdiutissimè remouendos: ne illos postquam ex ephebis excesserint, præposteris moribus suis imbuant. Postremò addidit, eos quoque qui baptizati essent, nihil ferè habere Christiani præter nudum nomen.

*Indorum
pertinax
Idololatria
malis His-
panorum
exemplis
alitur.*

EXINDE quum inter commentandum (vt fit) in penitiores de specialibus rebus sermones paulatim delapsi essemus, & ex eo multa tum de moribus Hispanorum, tum de earum prouinciarum regimine percontarer: atque ille me in rebus Indicis inuestigandis curiosum animaduertet: epistolæ cuiusdam exemplar, legendum mihi tradidit. Eam Baccalaureus quidam ipsius familiaris, Didacus Lopez de Zunega, ad Episcopum, Præsidentem & Assessores Guattimalæ cōscripserat; durius nimirum ab istis coercitus & malè habitus; quòd eorum vitia & flagitiosos mores verbis liberiùs perstrinxisset. Quum verò eam apertam misisset, descripserat ex autographo monachus, à quo & exēplum infrà scriptum desumpsit. Eius autem sententia hæc erat:

Ex quo me fortuna per orbem terrarum *Hispanus;*
agitare cœpit, Regna aliquot & prouincias *Hispanorū*
peragrandō emensus sum; & nusquam non *præsertim*
nouī aliquid & inusitati conspexi. Verū ex *Ecclesiasti-*
quo fors mea permisit vt in has Indiæ regio- *corum, in*
nes, quæ Auræ appellantur, & virtutis om- *India mo-*
nis expertes sunt, traicerem: tot tantaque *res depin-*
nequitia exempla vidi, vt neque eis enarran- *git.*
dis lingua mea, nec cogitatione comple- *«*
ctendis animus meus, par esse possit. In iis *«*
ferè pessimum hoc animaduerti, quòd inter *«*
vos nulla iustitia, nulla virtus, nulla boni- *«*
tas, nulla castitas, superest: quin omne æuum *«*
vestrum studiis partium, simultatibus, perfidi- *«*
dia, vanitate, rapinis, dissidiis, inuidentiis, *«*
odiis, aleis, lustris, blasphemis, intestinis *«*

» bellis, luxu, auaritia aliisque pessimis libidini-
 » bus, miserè consumitis. denique qui vestrum
 » optimus habetur, quanto se is ceteris prestare
 » putat, tanto est omnium deterrimus. Summa
 » quidem cura notaui ac comperi maximam
 » partem vestrum, quotcumque in Indiam ve-
 » nistis, tales esse ut, non dico cælum atque An-
 » geli, sed terra & dæmones ipsi vos exosos in-
 » uisq. habeant. Ac pro certo habetis, quem-
 » admodum tyrannica multa facta per vim per-
 » petraſtis, ita Christum permissurum ut serui
 » omnium per ius euadatis.

» Eius rei exempla & clara documenta si
 » quæritis, historias Græcas Latinasque euolui-
 » te, Romam caput & decus orbis considerate:
 » Athenas & Spartam, bonarum omnium legum
 » ac morum lumina, intuemini, multasque alias
 » ciuitates & regna, quorum vix hodie vesti-
 » gium vllum, ac ne memoria quidem ipsa su-
 » perest. Si tantæ ciuitates periere, tot opibus
 » dotibusque florentes, ac tantorum Princi-
 » pum mentibus viribusque administratæ, vo-
 » bis scilicet talibus, velut eximiis, Deus peper-
 » cerit? An putatis Dei bonitatem ac patien-
 » tiam passuram ut per omne æui tempus tantis
 » induti vitiis, & tot sceleribus demersi perma-
 » neatis? Nonne iudiciis admodum obtusis &
 » occæcati estis? Scilicet creditis Indos Chri-

*Barbari ho-
nis exēplis
quàm com-
modis ver-
bis, magis
mouentur.* stianos futuros, si vos ipsi non estis, nisi fortè
 nomine ac titulo tenus? Frustra id quidem.
 Nam multo efficacior (mihi credite Domini
 mei) ad brutas illas gentes fuerit vel vnus diei
 honesta vita & bonum exemplum, quàm
 conti-

continuae integri anni lectiones & doctrinae. α
 quid enim refert odoriferas rosas ad plebem α
 ore & lingua spargere, si mox spinosis ma- α
 lorum operum aculeis illam pungitis & ve- α
 xatis? α

NONNULLI dicunt quod vestra Sancti- α
 tas domine Episcopo, satis boni facit: sed vi- α
 dete ut bene etiam illud faciatis. quippe repe- α
 riuntur qui & quod alioqui bonum est male α
 faciant: & vestra Sanctitas ex eo grege est. α
 Nam quos vestire debebatis, eos spoliatis: α
 quod amarum est dulce, quod dulce est, ama- α
 rum dicitis: mendaces & falsos diligitis: eos α
 qui vera loquuntur, odio habetis. aspernamini α
 bonos, & turpes probrososque honore affi- α
 citis: vitiosis fauetis, & vexatis honestos. α
 Denique de alieno valde liberales estis, de α
 vestro parcissimi. Quid dicam amplius? α
 Nempe hoc, vos multo ad remigandum in α
 triremi aliqua, quam ad id munus gerendum, α
 aptiores esse: idque affirmare ausim, vestrae α
 Sanctitati plus esse virium ad tractandum re- α
 rum quam virtutis ad gubernandum Epif- α
 copatum. α

ALII dicunt, quod vestra Dominatio α
 multo honore decorata atque honestata est. α
 Sed mementote Senecam dicere, Stultorum α
 laudem, a sapientibus haberi pro argumento α
 infamiae: quia quidquid stulti cogitant, va- α
 num est: quidquid loquuntur, falsum: quid- α
 quid damnant, laudabile: quidquid appro- α
 bant, malum: & quidquid laudant, infame. α

» denique quidquid agunt & moliuntur, nihil
 » nisi amentia est. Sed laudari & honestari ab iis
 » qui ipsi honore digni sunt, is demum verus
 » honos est: summum verò & præcipuum de-
 » cus, placere Iesu Christo.

» CETERVM accepi à nonnullis patientiam
 » quam in tolerandis ærumnis meis adhibui,
 » vestræ Dominationi plurimùm admirabilem
 » fuisse: sed, vt ingenuè dicam, vestra admiratio
 » mihi plurimùm admirationi fuit. Nam rerum
 » perperam gestarum pænitentia & dolor è sa-
 » pientia oritur: sed benè & honestè factorum
 » immodica admiratio, non aliunde manat,
 » quàm ab exiguo iudicio & minore vsu. Quip-

*Episcopi ho-
die in Pa-
patu quid-
uis aliud
sciunt &
agunt quàm
quod sui
muneris
est.*

2. Tim. 3. 12

pe vos id fugit, Nos cum Christo crucifigi
 oportere, quantum ad hunc mundum attinet,
 si velimus in futuro vnâ cum eo æterna gloria
 perfrui. Vos ignoratis luculentam illam Pauli
 Apostoli sententiam in posteriore ad Timo-
 theum epistola, Omnes qui piè viuere volunt
 in Christo Iesu, in hoc seculo persecutio-
 nem passuros. Nescitis, quod corpori damno-
 sum est, id animæ esse vtile: nescitis, regnum
 cælorū non acquiri cursu taurorum, non lusu
 arundinū, non arca inclusorum nummū &
 auri copia, non feruorum fodinas exercen-
 tium ingentibus familiis (quales vestra do-
 minatio multos adhuc habet) non dolis, non
 astu, non mendaciis: verū persecutione, in-
 firmitate, carcere, vinculis, paupertate, fame,
 siti, infamia, ingratiis, exiliis, tormētis, variisq.
 ærumnis, quæ assiduè vitam mortalium obsi-
 dent & exercent, eò perueniri. Eas verò res si
 vestra

vestra Dominatio ignorat, quod facilè equi-
dem credo, annumerare vosinet potius bestiis
quàm hominibus potestis.

MULTA præterea sunt quæ à me dici pos-
sent, tum de vestra Dominatione, tum de ipsis
etiam Præsidibus. Sed eiusmodi rerum tâta
est copia, vt verear, ne me de iis scribere ag-
gressum tempus ipsum & charta deficerent.
Quare verbum non amplius addam. Data
Trugillij, xx. die Maij. Anno M. D. LII.

Didacus Lopez de Zunegua.



¶ Ceratum, integrum Iudicem, Hispanorum flagitiis obuiam
ire studentem, mors intercipit. Iudicum
onerosum munus.

CAP. XX.

QVVM primò iui Guattimalam, ibi
tum Præses erat licètiatus Ceratus.
Is ille erat Ceratus qui in Dominicâ
Edictum regium de libertate Indo-
rum tulerat, vti superiùs diximus. Eum tunc
Cæsar amotum Insula regendæ illi provinciæ
imposuerat: de quo verè hoc possum testifi-
cari, numquam in vniuersa India eo meliorem
nec sanctiorem fuisse Iudicem: nec qui iusta
edicta mādātāq. regia rectius obseruaret, sem-
per procurādo ne Indi ab quoquā Hispano in-
iuria vlla violarentur, aut haberentur durius.

*Ceratum
Hispanum
indicem,
Hispanorum
contuma-
ciae cedit.*

SAEPENVMERO suorum contumaciam arrogantiamque expertus quòd indigenarum salutem procuraret, pertæsusque, optare solebat ut Deus eum à tam peruerso hominũ genere liberaret. Dicebatq. si Deus traicere in Hispaniam ipsi concederet, se Regem mone- re velle, ne deinceps sacerdotem vllum trans- mittere in Indiam pateretur, propter fla- gitia eorum & intemperantissimas libidines. Sed morte præuentus, quod in animo habebat præstare non potuit.

*Iudicibus
muneris
administra-
ti ratio
Deo red-
denda.*

ITAQUE successor ei alter Mexico missus est, Doctor Chesada: qui duobus post mensi- bus, quàm Guattimalam venerat, vita conce- sit. Quumque ægrotantem monachi aliquot consolarentur, dicendo, Domine Præsident esto bono & hilari animo: aliaque cuiuscemo- di pro tempore subijcerent: ille excipiens, Ah qui fieri potest, inquit, ut is hilari animo sit, cui tot rerum ratio ipsi Deo reddenda est?


HOC dictum memorabile, huic loco infe- rere operæpretiũ visum est, ut inde sibi exem- plum sumant Iudices & Magistratus: id est, ut perinde iudicent de aliis, qualiter à Deo de se iudicium ferri volent: atq. ita bene subductis sui muneris rationibus ex hac vita excant, ¹ ut in futura æternũ non plangent.

INSIGNE Ludouici, cognomento Diui, Gallie Regis, exemplum in eam sententiam exstat. Is enim quum forte aliquando ex Psalmis Davidis preces ad Deum conciperet, interuenit aliquis, qui pro reo quodam capitalis criminis gratiam peteret. Rex, quasi aliud agens, annuit. Mox verò quum incidisset.

incidisset in versic. Psal. 106. ibi, Beati qui faciunt iustitiam in omni tempore. tum protinus revocari iussit eum cui gratiam concesserat, eamque irritam fecit: memorabili edita sententia, Principem qui punire potest crimen, nec punit, non minus coram Deo reum esse quam si id ipse perpetrasset. Pietatis esse opus, non seuitia, iustitiam facere. Annal. Gall. Sed in primis memorabilis Oliuarij Gallia Cancellarij casus & exitus, Iudicibus documento esse debet. Is quum tristem in pios viros, qui Cabrierijs & Merindolij Provincia oppidis puram religionem exercerent, sententiam latam suffragia suo contra conscientia iudicium, approbasset: ac postea veritatis cognitione imbutus saepenumero fassus esset cū lacrymis, se meritò ob id à Deo reiectū: tamen in tumultu Ambosiano precipuus inter eos Iudices sedit, qui multos pios ac strenuos viros, tyrannico peregrinorū iugo & Regē ipsum & populum Gallia liberare fortius quam felicius molitos: velut perduelles, reluctante conscientia, damnarunt. In iis quū Petrus Campagnacus, litteratus adolescens, ad causam dicendam productus esset: Cancellarius, eo neque audito neque interrogato, Suspendite, inquit, suspendite hunc hominem. Quid? suspendite, ait Campagnacus. Facile tibi quidem id dictū est. At si tu, ex quo id factis es promeritus, suspensus esses, iam ante triginta annos pauidisses coruos, nec tot scelerū minister fuisses. Recordare mecū, quid admiseris quū Pictavi Iuricivili operā dares. Nū te eo tempore unum e contubernaliis, tuis sceleratè interfecisse meministi atque inde in tantum patris odiū venisse, ut ex eo te in conspectū suum venire vetuerit? Ac reipsa quidē

Arquinnullerius quidam, Oliuarij tum socius, perditus nebulo, propter hoc facinus Luteria suspensus fuerat. Ad hac verba adeo perculsum memoria facinoris Oliuarium fuisse constat, ut obruto maiore & insania animo, & inde graui morbo implicitus, horribiliter aduersus Deum ipsum fremeret. Tanta interea agritudinis & horroris vehementia, ut quamquam defecto corpore & assiduus morbis debilitato: phrenetici tamē instar aut robusti alicuius adolescentis, totum cubile concuteret. Ita agrotantem inuisit Cardinalis Lotharingus: sed Oliuarius, quum suos eius aduentu cruciatus augeri sentiret, facessere properē cubiculo iubens, ne ipsius quidem conspectum pati potuit. Vt verò paulo longius semotum animaduertit, tum altius ingemiscēs in has voces erupit, AH, Ah, Cardinalis, tu nos omnes in aeternum exitium trahis. Tum accedere ad agrum Cardinalis, & consolando ultrā spiritus eius mitigare: Eum videlicet tentari, inquiens, ab immundo spiritu, sed in fide perstandum esse. Egregiē, inquit Cancellarius, egregiē, scilicet quasi hac tu credas. Inde aspectum eius auersatus, & nihil eloquutus ultrā, paulo post vita concessit. Inter lentos cruciatus, Anne Burgij senatoris integerrimi (cum iudicio, Cardinalis precipui iussu rogatūq. victus, subscripserat) mortem precipuē deflebat. Hac est merces Iudicium, quibus Aulica gratiae fumus, sua conscientia potior est.

TER-



TERTII LIBRI SVMMA
ET ARGVMENTVM.

*

HISPANI, subactis, aut certè tentatis, Indica continentis oris aliquot, Castella Aurea, Noua Hispania, Nicaragua, Iucatan, aliisque quæ Septentrionem spectant: nunc quoque versas in austros prouincias affectâtes, Peruanum in primis regnum ditissimum, Pizarro & Almagro ducibus, occupât, & legitimo rege præter fas interemto, in prouincia formâ redigunt. Mox inter eos, ubi hostis defuit, fœda de principatu coorta dissidia, bella ciuilia accendunt: ne sublatis quidem, partium ducibus extincta.

INTEREA graui cum tyrannide seruitus gliscit aduersus Indos: cui tollendæ, & simul componendis prouinciæ motibus, mittitur à Casare unus & alter. Mota in utrumque contumaciter arma: sed in ultimum, Proregem videlicet, præcipuè, ab omnibus ferè colonis scuitia Edictorum offensis, Gonzallo Pizarro duce, publicum bellum suscipitur. Prorex praelio victus interficitur. Casar quando vi aperta non processerat, astu rem aggrediendam ratus, vulpem mittit in Indiam, Petrum Gascam. Is, precio & premiorum spe plectis in se hostium ducibus, ac copiis, Pizarrum viribus exutum & facile victum morte adficit: atque agrè compositis Peruanis rebus in Hispaniam reuertitur.

HIS exactis, Benzo in describendam Peruanorum religionem, mores & instituta excurrit: docetq. quam Hispani non tantum de se, sed de omnibus quoque Christianis, opinionem apud eas gentes concinuerint: Nimirum non esse homines ex hominum stirpe genitos, sed immanes quasdam beluas ex barbari elementi spuma concretas ad humani generis perniciem. Vsq̃ue adeo barbariem inter Barbaros ipsos exercuimus. Postremò librum suo ex India patriam reditus claudit.

NOVÆ





NOVAE NOVI ORBIS HISTORIÆ,

LIBER TERTIVS.

¶ Fr. Pizarrus, Did. Almagrus & Fern. Luques, in ita societate, expeditionem in Peruanas regiones suscipiunt. Indi Pizarrum & Almagrum malè accipiunt. Illi tandem multos post labores in speratas opes incidunt.

CAPVT I.



AM^t Franciscus Pizarrus, Dida *Avaritia*
cus Almagrus, Fernandus Lu- *inquis, ex*
ques sacerdos, Panamæ, cer- *medias in-*
tis partisq; opibus fruebantur, *ter opes i-*
quum pro certo accipiunt om- *nops.*

nem illam oram Meridiem versus auro, argento, eranis, & smaragdis abundare. Itaq. tres isti simul societatem ineunt, quúmque inter eos re communi consilio deliberata, sententia stetisset, nouas terras ire vestigatum, fide inuicem accepta & data promittunt pro se quisq. fidelem ad id operam collaturos; partásque opes, terras & gentes subactas, ex æquo inter se fraternè diuisuros.

HI s ubi conditionibus res inter eos transacta est, naues, arma, commeatus, omnia classiorandæ necessaria, comparant. Mox ducen- tis & viginti contractis militibus atque in naues impositis, Pizarrus & Almagrus anno

M.D.XXVI. paucis alius post aliū dieb. Panama soluunt: sacerdote ibi relicto, vt quæ ad expeditionem necesse essent, curaret. Pizarrus ea ora tercentum millium spatio pernauigata, tandem litus tenens in terram egreditur. Ibi obuiam Indi progressi ad litus, terræ aditu Hispanos prohibent, multisque interemtis, Pizarrum ipsum cum aliis aliquot faucium prælio excedere cogunt. Ipse tam inauspicato principio deterritus, Panamā reuertitur, iam suscepti consilij pænitens. Diuersa in parte Almagrus flumine aduerso subiens, quod ipse S. Ioannis nuncupauit, benignè ab indigenis exceptus est, & ab iis tria amplius aureorum ducatorum millia dono data retulit. Inde ad mare secundo amne defluens, & oræ aliquantum præteruectus, in eundem fortè incurrit locum vbi socium eius malè acceptum fuisse diximus. Ergo Almagrum quoque ibi egressum Indi ferociter adorti, alterum eius oculum lapide grauitè feriunt, quem paulo post amisit: maximamque militum eius partem fœdè trucidant. Itaque multis amissis Panamam quoque & ipse regredi cogitur.

POST QUAM eò peruenit, Pizarrum ibi nactus, ei significat terram ab se detectam ditissimam auri esse. itaque sibi videri de integro instaurandam classem, & denuò ad eam subigendam eundum. Quare percuratis vulneribus, cum ducentis militibus & multis Indicis mancipiis, duabus nauibus, & lintribus aliquot patriis quibus Indi singulis arboribus cauatis nauigant, portu soluunt: quumque
maximis

maximis laboribus per altum eandem illam quam prius oram tenerent: non tamen eodē *Mira li-* quo primū loco, in litus egrediuntur. Indi- *Barbaris* genæ, quum gentem illam barbatam haud sa- *iudicij sa-* tis probam esse iudicarent, strenuè in Hispa- *gacitas,* nos impressiōem faciunt, multisque eorum *qui ignotos* cæsis, ceteros ad naues fundunt fugantq. Hi- *ram bene* spani appulsu litoris prohibiti in Gorgonem secedunt, perexiguam & desertam insulam, quæ sex tantum mill. freto à continenti discreta est. *nessens.*

IBI quum ea prouincia potiri cuperent, propter ingens auri oblatum specimen, nec ad id perficiendum satis militum haberent, Almagrum ad supplementum arcessendum ire placuit. Ipse eius rei causa Panamam regressus, quanquam paulo tardius ibi moratus, cum octoginta quinque Hispanis reuersus est, & Pizarrum cum omnibus suis propè exanimatum fame reperit. Mox tamen vino, pane biscocto aliisque cibariis quæ Panama subuecta erant, reſectis corporibus, inde soluentes, viginti millia pass. longius appulsi, ingenti diuitiarum spe in litus defiliunt. Sed vix egressis Indi lanceis faxisque armati superueniunt, & in Hispanos animosè gradum inferentes, intereuntis aliquot, ceteros è finibus suis arcent. Hispani rem haud satis obuiam & paratam experti, in insulam desertā concedunt, quam quod galli gallinacei effigie promontorium haberet, insulam Galli numcuparunt.

PIZARRVS ira & dolore in eam gentem incensus, ob tot interfectos ab ea milites, vl-
cisci suorum cædem cupiens, socium Panamā

*Hispani
milites vo-
ta sua exse-
crantur:*

remittit, eiq. negotium dat vt quammaximè multos milites contrahat & adducat. Parantem abire Almagrum plerique Hispani sequi volebant, suæ cupidini infensi, terramque ipsam & speratas eius diuitias execrantes: sed quum illis duces ipsi potestatem abeundi, imò etiam scribendi ad suos, dare abnuerent, ne fortè aduersam de ea ora spargerent famam, & nouum subsidium impedirent, remāsere. Sed nè ita quidem fama cōhiberi potuit, quominus Hispanorum clades & misérias vulgaret: scripsere nonnulli Hispani clanculum ad amicos de morte suorum, de laboribus intolerandis ærumnisque in quas incidissent: quàm misero statu res essent, postremò de asperitate ipsius regionis: plurimùm de Almagro & Pizarro querentes, quòd plerique ipsorum morbis impliciti, quum Panamam ad curanda corpora regredi vellent, liberum com meatū ab iis impetrare non potuissent.

FORTE paulo antè quàm Almagrus Panamam appelleret, ei prouinciæ Petrus Flumineus (vulgò *de-los-Rios*) impositus fuerat. Is tali de Hispanis nuncio accepto, subitò domesticum quendam suum ad insulam Galli expeditè ire iubet, ac Pizarro edicere, graui constituta pœna, ne quemquam Hispanum inuitum ibi detineret. Pizarrus ex eo Gubernatoris mandato ingentem cepit dolorem: quum maxima pars Hispanorum qui cum eo erant, insula excederet. Ceteris qui remanserunt, (quatuordecim erant, omnes ferè sodales nautici) plurimas gratias agit, ac spe ingenti splendidi-

splendidis que promissis onustos rogat ut patienter durare aliquot dies vellent, donec Almagrus cum nouo subsidio rediret. Ergo dies aliquot in insula tolerant, ostreis, cancris & piscibus vescentes: donec tandem ab Almagro naus commeatus subuehens venit: sed sine militum supplemento, propter improsperam famam quæ de ea ora Panamæ increbruerat.

*Dura militi-
tia, nisi
quod inter
omnia aut
fames du-
rissima esset*

IN ea insula Pizarrus aliquamdiu moratus & cum eo pauci illi, in summa rerum omnium angustia, sine ulla auxilij spe, postquam diu multumque inter se consultassent quid facto esset opus, tandem communi consilio oram præterlegendam esse statuunt, siquæ fortè ipsis diues & prospera regio occurreret. Quingentum millium spatium emensi, quum Chiræ Peruani regni prouinciæ litus tenerent: ibi exscensu in terram facto, pauca indigenarum pecora & Indos adolescentes aliquot excipiunt, qui linguam Hispanicam discerent.

INDE Tumbesiam regressi, de magnis videlicet eius populi opibus ab Indis edocti, quum ad tentandum terræ aditum non satis animi Hispano cuiquam esset, propter ingentem Indorum multitudinem, qui per omne spatium litoris effusi conspiciebantur: Petrus quidam, Creta insula ortus, periculum ultrò ipse facere statuit. Itaque machæra oblonga, ex iis quæ ambabus manibus tractantur, armatus, in litus egreditur. Non parum admirationis incussit indigenis barbati

hominis tunc primùm à se visi species: ille intrepidè per medios progressus, ab eius oræ Præfecto comiter & honorificè excipitur. Mox ab eo in turrin præfidiariam introductus, in qua templum Soli dicatum inerat, postquam id tantis opibus, quantas vix animo caperet, excultum ornatumque conspexit, in admirationem adeo defixus stupefactusque hæsit, ut ea per somnium intueri se duntaxat crederet. Ad portam animalia quædam specie leonum & duos tigres, sed innoxios, reperit. Quumque abeuntem aliquot aureis emblemata

*Avarus cal
lidè vitia
sua dissimu
lans.*

tis & monilibus Præfectus donare vellet, Crentensis, velut talia aspernaretur, abnuit, dissimulans se ea quærentem in eas terras venisse. Regressus ad nauim, quæ & quanta viderit refert.

I FRANC. Pizarrus, is est quem Hoieda Vraba decedens, legatum suis militibus præfecerat. *(supr. lib. 1. cap. 19.)* Tum verò, quum fortunam sibi ipse laboribus, aut, ut maxima pars Hispanorum militum qui tum in India erant, rapinis, fecisset, Paname in re ampla & lauta erat. Fernandus Luques, scholæ cantorum primicerius (ut vocant) diues, ibi etiam manebat. Is postea exhaustis in quæsitu Peruani regni pecunijs, & eo inuento ab socijs exclusus, Pazzo vulgò vocatus est, id est, stultus, quòd fortuna bene uti & certis iam opibus frui nesciisset. Gom. Hist. gen. lib. 4. cap. 1.

¶ Pizar-



¶ Pizarrus, missu sociorum, in Hispaniam ad impetrandam re-
pertæ prouinciæ subigendæ potestatem, nauigat. Sibi soli
impetrat. Almagram ab se alienat. Mox reconciliati, ter-
ritum socium extrudunt.

CAP. II.

IN CREDIBILI gaudio Pizarrus
persusus, quod in tam diuitem oram
incurrisset, exemplò signo abeundi
pronuntiato, in Panamam vela dat.
Ibi sociis Chiræ felicitatem & ¹ Tumbesiæ o-
ræ diuitias, aperit. Illi quum superfundenti se
se lætitiæ, quantam vix animo caperent, tem-
perare non possent: ambo, Almagrus videli-
cet & Fernandus Luquez, Franciscum Pizar-
rum mittere in Hispaniam statuunt, qui à Cæ-
sare Tumbesiæ subigendæ potestatem pete-
ret. Verum à pecunia imparati, consumtis vi-
delicet in earum terrarum quæsitu fortunis
omnibus, mille quingentos ducatos aureos
ab amicis mutuos sumunt, & ad sumtus illi e-
rogant. Pizarrus in Hispaniam appellit, Sena-
tum Indicum adit: & oræ à se nuper repertæ
indicem & relationem exhibet: simul sumtus
à se in ea factos & labores exhaustos referens,
atque ingentes diuitias regiæ Castellæ corone
pollicitus, Tumbesiæ potiundæ facultatem re-
giménque sibi tantum postulat, nulla socio-
rum mentione addita. Quæcumque petierat
obtinet. itaque diplomate in eam rem à sena-
tu scripto, à Cæsare cōfirmato, instructus, con-
tractis aliquot militibus, è portu San-lucari

*Pizarrus
societatem
fraudat.*

de Barrameda cum quatuor fratribus, Ferdinando, Gonzallo, Ioanne Pizarro, & Martino de Alcantara, vela in altum facit.

Q V V M breui secundo vento vsus, ad Nomen-dei, atque inde Panamam peruenisset, magnificè à fociis exceptus est: sed mox vt illi rescuere sibi tantum Pizarrum in Hispania negotiatum, suis priuatim rebus, non communiter societati, prospexisse, æquis oculis eum deinceps intueri non potuere: Almagrus præsertim, qui tot sumtus à se & maiores quàm à Pizarro factos reputans, & exhaustas facultates, & tres totos annos in ea expeditione consumptos, & amissum oculum: & super hæc etiam vt pecunia ab semet mutuò accepta, Pizarro ad impensam præbita esset: vt is ad vniuersæ societatis vtilitatem, non suam vnus, procuradam in Hispaniam missus fuisset, memori animo reuoluens, impatientissimè id factum & implacabiliter ferebat. Pizarrus mitigare vltrò eius spiritus conabatur. Se nihil videlicet à Cæsare impetrare potuisse causatus, præter Tumbesiæ subigendæ potestatem: bono tamen interea Almagrus animo esset. quippe fidem suam ipsi obstringere, daturum se operam vt & ipse aliud aliquod imperium in eadē prouincia obtineret. Adhæc quum esset inter eos societas: posse ipsum, tamquam summum Gubernatorem, de rebus omnibus pro arbitrio & pari secum iure statuere. Sed parua eius verbis apud Almagrum fides: imò etiam iste ob hæc nugarum ludibria multò aduersus eum indignatior, palam dicere, Pizarrum falsum & perfidum esse.

Dissidiorū

Pizarri &

Almagri
initia.

DE NIQVE quum aliquot dies in his simulatibus & iurgiis consumsissent, Pizarrus tandem necessitate magis quàm voluntate adductus: quum se videlicet sumtibus exhaustū & pecuniis ac commeatu vacuum (quibus contrā abundare Almagrum, nec quidquam erogaturum ob discordias intelligebat) quum se inquam, nisi cum Almagro in concordiam rediret & ab eo nummis iuuaretur, provinciam suam tardius initurum cogitaret: doctorem Gamam rogat vt inter ipsos concordiam reconciliet. Quid multa? istius interuentu in gratiam inuicem redeunt: iubet doctor Almagrum Francisco Pizarro arma, equos, & quidquid commeatū prouisum haberet, & pecuniæ insuper certam summam, tradere. Pizarrum verò vicissim quoscumque honores & dignitatum ornamenta à Cæsare acceperat, ea cum Almagro participare. Ita conditionibus & pactis redintegratis, tertio socio Fernando Luque excluso, pacem & concordiam denuo inter se incunt: ac fanciendis artius promissis consecratam Hostiam² sumentes, iurciurando firman^t se integra fide mutuā amicitiam ad mortem vsque inuiolatam conseruatu^ros.

*Pizarrus
& Almagrus iureiurando amicitiam confirmant, sed quod mox violent.*

HIS ita transactis, Franciscus Pizarrus cum centum quinquaginta militibus & equis multis, Panama moliens, Almagrum cum quanto posset maximo subsidio quamocyssimè subsequi iubet. Inde Colomchiam appellit provinciae Guancauilichiae portum, vnde in Puna^m insulam transgressus à Præfecto perami-

*Hispani
preclaris
factis Pu-
nensium a-
nimos ab
se alienant.*

cè exceptus est. Verùm vt ille fœda nefandâ-
que Christianorum facinora expertus est, per
singulas domos aurum & argentum quæren-
tium, feminas ad stuprum rapientium, ceterâ-
que perpetrantium quæ à militibus fieri a-
mant: cum valida Indorum manu Hispanos ex
tota insula expellere nititur. Sed quum im-
pressionem ab hostibus ex aduerso factam
ferre non posset, cum multa suorum iactura,
filuas fuga petiit. Pizarrus crudelissimè victo-
ria vsus, cum multis Hispanis in Tumbesiæ
continentis oram L. mill. interuallo ab insula
distantem traiecit.

SIMVLAC continentem attigit, indigenæ
auditis, quæ Hispani in Puna perpetrarant, in
arcem aliquantum à mari distantem confu-
giunt. Pizarrus prouinciæ Gubernatorem per
nuncios arcessit, eius amicitiam multum se
appetere testatus: is verò non tantum ire ab-
nuit, sed etiam hostiliter omnibus viribus in-
sultâs ei quanta maxima damna potuit intulit.
Itaque Pizarrus noctu flumen transgressus cū
parte copiarum, præeuntibus peritis itinerum
ducibus, spinas, saltus & asperrima quæque lo-
corum penetrans, hostes incautos & somno
solutos opprimit. Mox ingenti eorum cæde
facta, Tumbesiam reuertitur, urbemque ca-
ptam totam diripit, & omnibus ornamentis
delubrum Solis spoliât.

I Tumbes, seu Tumbesia Peruanî regnî oræ
maritimæ prouincia, non procul ab Equinoctiali
linea, Meridiem versus, & Indorum vrbs eiusdem
nominis, mox Hispanorum colonia, XII. leucis à

Puna

Puna insula distans: unde Pizarrus Peruanarum opum primum specimen praecepit.

2 *Id ab illis, secundo rupta concordia, & denudò reconciliata, factum scribit Gomara: atque horribili iureiurando sancitum ab Almagro nouum illud fœdus, nempe: Vt prius fœdus rupisset, tum ut Deus illius corpus animamque ad inferos detruderet. Sed ambitio auaritiâque omnia sacra iuxta ac profana proculcant.*

3 *Puna insula ex aduerso Tumbesia prouincie sita, duarum leucarum freto à Continenti discretâ, XLVIII. mill. pass. in circuitu amplectitur. Hodie San-iacobi insula ab Hispanis vocatur.*



Attabaliba Peruanus Rex, sinibus suis Hispanos excedere iubet. Pontificem Rom. non agnoscit. Vt et neglecti Evangelij reus, vi ab Hispanis capitur.

CAP. III.

PER eos dies Attabaliba, ¹Peruanæ prouinciæ rex Cassiamalcæ erat. Is audito peregrinam gentem barbatam in suos fines ingressam, cum terribilibus quibusdâ ac prodigiosis animalibus omnia loca percurrere, & cædibus ac latrociniis infesta facere: legatum ad Franciscum Pizarrum mittit, minitans nisi subditos suos tranquilla pace frui sineret, patriamque repeteret, breui infortunium inuenturum. Ad hæc Pizarrus respondit, Se non eò venisse cuiusquam offendendi animo, sed vt ope atq. opera eos iuaret qui suam amicitiam expeterent: id sibi disertè ab Imperato-

liij.

*Pizarrus
subdolum
animum
specie ami-
citiae &
pietatis te-
git.*

re principe suo mandatum : neque se posse si-
ne magno dedecore ad eum reuerti, nisi prius
Regiam ipsius personam vidisset, eique res
ad felicitatem tum corporis tum animi perti-
nētes exponeret. Sub hæc Pizarrus Cassiamal-
cam versus contendit : & per Chiræ prouin-
ciam iter faciens, à Regulis vltro de iungenda
secum amicitia interpellatur, qui ob occupa-
tas ab Attabaliba suas terras cum eo capitales
inimicitias gerebant. Ac quia eo fortè loco na-
uigabile flumen erat, quà tutò subire naues po-
terant, condendæ ibi coloniæ sedem eligit, cui
San-michaelis nomen fecit : & quò quisque
suum diligentius asseruaret, manubias & præ-
dam omnem inter socios partitur.

*Attabal.
Hispanos
nondum
expertus
contēnit.*

INTER hæc Attabaliba Christianos ad-
uentare atq. vltius tendere audiens : sed eos
paucos, defatigatos & molles vsque adeo vt
non nisi ingentibus Pachis (sic illi equos no-
minant) iter ingredi possent, de barbatis illis ri-
dere ipse, & remissis ad eos legatis denuncia-
re si sua illis vita cara esset, ne longius progredi
auderent. At Pizarrus, Enimuero sibi ne-
cesse esse respondet, Maiestatem ipsius coram
cum debito honore visere : simul exercitū pro-
cedere iubet : quūq. Cassiamalcā peruenisset
præmittit legatos & magistros equitū qui regi-
s animum statūq. explorarent, eique indi-
carent, venisse Hispanum ducē adeundi eius
cognoscendiq. auidum. Ille sub aduentū Hi-
spanorum duo fermè mill. interiùs secesserat.
Legati, vt in conspectū regij agminis venere,
agitare equos & glomerato gressu solo insul-
tantes huc atq. illuc circumflectere incipiunt.

Indi verò ad noui huius monstri conspectum obtupescere. At ipse rex nihil eo spectaculo moueri, non mirari: interea tamen irasci, quòd parum reuerentiæ atque honoris sibi exhibitum à barbatis illis crederet.

FERDINANDVS Pizarrus per interpretem e imperatoris fratrem esse significat, qui Papæ ac Cæsaris, amicitiam eius ultro appetentium, missu è Castella venerit. Itaque veniendi ad se & coram colloquendi ei potestatem faceret. Quippe habere ad Regem ipsum summis de rebus mandata, eaque coram expromere velle: quibus editis mox in patriam reuersurum. Attabaliba adhæc, Ea se cuncta facturum inquit, dū ante omnia suis finibus excederent.

Ea lata conditione, reuersus ad suos Ferdi *Indorum* nandus, magnificum regis paratum & stupen *diuitia Hi-* dam opulentiā prædicat: ceterum cum in suo re *spanorum* gno aduenis sedes concedere nolle. Quæ eum *auaritiā* diem sequuta est nox, quàm longa fuit, tota ab *& scuitiā* Hispanis ducibus instruendis ordinibus & a- *irrigant.* nimandis militibus consumpta est: Victoriā videlicet esse in manibus & cum stolidis ignauisq; rem fore, quos vel solo equorum hinnitu ac fremitu perterritos, pecorum ritu, ad satietatem trucidant. Inde Pizarrus, instructis ordinibus & dispositis circa palatium & in ipsis portarum limitibus aliquot maioribus tormentis, suos hostile quidquā cœptare, nisi signo edito, vetat.

SIMVLATQ; illuxit, ecce Rex amplius xxv. *Regius. At* millibus Indorum stipatus, velut in sollenni *tabuliba* triumpho, hominum humeris portabatur, cir- *paratus.* cumpendentibus vndique aureis monilibus,

versicoloribus auium pennis præfulgens, interula sine manicis vestitus, & pudenda bombycina fascia velatus. Sinistrum regię frontis latus purpureus è lana tenuissima floccus honestabat, supercilia eius & genas inumbrans: pedes, breuissimo obstragulo calceoli ornabant. Tali cultu & paratu triumphali ciuitatem & palatium iniit, ibi barbatorum aduenarum legationem per otium auditurus.

*Euangelij
Barbaris
annuncian-
di noua &
monacho
dignaratio*

*"Sic ille
Breuiarium
suum voca-
bat.*

INTER hæc viam sibi ad regē faciens frater Vincētius de Valle viridi ordinis Dominiciani monachus, altera manu Crucē, altera Breuiarium gestans, ratus fortasse Attabalibam repentē in magnum aliquem theologum euassisse: per interpretem ei significat, Se Sacræ maiestatis Cæsareæ mandatu eius excellentiam adiisse, idque cum autoritate Romani Pontificis, cælestis Seruatoris vicarij, qui Cæsari terras antè incognitas, & nunc primum inuentas dederit, vt eo doctos piósq. homines mittat, qui sanctissimum eius nomen publicè apud eas gentes prædicent, easq. fœdis ac diabolicis erroribus liberent. Inter hæc verba monachus Regi Legē Dei exhibet, & ab eo omnia ex nihilo creata prædicat. Inde ab Adamo & Eua exorsus ordine exsequitur, vt Christus è cælo descenderit, vt assumpta humana carne in vtero virginis, in cruce mortē obierit: atq. inde resurgens à mortuis, ad plenam generis humani redemptionem, in cælos ascenderit. Mox ad resurrectionē mortuorū & vitam æternā delapsus, vtramque affirmat: & à Christo Petrum primum eius vicarium, Ecclesiæ gubernandæ impositum testatus, simul autoritatem Pon-

tificū ipsius successorū adstruens exponēsq. postremò Cæsaris & regis Hispaniarum, totius orbis Monarchæ, opes ac potentiam exaggerat. Itaque pro officio facturum Regem si illius amicitiam accipiat, si vectigalem clientēque eius se ferat: denique si abdicatis falsis diis, diuinæ Legis & Christianæ religionis fidem & obsequium induat. Id nisi sponte fecerit, pro certo habeat se eò vi atque armis coactum iri.

HIS auditis Rex, Se haud grauaturè summi orbis Monarchæ amicitiam accepturum ait: sed se & liberū & regem ei quem numquam viderit tributa pendere, id verò sibi parum æquum & honestum videri. ² Pontificem autem insigniter fatuum & impudentem esse eo facile prodi, quòd aliena tam liberaliter largiatur. De Religione verò, se suam abiecturum planè negauit: ac si ipsi in Christum crederent, qui in cruce mortuus esset, se in Solem credere qui numquam moreretur. Inde à monacho percōtatur, vnde sciret Christianorum Deum ex nihilo creasse omnia, & in cruce mortuum esse. Monachus ab eo quem haberet libro ea doceri respondet. Simul librum Attabalibæ porrigit: ille acceptum inspectūque aspernatus & renidens, Hic liber, inquit, « nil mihi dicit: mox ad terram afflixit. Monachus illico librum recolligere, & quantum niti poterat clamitans, Hispanos ad cædem accendere: ³ Agite Christiani (aiebat) agite & tam foedi facinoris pœnas expetite: Evangelia ludibrio habita & proiecta sunt. Trucidate istos canes, qui legem Dei ita contu-

*Pontifex
de alieno
liberalis.*

«
*Crudelis
concionator.*

maciter aspernantur.

*Hispanorū
xelus, pro
Euangelio
scilicet.* HÆC & talia quum magna voce dixisset, Franciscus Pizarrus explicatis vexillis signum pugnae, vti proposuerat, edit. Inde fulminantia tormenta primum Indis terrorem inferunt: mox iam insueto strepitu attonitis superueniunt equi, æneis tintinnabulis & crotalis latè tinnitum cientibus colla & crura circumdati: postremò circumstrepentibus vndique tympanis admisto clangore tubarum extra se raptos barbaros & ancipiti circumuentos malo, Hispani inuadunt. Indi quos non tantum insolitus machinarum fragor perculerat, sed equi quoque, ferocissimum animal, & tam acutis ensibus fœda illata vulnera turbauerant, abrumpunt ordines, & quæ cuique patebat ad fugam via velut lymphati erumpunt. Tum verò Hispani equites ferociter in hostem velut profligatum incurrunt, & fugientes proculcant: qui quum ob nimiam multitudinem alij super alios cumularentur, ruinæ similem stragem dedere. Hic horribili cæde Hispani lanceis & gladiis in cadentes barbaros debacchari.

*Hispanorū
equitum
facilis de
Indis victoria.*

PIZARRVS peditum agmen ducens, rectà ad Attabalibam tendere, quem Indi multi circumstipabant: quumque pugnae immemores corpora tantum ante ipsum regem obicerent, Hispani cædendo gradum promouebant, donec ad Attabalibam viam sibi per hostium stragem facerent. Vt verò tandem ad eum peruenire, tum quisque capti regis opimum decus expetens, Indos lecticarios cedere. Et iam clade

clade ferentium è sublimi illa sella delabebatur, quum Franciscus Pizarrus amiculo illum corripuens ad terram detraxit. Ad eum modum proiectus è sella ac prouolutus Attabaliba, nullo resistente, capitur, & Pizarri fidei ac potestati sese permittens, custodiæ traditur. Ea res bello finem imposuit, sine ullius Hispani cæde ac vulnere, præterquam Pizarri, cuius manus, quum Regem capere vellet, à milite Indum appetente, ferro icta est. Ferdinandus Pizarrus cum equitatu totum eundem diem fugientibus instans, omnes vias Indorum cædibus repleuit, quum nulli neque ætati neque sexui victorum crudelitas parceret.

PER omne prælij tempus ipse quoque monachus milites clamore incendere non destitit, monens vt Indos punctim magis quàm cæsum ferirent, ne videlicet ensium laminas perfringerent. Hispani quum sanguinolentam eam victoriam de infelici illa gente retulissent, totam noctem quæ eundem diem excepit, tripudiis & festo luxu ouantes transgere.

*Monachus
ex concio-
natore la-
nista.*

I PERUVI præprie prouincia exigua & inops est, quam Franciscus Pizarrus Panama soluens, impetrato à Petro Aria Gubernatore commeatu, primam aperuit, quinquaginta leucis Panama distantem: à qua postea improprie totum illud ingens Attabaliba regnū & vniuersa prouincia, quæ per omnem eius oræ longitudinem, mille & ducentarum leucarum amplius spacio, reperta sunt, PERUVI ab Hispanis dicta sunt. Aug. Zarar. Hist. Peru. lib. I. cap. I.

2 *Alexandri VI. Pontificis, exstat bulla, qua
 has terras Ferdinando & Isabella eorūque suc-
 cessoribus donat. Eius verba quæ huc pertinent,
 » hac sunt: Ut tanti negotij prouinciam, Apostolicæ
 » gratiæ largitate donati, liberius & audacius assu-
 » matis: motu proprio, non ad vestram vel alterius
 » pro vobis super hoc nobis oblata petitionis instan-
 » tiam, sed de nostra mera liberalitate & ex certa
 » scientia ac de Apostolicæ potestatis plenitudine o-
 » mnes insulas & terras firmas inuentas & inuenien-
 » das, detectas & detegendas versus Occidentem
 » & Meridiem (fabricando & construendo vnā
 » lineam à polo Arctico, scilicet Septentrione, ad
 » polum Antarcticum, scilicet Meridiem: quæ linea
 » distet à qualibet insularum, quæ vulgariter num-
 » cupantur de los Açores & Cabo-verde, centum
 » leucis versus Occidentem & Meridiem) Aucto-
 » ritate omnipotentis Dei nobis in beato Petro con-
 » cessa ac vicariatus Iesuchristi quæ fungimur in ter-
 » ris, cum omnibus illarum dominiis, ciuitatibus, ca-
 » stris, locis & villis, iuribusque & iurisdictionibus
 » ac pertinentiis vniuersis, vobis heredibusque &
 » successorib. vestris (Castelle & Legionis regibus)
 » in perpetuum tenore presentium donamus, conce-
 » dimus & assignamus: vósque & heredes ac succes-
 » sores prefatos, illarum Dominos cum plena, libera
 » & omnimoda potestate, autoritate & iurisdictione,
 » facimus, constituimus, & deputamus, &c. Quo
 iure hæc dare potuit Papa, in quæ nullum ius um-
 quam habui? Nisi forte quia Christus celi ac ter-
 re heres est, cuius bonus iste Pater vicarius est,
 scilicet.*

3 *Eo facto facile prodidit hic Pseudopropheta
 quo*

quo spiritu ageretur. Quippe non sic Christus: qui arundinem quassatam non confringit & linum fumigans non exstinguit. Matt. 12. 20. Itaque talem mox frugem Episcopus messuit, qualem monachus seuerat: nimirum à Barbaris in Puna insula fuste postea elisus.



¶ Attabaliba libertatem ab Hispanis ingenti precio paciscitur. Hispanorum de sua nece consilia subolsacit, & de se commotas suspiciones purgat. Hispani eius spoliis ditescunt.

CAP. IIII.

POSTERA die Pizarrus Attabalibam inuisit, consolatur, & vetat metuere ne interficeretur. Rex iniquissimam suam fortunam incusans, iniectas sibi catenas conqueri: dein gnarus quid Hispani concupiscerent, Pizarro spondere, se si libertas ipsi promitteretur, tantum aureorum & argenteorum vasorum daturum, quantum implendo cœnaculo in quo erat, sufficeret, ad id altitudinis quò sublimè elata manupertingi posset: ea tamen lege ne vasa frangerentur quoad pactam summam tradidisset. Promittit Pizarrus libertatem, & conditionem accipit.

Attabaliba de Hispanorum senitia securus, avaritiam eorum exple re nititur, sed frustra.

ATTABALIBA libertatis cupidus, & Pizarri promissis innixus Præfectos quosdam suos per omnes regni prouincias, Cuscon maximè, dimittit (ea vrbs sexcenta millia Cassimalca distat) disertis additis mandatis, vt

*Hispani
Attabali-
bae crimi-
na & ne-
cessitruunt.*

quamocyssimè fieri posset redemptionis suæ pretium properarent. Itaque breui ex omnibus Regni partibus affluunt Indi aurum & argentum vehentes: sed quum iam menstruum spatium exiisset, & vixdum dimidia pretij pars aut paulo amplior esset contracta, propter immanem pecuniæ impetratę summam: Hispani fremere incipiunt, Attabalibam nempe specie contrahendę pecuniæ, ingentem conflare exercitum, & in sua omnium capita conducere. Itaque maior pars Franciscum Pizarrum hortantur, vt de eo capitale supplicium sumat: fecissetque iam tum haud dubie, ni nobiles aliquot viri illum de ea sententia demouissent.

*Attabali-
ba aduer-
sas de se
suspicionē
rebus ipsis
reuincit,
sed frustra.*

ATTABALIBA exitij sui consilia coqui subolfaciens, multum de Pizarro conqueri, ac dicere, Nihil causę esse quamobrem pristinum in se animum exueret: neque vsquam in suo Regno vlla hominum conuenticula aut cœtus fieri, nisi ad curandum & conuehendum corporis sui pretium: quod quidem quia longinquis è regionibus comportaretur, ad tam breuiem quàm vellet diem præsto esse non posse. Quod si verbis suis parum fidei inesse suspicaretur, aliquos ipse è suis Cusconmitteret, vnde maxima pars pecuniæ imperatę ventura esset. Itaque Pizarrus eò Sottum trib. mil. & duos præterea Hispanos mittit. Illi quum in ipso itinere obuios subinde Indos aureis & argenteis vasis onustos haberēt, rem ita esse vti Rex dixerat facillimè comperiunt: quum tamen Cusci opulentissimę vrbis diuitias

diuitias ipsi capeffere oculis concupiscerent, regredi è via noluerunt.

FERDINANDVS Pizarrus, fratris iussu, cum equitibus aliquot diuersa loca peruagatus, in multos & ipse Indos incurrit, qui aurum Cassiamalcam conuherent. Inde in interiora progressus in Pacamam peruenit, vnde quoque ingens auri & argenti summa deportabatur. Summa pretij pro redemptione Attabalibæ persoluti, cum eo quod præda contra-^{Hispani}ctum erat, duos auri milliones, id est vicies ^{Attabali-}bae adhuc centies aureorum castellanorum millia, superauit. Ea pecunia in vnum colata, postquam ^{viuentis,} quinta Regio fisco seposita est: ^{videntisq.} vt singuli ^{spolia inter} quod suum erat seruarent, inter omnes ^{se diuidit,} pro meritis & dignitate cuiusque diuisa est.

QVVM inter hæc fortè aduenisset Didacus Almagrus, ei quoque, nequem tumultum moueret, debitam pecuniæ partem, eiusque militibus, nonnullis quingentos, quibusdam etiam mille ducatos Pizarrus dedit. Secundum hæc Ferdin. Pizarrum & vectigal quintæ ad regem Hispaniæ mittit, eumque de rebus à se gestis edocet: cum Ferdinãdo multi Hispani, triginta & quadraginta millium ducatorum precium referentes, in patriam reuersi sunt.

I Ex ea præda Regi in quinta vectigal quadringenta aureorum castellanorum millia obuenerunt. Hispano equiti cuique octo mille & nongenti castellani, seu pesi aurei, vt vocant: & trecenta sexaginta argenti pondo. Pediti mille, quadringenti & quinquaginta aurei pesi: & centum octoginta pondo argenti. Nulli vnquam milites, adeò diuites,

nec tam breui, nec tam paruo labore ac periculo, euaserunt. Sed plerique qua facilitate tantas opes quasauerant, eadem amisere: ganeis aly, aly alea. Intentis quidem interim adeo rerum precijs, in tanta auri argentique vilitate, ut caliga è panno triginta castellanis aestimarentur: ocrea tantumdem: penula nigra centum: scapus chartæ, decem: amphora vini, viginti: equus tribus, quatuor, immò etiam quinque, millibus ducatorum veniret: quo pretio etiam postea aliquandiu steterere. Ita ex eo quæstus plus sumtus quàm lucri, & in summis diuitiis summa inopia. Gom. Hist. gen. lib. 4. cap. II 7.



¶ Attabaliba morte adfcitur à Pizarro. Quisquæ eius legatus prælio ab Hispanis vincitur. Franciscus Pizarrus Cuscon, Peruani regni caput, captam diripit.

CAP. V.

IS ita, vti diximus, confectis, Franciscus Pizarrus, Didacus Almagrus, ceterique duces communi consilio deliberant quid de Attabaliba statui par esset. Nonnulli necandum esse: alij soluendum censebant: erant etiam qui in Hispaniam mittendum ad Cæsarem dicerent. Tandem quum omnes sententiam rogati dixissent, vicit ea pars quæ necandum censebat.

TRADITVM est à nonnullis, Indi cuiusdam Philippilli¹ indicio proditum ac necatum Attabalibam, quum videlicet ille Francisco Pizarro occulta Attabalibæ consilia enun-

enunciaſſet, clanculum Indos ad Hiſpanorum *Attabal.*
 cædem ſollicitantis. Verùm ipſe audiui ac *ab Hiſpa-*
 comperi Pizarrum ex quo Attabalibam captū *nis ne-*
 in poteſtate habuerit, iam tum ſtatuiffe cum e *tur, vt faci-*
 medio tollere, quò faciliùs eas prouincias ſu- *lius eius*
 bigeret: quippe ſublato capite, membra haud *ſubditos*
 difficulter in perpetuam ſeruitutem conceſſu- *ſub iugum*
 ra. Atque id verum eſſe, perſpicuè ex eo appa- *mittant,*
 ret, quòd Pizarrus, niſi Attabalibæ necem ſuf-
 fragio ſuo comprobafſet, poterat cum ho-
 norificè in Hiſpaniam ad Cæſarem mittere:
 quod vt faceret multis precibus ab eo Attaba-
 liba contendit. Ergo non ſine omine ac Dei
 nutu contigit, vt omnes qui de necando Atta-
 baliba conſenſerunt, poſtmodum infelicem
 vitæ exitum inuenirent.²

At tum Attabaliba, accepto mortis ſuæ
 nuncio, lugubriter in ſuſpiria & lacrymas *Attabal.*
 effuſus, Barbatorum aduenarum ſclerata *verbis Pi-*
 perfidiam incuſare exorſus eſt. Mox quum *zarrum fru-*
 Pizarrus ſententiam in eum latam ipſi edidiſ- *ſtra flecte-*
 ſet, totus in preces abiectas verſus, eo prorſus *re conatur*
 ritu, quo Solem præcipuum ſuorū numinum *quem auro*
 Indi adorant, tali ad eum oratione uſus eſt: *nequie-*
rat.

PLVRIMVM te miror, inquit, Imperator, «
 quòd quum fidem tuam iureiurando obſtrin- «
 xeris, te, ſi pecuniæ promiſſæ ſummam darem, «
 non tantum mihi, exemptis vinculis, liberta- «
 tem redditurum, ſed etiam ceſſurum finibus «
 meis: mihi tamen, poſtquam pactum pretium «
 accepſti, libertatis loco extremum & infame «
 ſupplicium iudices. Si Philippillus me apud «
 te criminatus eſt, de ſubditis clanculum ad «

» vestram cædem sollicitatis, ficto crimine ab
 » eo circumuētus sum: neque id mihi vñquam
 » in mentem venit. Itaque vitæ vsuram mihi vt
 » concedas te rogo, quando aduersum te nihil
 » morte dignum nec admisi nec cogitauī. Ac si
 » mihi parua apud te fides est, mitte me in His-
 » paniam ad Cæsarem, cui ingens auri argentiq.
 » pondus muneris loco deferam. Quod si vi-
 » tam mihi eripis, pro certo habeto, subditos
 » meos non prius cōquieturos quàm alio crea-
 » to rege, vestra omnium Barbatorum interne-
 » cione necem meam expiauerint. si verò vita
 » conceditur, Regnum quietum ac tranquil-
 » lum continebo: neque erit quisquam qui com-
 » mouere se audeat. Vt finem orationi Attaba-
 » liba imposuit, manantibus vbertim lacrymis,
 » Pizarrus excipiens, iam reuocari posse senten-
 » tiam negauit. Itaque eum Numidis, quos ta-
 » libus ministeriis assuetos habebat, ad suppli-
 » cium tradit. illi laqueum ceruicibus innexum
 » cuneo ligneo intorquent (id Hispani vulgò
 » Garrottum vocant) & fauces regi elidunt.³

HVNC vitæ finem Rex Attabaliba ha-
 buit: vir mediocri statura, prudens, animosus,
 & imperij cupidus. Quo tempore primùm
 Pizarrus eius regnum ingressus est, cum Guaf-
 care fratre natu maiore, qui in Regnum pa-
 ternum successerat, bellum gerebat: eumque
 mox captum necari iussit. Vxores multas ha-
 buit, quarum præcipua & legitima, soror erat,
 Pagha nomine: & ex iis aliquos liberos sustu-
 lit. Ceterum omnium rerum nostratium
 quas Hispani ei ostentarunt, nullam libentius
 inspe-

inspexit quàm vitrum, dixitque Pizarro, Se plurimum mirari quòd quum in Castella rei tam pulcræ copiam haberent, peruestigandis metallis adeò vilibus auro & argento, peregrinas terras & maria obeundo, semetipsos fatigaret.

Eius parens Guaiacaua dictus est, popularibus dum viueret adeo carus & venerabilis, ut eum etiam hodie lugeant, ac vulgò persuasum habeant illum ad vitam propediem reuocatum, regni gubernacula suscepturum. Iacet in Quitensis vrbs finibus, maiorum suorum tumulis illatus, cum immensa auri & argenti elaborati copia, hominum, feminarum, animaliumq. omnis generis ac piscium effigie. Hispani sedulò sepulcrum eius à compluribus Indis etiam tormentis vehementissimis, quæsiuere: sed frustra. Neque illi vnquam eum locum indicio suo prodiderint, etiamsi omnes ad vnū interficiantur.

INTERFECTO rege, Franciscus Pizarrus Calsiamalca mouens, Cuscon regni Peruani caput, occupare properat. Obuiam fit ei cum exercitu Quisquiz Attabalibæ legatus, & præcipuus ducum, qui cum magna multitudine in aciem progressus Barbatos persequi & Regis sui necem vlcisci magno animo statuerat. Eum tumultuariis aliquot præliis expertus Pizarrus, tandem cum ingenti Barbarorum strage in fugam versum, Almagro cum parte copiarum persequendum & reliquias belli extinguendas, relinquit. Ipse, quinque

Quisquiz
Attabal.
principis
sui necem
vlcisci stat.
det.

tantum Hispanorum iactura facta, vltius progressus, quum iam Cusco in conspectu esset, & multi passim ignes apparerent: ratus fugisse ciues & ignem subiecisse vrbi, equites ad rem explorandam præmittit. Illi ignes esse è speculis accensosprehendunt, qui Barbata gentis aduentum Præfecto significarent: procedunt tamen animi alacres, & iam fermè in collem vrbi propinquum euaserant, quum repentè sese ostendentes Barbari, subeuntes Hispanos propellunt & saxis obruunt.

INTER hæc superueniens Pizarrus, fugientes suos colligit, & cū omni equitatu in Barbarorum cuneos effusis habenis inuectus, vertit pugnae fortunam, & feriendo ac cædendo obuios, Indos in fugam auertit. Illi furioso equorum impetu & acri gladiatorum acie perterriti, arma etiam passim abicere quò expeditius fugerent. Interueniente nocte Pizarrus insidias metuens, eo ipso loco in quo eum nox deprehenderat suos confidere iubet & castris locum capere. Itaque Indis fugiendi spatium datum est, quorum plerique cum pecoribus, vestimentis, & sale, deuios montes petiuere. Postera die Pizarrus Cuscon ingressus præsidium obtruncat, ceteros capit, urbem diripit, & ditissimum Solis templum spoliatur. Itaque magis prædæ è Cusco quàm ex Attabaliba Castamalca contractum est. Sed ne ita quidè expleta hiãte militum auaritia, omnes insatiabili auri cupidine ardentes, captiuos omni genere crucia-

cruciatus torquere, vt defoffas pecunias & sepultos thefauros proderent: vt verè quidem hîc exclamare nobis liceat, O quot Nerones, quot Domitiani, quot Commodi, quot Bassiani, quot immites Dionysij, eas terras peragrauere! Ibi reperti sunt Hispani qui trucidatos ad ludicrum oblectamentum Indos vorandos canibus obijcerent ⁴.

DIREPTA Cusco, & diuisa inter Hispanos prouincia, Marchio in maritimam oram regressus, Didacum Almagrum ibi repertum nuper victæ prouinciæ Gubernatorem designat, & eò cum imperio mittit. Ipse ciuitatem Regum nouam coloniam ad fluminis ^{Limæ, seu} Limæ ripam condere incipit: inde Trigillum ^{Regum-} proficiscitur, vt captiuos Indos inter Hispanos colonos diuideret, quorum opera in subigenda prouincia vsus erat. ^{ciuitas, colonia.}

I PHILIPPILLVS hic, vnus erat ex iis adolescentibus Indis, quos Hispani principio in Tumbesia ora exceperant, vt Hispanicam linguam discerent: de quib. huius lib. cap. 1. Hic quum vnus ex Attabalibæ concubinis amore deperiret, pactusque ducturum eam in coniugem, si fortè moreretur Attabalibæ: explendæ cupidinis audus, Regi insidias struit, & conciri ac sollicitari ab eo clanculum populares aduersus Hispanos Pizarro defert. Gomar. Hist. gen. libro 4. cap. 118. Attamen, si Benzoni credimus, totus hic mimus ab Hispanis fictus & compositus videtur, vt Attabalibæ necis inuidiam ab se in alium deriuarent.


2. Franciscus Pizarrus & eius fratres Didaco

*Almagro gulam laqueo frangi curarunt. Didaci Almagri filius Didacus Fr. Pizarrum domi suæ interfici iussit: quem mox Vacca de Castro capitali supplicio adfecit. Ioannes Pizarrus ab Indis in Cusco urbe mactatus est: Vincentius de Valle-
viridi monachus ille, qui primus Hispanos ad cædem Indorum accenderat, in Puna insula fustibus elisus à Barbaris. Ferdin. Pizarrus in Hispania in vinculis consenuit. Gonzallus Pizarrus ultimus fratrum Pizarrorū, quum aduersus Regem Hisp. bellum in Peru mouisset, captus à Petro Gasca & ultima pœna affectus est. Ita iniusta Attabalibæ cedes omnium propè eius auctorum tristi exitu tandem pensata & expiata est.*

3 Prodigia nonnulla mortem eius, & quæ inde sequuta sunt mala, portendêre. Nam xx. diebus antequam hac acciderent, ingens cometes, Cuscon versus, maximam noctis partem effulsit. Terrificum id sidus repentè conspiciatus Attabaliba sub vesperam, eo die fortè solito latior, verso ad Hispanos sermone: Breui, inquit, in his regionib. magnus aliquis Princeps occidet. Ita nimirum imprudens mortem sibi imminentem prædixit. Ceterum (ut Hispani scriptores tradunt) Pizarrus eum proditionis damnatum, nisi baptisaretur, viuum comburi iussit. Quum ad supplicium duceretur, Christianum fieri cupere se dixit. Itaque Pizarri iussu baptizatus: mox remissa pœna acerbitate, alligatus ad palum, medio Cassiamalca foro strangulatus est. Adeo non puduit istum subulcum cum India rege tam fœdo more agere.

4 Tanta huius seuitiæ, cuius non pauca exempla exstant, adeo nonnumquam canes ipsos pudit, ut

ut crudelitatis aliena ministerio fungi non sustine-
rent. Memorabile unū referam. Didaco Salazari,
(cuius inter San-^{ti}oannis insule primos occupato-
res celebre adhuc nomen est) canis erat molossus,
acer & Barbaris in primis infestus: Bezerrillum vo-
cabant. Nocte quæ diem, quo Cacicum Mabodo-
macam prælio Hispani vicerunt, sequuta est, Sala-
zar canem aduersus Indicam anum, quæ inter ca-
ptiuos erat, emittere constituit. Id ut commodius
faceret, epistolam tradit vetula perferendam ad
Gubernatorem, qui duobus inde fortè milliaribus
aberat: sed eo consilio ut simulatque à suorum con-
spectu ablata esset, canem in eā solueret. Ea quum
lata abiret, sperans se huius epistolæ beneficio liber-
tatem consequuturam, vixq; inde lapidis iactu
abesset: Salazar canem emitit: is vetulam faciliè
assequitur. Misera anus, ubi molossus furibundum
ad se rectà tendere videt, humi residens, his eum
idiomatis sui verbis mulcere incipit: Domine. ca-
nis, domine canis, ego fero istas litteras ad Guber-
natorem: ob signatam epistolam ei ostendens: & ad-
dens, Ne seuias in me, domine canis. Hic canis,
velut supplices illas & abiectas preces sensisset, pro-
tinus mitigato impetu substitit, & sublato altero
crure, ut canes ad parietem solent, eam perminxit.
Ea res Hispanis, qui ferociam & seuitiam anima-
lis nouerant, miraculo fuit: puduitque ipsos femi-
nam interficere cui canis pepercisset. Ouid. Hist.
Ind. lib. 16. cap. 11.



Almagrus Peruanæ regni Mareschallus designatur. Chilensem prouinciam petit. Mangus Attabalibæ frater rebellat. Cuscon urbem capit. Pizarrus undique in eum auxilia contrahit.

CAP. VI.

*Almagrus
Mareschal-
lus Peru.*

PER eos fortè dies Almagrus litteras à Cæsare accipit, quibus, se ab eo Mareschallum Peruanæ regni designatum intelligit: & vltra fines prouinciæ à Pizarro deuictæ trecenta millia pass. suo imperio attribui. Hoc tam læt o nuncio auctus, quum Cuscon urbem extra terminos prouinciæ Pizarri, & sui imperij esse sibi persuaderet, repentè priuato consilio Indica mancipia & agros de integro partiri pro sua libidine instituit.

ID vbi cognitum Pizarro, ex templò Ioannem fratrem suū cō cum Hispanis aliquot & imperio mittit, qui Almagri conatis obuianiret: ne videlicet absque suo permissu quidquam ab eo in prouincia nouaretur. Ioannes re inchoata, necdum perfectæ, reuertitur. Itaque Pizarrus ipse per dispositos equos Cuscō petit, Almagrum conuenit. ille primò Cæsareis literis fretus, Pizarro obsequi negat: ad extremum tamen, vbi viribus se imparem cognoscit, se ad omnia paratum quæ ille vellet, esse simulat.

*Indorum
strategema.*

CETERVM Indi quū terras suas desolari quotidie, haud satis æquo animo ferrēt, & noua subinde auxilia Hispanis summitti, priusquā amplius crescerent, libertatis recuperandæ cupi-

cupidine, Christianorum vires dispergere statuunt. Itaque disseminant Chilen prouinciam Cusco mille pass. millia distantē, versus¹ Magellanicum fretum, auri & argenti ditissimam esse aliisque rebus omnibus abundare quæ ad tuendam vitam sufficerent. Hanc tam speciosam occasionem extrudēdi Almagri oblatam amplexus Pizarrus, non prius stimulare hominem destitit quàm illum ad eam expeditionē suscipiendam impulit. Conuenit inter eos, vt si felicem eam ac commodam prouinciam iudicasset Almagrus, eius administrationē propriè sibi à Cæsare peteret: sin minus, reuersus prouinciæ iam paratæ & communibus armis partē æquam portionem acciperet, ex pactis & conditionibus quæ inter eos Panamæ conuenissent. Ita nouis de integro sacramentis mutuam amicitiam sanciunt & inuiolatâ ad extremum conseruatueros confirmant.

INDE Almagrus destinata exsequi pergit, & equis, armis, rebûsque aliis ad expeditionē necessariis comparatis, cum quingentis militibus multisq. Indicis seruitiis mouit: ac quâquam immensis laboribus & intolerabili prope tempestate vexatus per montes perpetuis obsitos niuib. iter faciens, vbi maxima pars Indorum, & aliquot Hispani equique frigore obriguere: procedere tamen quò intenderat perseuerauit, ac vix tandem in Chilen prouinciam peruenit.

HAVD multò post Almagri discessum, Ferdinandus Pizarrus Limam appellit à Cæsare diplomata & priuilegia afferens: Vnum

*Almagrus
in Chilen
prouinciâ
sterilem,
per speciem
honoris ab
legatur.*

videlicet fratri suo, quo is Marchionis titulo augebatur: alterum Didaco Almagro, eodem exemplo quo literæ quas iam ille à Cæsare de honore sibi delato acceperat. Atque hic fons fuit, vnde mox atrocita inter eos orta bella tamdiu durauere, quoad altero in vinculis strâgulato, altero altero domi suæ interfecto, vtriusque exitio finirentur. Sed hæc, quum ad intestina bella ventum erit, suo loco dicentur: neque de his alia ferè trademus quàm quæ vulgò nota & omnibus manifesta sunt. Quum enim hisce de rebus multa à multis audierim, alios aliter ea narrare atque in multis discrepare inter se comperi, studiis videlicet partiũ aut fauore cuiusque in suum ducem propenso præoccupatis animis. Addo etiam amplius, in illis terris veri perpaucis curam esse.

*Peruani,
duce Man-
go, aduer-
sus Hispanos rebel-
lant.*

INTER has rerum vices Mangus Inga At tabalibæ frater, cuius capiti Franciscus Pizarrus diadema regium imposuerat, quum tumultum & nouas res moliretur, à Ferdinando Pizarro oppressus est. Is regulum ferreis compedibus onustum Cuscensis arcis custodia inclusit. Sed breui ab eius fratre Ioanne, vinculis leuatus est, quum præter magnum auripondus ei datum, etiam se fidum atque amicum fore promitteret. Mox tamen vt emissus est, Hispanos animaduertens dispersis agminibus, cædibus incendiisq; latrocinij verius quàm iusti more belli, omnem prouinciam peruagari: clanculum contractis militiæ ducibus & rebus omnibus ad bellum necessarijs

com-

comparatis rebellionem cœptat. Ac repentino impetu loca aliquot circumuolitans, multos Hispanos aurifodinis intentos opprimit, & cum Indis quoque ipsis, quorum illi opera in auro effodiendo utebantur, interficit. Mox vnum è legatis suis, cum Indorum non spernenda manu ad occupandâ Cuscon mittit. Ille necopinanti ciuitati superueniens, arcem quoque eodem impetu capit, & Ioannem Pizarrû cum aliquot Hispanis interimit. Eam quum breui recuperassent Hispani, paulo pòst Mangus Inga centum amplius millibus Indorum circumfessam denuo expugnat, incendit, & maximam Hispanorum partem trucidat.

MARCHIO audita rebellionem Mangi, nec tantam armatorum multitudinem quantâ erat, ab eo excitam ratus, Didacum Pizar- *Hispanorû
ab Indis
acceptæ
clades.* rum in eum cum septuaginta quinque Hispanis mittit: sed istorum cladis ne nuncius quidem superfuit. Nec dispari euentu cum Barbaris pugnavit Morgouius trib. mil. qui Guamanga profectus vt opem Cusco ferret, ab Indis cum multis Hispanis oppressus est. Itaque Marchio Gonzallum Tapiam cum octoginta equitum turma cò properare iubet: sed & iste cum maxima suorum parte non procul Guamanga occubuit: Gaeta quoque alius trib. mil. & quinquaginta simul Hispani, parem exitum habuere.

INTEREA Marchio anxius animi, quum multo elapso tempore neque à fratribus, neque ab aliis ducibus & legatis suis nuncium vllum acciperet, & nonnihil mali suspectans:

præter superiores duces Franciscum Godoiũ cum quadraginta equitibus eò dimissum, quæ comperit renunciare iubet. Ille in angusto saltu deprehensus, quum vndique irruentibus barbaris fœdam suorum cædem ante oculos cerneret: vitæ magis quàm decoris memor, quum fortè prævalenti equo veheretur, eum in fugam vertit, & in ipso itinere de rerum omnium euentu à quibusdam Hispanis certior fit. Vt Limam regressus est, Marchioni clades suorum, obsidiones vrbum & exscidia renunciat: insuper etiam addens, aduentare ingentem hostium exercitum & rectà Limam tendere.

MARCHIO extemplò Petrum Lermam cum quinquaginta equitum turma & multis Indis amicis obuiam ire hosti iubet: ac postridie ipse quoque vrbe egressus, hostibus pugnandi copiam facit. Acerrimè vtrinque & æquo propè Marte res geritur: tandem Indi, quum impetum Christianorum ferre non possent, terga vertunt & collem non procul Lima editum ac munitum occupant. Multi eo prælio Indorum cecidere: ex Hispanis duo tantum: multò tamen plures faucij, & Petro Lermæ dentes lapidis ictu excussi sunt.

*Pizarvus
auxiliũ
dique cor-
roget.*


INTEREA Marchio, tanta rerum angustia constrictus, quādringentis Hispanis amissis, & ducentis amplius equis: quum neque à fratribus nuncium vllum acciperet, & Almagrum in Chilenſi prouincia mortuum esse crederet, & in tanta militum penuria tot repente hostibus circumuallaretur: primũ

Alphonsum

Alphonsum Aluaradum, qui Chiachiapoios subigebat, quamocyssimè arcessit, & cum suo exercitu accurrere in subsidium iubet. Simul literas & nuncios diuersa in loca dimisit, Trugillium, Panamam, in Nicaraguam, in Nouā Hispaniam ad Ferdinandum Cortesium & alias Hispanorum colonias: atque ex omnibus auxilia exciuit. Primus omnium ducum Hispanorum Alphonfus Aluaradus Limam peruenit: quem mox Marchio legatum suum & totius exercitus summum imperatorem designat.

Is cum trecentis Hispanis, maximam partem equitibus, obuiam ire hosti properat, nō prius conquieturus quàm deletis funditus Indorum copiis Cuscon obsidione soluisset. Primum igitur deiectis Indis è montibus Limæ propinquis quos infederant, longiùs progressus Tizioiam præcipuum Mangi Inge legatum *Permanere* quinquaginta amplius millia Indorum in acie *ges suos olim Ingas* habentem, prælio fufum terga vertere coegit. *vocabant.* Ipse quum in Sausam urbem ad faucios curandos concessisset, ibi Gomezium Tordioiam & ducentos Hispanos sibi à Marchione missos in subsidium reperit. Mox inde degressus Tizioiam denuo obuium habet. is nouis supplementis instaurato & aucto exercitu, solutos recenti victoria Barbatos oppressurum se sperauerat. Vbi in conspectu fuere acies, neutris certamen detrectantibus, strenuè pugnatur: donec ingenti edita strage, Indi in fugam versi sunt.

I MACELLANICVM fretum, quod à Ferdinando Magellane Lusitano repertum est, anno M.D. XX. quum ad Austrum ultra Æquinoctialem plagam tres & quinquaginta gradus confecisset. Ex ea classe, una naus, *Victoria* nomine insignis, anno M.D. XXII. toto circumueto orbe, *Hispalim* redijt. Itaque eius nauclerus, *Ioannes Sebastianus de Cano*, scutum suum insigni orbis effigie, & his circuminscriptis verbis, **PRI-MVS CIRCVMDEDISTI ME.**



¶ *Almagrus* è Chilensi prouincia redit. Mangus fugamontes perit. *Almagrus* Cusci ingressu à Ferd. Pizarro prohibitus clam urbem intrat. Per speciem colloquij structas à Fran. Pizarro insidias declinat. Mox pralio victus à Ferd. Pizarro capitur, & in custodia necatur.

C A P. VII.

DV M hi motus agitantur, diuersa parte *Almagrus* Chilensem regionem inopem & sterilem, non vt fama erat, diuitem nactus, ex ea prouincia excefferat. Iamque appropinquabat Cusco, quum Mangus Inga, audito eius aduentu, metuens ne ipsius simul & Marchionis copiis circumfusus atq; inclusus vndique exitum non haberet, abiecta recuperandi sui status spe, cum viginti amplius Indorum millibus, soluta Cusci obsidione, montes quosdam *Guamangæ* imminentes infedit. Sed quum locus incultus & asper tantæ multitudini alendæ non sufficeret, paulatim dilapsi ferè omnes in diuersa abiery. Ipse Mangus tribus tantum aut quatuor millibus Indorum

rum comitantib. amicitia Hispanorum in totum aspernatus, inter illos montes confedit.

QVVM aliquanto post p̄ses Gasca, re-
 gno huic componendo quæsitus, postquam
 Gonzallum Pizarrum capitali supplicio affe-
 cerat (vt inferius dicetur) missis ad Mangum
 Indis eum ad se arcefferet, iuberetque sub im-
 perium suum sine vlllo metu conced ere (quip-
 pe se eò venisse vt pœnis noxios & præmiis
 bonos afficeret: se componendis prouinciæ
 motibus & restituendæ omnium libertati mis-
 sum esse:) quum, inquam, Gasca missu, Indici
 legati hæc Mango exposuissent: Tum ille, Ec-
 quid putatis, inquit, vos mihi facturum hunc
 Apum (sic illi Principes vocant) postquam me
 ipsius fidei ac potestati permisero. Hic Indi,
 Idem de te statuet, inquiunt, quod Franciscus
 Pizarrus de tuo fratre. Petet abs te plenam au-
 ri & argenti domum: mox te strangulandum
 carnifici tradet. Ita irrita legatione Indi do-
 mum reuersi sunt.

*Mangus
eorum ver-
bis sibi os
sublini nō
sinit, quorū
mores no-
uerat.*

“
“
“
“
“
“
“
“

QVVM, vti diximus, Mangus Inga deuios
 montes fuga petiisset, Didacus Almagrus bre-
 ui Cuscon perueniens, ciuitatem velut suæ
 prouinciæ, Gubernatoris iure, ingredi voluit.
 Sed Ferdinandus Pizarrus introire parantem
 repulit, causatus, Sibi non licere eum in urbē
 accipere absque Marchionis fratris sui per-
 missu, cuius nomine atque auspiciis ei pro-
 uinciæ ipse præffet. Ceterum si tanquam
 priuatus intrare vellet, eum verò multò li-
 bentissimè cum militibus suis excepturum,
 tantisper dū de fratris voluntate certior esset

*Bellorum
civilium in-
ter Alma-
grum &
Pizarrum
tētamēta.*

*Almagri
in hostem
clementia,
ipsi postea
exitiosa.*

factus. Hic Almagrus dicere, Vt domum suā iniret, nihil sibi esse opus fac cultatem à quouam petere. Tandem multis vltro citroque inter altercantes commutatis verbis, postquā Almagrus Pizarrum perstare in incepto nec se admittere velle comperit: noctu amicorum quorundam ciuium ope urbem intrat, & Ferdinandū ac Gonzallum Pizarros incautos opprimens, vtrumque separata custodia attineri iubet. Ac Ferdinandus quidem, vt totius mali causa, ab eo mori iussus esset, ni amicorum interuentu & accuratis precibus protectus veniam obtinuisset. Luce orta Almagrus ex Regij diplomatis præscripto, approbantibus ciuibus, publicè præconis voce Gubernator pronunciatus est.

INTER hæc nuncius adfertur Almagro, Alphonsum Aluaradum, Francisci Pizarri legatum, cum valido Hispanorum exercitu castra habere ad Abancaiam flumen. Ergo metuens ne ille copias aduersum se duceret, Hispanos ad eum aliquot mittit, qui denunciant, vt aut Cuscon in fidem & imperium suū concederet, aut exiret è prouinciæ suæ finibus. Sed vbi legati non reuertebantur, nempe ab Aluarado retenti, copias instruit, & fidissimis suorum tum ciuitatis tum captiuorum custodiam committens, Cusco cum non spernenda manu mouet. Quum sub noctem ad Abancaiam peruenisset, nuntiatumque esset eius pontem magno Hispanorum præsidio obtineri: transmissio raptim vado, de improviso Aluaradi castra ingreditur, eumque sine cuius-

cuiusquam cæde cum multis Hispanis capit.

ALMAGRVS eius victoriæ successu inflatus, Cuscon reuertitur, & iureiurando affirmat se non prius quieturum quàm omnes Pizarristas ex Peruano regno eiecisset. Aluaradum in eandem custodiam qua Gonzallus Pizarrus attingebatur, condit: illi, præmiorum ingentium spe corruptis custodibus, nocte quadam ambo vinclis elapsi, in urbem Regū perueniunt & Marchioni hæc omnia exponunt. Ille, quingentorum militum manu facta, rectà in Almagrum ducere constituerat: ni Ioannes Gusmannus, Didacus Mercatus procurator eius, & monachi aliquot ordinis D. Mariæ Mercedis, eius destinatis obuiam issent. Illi enim ex apparatu Marchionis in Almagrum ingens aliquod malum oriturum præfagientes, reducere eos in mutuam gratiam conati sunt. Itaque tota controuersia decisio istis concordia sequestribus committitur. Illi ita pronunciant, Placere vt vtrique arma ponerent: Almagrus Ferdinandum Pizarrum è custodia emitteret: ambo in Hispaniam ad Cæsarem scriberent, qui de integro eorum prouincias atque imperia definiret: postremo ambo Malam locum colloquio destinatum conuenirent ad sanciendam concordiam, decem tantum equitibus stipati.

HIS conditionibus latis, Marchio Lima *Pizarrus* Malam contendit & Gonzallo fratri suo ne- *specie recō* gotium dat vt cum omni exercitu sequatur: *ciliationis* ceterum in transitu, quâ Almagrus iter factu- *Almagrū* rus erat, aliquot tormentularios in insidiis cō- *insidijs ca-* par.

dat, qui hominem incautum interimant. Eius conspirationis monachos quoque confcios fuisse fama est: cuius tamen non is successus fuit quē expectauerant. Simul enim ut Almagrus Malam peruenit, cum Marchione congressurus, Pizarri miles quidam propius succedens ei in aurem dicit, Si cara illi sua vita esset, statim nulla interposita mora abiret. Ille extemplò in equum ascendens cum comitibus abiit: quūque infessum à tormentularijs locum fortè animaduertisset, diuerso itinere Cuscon trepidè repetit. Multum interea de Pizarristis & monachis conquerens, dicēsq. Inde à Pilati temporibus non iniustiorē vīquam editam fuisse sententiā fraudēque quā quam isti moliti essent.

MARCHIO res patefactas & infensum Almagri discessum cogitans, ac veritus ne de fratre Ferdinando, quem adhuc in potestate habebat, grauius aliquid consuleret: Didacum Aluaradum Cuscon ad placandum eum mittit, rogātque ut quacumque ratione pacem concordiamque inter eos conciliet: iureiurando affirmans se insidiarum quas frater parasset planè ignarum esse, eaque omnia haud volenti sibi accidisse. Aluaradus vera ea esse persuasus, ad Almagrum properat: ei quē audierat aperit: rogans ut vel in communis inter ipsos amicitiae gratiam pateretur sibi persuaderi, ut pacem quā bellum mallet. Quippe nō esse consciū Marchionem structi aduersus eum doli: denique illum fidem suam iureiurando obstrinxisse, imperij sui finibus conten-

tum

tum nihil aduersus Almagrum moturum, donec à Cæsare noua constitutio afferretur.

ALMAGRVS, etsi à nonnullis amicorum moneretur ne Marchionis promissis fidem adderet: precibus tamen Aluaradi permotus conditiones accipit & conciliata de integro amicitia Ferdinandum Pizarrum liberat. Marchio vbi fratrem solutum habuit, eo stimula nte, fidem datam & toties tam sanctis iuramentis confirmatam abrumpens, breui Almagrū dolo aggreditur, missis Chincam qui ei significarent: Recentissimè à Cæsare allatas esse literas, quibus iuberet vt ipse in prouinciā à se repertam & domitam actutū concederet. Ad hæc Almagrus respondet, Se quidem, si mandati Cæsaris inspiciendi sibi copia fieret, protinus obsequuturum: sin minus, certum esse sibi Prouincia sua non decedere. Marchio rescribit, Nisi protinus sponte Cusco excederet, se illum inde vi eiecturum: idque non fecerā inter ipsos pacta violantem, sed nouo illo Cæsaris mandato fretum, quæ sua essent pro suo iure repetentem facturum. Almagrus perstare in proposito, & negare se prius decessurum quàm visis Cæsaris literis.

Almagrus incolumē emittit hostem, quem ignominia irritauerat

Pizarrus belli Almagro inferendi occasionem rimatur.

Hoc accepto responso, Marchio, valida Hispanorum manu contracta & multis Indis, Limā mouet: palam ferens se ad expellendos Chinca inimicos, prouinciæ suæ haud ambiguè oppido, contendere. Almagrus vt hostem adesse cognouit, viribus haud satis fidens, in Gaitaram montem editum & saxo-

... .. v. ij.

sum concessit: sed inde quoque vrgentibus inimicis deiectus, Cuscon raptim aufugit atque ibi suis ex trepidatione collectis, ab Indis galeas & alia munimenta corporis ex auro & argento fabricanda curat: omnes Hispanos qui aduersariis paulum modò studere viderentur, custodiæ tradit: primores etiam nonnullos maximè suspectos strangulari iubet.

*Prælium in
ter Alma
gristas &
Pizarristas*

MARCHIO itineris labore fatigatus, Ferdinando fratre suo summo Iuris Prætorè designato, alteri fratri Gonzallo legato suo & Præfecto militiæ cura belli permisa, vtrunque copiis omnibus in Almagrum Cuscon tendere iubet: ipse ad urbem Regum reuertitur. Almagrus hostium aduentu cognito, obuiam egressus, duobus millib. pass. procul ciuitate, munito loco castra posuit: distributisque vt potuit, copiis Hordonio trib. mil. primam aciem ducendam tradit: ea expeditis velitibus, cetero peditatu & Indorum quorundam sociorū auxiliis constabat. Ille militari via ducens, inter montem & ciuitatem ad ripam exigui lacus constitit. Equitibus Franciscum Chlauensem & Ioannem Tellū præficit: Alphonsum Peresium alia Hispanorum turma & multis Indis angustos calles ad montem spectantes insidere iubet: vnde si opus esset, in hostium latera incurreret.

FERDINANDVS Pizarrus è monte in planum degressus, postquam hostes quietos animaduertit, Mercadillium trib. mil. cum magna parte equitatus & Indorū subsidio numquid insidiarum aut latentis doli subesset, exploraturum

ploratum mittit. Ille quum in Alphonſi Pereſij cohortē incurriſſet, Indos ſocios in aduerſarios Indos irruere iubet. Ita contractis pugnae initiis, Pizarrus tormentularios in equitatum hoſtium emittit: illi pilularum grandine multos deiiciunt. Franciſcus Chlauenſis quum ſuos malè haberi cerneret, aliquot machinas diſplodi iubet. Icti globis nonnulli hoſtium ceciderant: ceteri perculſi terga vertebant: ni ſuperuenientes Pizarri fratres caſtigafſent territos, & confirmatis ſuorum animis prælium inſtauraſſent. Acrior inde coorta pugna: ſumma vi vtrimque res geritur: tandem funduntur Almagri milites: Pizarrus crudeliſſimè victoria uſus eſt. Almagrus æger pugnae intereſſe non potuit: ſed è collis vertice prælij euentum contemplatus, ubi ſuos fuſos conſpexit, fugam & ipſe capeſſit. Ferdinandus Pizarrus fugientium tergis inhærens Almagrū aſſequitur, captūque in cuſtodiam tradit. Inde quæſtione de eo habita, reum peragit & capite damnat: arguens, quòd è Chilenti prouincia reuerſus vi Cuſcon irrupiſſet, quòd ſe & fratrem nullius flagitij compertos in vincula conieciſſet: quòd prouinciæ agros pro libidine, nullo imperio aut mandato Cæſaris fretus, iterum diuiſiſſet: ad hæc multis Hiſpanis necis cauſa fuiſſet: poſtremò ruptis induciis & iureiurando aduerſus regium magiſtratum pugnaſſet.

*Almagrus
à Ferd. Pi-
zarro ca-
pite dam-
natur.*

ALMAGRVS poſtquam capitalem in ſe latam ſententiam indiſta morte cognouit, ingenti animi dolore iſtus, ad Cæſarem prouo-

*Pizarrus
in Alma
grum inex
orabilis,
cui vitam
debebat.*

cat. Pizarrus prouocationem admittere nolle. Itaque Almagrus totus in preces versus, illum per Dei gratiam ac misericordiam orare ut sententiam reuocare vellet. Se iam prouectæ ætatis, debilem, podagræ etiam doloribus infestari: ni soluere se vellet, at custodia clauso paucos illos qui superessent vitæ dies ad meditando peccatorum pænitiâ concederet. Adhæc meminisset sua maximè opera Marchionem carissimum eius fratrem in tantum honoris & diuitiarum fastigium euectum esse. Ipsum quoq. Ferdinandum aliquando apud se fuisse in custodia: in quem etsi pro suo iure animaduertere potuisset, vim tamen ab eo abstinuisset.

SUPPLICARE præterea pro eo apud Ferdinandum multi nobiles, in primis Didacus Aluaradus, qui quum eos in pristinam concordiam redigeret, vitæ suæ sponsione, Ni datam fidem seruarent, pro quouis eorum pacisci se paratum affirmauerat. Ipse quidem tum ac ceteri, manantibus effuse lacrymis, & verbis eiusmodi quæ ferocissimi leonis animum frangere, & cor adamante durius emollire, poterant, Pizarrum flectere conati, frustra operam consumsere: neq. iste, obstinatus & clausus ne quo affectu perumperetur, peruinci ullis precibus potuit ut miserationis signum ullum ederet. Ergo Didacus animo aduersum supremam firmato, confessione defungitur & testamentum facit. Pizarrus laqueo ei gulam frangi in carcere: mox exanimis ceruices amputari medio vrbis foro iubet. ¹ Hunc

*Almagro
gula la-
queo fran-
gitur.*

vita

vita finem habuit Didacus Almagrus.

MVL T I S ea sæuitia displicuit: maximè omnium Didaco Aluarado. is ergo paulo post in Hispaniam transgressus est, vt medietas in Franciscum & eius fratres querelas ad regem deferret. Sed quum in id vnum strenuè incumberet, breui Vallæoleti moritur, veneno, vt fertur, sublatus. Ceterum Almagrus obscurus & vltimæ sortis homo, quando & eius adhuc ignoratur pater, literas nesciit: ceteroquin diligens, honoris avidus, si quæ præmio donaret id ab omnibus volebat intelligi: sæuitia aduersum Indos insignis: Didacum filium ex Indica concubina Panamæ susceptum eisdem secum nominis reliquit.

Almagri
natales.

I H A E C in vrbe Cusco, anno M.D. XXXVIII. acciderunt. Eius autem mortem non tantum latam Pizarro Marchioni, sed eius quoque sponte ac iussu perpetrata, sequentia prodiderunt: quum plerique etiam paci consultum ferrent, dirempta emulatione inter Almagrum & Pizarri fratres, quorum alteri se fratres imperantis, alter consortem imperij, cogitaret. Itaque prudenter à Pizarro factum ex Machiaveli placitis, qui Reipublicæ novæ statum condi & componi non posse asserit, si plures pari imperio rerum arbitri existant. Quippe commune duobus aut pluribus imperium quum raro concors sit: unius hominis ingenio atque auctoritate omnia constitui multò esse satius.

v. iij.



Pizarri, Almagro sublato, varias expeditiones suscipiunt. Ferd. Pizarrus in Hispaniam transgressus custodia clauditur. Franc. Pizarrus ab Almagri factione interficitur. Did. Almagrus filius, imperium prouinciae occupat.

CAP. VIII.

*Hispanorum
in varia lo-
ca expedi-
tiones.*

PIZARRVS, sumpto de Almagro supplicio, prædam inter milites diuidit & res Cuscentis ciuitatis componit. Inde ad Marchionem fratrem regressus, de nouis terris vestigandis cum eo de liberat. Id ubi visum, Petrum Valdiuiam ducentis cum militibus in Chilensem prouinciam mittunt: Gonzallum Pizarrum in Coliaum ditissimam auri regionem: qua subacta mox in¹ Cassiæ (vulgò Canellæ) oram transijt: vnde postea pauper & accisis rebus reuersus est: Petrum Vergaram in Bracamorios: sed is in inopem & bellicosam gentem incidit, quæ propterea ad hanc diem inuicta & indomita mansit. Duces præterea & tribunos mil. plures Trugillium, Chiachiapoiã & ad alios populos diuersis cum agminibus mittunt. Ita Hispani variis expeditionibus alia atque alia appetendo loca, immuneris hominum cædibus atque infinitis sæuitiæ exemplis editis, maximam partem eius regni, vt ceteras Occidentalis Indiæ prouincias, in solitudinem & vastitatem redegerunt.

MARCHIO expeditis ad dictas prouincias subigen

subigendas legatis ac ducibus, fratrem suum Ferdinandum in Hispaniam cum Almagri *Almagri* causa & (vt dicūt) processu, ac quintæ Regiæ *sanguis Fer-* vectigali, mittere constituit. Ferdinandus, *din. Pizar-* quamquam dissuadentib. amicis ne iret (quip- *rum in His-* pe ipsum nullis argumentis mortem Almagri *paniam vs-* Cæsari probare aut excusare posse: adhæc Al- *que, ad pæ-* uaradum ad Curiâ grauissimas querelas cum *nas expe-* de ipso tum de fratribus eius deferentem præ- *tendas, per-* occupasse animos) soluit tamen, ingenti sui- *sequitur.* metipsum fiducia, venditans se pro summis in Regiam Maiestatem collatis officiis, compositis videlicet prouinciæ motibus & seditiosis pœna coercitis, ingentia præmia meritum. Verum quum in Hispaniam appulisset cum magna auri vi, non multo pòst quàm in Regiam venerat, Cæsaris mandatu correptus in arcem Medinæ-campi (vulgò Mottam vocāt) inclusus est. neque quid eo factum sit, deinde auditum est.

POSTEA QUAM Ferdinandus Pizarrus Lima soluēs in Hispaniam vela fecerat, multi in ea ciuitate & aliis prouincię locis vtriusque Almagri, cum parentis tum filij, amici supererant: sed ij sparsi, egentes, nulla neq. re neque spe, omnibus videlicet fortunīs à Pizarri factiōe euersi & spoliati. Inter eos princeps vnus maximè eminebat Ioannes Rada. Is primò clanculum cum Didaco Almagri filio de vlciscenda patris eius morte consilia agitare: mox vt eius primùm instinctu conflata & orta coniuratio est, occultè arma conferūt, amicos & confœderatos aggregant, mittuntq. ad

Fr. Pizar-
rum nimis
hostium
contemptus
perdit.

remotos vt quamdiligentissimè possint Li-
mam omnes cōuolent. Non defuere qui Mar-
chioni immatura adhuc coniurationis con-
silia proderent : sed ille quum significatum
esset Almagristas perniciem ipsi moliri : ista
haud sanè magnificiens, ratúsque hæc renun-
ciâtes odio potius in eos quàm vero moueri,
ferè respondebat, Sincerent illos suis miseriis
conflictari : satis iis infelicem suam sortem o-
neri esse, vt vexari grauius nihil opus esset.
Quinetiam quum denuo de cauendis insi-
diis moneretur, quippe haud dubiè cædem
ipsi ab inimicis parari: etsi aliquantulum com-
motus est, id tamē sibi credibile nō esse, dixit.

AT T A M E N ne planè lentus in suo pericu-
lo esse videretur, Ioannem Velasquen Præto-
rem vr̄bis arcessi iubet. Is quòd fortè ægro-
taret, pro se doctorem Picadam collegā suum
& Iudicem ordinarium (ex eorū ordine quos
Hispani *Alcaldes* nomināt) mittit. Hunc Mar-
chio interrogat, num sui occidendi occulta
consilia à Didaco Almagro iniri alicunde sub-
olfecisset. Ille nullo se ea indicio comperisse,
aut sensisse affirmat: ceterum nihil ipsi timen-
dum videri, dum rectum integrūque magi-
stratus sceptrum haberet in manibus. His ver-
bis acquiescit Marchio.

D Y M exsequendæ cædis occasionem ex-
spectant coniurati, admonentur, nisi facinus
maturarent, omnia mox emanatura. Itaque
Ioannes Rada, & vñdecim coniurationis par-
ticipes armati trāsverso vr̄bis foro decurrētes
& vociferantes, VIVAT REX ET MORIATUR
TYRANNVS : domum Marchionis irrumpunt.

Is tumultu exaudito, & quid esset suspectans, claudi atrij fores, firmari aditus, iubet: ipse ad muniendum corpus vertitur.

IN T E R E A dum armatur Marchio, Francisco Chiauenfis, Præfectus prætorio, fores palatij recludit: ratus autoritate sua coniuratos cohibiturum: sed vt via patuit Almagristæ violenter irrumpunt, & ipsum Præfectum gladio in caput altè impacto interimūt. Doctor Velasquez sceptrum prætorium mordicus tenens, ne intercideret, per fenestram in hortum præcipiti saltu semet ipse deiecit. Martinus de Alcantara Marchionis frater natu maior, cum aliquot domesticis, ratus se aduersus tot manus parem futurum, conclauis ostium tutabatur. Inde tandem armatus foras profilit Marchio, qui quū vnum ex omnibus suis fratrem superesse cerneret: Euge, mi frater, inquit, pugnemus strenuè aduersus proditores istos: per Deum iuro nos duos solos istis omnibus cædendis pares esse. Sed Martinus multis vulneribus confossus breui cecidit: ipse tamen solus egregiè se defendebat, donec irruentibus vndiq. inimicis, vnus cuspidem in medio eius gutture ita fixit, vt exanimis in terrā pccideret.

Hic Pizarro vitæ finis fuit. Trugillio Hispaniæ vrbe ortus erat, robusto & vegeto corpore, strenuus manu, ingētis animi: verū falsus, crudelis ac negligēs & literarū ignarus. Gonzallo Pizarro patre genitum ferunt, qui in Nauarræ regno ordines duxerat: & alij quidem legitimū eius filium, alij spurium tradunt: expositūq. in cunis ad tēpli portā, nec repertū

*Fr. Pizar-
rus ab Al-
magristis
interfici-
tur.*

*Fr. Pixari
natalium
nobilitas.*

qui tollere aut alere vellet²: mox à patre agnatum, vt adoleuit, pascendis suis rus ablegatum: quum gregis pars aberrasset, pauit tantem nec ausum reuerti domum fugisse Hispalim, atque inde in Indiã cum Alphonso Hoieda Vrabensis prouinciæ Præfecto transisse.

*Did. Almagrus fil.
Peruanæ
prouinciæ
regimen
inuadit.*

VVLNERE letali ictus Marchio animam agebat: Almagristæ nihil cunctati foras se proicere, & per urbem volitantes vociferari, VIVAT REX ET DIDACVS ALMAGRVS. Ad eas voces multi amici Marchionis tumultu exciti concurrunt: inde vulnera & cædes partium: sed quum Almagristæ multitudine & animis longè superiores essent, facile aduersarios fundunt: Marchionis domum aliorumque diuitum ciuium amicorum eius diripiunt, quorum alij capti, alij metu dilapsi fuga aut latebris discrimen vitauere. Didacus Almagrus Gubernatorem se ferens, omnes iurare in sua verba coegit, quoad Cæsar Peruanis rebus prospiceret. Mox sceptrum insignæ Iuridicæ potestatis familiarissimis suis tradit: trecentos milites legit: arma & equos quibus non fidebat adimit: & summum Præfectum militiæ Ioannem Radam designat.

HIS confectis, Cuscon properat: ibique à nonnullis aduersæ factionis cinibus dissimulanter excipitur. Inter hæc iurgium fortè inter³ Garciam Aluaradum & Christophorum Sotellum nobiles Hispanos oritur: Aluaradus Sotellum mucrone transfigit: quumque Didacum ipsum per insidias interficere destina-

nasset: Didacus, patefacto dolo, in Garcia caput, quam ipsi struebat, perniciem vertit.

I POST mortem Almagri, nuncius ad Fr. Pizarrum allatus est de inuenta regione Canellæ feraci in Quitensi prouincia, Orientem versus. Itaque ad eam occupandam Gonzallum Pizarrum fratrem mittere statuit. Porro arbor hæc, Canellæ ferax, in prouincia Zumaco, sub Aequinoctiali linea sita, reperta, ampla est, foliis lauri, minutis bacis racematim coherentibus, qui calyce, suberino aut querno simili, continentur, ampliore tamen & magis cauo, colore nigricante. Ac tametsi multæ passim huius generis arbores siluestres exstent: diligenter tamen & magna cura eas in suis prædiis indigenæ colunt. Itaque ex cultis longè nobilior Canella quàm ex aliis nascitur: eamque illi in precio habent, quia è circumvicinis regionibus, merces alias & vitæ tuendæ necessaria omnia, huius aromatis ope redimunt. August. Zarate. Hist. Peru. lib. 4. cap. 1. & 2. Petrus Cieça parte prima Chron. Peruani, cap. 40.

2 Eum etiam expositum & Suis uerbis alitum aliquot dies scribit Gomara. Porro, quanquam in tanta trepidatione omnium, mors eius tamen multò miserabilis fuit: nec erat quisquam adeo rerum humanarum immemor, quem non commoueret illa facies: Marchionem, & tot opum paulo antè dominum: qui tot à se repertas prouincias occupasset & diuisisset: non testamenti condendi, non ueniæ peccatorum à Deo rogandæ, ocio dato: in sua colonia, inter suos populares ac milites, per insidias civiles, quas multi prodidere, nemo prohibuit:

media luce duodecim hominum coniuratione interfectum: quum in tanto eius discrimine nemo colonorum, quos ferè omnes clientes & beneficiis suis obstrictos habebat, ad opem ferendam accurreret. Mox etiam festinato & vix plebeio funere raptim contectum, ne amputaretur caput ludibrio futurum: direpta à coniuratis domo, repentè ad tantam inopiam redactū esse ut funeri sumtus deesset. Hæc Lima in Peru accidere, anno M. D. XLI. die XXVI. Iuny.

3. Christophorus Sotellus & Garcias Aluadus Cuscon urbem, Did. Almagri nomine, praesidio & pari iure obtinebant. Quum in iurgio Sotellum Garcias interfecisset, eiusque magno desiderio angi Didacum animaduerneret: ultionem ab eo metuens, occupare facinus, & Didacum ipsum tollere statuit. Id quum perpetrare palam non auderet, occulta molitur. Didacum ad conuiuium inuitat, inter epulas incautum obtruncaturus: ni coenam condita Didacus monitus, paratas sibi ab Garcia insidias, aegritudine simulata, valetudinem excusasset. Simul tribunos cum militibus aliquot, Sotelli amicos, in penetrale cubiculum condit. Garcias parato conuiuio, ipse cum amicis ad arcessendum domo Didacum proficiscitur: & quamquam ab uno & altero in via de insidiis à Didaco structis monitus, perrexit tamè ire: donec Didaci ædes ingressus, venire ad conuiuium rogat. Ille primò excusans, tandem agrè assentiri, & è cubili se allenans præeuntem Garciam sequi. Interea fores clauduntur, & ab erumpentibus ex omnibus cubiculi partibus coniuratis, Garcias confoditur. Aug. Zarat. Hist. Peru. lib. 4. cap. 14.



*Vacca de Castro à Cæsare componendis Peruana pro-
uincia motibus mittitur. Is Did. Almagrum
prælio victum captumque capitali
supplicio afficit.*

CAP. IX.



MOx sequuntur alij rerum successus. *Vacca ad
tauros in-
domitos
coercendos
à Cæsare
mittitur.*
Postquam enim Cæsar funestas His-
panorum discordias, Almagri mor-
tem, Pizarri & aliorum cædes, audi-
uit: Licentiatum Vaccam de Castro in Indiam
mittens, quæstionem acrem exercere & vindi-
care in noxios iubet, ac prouinciam quam pa-
catissimè fieri posset, extinctis dissidiis com-
ponere.

HI s cum mandatis Vacca ex Hispania sol-
uens, Panamam peruenit: vnde in Peruanum
regnum vela faciens, propter aduersos ventos
portum Bonauenturæ petere coactus est: vbi
in terram egressus, summis cum laboribus om-
nem Venalcazaris prouinciam terrestri iti-
nere emensus, vix tandem Quito urbem atti-
git. Ibi exploratis Didaci actis & consiliis, au-
ditoque eum Gomezij Tordoix imperium
spreuisse, cui vt Cuscon urbem Vaccæ nomi-
ne occuparet mandatum erat: Trugillium pe-
tiit, eiusque ciuitatis tutela Moræ legato suo
commissa, cum ducentis militibus, quos variis
è locis raptim contraxerat, Limam conten-
dit. Ibi regiis literis mandatisque coram edi-
tis, ab omnibus ciuibus Gubernator Peruanæ
prouinciæ agnoscitur.

*Vacca Didac. Alma-
grum ver-
bis mulce-
re studet.*

INDE, decem millibus ducatorum mutuis sumtis ad stipendia & sumtus belli, milites contrahit, arma & equos comparat, & cum quingentis Hispanis Guamangum prope-
rans, ex eo loco ad Didacum Almagrum scribit, qui iam Cusco cum exercitu mouerat: vt positis armis se fidei eius ac potestati permetteret. Si vltro obsequeretur, pollicetur non tantum quaecumque antè peccasset ei condonaturum: sed & liberaliter daturum, vnde honorificè in prouincia viuere & ordinis sui dignitatem fastigiũque tueri posset. Ad hæc Didacus respondet, Si ab eo patris sui præfecturam obtineret, & diploma Cæsareum, quo veniam præteritorum consequeretur, his se contentum fore: Sin minus, se eius verbis parum fidei habere: quando quo tempore de fœdere & pace palàm secum ageret, clam milites suos astu ad defectionem sollicitaret.

*Almagrus
occasione
vti nescit.*

VACCA Didaci animo cognito, Guamanga, quòd is locus asperior esset, mouens progressusque, edito in planicie tumulo, quem indigenæ Chiuppam vocant, in conspectu hostium, confedit. Hic Didaco rei bene gerendæ præclara occasio se offerebat, si ea prudenter vti nouisset. Nam Vaccæ milites quum agmen in cliuum montis erigerent, si defessos & solutis ordinibus subeuntes adortus esset, parua manu fundere poterat. Postera die ambo duces copias in aciem educunt, suosque pro se quisque hortantur: victoriæ præmia ingentia ostentâtes: victos contrà, vitam, decus, fortunas, imperium, amissuros. Didacus suis

tormen-

tormentis loco plano constitutis, quibus Petrus Cretenſis præerat, rectâ in hoſtilem aciem fulminabat: magnâque cladem hoſti intuliſſet, ni id tempeſtiuè animaduertens Franciſcus Caruaial, Vaccæ Caſtrij primarius ſignifer, aciem paulum ex eo loco in vicinum obliquans, vbi à tormentorum ictibus tuta eſſet, exercitum ſeruafſet. Didacus ab vtroque machinarum latere equitatum, pedites in medio conſtituens: ipſe in dextro cornu ſtetit, vbi multos Indos lanceis, lapidibus, iaculis & variis miſſilium generibus armatos locauerat.

VACCÆ de Caſtro acies hoc modo ſtabat, ipſe inter primores cum triginta equitibus ceteram aciem antecedens: poſtea tamen ſuorum rogatu in poſtremum agmen ſeſe recepit. Equitum alæ duæ ab vtroque cornu locatæ: dextrum Alphonſo Aluarado, læuum Petro Alvarez Olguino, cum Regio vexillo tuendum datum: pedites in medium accepti. Indi qui in Didaci auxiliis erant, primi ante ceteram aciem progreſſi, pugnam laceſſentes, ab hoſtibus ſtrenuè pelluntur. Tum Didacus ferociter in hoſtem inuehitur: iâque acri vndique coorto certamine, Caſtrij pedites tormentis aduerſariorum potiti: & Didaci milites multis hoſtium cæſis, duo rapta ſignâ referentes, omnia tumultu & diſſonis clamoribus repleuerant: quum iam propinqua nox & dubia victoria omnes ad pugnam acrius incenderet. Ergo vtriſque ad extorquendam hoſti victoriam ingenti animo cōnitentibus,

multum ibi sanguinis fufum eft. Ad extremum Vaccæ victoria fuit, fed ea non incruenta. A parte Cæfaris, trecenti amplius Hispani cecidere, & ducum ipforum pars maxima: Almagristarum centum fermè & quinquaginta: nonnulli Guámanguam & alia loca, prout quemque fuga tulerat, diuerfi petiere: fed Vaccæ iuffu capti, Licentiato Gamæ traduntur.

*Almagrus
ab amico
cum fortuna
fidem
exuente
proditur.*

*Almagrus
capite ple-
ctitur.*

Is cognitis omnium caufis, in noxios, fed maximè in duces ipfos & feditionis capita, animaduertit: quofdam diuei fis equis diftrahi, alios è patibulo fufpendi iuffit: milites aliquot exilio damnauit. Didacus ipfe è prælio, fequentibus tantùm quatuor militibus, Cufcon fuga petierat, eas fibi latebras tutas fore ratus: fed Rodericus Salazar vrbis Prætor, quem ipfe multis beneficiis donisq; honeftauerat, clade eius audita, quorūdam aliorum ciuium confenfu eum correptum Vaccæ tradidit. Is Didacum capite plecti iubet: eius morte prouinciæ pax reddita. Mox Vacca Indos captiuos inter milites, qui fidelem ac ftrenuam operam ei bello nauauerant, velut prædam diuidit: ceteros ad nouas terras fubigendas dimittit. Inde Indis de integro calamitates glifcere, quos Hispani, vacui bellis, aurifodinis exercendis, aliisq; intolerandis laboribus vexabant.

¶ *Blasens*



¶ Blasus Nunex Prorex, SC. de Andorum libertate rigidius
urgens Hispanorum odiâ in se concitat. Gonz. Pizarro
duce, publicè aduersus Proregem bellum ab eis suscitatur.
Prorex Procuratorem regium interficit.

CAP. X.

DVM apud Peruenſes hi rerum
motus agitatur, Indicus Senatus,
Cæſaris iuſſu, ^{SC. de Indis in libertatem reſtituendis.} ¹Edictum de Indis
in libertatem reſtituendis de in-
tegro cõfirmat: & Peruanæ pro-
uinciæ prorex designatur ² Blasus Nunnez
Vela, ingentis ſpiritus atque animi vir. Hic
Cæſaræo diplomate inſtructus, cum quatuor
Adſeſſoribus, licentiato Didaco Cepeda, Petro
Ortizio, Ioanne Aluarez & doctore Liſone,
ab Hiſpania ſoluit.

QVVM ſub finem Ianuarij menſis, anno
M. D. XLIII, ad Nomen-dei appuliſſet, ibi-
que Hiſpanos è Peruana prouincia tranſgreſ-
ſos reperiſſet, cum magna auri & argenti vi-
diſceſſum in Hiſpaniam parantes: cognoscere
ex illis voluit quibus artibus aurum illud que-
ſiſſent. ³ Quippe iſtos Indica mæcipia quę iſtis
in parte prædæ obtigiſſent vendidiſſe accepe-
rat, contra leges nuper in Hiſpania latas. Itaq.
Regiis magiſtratibus vt aurum illud retineât,
quoad verum quærendo cognosceret, impe-
rat. Ea res multis ciuibus noua atque inſolens
viſa eſt: præſertim quû in ea vrbe id ab eo ten-
taretur, quæ extra ipſius prouincię ſineis eſſet.
Ipſe tamẽ nihil oſecius, niſi Adſeſſorû & aliorû

Hispanorum, quorum opes in ea colonia multum pollebant, interuentu ac precibus mitigatus esset, pecunias eas omnes haud dubie in fiscum redacturus erat: ac sic quoq. ægrè admodum omnia dominis restitui iussit.

*Proregis in
Adseffores
suos falsè
dictum.*

EX IN terrestri itinere Panamam petit, vsque adeo Adsefforum pertæsus propter crebras ipsorum inter se altercationes: vt subinde diceret, Ab Cæsare & Senatu Indico se quatuor Adsefforibus ineptissimis instructum, quorum vnus adolescens esset, alter stolidus, tertius stipes, postremus inscitia insignis. Quippe Cepeda adolescens erat, Ioannes Aluarez stolidus: Petrus Ortiz, imperitus literarum, & Latinæ linguæ planè ignarus, & quartus stipes & ineptus homo. E Panama in Peruanum regnum vela faciens, decimotertio quàm soluerat die Tumbesiæ oram tenuit: neque vlla naus tam breui cursu spatium illud vnumquam percurrerat.

*Indorum
seruitus sol
uitur.*

AB eo loco restituendæ Indis libertatis initium faciens, vetat ne Hispanis quidquam commeatus aut mercium dent, nisi persoluto precio: vetat ne Hispani ipsis ad baiulanda onera & vecturam sarcinarum inuitis abuterentur. Nam qui ante cum ei regno præfuerant Gubernatores, edicto iusserant, vt omnibus Hispanis qui pedibus iter facerent, eorum locorum Cacici tres Indos baiulandis eorū sarcinis attribuerent: equitibus verò quinque: insuper singulis pullum gallinaceum, cuniculū, & patrij vini (quod illi *Azua* appellāt) lagenā vnā, sine vllō pretio præberent. Hæc omnia Prorex sustulit.

QVVM

QVVM forte Tumbesiæ in sacerdotem & Gonzalli Pizarri clientem quendam domesticum incidisset, qui prælio aduersus Didacum Almagrum gesto interfuerant, vtrumque in patibulum egit: in vrbe San-michaelis Didacum Palominum Indis vassallis priuauit, quòd eos durius & inclemētius haberet. Grauiissimè se in eos animaduersurū minabatur qui ipsius imperiis atque edictis audientes non essent.

INDE Trugillium trāsgressus Edictum de Indorū libertate promulgat: quūmq. ab eo ciues prouocare vellēt, prouocationē non admittit: causatus se à Cæsare expressum disertūmq. mandatū habere Edicti strictè adeo & exactè seruandi, vt appellationem ab eo nullā aut exceptionem admitteret. Omnes obstinatum & inflexibilem Proregis duritiā experti, & ipsū & leges, & earum latores diris execrabantur. Qui seruos regio signo iniustos habebāt, vulgò fortem suā miserātes dicebant, nullā sibi aliam superesse opem, nullā præterea rationem qua vxores, liberos & domū sustentarent. Qui eas prouincias subegerant, conceptū animis dolorem perferre non poterant, palam conquerentes: Postquam, pro imperio & gloria Cæsaris corporibus & fortunis consumtis, ei opulentissimum & pulcherrimum Regnum suis manibus quæsiuerint, egregia scilicet sibi precia laborum persolui.

SED cum acerrimè omniū perstrinxit monachus ordinis D. Mariæ (Petro nomen erat) quum in has voces erūperet: Indigna præmia suam Maiestatem iis reddere, qui tam fidelem

*Monachus
intempesti-
ua liberta-
tis poenas
morte luit.*

& strenuam operam ei nauarant: & eas leges explendæ auaritiæ latas rapinam potius quàm sanctitatem & iustitiam redolere. Neque aliò spectare omnia Edicta quæ ex Hispania venirent, nisi vt augerentur Regij redditus. Itaq. his verbis offensus Prorex noctu carnificem summisit qui monacho gulam frangeret.

I AM superbiæ Proregis & durarum eius legum fama vbique sparsa erat, quum Hispani malle se mortem oppetere, quàm eiusmodi morem gerere legibus palam ferētes, omnib. locis tumultū & seditionē agitāt. Miserat fortè Prorex Cuscō ad Vaccam de Castro legatū quendā suum. Is rogatu ciuiū admittere eum in urbē noluit: ac breui cum multis Hispanis, quo propiūs rerū statum inspiceret, in ciuitatem Regū cōtendit. Appropinquātem vrbi cum magno comitatu ciues admonent ne ingrediatur. quippe vereri se ne aliquid secus quàm vellet ipsi accideret, ob exclusum Proregis Legatum. Præterea quòd tanto agmine stipatus veniret, suspicionem de se aliquā moturum. Itaque Cuscon potius reuerteretur, & ciuitatem Regis nomine obtineret. Sed Vacca regredi haud satis auctoritati suæ decorū existimans, maximā comitatus partē dimittit quominus suspectus esset, & cœptum iter peragit. Breui Limam ingressus, commotum ciuitatis statum & res perturbatas offendit.

NONNVLII ciuium Proregem monuerant, vt quāprimum posset, Trugillio venire properaret priusquā Vacca de Castro Limam ingrederetur: is ergo festināter oppido egres-
sus

sus Limam magis itineribus contendit. In itinere, eo loco cui Fossæ nomē est, inscripta parietī hæc verba reperit: *Quisquis fortunas meas ereptum veniet, maturè videat quid agat. nam id quidē capitis sui periculo fecerit.* Præterea ei significatum est, decreuisse Limenses ciues eum Peruenſi prouincia eijcere, nisi Edictorum effectum suspenderet, quoad à Cæsare rebus aliter prospectum esset.

HIS simul de rebus plurimum indignatus Prorex Fossæ mouet: quūmq. iam Limæ appropinquaret, Guilhelmus Suarez Regius procurator (Factorē vulgò vocāt) obuiā ei egressus iusiurandum ab eo nomine senatus exigit: Priuilegia videlicet, beneficia, & iura ipsis à Cæsare concessa facta & recta cōseruaturum, prouocationēmq. à nouis legib. admissurum. Prorex iusiurandū ita concepit, Se quæ ad obsequium & honorem Cæsaris pertinerent, ea omnia facturum. Ita ciuitatem ingreditur: maximæ parti ciuium parū gratus eius aduentus fuit: sed multò acrius odia omnium in se accēdit quum Edictum de liberandis Indis promulgasset: quūmq. à familiaribus rogaretur ne faceret, quippe seditionem aduersus eum concituros Hispanos, contumaciter respondit, Se voluntatem suam & Cæsaris mandata prorsus exsequi velle. Mox etiā Vaccam de Castro in custodiam tradit, Edicta sua Cusci admittere noluisse eum arguens, & assumpta Gubernatoris autoritate Indos inter Hispanos diuisisse: postremò, non facta à Rege potestate, armis aduersus Almagrum certasse.

*Prorex dñ
de summa
iure nihil
remittere
vult, odia
omnium,
mox rebellionem, excitat.*

PROREX tum ceteris factis, tum maximè Vaccaë vinculis, cuius in se beneuolentiam studiūque multò quàm antea maius Limenses experiebantur, tantam omnium ciuium inuidiam, tantum odium in se cōciuit, vt plerique Hispani Gonzallum Pizarrum crebris literis sollicitarent, vt Cuscon quācelerrimè veniret. Incidisse res magni momēti de quib. cum eo ibi agere vellent. Is tum fortè erat apud Ciar-chas fodinis suis prorsus intentus, nec de his rebus quidquā cogitans: tum verò frequentib. nunciis & literis excitatus, Cuscon venit. Ibi coniurationis principes sœuitiam Edictorum exponunt, quæ Prorex attulerat: quam etiam ipse intolerabili cōtumacia oneraret, omnem

*Gonz. Pi-
zarrus dux
varium.* ab iis prouocationē respuēs. Itaq. Gonzallum orare omnes vt propugnandę vitæ ac fortunis suorū summum se Ducem & Procuratorem partibus ostenderet. Polliceri ac iurare singuli se strenuam fidelēmq. operam nauādo fidem illi datam ad vltimum præstituros. Abnuere primò Pizarrus, & id à se expectari petiq. non debere dicere: quippe Edictis repugnare, quid aliud esse repugnare ipsi Cēsari, qui eorū obsequiū effectūmq. tā exactè vrgeret? Verū qui eas terras subegerāt Coloni, inceptū suum ab omni rebellionis suspicione purgātes, & causam probantes, flexere tandem vt imperium illud à se suscipi fateretur.

HIS suffragiis Gonzallus Pizarrus Gubernator & Procurator generalis Peruanarū provinciarū designatus, vexilla depromit & breui quadringentos amplius milites contrahit.

Hæc

Hæc ita Cusci gesta esse posteaquam Proregi allatum est, Hieronymum Loaisam Limensem episcopum Cuscon ad Gonzallum mittit, oratum ut suscepta aduersus Regem suum belli consilia omitteret: ac Limam ad reconciliandam secum concordiam veniret. Id quidem cum pro certo habere posse, nullâ ipsi incommodam Legem ab se allatam esse: imò venisse ut eum ingentibus præmiis & meritis afficeret. Verùm Episcopus à Pizarro neque auditus neque admissus, irrita legatione rediit.

PROREX, cognito Pizarri animo, metuens ne ille prius ad Limam cum exercitu esset quàm ipse bello necessaria parasset: quinquaginta tormentularios ad præsidium sui corporis comparat: quantum militum potest contrahit: è variis locis noua subsidia arcessit: Quintæ vectigal retinet, quod Vacca de Castro confecerat ut primo quoq. tēpore in Hispaniam mitteretur: ac magnam præterea pecuniæ summam in sumtus belli & stipendia militum mutuò sumit. Itaque breui ad eum Petrus de Puellis Guantico, Gonzallus Diaz è Piura cum multis Hispanis è Quitensi provincia profectis confluunt: sed isti paucis post diebus quàm Limam venerant cum omnibus ferè militibus aliisque trib. mil. ad Pizarrum transfugiunt. Nec multo post aliquot nobile qui apud Factorem seu Procuratorem regiū in hospicio erant, cum duobus eius nepotibus à Prorege ad Pizarrum transiuere. Id ubi Proregi nunciatum, extemplò Alphonsum de Monte-maiore cum quinquaginta equitibus

ad capiendos transfugas mittit. Ille fugientes assequutus, proditur à suis & ab iis quos persequēbatur, capitur: inde omnes vno agmine ad Gonzallum Pizarrum concurrunt.

Prorex Pro
cur. regium
interficiēs,
sibimet ex
itium ad-
fert.

INTEREA Prorex, quem non minus defectiones suorum quàm hostium apparatus angebant, Factori in primis succēsebat, ei utique vehementer infensus, quem totius mali causam esse suspicabatur. Tandem hominem noctu arcessit: vixq. ille domum eius ingressus

” erat, quum iræ impotens, Ecquæ tandem sunt
 ” istæ quas moliris proditiones, Factor? in ma-
 ” lam tuam rem huc ad me venisti, quem tu te-
 ” chnis tuis peruertis. Ad hæc Factor: Ego tam
 ” bonus Regis seruus sum ac dominatio vestra.
 ” Prorex: Mentiris per gulam, inquit, simulque
 pugionem stringens gemino ictu eum confodit: deinde ingestis vulneribus confectum à domesticis, proiici in præceps è cœnaculi pergula iubet: corpus eius à Proregis mancipiis licentia tenebrarum, quam nemo prohiberet, pedibus tractum & multis ludibriis vexatum est. ut illuxit, honorifico funere effertur.

LICENTIATVS Caruaial, ubi fratrem à Prorege interfectū cognouit, iurauit se non prius quieturū quàm mortem ipsius ultus esset. Ea quidem Factoris cedes plerisq. ciuium tantum terroris iniecit, ut ne eadē à Prorege in se exempla ederentur vulgò pauitantes, Gonzalli Pizarri aduentum ardentibus votis optarent, qui ipsis perpetuā eam formidinē demeret.

I QVIBVS de causis id factum sit, ex Hispanis scriptoribus paulo altius repetam. Per ea ferme tempora transgressi ex India Occid. in Hispania


niam aliquot Ecclesiastici homines: & bono, ut sibi videbantur, zelo impulsī, Regi & Indici consilij proceribus renunciarunt, quā profligata licentia Hispani aduersus Indos sentirent. Quippe nō tantum eorum fortunas ferre atq. agere, ipsos ad onera ferenda, velut iumenta, adigere: immodicis tributis grauari, & verberare: sed etiam, velut mancipia ad metalla damnata, in aurifodinas & piscatus unionum demergere. Itaque quemadmodum in insulis San-dominici, Cuba, San-Ioannis de portu diuite & Iamaica, omne propè indigenarum genus miseris & laboribus interisset: ita in Noua Hispania & in Peru breui omnes Indos à stirpe absumtum iri, nisi maturè obuiam iretur. Porro eius mali maximam culpam sustinere Gubernatores ipsos, eorum legatos, & Maiestatis ipsius Procuratores, Episcopos, Cœnobita, ceterasque eiusmodi Speciosas personas, quæ fauore & opibus subnixæ, nullam ex legibus actionem aut pœnam metuerent. Hac & similia, tum alijs, tum maximè inter ceteros Dominicanus quidam, Bartholomæus de Casis, sedulo inquisita, ad Cæsarē retulerant. His ille acceptis In-dico senatui negotiū dat, ut adiunctis Iurisperitis & religiosis alijs viris, ijs malis remediū adhibeat. Illi, rebus sat cognitis & deliberatis, Edictum XL. capitum seu legum condunt, quarum summa hæc erat: PLACERE Indos liberos ac sui iuris esse: ac proinde nemini fas in posterum Indum ullum aut ad fodinas aut ad piscādos uniones adigere: imò ne ad præbendā quidē geruli operā, nisi fortè ijs locis ubi alia vecturæ ratio non suppeteret, ac ne tū quidē, nisi persoluta laboris mercede. Præterea Indis qui vectigales Hispanis essent, pro cœsus habitu & modo tributa indici. Omnes Indos subditos patro

norum aut seniorum suorum morte vacuos : omnes fundos, agros, Indos vassallos, qui episcopis, monasterijs, Ptochodochijs seu Hospicijs publicis per totam Indiam assignati essent, sub Regia corona dominium ac ditionem redigi: adeo ut ne ipsi quidem Gubernatores, eorúmve legati, & Regij procuratores vassallum ullum Indum aut seruum retinerent. Porro omnes Indos, qui extra natalis soli finis quoquomodo abducti essent, eò remigrare ac reduci, & Christ. religionem doceri. Haëtenus de legibus, & causis earum. Nunc cur Prorex cum Adsefforibus in Peruanam provinciam missus sit, paucis expediam, Quam Peru, totius India ditissima provincia, è Regia curia, cuius sedes Panama erat, supremum ius peteret, quod duo tantum Iuridici Adseffores redderent: nec maxima anni parte commodè utrinque nauigari posset: inde accidebat ut longa causarum dilatio & tardus litium exitus esset. Itaque quum Peruanarum rerum maximi momenti status id exigere videretur, Præsidentis Proregis titulo, quatuor Adsefforibus comitatum eò mitti, nouamque ibi Curiam statui placuit. Ceterum hæc leges Madricij lata & promulgata sunt, anno M. D. XLII. easque manus sua subscriptione Cesar Barcinone confirmavit. Ex Hispanis scriptoribus.

2 Primus Prorex in Peru missus est Blasus Nunnez Vela Abulensis, tum regionum Castelle satellitum Præfectus. Magno vir animo, rectus, & qui aduersum blandientes incorruptus, summos cum infimis æquo iure regeret: in primis Regia mandata exacto cum rigore nec simulate exsequi.

qui studiosus. Experimentum sui dederat in Malacæ & Cuenca præfecturis. Attamen & ira impotentem fuisse, & suspicionibus properum, & credulum nimis, & præcipitem in pœnas, res ipsa & exitus postea docuit.

3 In aliena prouincia intempestiuè imperium exercere visus est: quum (ex eo capite Legum, quo iuebantur Indinatali solo reddi, quocumque modo inde abdueli essent) Peruanos Indos per Panamensem prouinciam conqueri, atq. inde nauibus in Peru auehi iussit. *August. Zarat. Hist. Peru. libro 5. capite 2.*



¶ Prorex Trugillium migrare constituit. Tumultu Limæ orto, capitur & custodiæ traditur. Gonz. Pizarrus partium imperium & bellum in Proregem suscipit. Machicaus Panamam diripit. Inoiosa ei sufficitur. Verugus Nomine-dei potitus, mox inde à Pizarristis ejcitur.

CAP. XI.

PROREX vt perfectò demum facinore magnitudinem eius intellexit, omniumque in se accensa odia, hostis debellandi spe amissa, cum Regio senatu Trugillium migrare constituit. Instaurare eo loco vires cogitabat: itaque quamuis repugnantibus Assessoribus, duas naues in strui iubet, & Alphonsum Richelmum Regium Præfectum ærarij, Alphonsum rationarium Quæstorem, aliosque præterea nobiles euocari iubens: negotium dat iis vt in diem crastinum præsto sint. Quippe Trugillium na

Prorex nemine persequente, fugam spectat.

uigare sibi esse in animo : & Velam Nunez quidem fratrem suum terra cum militibus mittere : se verò cum coniugibus ac fortunis omnibus tum Adfessorum, tum colonorum, maritimo itinere abituros. Nulli eorum satis animi ad contradicendum fuit:ergo magis nō ausi repugnare quàm consilium probantes abeunt,& omnia Adfessoribus enunciant.

Illi quum inter se ea de re deliberassent, Lima non excedere statuunt : simulque edicunt ciuibus, ne coniuges neu quid rerum suarum exportari & in naues imponi sinerent. Ipsi quoque Proregi fortiter obnunciantes, comonefaciunt si Lima discederet, hostibus aucturum animos:manentem contrà frenos eorum audaciæ iniecturum. Præterea sibi à Cæsare disertè mandatum vt in ea ciuitate, non alibi, sedem figerent:neque aliò migrare, saluo eius imperio, sibi esse liberum. Prorex tamen omni obnunciatione & obtestatione neglecta, pertinaciter in proposito persistens discessum parabat : quum in ciuitate ingens repente tumultus oritur. Rapta arma : Vela Nunez stans in foro cum aliis Proregis ducibus, mox desertus à militibus, metu hostium in cœnobium San-dominici confugit: alij domum Proregis irrumpunt, & fores occludunt: circumfusi ædibus ciues quadrantis horæ spatio Proregem obsident: quem milites clamoribus magis quàm armis propugnabant: quum innoxiiis lancearum hastilibus, cuspidibus retro versis, subeuntem propellerent hostem, & fistulas ferreas sine globis in vanum disploderent.

*Lima ex
trepidatio
ne Prore-
gis tumultus
oritur.*

TANDEM Antonius Robles scala in murum euadens, domum irrumpit: portam recludi iubet: Dominicani quidam monachi Proregem adeunt & vt sese dedat admonent. Ille tandem eorum precibus expugnatus, Laurentij Aldenæ aliorumque aliquot trib. mil. fidei sese permittit: & ad licentiatum Cepeda deduci se iubet. Vt in conspectu fuit, ingenti dolore anxius, quòd obuius quidam, ipsum, dum deducitur, infesto tormenti ictu appetierat, Cepeda ita affatur, Domine Cepeda, inquit, rogo te, nequis me interficiat, vt mei curam habeas. Cepeda cohortatus ne pauesceret, cum domum suam deducit. Mox etiam Adfessores consolantur hominem, & se eius calamitate grauissimè affici affirmant: se vt caperetur neq. operâ neq. consiliû dedisse: sed quâdo ita accidisset vt in ipso potestate esset, pro bono atq. ipsius vtilitate facturos vt eum in Hispaniam ad Cæsarem mitterent.

IN eo statu res adhuc erant, quum ciuitatē noui de integro motus inuadunt. Nonnulli Proregem soluendum: alij contrà interficiendum censebant, aut certe è ciuitate pellendū. Tandem diu multumq. inter se altercati ciues in eam sententiam omnes descendunt: Remittendum esse in Hispaniā ad Cæsarem, vt paulo antè diximus. Quippe eius discessum multa sequutura commoda: Pizarrum videlicet arma positurum: pacatam fore prouinciā: atque ea Cæsari satisfactura. Ergo quæstione de Prorege habita eique culpa totius motus assignata, cum fratre in nauim impo-

Prorex cepitur.

“
“
“

Prorex in Hispaniā remissus liberatur.

domum referentem, quæ partim muneribus, partim stipendiis, partim rerum venditarum pretiis, contraxerat. Eumque cum omnibus fortunis licentiato Alvarez in Hispaniam deducendum tradunt. Is ad Tumbesiæ oram impulsus, Proregem liberauit: quo facto ei mox exitium attulit.

EODEM ferè tempore Gonzallus Pizarus Cusco mouens (paulo antè interfectis Philippo Gottierez aliisq. aliquot nobilibus, quòd ad Regem multa aduersus ipsum scripsissent) duobus à Lima mil. pass. castra locat. Quumque ibi accepisset, Proregem solutum Tumbesiæ exercitum contrahere: priusquam urbem ingrederetur, quo in se animo Assessores & nonnulli ciues essent cognoscere voluit. quippe non paucos inclinatis in Proregē studiis esse audiuerat. Ergo à senatu, omnium colonorum nomine qui eas oras subegerant, ciuitatis imperium postulat, quantum id Regij obsequij respectus & totius prouinciæ communis utilitas postularet. Maxima ciuium pars deferendum ei imperium censebat, metuentes ne vi irrumpens urbem ipsam diriperet: alii, Cepeda maximè, validà militum manu cōtracta fretus, omni ope propulsandum contendebat: sed vbi cognouit maximam militū partem transiisse in castra Pizarri: tum etiam à nonnullis, quòd vim quàm leniores vias experiri mallet, correptus: quum illi sine vtriusque partis grauissimo damno prælij aleam tentari posse negarent, speciosiora suadentibus accessit. Hæc enim simulata tantum erāt: neq.

neque alio animo ab iis iactabantur, nisi vt Regis os fallaci obsequij specie sublinerent. *Gonz. Pl. Carrus Gubernator Peru. de signatur.*
 Omnium ergo consensu Gonzallus Limam ingressus, Gubernator, addita exceptione, dicitur: Nempe ea lege vt quoties Cæsar de rebus aliter statuisset, ipse eo se munere vltro abdicaret: interea illud fideliter pro boni & Christiani viri officio, sub Dei & Regis auspiciis & imperio, gereret.

GONZALLVS iam Gubernatorem agēs res ciuitatis componit, Senatum abolet, insidias ab eo metuens: quadraginta millia ducatorum à Regio fisco mutua sumit ad stipendia militum: Machicaum trib. mil. Panamam mittit: Doctorem Teiadam in Hispaniam de *Bacicaum Hispani scriptores vocant.* legat, qui Cæsarem de prouinciæ statu, & quæ nouas leges sequuta essent incommoda, certiorum faceret.

MACHICAVS penuria maiorū nauium, duobus phaselis vela fecit cum L. tormentulariis: & oram præterlegens duas naucis ad Trugillium, & vnam in Tumbesia ora cepit: Proregi terrorem intulit: Ioannē Lanez in fugam vertit: aliquot milites in Portu-vetere contraxit: & prope Tabogam naue vna potitus, eius magistrum, quod demissis properè velis in deditionem non venisset, ex antenna suspendit. Mox in Panamam appulsus, quum Ioannes Gusmannus qui militum pro Blasco Prorege delectum habebat, cum ingressu vrbis prohiberet: intercessit eius prouinciæ Gubernator. Nam quum audisset Machicaum nō alia de causa eò appulisse quàm vt doctorem

*Machicaus
Panamam
diripit.*

Teiadam, legatum & procuratorem à comuni Peruenſis prouinciæ ad ipſum Cæſarem miſſum, comitaretur: Guſmannum cohibuit. quippe equum non eſſe inquiens legatis moram & impedimentum offerre, & nulla de cauſa humanis cædibus materiem occaſionemque præbere. Itaque Machicao patet aditus: ipſe cum maxima ſuorum parte in terram egreſſus, naues aliquot quæ in portu ſtabant occupat: milites qui Ioannem Guſmânnum deſeruerant omnes ſibi adiungit, cum multis volonibus erronibúſq. qui Nomen-dei eò cõfluxerant: Bartholomæum Perẽſium trib. mil. eiúſq. ſigniferum interficit: ac multò plures interemiſſet, quòd initis de ipſo occidendo conſiliis ad exercitum eius tradendum Proregi conſpiraffent, niſi ſibi conſuluiſſent fuga: tormenta vrbi propugnandæ comparata capit: negotiatorum tabernas veſtiendis militibus exhaurit, ſe aliàs pro mercibus pretium perſoluturum pollicitus. Exactis per hæc ſcelera aliáq. multa aliquot menſibus, octo nauibus & quadringentis amplius militibus auctus, Panama in Peru re nauigat.

*Inoioſa
Machicao
ſufficitur.*

PORRO metuens Gubernator Pizarrus ne Prorex è Panama bello vires facillimè reparet, quòd is locus nauibus quæ ex Hiſpania ad Nomen-dei appellunt opportunus & cõmodus eſſet, eum portum ſibi occupandum ſtatuit. Sed quum audiſſet Panamenſes ciues & mercatores de Machicai latrociniis & rapinis plurimum queri, abdicato ei munere, Petrum Inoioſam in eius locum ſufficit. Non

deſue-

defuere qui intercederēt & Machicāo munus illud continuari vellent: sed hæc sententia obtinuit. Inoiosa, Proprætoris seu summi classis præfecti titulo auctus, cum centum quinquaginta tormentulariis è Calliao Limæ portu soluit: inde oram præterlegens Velā Nunez in portu Bonauenturæ cum xx. millibus duarum corripit. Is in eo portu duos myoparones instruebat, traicere in Panamam cogitans ibique Proregi fratri suo milites conscribere. Eum captum Inoiosa Limam ad Gubernatorem mittit: qui mox cum tumultus cientem & colonias ad Proregis partes fouendas sollicitantem capite plecti iussit.

*Proregis
frater capi
te plecti-
tur.*

INOIOSA præterea Gonzalli Pizarri filium, quem captum Vela Nunez secum ducebat, recuperat: & cum ea præda è portu Bonauenturæ soluens tribus nauibus & duobus myoparonibus. Panamæ oram tenuit. Ibi tum fortè Ioannes Lanez milites Proregi contrahabat. is vt naues conspexit, extemplò pulsari tympana iubet, & in forum cum militum agmine progressus, quantum niti voce poterat ciues inclamat: Proдите foras Proditores, & regiam prouinciam à tyrannis defendite. Hæc verba multorum indignationem odiūque in eum commouerunt.

POSTERA die Petrus Casaus summus eius prouinciæ Prætor (Iustitiarium maiore vocant) Ioannis Lanez rogatu, milites Nominis-dei colonia excit: simulque ad Inoiosam mittit qui causam aduentus eius quaerent. Ille se ad Ferdin. Machicai nominat

luenda & dissoluenda venisse, respondet: co-
facto, mox in Perusium regressurum. Atta-
men vbi ille Panamæ arma in se sumi & vim
parari intellexit: nec pati vllomodo velle Io-
annem Lanez vt urbem intraret: milites in ter-
ram exponit, & inter prominentes litoris sco-
pulos collocat: myoparones cum aliquot tor-
mentis oram radere iubet. Altera ex parte Io-
annes Lanez Panama obuiam egressus, cum
trecentis amplius Hispanis, castra prope ho-
stem locat. Iamque tormentarius, iussu La-
nesij, machinæ vni ignem immissurus erat:
quum monachus quidam ordinis D. Mariæ,
crucifixi imaginem gestans, cum Petro Cabre-
ra mula circumuectus, P A X, P A X, alta voce
proclamat.

Inoiosa

strategema

PROGRESSI ad colloquium vtriusque
partis duces, his legibus fœdus ineunt: Vt
Inoiosa xxv. tantum militibus comitatus vr-
bem intraret: Reliquum exercitum & naues
ad Tabogam insulam procul vrbe remoueret
donec Machicai debita persoluisset: postre-
mò nobiles viros duos, quoscumque Lanez
legisset, fidei obsides daret. Inoiosa his acce-
ptis conditionibus, Balthassarem, comitis Go-
meræ filium, & Paulum Menesium trib. mil.
obsides tradit. Ita fallacibus promissis circum-
uento Lanefio, pax inter eos componitur. At
paulo post, quum persoluendis militum sti-
pendiis pecunia Lanefio deesset, milites eius
terni quaternive ex vrbe in Tabogam com-
meantes & ludicris cantionibus, quominus su-
specta res esset sese oblectantes, per omne in-
duciarum

duciarum tempus, paulatim omnes duci suo elapsi ad Pizarristas transfugere. Ipse tandem ab omnibus destitutus, vno reliquo pedisequo, fugæ comite, Panama decedit, & Carthaginem sese recipit. Inoiosa orbam præsidio urbem cum exercitu intrat, festas inter militum voces clamantium, VIVAT REX ET GONZALLVS PIZARRVS. Mox ad Nominis-dei coloniam occupandam & eum portum tutandum Petrum Cabreram & generum eius cum duabus cohortibus mittit.

Non multo post Melchior Verdugus, Pizarri partibus infestus, cum ducentis militibus per emissarium Nicaraguensis lacus secundo amne defluit. Ad Nomen-dei noctu *Verdugus* fortè quum appulisset, milites exponit. Egre *Proregis* dientium in terram militum tumultu excitati *partes fo-* coloni, Gallos esse arbitrati, in siluas confu- *uens No-* giunt. Melchior in Cabrerae ædes ignem iniici iubet, illum simul conflagraturum cum domo ratus: sed iam ille in Panamam cum genero aufugerat. Ad eum modum Verdugus Nomen-dei potitus, eam præsidio munit.

At ciues, quum multas à militibus iniurias quotidie paterentur (illi enim militari licentia merces & quæque obuia rapientes, aliæque infanda edentes facinora, ius etiam prætexebant sceleribus: Id nimirum meritò iis accidere qui Tyrannos aduersus Regem defenderent) graues de illatis sibi à Verdugo damnis & iniuriis querelas ad doctorem Riueram, eius prouinciæ Gubernatorem deferunt. Is Panamæ manebat: ac tum Petri Inoio-

ſæ auxilium implorans, cum eo Nomen-dei cum centum & quinquaginta tormentularijs properat. Prius tamen quàm vim adhiberet, Verdugum obteſtatur, vt præſtitis impenſis & penſatis damnis quæ colonis intulerat, pro uinciam ſuam extemplò repeteret. Id niſi ſpò te faceret, vim & arma exſpectaret. Ad hæc Verdugus, Et eum & colonos grauiora mereri, quando tyrannos in regia prouincia fouerent, reſpondet. Inoioſa tam contumaci reſpò ſo offenſus, ciuitatem irrumpit, ſuos vndique inuadere hoſtem iubet. Verduguenſes tantà tormentulariorum copia perterriti, adhæc, vt qui nihil præcauiſſent, incompoſiti inordinatiquæ, omiſſa defendendi ſui cura, terga vertunt: & princeps fugæ ipſe Verdugus in myoparonem raptim inſiliit: certatimq. milites nauigia è portu moliti inde omnes, præter vnũ vulnere impeditum, trepida fuga exceſſere.

*Verdugus
Nomine-
dei eiſci-
tur.*



*¶ Centenus à Caruaiale funditur. Prorex prælij fortunam
aduerſus Pizarrum expertus vincitur
& interficitur.*

CAP. XII.



HÆc Panamæ & Nomine-dei gerebantur: interea Gonzallus Pizarrus ad opprimendum Didacum Cētenum, rebellionē aduerſum ſe moſlientem, Franciſcum Caruaialem Præfectum caſtrorum legatum ſuum mittit. Is Cētenum ad Potoſiam aſſequutus, aggreditur, funditq. vſque-

vsque adeo captiuis militibus immitis vt omnes suspendi laqueo iuberet. Centenus ipse inter tumultum cum Lodoico Riuera & famulo vno in montes quosdam asperos Indis habitatos elapsus nō procul Arequipa, pernitiē effugit. Caruaial ea victoria insolescens & varia per loca infesta arma circumferens, omnia sanguine, ferro flammisque miscuit, Ciarchas diripuit: atque ex eo loco Arequipam, dein Cuscon regressus, latrocinis, suspendiis, & corporū dilacerationibus, quoscumq. Regis partibus fauentes cepit, atrociter vexauit.

Eodem ipso tempore Prorex in Popaiano, prouinciæ Venalcazaris agro erat: à Gonzallo Pizarro instante acriter cedenti diu iactatus, eius manus vix effugerat: tum verò ibi delitescens quum mendaci fama accepisset Pizarrum è Quito Limam concessisse, etsi captiuitate fratris non mediocriter angeretur spem tamen recuperandi imperij, vindictæq. à Pizarristis expectendæ, non omnem abiecit. Itaque Sebastiani Venalcazaris ope quadringentos Hispanos contrahit, acieque instructa procedens: vbi Ottabalū peruenit, Gonzallū nec Limā profectū, nec procul abesse cum valido exercitu aduersus ipsum venientem cognoscit. Hoc tam inopinato nuncio perculsus sub vesperam crebris ignibus ad fallendum hostem passim excitatis, inde prima ferè vigilia mouit: & per inuios saltus atque aspera tesqua raptim exercitum ducens, ne vllō quidem quietis momento ad relaxandū laborem dato, totā eam noctē & magnā sequentis

Prorex vires instaurat.


diei partem, ducibus Indis, ingens viæ spatiū emensus est. Ac vix tandem, fatigatus & propè exanimatus siti, Quito peruenit. Ibi quum Numidica mulier aquæ ampullam vnam ei porrexisset, sitim restinxit: & à ciuib. de exercitu Pizarri diligenter sciscitatus, vbi validum esse comperit, aliquantulum expauit: mox collecto animo, multis consulentibus vt positis armis Gonzalli fidem ac clementiam experiretur: Vel mori strenuè sibi esse melius respōdit, quàm se tali viro, id est tyranno, dedere.

Prorex à Pizarro victus interficitur. EXINDE nonnullorum fidei ciuium diffusus, Quito egreditur & tribus ab vrbe pass. millibus in modica planitie, castris locum deligit. Pizarrus quem dispersis passim exploratoribus nullæ hostis res fallebant, fuga Proregis comperta & quanto flexu viæ copias circumduxisset, milite sequi iussu cedenti instare constituit, & postera die patentibus locis eum adeptus, castra castris contulit. Prorex animosius quàm prudentius suos in aciem e-duxit: neq. illi pugnam detrectant. Ac primo congressu tormētularij Pizarri pilis plumbeis hostium aliquos obtriuērāt: hinc trepidantes equitum alæ Proregi circumfunduntur: ille animosè pugnam ciens omnes pariter in hostem ducebat. Sed transuersam Regionum aciem, equitum turma duce Cepeda incurfans, facillimè perrupit. Prorex ex equo deiicitur, quūmq. oppressus pondere armorum niti ad resurgendum non posset, ignotus aliquandiu inter suorum hostiūque stragem fefellit. Mox quum Quitensis ædituus illac fortè præter-

præteruectus, propius se ad eum applicuisset, tum Prorex: Abstine à me manus, inquit: ego sum Prorex. Sacerdos, Opportunè: tu is es quem nos quærimus. Ac confestim ad licentiatum Caruaialem accurrens, lætum illi hoc nuncium perfert. Is Factoris fratris sui cædem vlcisci ardentissimè cupiebat, quem Prorex manu sua, vt antè diximus, interemerat. Ergo properabat vt iacentem hostem confoderet: ni Petrus de Puellis descendere equo parantem cohibuisset, Haud satis decorum ipsius auctoritati eiusmodi facinus edere, admonens. Ille igitur, seruo ad cædem eius misso, Proregem obtruncari iubet. Interfecti caput abscissum Quiton Caruaialis iussu defertur, & patibulo, vnde capita noxiorum pependant, affigitur. Neque eo ludibrio contenti nonnulli, barbam etiam contemtum vulserunt. Tandem tamen corpus sublatum, deportatur Quiton, & postera die iussu Gubernatoris honorificè conditur.

E o prælio Pizarristarum quinque cedere, aliorum paulo plures. Gubernator moderatè victoria vsus, cum hostibus clementer egit. Venalcazarem quoque, quamquam aduersus se pugnasset, donis prosequutus, in suâ prouinciam remisit, & aliquot præterea Prætores & duces. Boniliam Præfectum-ærarij, & alios Quitenses ciues captos, Chilen in exilium misit. Sed illi comparata clanculum naui in nouam Hispaniam aufugere. In Guaiacuil Manuelem Statium Propræfectum misit: ad Portum-veterem, Lupum Aialam: Sausam

Alphonsum Mercadillium: Trugillium, Didacum Moram. Ad hunc modum ceterarum ciuitatum imperiis distributis, Petrum de Puellis quoque legatum Quito præficit, & inde progressus in ciuitate Regum ingēti omnium lætitia exceptus est.



Petrus Gasca componendis Peruanæ provincie motibus mittitur à Cæsare. Ad Gonzallum Pizarrum scribit. Pizarri & rebellium responsum. Multæ vrbes à Pizarro deficiunt. Centenus Cuscon occupat.

CAP. XIII.

INTER hos Peruenſium motus, nuncius affertur Cæſari Proregem à Limenſibus captum, à Gonzallo Pizarro motam contumaciter rebellionem & ſumta aduerſum ſe arma. Ex quo ingenti dolore affectus eſt, grauiter Adſeſſores incuſans, quòd talia conſenſu ſuo approbaſſent. Mox comperto, præcipuam malì cauſam à Prorege ortam: illūmq. quum nollit prouocationem à nouis legibus admittere, ſeditioni materiem & flammā ſubdidiffe: aliquātum mitigatus, ne prouincia maius detrimentum acciperet, ſuperioribus vulneribus ſanandis quieti ingenij hominem legere inſtituit. Nemo ad eam rem licentiato Petro Gasca aptior viſus eſt, viro quem aſtutiſſimæ vulpis quàm ferociſſimi leonis ſimiliorem facile eſſe crederes. Hunc Præſidis titulo auctum

Vbi leonina pellis non ſufficit, vulpina aſſuitur.

auctum, omnique imperio, autoritate, & quibuscumque voluit petiitque literis ac diplomatis instructum, in Perusium mittit.

Is licentiato Cianca & Renterio comitibus adiunctis, anno M. D. XLVI. ex Hispania vela fecit, ac prospero vsus vento quinquagesimo quinto quàm soluerat die ad Nomen-dei appulit. Inde terrestri itinere Panamam progressus, quam occultissimè fieri poterat, quo statu Pizarri res essent, sagaciter odorando & sciscitando peruestigabat. Siquando à Pizarristis fortè interrogaretur, quam ad rem ex Hispania missus esset, omnibus comiter ac sæpe capite aperto respondebat, Se ad componendos Peruenfes motus, & abroganda Edicta quæ Prorex attulerat, venisse: ac oblitteratis venia omnibus quæ deliquerant, summopere se cupere eas prouincias in pristinum statum reducere, vt omnes honestè pacificèque viuerent. Interdum etiam familiarius cum gregariis militibus sermonem socians, bono animo & hilari esse iubebat: se omnia velle recta & molli via consequi: quintiam diuitiis omnes expleturum pollicitus, non se aliò tendere affirmabat quàm vt ius earum prouinciarum recuperaret: & ipsi agnito errore sub imperium Cæsaris redirent.

*Gasce in
subodoran-
dis hostiū
consilijs mā-
ra soller-
tia.*

His & aliis multis eiusmodi splendidis dictis omnium oculos perstringens, simul Inoiosam aggreditur, & ad tradendā sibi cum exercitu classem sollicitat. Dein ad Pizarrum

*Gascam fallas
ces ad Pi-
zarrum lit-
tere.*

litteras mittit, ²quarum sententia hæc erat: Si Imperium & arma sponte poneret, veniam ipsi omnium antè actorum à Cæsare tribui, & abrogatis legibus nouis omnibus fortunas suas relinqui. Porro ne eorum qui ipsius partes hæctenus sequuti essent, fidei nimium in- niteretur. quippe illos, simulac vocem Regis audissent, veniam & pacem offerentis, omnes ab eo ad vnum defecturos, & perniciem eos- dem ipsi allaturos, quibus salutem suam cre- deret.

HIS acceptis litteris Pizarrus, aduocato primorum consilio, omnes sententiam liberè dicere iubet. Illi, re diu multumque delibera- ta, tandem congruentibus ferme in vnum om- nium sententiis decernunt, Primùm omni ope Gascam Peruanæ prouinciæ aditu prohiben- dum esse: deinde mittendum legatum ad Cæ- sarem, qui de Proregis morte ei explorata om- nia & certa referret: tum Regiæ eius Maie- stati supplicaret, vt propitia volensque pro- uinciæ imperium Gonzallo Pizarro confir- maret. Id si ab eo impetrarent, magnam vim pecuniæ ei se vltro contributuros. His de- cretis, F. Hieronymum Loaisam & Lauren- tium Alda nam in Hispaniam delegant, ac epi- stolam ad Gascam Præsidem communi om- nium nomine scribunt, legatisque eam, sexa- ginta quatuor Prouincialium, qui eas terras pro virili parte manu ceperant, chirographis subscriptam & obsignatam ad eum perferen- dam tradunt. Exemplum eius infrà scri- ptum est:

MA

MAGNIFICE domine, te Panamam ad- *Gonzal*
 uenisse, & nunc quoque de traiectu in Peruen *Spantium*
 sem prouinciam cogitare, accepimus. Equi- *ad Gascam*
 dem si paulo maturius & ante Proregis mor- *magnani-*
 tem venisses, id nobis non minus iucundum *mum re-*
 quàm vtile futurum fuisse testamur. Nunc au- *sponsum.*
 tem post tot intestina bella & Hispanorum
 cædes non tantum parum tutus in has prouin-
 cias aduentus tuus, verumetiam detrimētum
 aliquod grauius allaturus est. Quare multo sa-
 tius videtur, & cum publico omnium bono
 coniunctum vt tu in Hispaniam cum legatis
 nostris redeas, quos ad Cæsarem mittimus, vt
 ei horum motuum causas successusque & con-
 filij nostri summam exponant: petantque ab
 eo vt Gonzallo Pizarro huius prouinciæ im-
 perium proroget ac confirmet, peritissimo
 omnium viro ac longo rerum & tractandæ
 prouinciæ vsu assuefacto: qui etiam propter
 singulares ipsius virtutes ab omnibus meritò
 velut Parens-patriæ habetur & diligitur: qui
 prouinciam pace & iustitia regit, qui Regia
 vectigalia ac redditus fartos tectosque præstat.
 Ac nos quidem eam gratiam à Cæsare acce-
 pturos confidimus, propter egregia in eum
 merita & constantem in obsequio & fide per-
 seuerantiam: quam, etsi ab ipsius Legatis &
 Præfectis bellis ciuilibus, & rapinis adeo vo-
 racibus, vt ne vectigalibus quidem regiis pe-
 percerint, crudeliter vexati, integram hæte-
 nus retinuimus. Facile quoque nos ei probatu
 ros speramus, quæcumq. propugnandi nostri
 causa sumtis in eos armis gessimus. quidquid

» enim huius fecimus, quod leges permittunt;
 » iuris nostri tuendi gratia fecimus. Quare ve-
 » niam aut gratiam criminum nullam ab eo pe-
 » timus: quando deliquisse in eum aliquid nobis
 » conscij non sumus. Te verò pro eo studio ac
 » zelo, quo hactenus semper in Dei cultum &
 » Regis obsequium affectum esse præ te tulisti,
 » magnopere oratum volumus, vt Hispaniam
 » repetas, & quæ his prouinciis recreandis
 » commoda necessariæque esse pro tua pruden-
 » tia perspicis, ea coram ipse Regiam maiesta-
 » tem edoceas. Quod te quidem ita facturum
 » speramus.

LITTERAS quoque dant ad Inoiosam
 (& hoc idem Pizarrus Laurentio Aldanæ in
 mandatis dedit) vt Petrum Gascam L. milli-
 bus ducatorum donatum in Hispaniam re-
 mitteret: aut si potius ita videretur, eum inter-
 ficeret. Id mox, allatis Panamam literis, Lau-
 rentius Aldana Præfidi Gascæ indicauit, mo-
 nuîtque vt ab occultis hostium insidiis ad
 ipsius cædem structis caueret. Præterea ei pro
 certo retulit Pizarrum numquam sponte pas-
 surum vt Peruanam prouinciam intraret:
 quamquam alioqui complures bene in Re-
 gem animati eum multo libentissimè visuri
 essent. Ceterum quum Inoiosa nullo pacto
 adduci posset vt classem Gascæ proderet,
 nempe fidei Pizarro datæ nondum imme-
 mor, ad vltimum tamen Cæsareis literis in-
 spectis, quibus anteaكتور omnibus qui à
 Pizarri factione ad Regem descuiissent venia
 dabatur;

*Inoiosa clas-
 sem Pizar-
 ri, Gascæ
 prodir.*

dabatur , expugnatus eam tandem tradidit: Tanta re tam facilè potitus Gasca, sine qua frustra in oppugnando Pizarro se fatigasset, *Gasca ho-* ingenti lætitia , eundem Inoiosam vt antè *stiumduces* classi præficiens : ceteros quoque classia- *præmiis &* rios duces suo quemque gradu atque ordi- *honorum* ne quem priùs obtinebat relinquit. Simul *specie ines-* *cat.* Nomine-dei aliquot tormenta & machinas aduehi iubet, quas ex Hispania transtulerat: mox etiam Mexico, Guattimala, Nicaragua, Dominica, missis ad præfectos litteris, milites, equos, arma, commeatus, contrahit: pecunias in stipendia militum mutuas à Mercatoribus sumit: Laurètium Aldanam ad promulgandas Veniæ generalis literas & novarum legum abrogationem, tribus nauibus in Perusium mittit.

ILLE Panama soluens, nullo loco priùs terram attigit, quàm in Calliaum Limæ ostium peruenisset. Inde nauim vnam è tribus *Amici cõ-* Trugillium, alteram Arequipam mittens, plu- *fortuna fi-* ribus simul locis Regia diplomata & classis *dem mu-* defectionem euulgat. Qua ex re factum est *tantes.* vt maxima pars ciuitatum, fama de classe ab Inoiosa Gascæ prodita sparfa, à Gonzallo Pizarro deficeret. Primùm Trugillij Didacus Mora, Quiti Rodericus Salazar ab eo desciuere, quorum hic Petrum de Puellis iacentem in lectulo pugione confodit: Franciscus Vlmeus in Guaiacuil Emanuelem Statium interemit, iam tribus aliis in Puna insula ciuibus interfectis. Quæ quidem cædes iam refixo explicatòque aduersus

rebelles & proscriptos vexillo regio, impunè grassabantur.

Q V V M fortè tantas inter rerum procellas ad Portum-veterem essem, Didacus Mendez Lupum Aialam cepit, Moralem trib. mil. singulari iussit: sed ab istis hæc vlciscendi potius rabie quàm studio iustitiæ fiebant. Didacus Centenus à Didaco Aluare Arequipa excitus, è montium latebris, in quas se abdiderat, prodit, & se Aluari iungit. Mox affluentibus quotidie aliis, cum octoginta Hispanorum globo, quos eiusdem causæ fors aggregauerat, Regis nomine Cuscon occupare properat: eam tum trecentorum militum præsidio Antonius Robles obtinebat, quos paulo post ad Pizarrum ducturus erat. Id vt comperit Centenus, noctu urbem intrat: hostes incautos & sopitos opprimit. Multi trucidati, vulnerati plures: dux ipse viuis capitur: ei Centenus ceruices abscindi iubet, & ceteram multitudinem, amisso duce, sub imperium Regis facilè redigit.

Q V A victoria admodum inflatus, Cusco mouet, & Potosiam aduersus Alphonsum Mendozzam & Ioannem Silueiram contendit. Hi duo Pizarri legati erant, eo loco iussa eius cum valida manu expectantes: sed vbi Centenum aduentare intelligunt, ei obuiam vltro egressi copias iunxere. Quibus ille viribus auctus Tiquacacensis lacus claustra occupat & cum exercitu ibi confidet, eo consilio vt Præsidem opperiens, simul obfesso eo transitu omnia itinera hosti intercluderet.

I OMNIVM quæ in Peru acciderant nunci-
 um accepit Carolus Cæsar in Germania (ubi tum
 aduersus Protestantes bellum gerebat) per Dida-
 cum Aluarez Proregis Vele cognatum & Fran-
 ciscum Maldonadum Gonz. Pizarri domesticum.
 Eorum porro malorum remedium aliquamdiu di-
 latum est, tum quòd Cæsar Castella abesset, tum
 quòd morbis nonnumquam implicitus, grauioribus
 curis non vacaret. Tandem Petrum Gascam eò
 mitti placuit, qui tum ex Inquisitionis Hispani-
 cæ collegio & consilio erat, cautum & cordatum
 virum, & cuius animum ingentibus negotiis pa-
 rem sollertiàmque expertus fuerat Cæsar, tum eo
 apparatu, quem paucis antè annis in regno Valen-
 tiæ aduersus Turcarum & Maurorum classem
 fecerat, quam imminere Hispaniæ allatum erat:
 tum aliis negotijs, quæ propriè ad Inquisitionis
 munus & Infidelium conuersionem spectarent.
 Hunc virum Cæsar, abrogatis durioribus illis
 Edictis, quæ Blasco Vele exitium attulerant,
 attributo libero imperio, componendis Prouinciæ
 motibus delegit. Neque ille, gnarus plura consilio
 & astu quàm vi perfici, superbiorem titulum asci-
 uit, quàm Presidis Regiæ audientia siue Curie
 Peru: nihil aliud palam præ se ferens, quàm
 se missum esse, ut omnibus ignosceret, & quam-
 mollissima via consequi posset omnia in pristi-
 num statum restitueret: acceptis tamen à Cæsare
 litteris, sigillis & chirographis, quorum autorita-
 te, si opus esset, vires & milites contraheret: sed
 id clam. August. Zarat. Histor. Peru. libro 6,
 capite 6.

2 PETRVS Gasca longa epistola Gonz. Pizarrum monuit vt abdicato Gubernatoris munere, sponte sub fidem atque imperium Caesaris concederet. Eius exemplum exstat apud August. Zarat. Hist. Peru. lib. 6. cap. 7. Eam per Petrum Hernandem Paniaguam misit, simulque Caroli Caesaris litteras ad Gonzallum Pizarrum scriptas, Anno M. D. XLVI. Earum litterarum sententia hac erat:

Rex.

» GONZALLE Pizarre, tum litteris tuis,
 » tum aliorum relatu, certiores facti sumus de exor-
 » tis in Peruanis prouinciis motibus, ceterisque rebus
 » quæ ibi acciderunt, ex quo Prorex Blasus Nunez
 » Vela legatus noster, & cum eo Regia curia Au-
 » ditores eò missi sunt: quòd nimirum illi nouas leges
 » atque Edicta, à nobis facta ad iustum earum re-
 » gionum regimen, & clementer tractandos earum
 » indigenas, rigidius exsequi vellent. Ac certum
 » quidem habemus, nec te, nec eos qui te sequuntur,
 » eo consilio secessisse vt imperium nostrum exuere-
 » tis: sed tantum vt rigorem & asperitatem declina-
 » retis, qua dictus Prorex ita uti strictè volebat, vt
 » nullam ab iis legibus prouocationem admitteret.
 » Itaque, totius rei veritate accuratè perspecta, si-
 » mul audito Francisco Maldonado, qui abs te &
 » Prouincialibus colonis missus nobis omnia retu-
 » lit: licentiatum Gascam, è sancta & generalis In-
 » quisitionis corpore ac consilio nostro eò mittere vi-
 » sum est. Quem idcirco mandatis ac potestate in-
 » struximus, vt, eis terris pace ac quiete reddita,
 » quæ


quacumque ad Dei cultum, provinciarum consti-
 tutionem ac decus, & colonorum, clientium nostro-
 rum, & indigenarum, comoda pertinere ipsi vi-
 debuntur, ea omnia curet ac provideat. Quare
 vobis mandamus atque iniungimus, ut quacumque
 dictus Licentiatius nostro nomine vobis edixerit,
 ea præstetis, ac perinde dicto audientes ei sitis,
 ut si ea à nobis ipsis mandata essent: tum ut
 quancumque poteritis, favore & ope eum
 iuuetis, quò facilius commissa à nobis perficere
 & exsequi possit. Quod vos præstaturos confidi-
 mus. Ac me quidem scito habere in memoria,
 & habiturum benefacta & officia in me vestra,
 tum quacumque Marchio Franciscus Pizarrus
 frater tuus imperij mei propagandi causa, præ-
 clare & fortiter gessit: atque eorum tum liberis
 eius tum fratribus suo tempore premia persolutu-
 rum. V E N E L O, XVI. die Februarij.
 Anno M. D. XLVI.

EGO REX.

Mandato sue Maiestatis:

Franciscus de Erafo.

z.ij.



Gonz. Pizarrum amicorum præcipui deserunt. Centenus ab eo, prælio vincitur. Chilensem provinciam, suadente Carnaiale, petere abnuir.

CAP. XIII.

Gonz. Pizarri inuictus in aduersis animus.

INTEREA Pizarrus è Regum ciuitate miseram partium ruinam, & paulatim diffugientes cum fortuna amicos, conspiciens, eos præsertim qui suscipiendi huius incepti præcipui ipsi autores & participes fuissent: ac iam à Petro Inoiosa, in quo vno maximè spem ac præsidium rerum suarum collocauerat, classem Gascae proditam, atque ab omnibus ferè sociis populis sumta in se arma: ingenti quidem dolore percuti, non tamen tot aduersis casibus frangi aut animum abiicere. Itaque aduersum mala insistens spei, Ioannem Costam ducentis cum militibus Trugillium aduersus Didacum Moram mittit: sed is quum Didacum Cassiamalcam concessisse & se validiorem esse comperisset, Limam reuertitur. Eum mox Pizarrus cum maioribus copiis Cuscon ablegat, vt inde Centenum eiiceret, quem in ea vrbe esse existimabat. Paulo post istius discessum, Laurētius Aldana Limensem portum quatuor nauibus inuectus, ingentem Pizarri exercitui terrorem intulit.

IN ea trepidatione Ioannes Roias & Alphonsus Maldonatus cū multis aliis Pizarrum de-

deseruere. Pizarrus ne plures ad hostem transfugerent veritus, Lima Arequipam migrare constituit: sed ne ea quidem res licētiati Caruaialis fugam morari potuit, qui cum omni familia, cognatis & amicis repentē à Gonzalo desciuit. Eius hominis transitio Gubernatoris animum vehementer pupugit, quòd is ē primoribus exercitus ducibus erat, & inter omnes amicos præcipuo honore cultus à Pizarro. Ergo ipse Lima excedens, per celeres equos ad Ioannem Costam scribit vt quamcelerrimē Arequipam veniat. Quum prope Guamanguā esset, Sottus summus Præfectuscastrorum, Martinus Vlmeus trib. mil. cum maxima cohortis parte, eum deseruerunt. Interea Arequipam ipse, Laurentius Aldana Limam ingreditur, & vexillum Regium attollit.

*Pizarrus
amicorum
præcipuorū
defectioni.
bus vulne-
ratur.*

GUBERNATOR, reuerso Ioanne Costa, dubius animi, eum & reliquos amicos qui fidem non mutauerant, in consilium adhibet, quid optimum factū esset exquirens: neque enim iam de imperio sed de salute agi. itaque quando retinendæ prouinciæ nulla spes esset, vitæ saltem consulerēt. Quum omnibus noua exilia, nouas quærendas terras placeret, & ad id Chilensis prouincia opportuna videretur: Pizarrus militem ire in ordines & disposito agmine ingredi iubet. Quingenti ferme Hispani milites, multis Indis lixis & calonibus admixtis, erant.

AT Pizarrus cogitans recto itinere tendentibus necessariò transeundū esse, quā Centenus cum mille ac ducētis Hispanis angustias

quasdam infederat, Franciscum Spinofam cum triginta equitibus viam propter alueum Tiquacacensis lacus sequi iubet, vt hosti velut illac ituri speciem præbens, eum ad impediendum transitum in illam partem auerteret. Ipse verò diuersa via, Caruaiale Præfecto-castrorum cum toto exercitu præmisso, per Vscouium asperrimos Guamangæ montes præstringens tendebat. Ibi sacerdos fortè reperi- tus, Cæsarei exercitus explorator, ab eo sus- pendii iussus est. Centenus ab Olea trib. mil. qui ad eum transiuerat, de Pizarri cōsilio edo- ctus, ex eo loco mouet & Pucoranum prope- rat. Pizarrus vbi hostem rectâ ad se tendere, comperit: se Guarinæ saltu & hostilibus co- piis clausum ac viribus imparem: mittit ad Centenum, Se prouincia omni vltro exceden- tem in Chilen migrare: proinde transitum li- berum abeunti concederet. Centenus enim- uerò negare se daturû, sed petere vt se in ipsius fidem ac potestatem permetteret. At Pizarrus:

» T V N O N es Rex, inquit, vt me tibi dedam:
 » tu nuper vnus è meis clientibus & domesticis
 » eras: verùm quum fortè aliquid à me flagitan-
 » ti negassem, tu aduersum me arma sumfisti.

Prelum
Pizarri cū
Centeno.

A B hoc responso, Centenus vltèrius per- gens, emissarij Tiquicacensis lacus ponte in- terfisso, Pucoranum peruenit, ibique x v. millibus pass. à Pizarro castris positis aliquot dies confedit, ratus haud dubiè Pizarri milites ad se transitionem facturos. Verùm vt ab illis nihil moueri videt, octo millia pass. propius hostem admotis castris: copias Alphonso Men-

Mendozzæ & Ioanni Silueræ legatis tradit. Ipse, lateris dolorem causatus, cum Ioanne Solano Cuscenſi episcopo in tutum locum secedit. Alphonſus Mendoza & collega, quibus hostem ultro aggredi certum erat, aciem tumultuariè, ac contemtu hostis negligenter ordinât. siquidem iam certam victoriæ spem præceperant animis, multa & vana iactantes & ludicra inter se cientes certamina, quum videlicet se Pizzarristis, etiamsi triplo tanto plures essent, faciliè pares esse dicerent.

CARVAIAL de ordine & loco in quo hostium acies instructa stabat ab exploratoribus edoctus, confestim ad Pizarrum, Illustrissime Gubernator (inquit per Deum iurans) ecquid proditores istos inuadimus? quid cessamus? victoria quidem in manibus est. Simulque dispositis agminibus, cum maxima tormentulariorum parte ceteram aciem strenuè antegressus, repentino incurſu hostium stationes irrupit. Ac primo quidem congressu tormentularij ingentem stragem faciunt. Sed Alphonſus Mendoza cum XL. tormentulariis, & omni suorum equitatu in Pizarri alam vehementer inuectus, propè in fugam verterat: ni Caruaial huc illuc ad animandos milites agmina obequitans, quâto indiscrimine esset Gubernator animaduertisset. Simulq. is Ioânem Torrem ad opem ferendam nomine ciens: Agedû, inquit, patrono nostro succurramus, qui in magno periculo est, ni maturè subueniatur. Ergo accitis promptissimis in eam partem accurrentes, præliû in fau-

*Pizarri vi-
etoria de
Centeno.*

rant, nec tantum labantem sustinere aciem, sed omnibus viribus ad victoriam connisi, pepulere hostem. Tandem Centeniani quum furētium inimicorum impetum tolerare non possent, abruptis ordinibus & defessi funduntur. Simulac suorum fugam Centenus è tuto conspexit, non expectato episcopo, insiliens in equum aufugit. E Pizarri exercitu circiter octoginta Hispani cecidere. Cepeda & Ioannes Costa vulnerati sunt. Ex hostibus quadringenti & quinquaginta desiderati sunt: in iis Ioannes Siluera & alij tribuni mil.

SECUNDVM eam victoriam Pizarrus Caruaialem cum xxx. tormentulariis versus Arequipam mittit, si fortè Centenum fugientem exciperet. Is Centeno nō reperto, urbem intrans, aliquot ciues pecuniis spoliatur. Pizarrus Bobadiliam trib. mil. cum totidem militibus, Ciarchas petere iubet, & quidquid equorum armorumque nactus esset capere: Machicao & sex aliis Hispanis gulam laqueo frangi curat, quòd sub initium pugnae ad Centenum transfugissent: ceteris ignoscit, quum fidelem ipsi operam præbituros in posterum promitterent. His gestis, Guarina mouens Cuscon petit: urbemque intrans cum ingenti omnium ciuium metu, licentiatum Martellum & duodecim alios è primoribus ciuitatis suspendi iubet: ex auro & argento arma fabricanda curat, urbemque excubiis & valida custodia firmat.

TRADUNT nonnulli, Pizarrum à Caruaiale monitum, ne militum quos ex Centeniclade

clade collegisset, & aliorum præterea quorundam fidei crederet. quippe prodituros eū ubi se occasio tulisset. Verū potius in Chilensem prouinciam concederet, quacumque transiret terram vrens populānsque & sequētibz hostibus omnia vastitate præripiens, ne comæatus militi, seu pabulum equis suppeteret. Porro ad hæc respōdisse Pizarrum, Sibi stare animo, aut vitam amittere, aut prouinciam seruare. Tum Caruaial, horribiliter derisus: Age, inquit, pergamus, quando ita lubet, Illustriss. Gubernator: mihi quidem scias tam bonas ceruices esse quā Dominationi tuæ. Equidem si tam sapientis consilij ratio à Pizarro accepta esset, frustra in eo persequendo Petrus Gasca caput scaberet, & incassum se ac militem fatigaret, nihil ex eo incepto præter inritum laborem in Hispaniam relaturus. Verumtamen Pizarri res eum exitum habere necesse erat.

*Proditorū
numquam
tuta fides.*

*Pizarro
sano consi-
lio uti ne-
scit.*



*¶ Gasca in Peru traiecit, Pizarrum prælio vincit. In eum,
in Caruaialem & ceteros moxios
animaduertit.*

C A P. XV.



INTER hæc Præses Gasca duodecim onerariis nauib. cū magnis tū modicis Panama soluit, quæ omnes fermè mercibus onustæ erāt, eum quingentis militibus quos in omnes na-

ues diuiferat. Ex iis Liburnicam vnam, seu bireminem celerem, quæ remigio impelleretur, efficiere conatus est: sed frustra, prærapida aquarum celeritate impeditus, quæ iis interdum locis torrentis instar decurrunt. Ergo decursum eum maris aduersum subiens atq. ægrè inde eluctatus, hiberno videlicet tempore: vix tandem in Mantæ portum peruenit.

*Hispani multos interficiunt, qui ob simul-
tates multas inter-
ficiunt, qui-
bus causam
partium
pretendunt.*

FORTE tum Portum-veterem Franciscus Vlmeus cohortis vnus præsidio obtinebat: is audito Præsidis aduentu, cum Didaco Mendez aliisque ciuibus ad eum excipiendum obuiam egressis, ei ad mare occurrit. Ibi ab illis cognoscit quo in statu res Pizarri essent, & vt ab eo omnes propè ciuitates defecissent: vnde incredibili affectus lætitia, postquam tamen Moralis, Emanuelis Statij trib. mil. aliorumque ciuium patratas cædes accepit, tali oratione eos increpuit: Vos, inquit, dum Regi seruire vos dicitis, per speciem obsequij & hominum cædes patratis & priuatas iniurias vlciscimini. Rex eiusmodi obsequiis non eget.

MOX inde digressus, breui Tombesiam appellit: tribunū mil. ad San-michaelis coloniam mittit, qui transfugas à Pizarro deficientes colligeret: Mercadilium trib. mil. à Bracomoriis arcessit. Breui quoque eius accitu Quito Salazar, Popaiano Sebastianus Venalcazar cum multis Hispanis venere. Exin nuncio accepto, Didacum Moram Cassiamalcaesse cum valida manu, & omnibus ex locis ad partes iuuandas auxilia concurrere, Præfces missis

missis ad Nouæ Hispaniæ Præsidentem literis, remittere se illi cogendi supplementi laborem significauit, quippe eo opus non esse. Eodem exemplo ad Nominis-dei, Nicaragua, & aliarum regionum Præfectos vnde auxilia exciue rat, scribit. Neque ex iis ullus venit, præter licentiatum Ramirem: is nauim vnā militibus & commeatu onustam ad Gascā adduxit.

INTEREA Gasca Inoiosa per montana cum maxima parte copiarum mittit, vt Hispanos qui Sausæ erant colligeret: ipse maritimo itinere Trugillium profectus de Centeniclade ibi nuntium accipit. Ex quo non medio cri dolore affectus, aliquandiu hæsitauit an ulterius procederet. Donec trepidantem confirmarunt sui, hortantes ne hac vna clade teritus irritum inceptum omitteret: quippe ipsi ad profligandum hostem abundè superesse militum: ad hæc hostilis exercitus maximam partem inuitam Pizarro seruire: simulque vt vexillum Regium conspexissent, ingratam militiam deserturos. Quibus ille monitis acquiescens, versusque in consilia belli, Alphonsum Aluaradū ad cohortes accipiendas quas Laurentius Aldana contraxerat, Limā delegat: exploratores multos cum Hispanos tū Indos ad itinera & cōsilia Pizarri speculāda præmittit.

INTENTO in hæc Gasca, Episcopus Cusensis & Alphonsus Mendoza, cum paucis victi exercitus reliquijs Trugillium superueniunt: & diuersa ex parte Didacus Mora Cassiamalca: Petrus Inoiosa & alij duces alijs è locis suas eò quisque copias adducunt.

*Gasse ap-
paratus.*

Iam Præses circa se non spernendam manum mille & quingentos milites habebat. itaque quod supererat, arma inspicit, vehendis machinis carros instaurat, plures globos & pilas ferreas, hastas, & lanceas, fieri curat. Quibus perfectis, cum toto exercitu mouet: Indi sarcinas & commeatus humeris ferebant, iique longo versu victi ne aufugerent: sub iniquo onerū pondere laborantes plerique agmen sequi nō poterant: alios adeo vehemens sitis fatigatos exurebat, vt linquente spiritu humi corpora prosternerent. Ergo istos, quum alleuare se non possent, Hispani immaniter gladiis decubant: quorundam etiam, quibus catena collo inserta erat, capita amputantes, ne videlicet in iis eximendis longiorem moram ternerent, aut si funibus reuincti essent, costas & latera ferro transfigentes: nonnullos quoque cruribus, alios naso, quosdam lacertis, aliquos etiam cruribus amputatis, truncos & laceros abiiciebant: donec tandem Præses Saufam, Indi Guamangnam peruenere.

*Hispani-
cia aduer-
sus Indica
mancipia.*

PORRO iter facienti primū obuius fit Valdiuia, ad eius opem è Chilensi prouincia accurrens, ac post eum Centenus: sed quum Andagolianorum prouinciam ingressus esset, alimentorum inopia atque insalubrium ciborum perniciosi succi (quippe exercitus Maizio duntaxat immaturo cocto, aut certè raptim tosto, vescebatur) tum etiam continui imbres & humidum terræ, per omnem ferè exercitū morbos vulgauere: donec Abancaia flumine transiisso, allata ab indigenis & finitimis populis

pulis cibaria, militem vtcumq. refecere.

Eo loco quum interfecissos ab hoste pontes omnes Præsces cognouisset (iunguntur autem flumina earum regionum eiusmodi pōtibz: Prælongas arborum virgas, eadem ferè crassitudine qua perticæ salignæ apud nos sunt, simul connexas, mōxque instar rudentū intortas, reticulato opere ab vtraque ripa deligant: ex his ita contexti ponticuli, quamuis non equiti, pediti tamen facilem transitum præbent) quum ergo eius formæ pontes abruptos nunciatum esset, eos Præsces ab Indis reponi & instaurari iubet. Quibus incredibili celeritate refectis, Apurimam fluuium haud procul Cusco cum exercitu incolumi transmittit: præter paucos milites & equos, qui prærapida vi fluminis ablati & aquis hausti sunt. Inoiosa & Petrus Valdiuia quum in vltiorem ripam euasissent, cum Lxx. tormentulariis editum collem, munitum natura & vtrisque opportunum, dum totus exercitus traducitur, occupant. Vix eum locum infederant, quum Ioannes Costa cum quinquaginta tormentulariis ad eum capiendum Cusco egreditur. Sed vbi hostes in vertice conspexit, extemplò in urbem regressus Gubernatori, adesse hostes & à Præscede transmitti flumen renunciat. Ille cum nongentis Hispanis & multis Indis Cusco egressus, in conspectu hostium ad Saguifaguanam castra locat.

PRÆSES, traiecto fluuio, quum fortè locum frigore ac gelu infestum, lignorum & commeatus inopem, insedisset, veritus ne sui

*Gascæ de
Pizarro vi
etoria.*

ad Pizarrum transfirent, cui eæ res abundè suppetebant, maturè acie decernere instituit. Itaque bonam noctis partem in expediendis armis consumit: ac luce orta milites ingentium præmiorum spe ac promissis implet, quod sæpe dixerat etiam atque etiam inculcans: Irent fortes ac pugnam strenuè capefferent: se qui omnia eorum causa vellet, bene meritos de se milites præmij expertes numquam passurum. Mox signis explicatis rectà ire in hostem iubet. At Pizarri clades à Cepeda cœpit. Quum enim eum ad angustias quasdam colli vicinas, quas hostis petiturus erat, occupandas præmisisset, ille repentè ad Præsidem transfugit, & post eum quinquaginta tormentularij transeunt. Ceteri destituti à sociis & subito pauore perterriti, abiicere arma, & quæ quisque potuit, alij in castra Cæsaris, alii aliò erumpere. Tum Inoiosa quantum niti poterat clamitans, hortatur suos instare perculsis. illi nullius rei magis quàm prædandi memores, ad diripienda impedimenta vertuntur: minus tamen prædæ quàm sperauerant ex hostium castris redactum est. Cæsarianorum vñus tantum Hispanus in acie cecidit: hostium, quinque.

*Pizarri in
rebus de-
ploratis
magnani-
mitas.*

GONZALLVS Pizarrus ab omnibus præterquam à paucis legatis & tribunis mil. destitutus, ad Ioannem Costam conuersus, Nos verò, inquit, tribune, quid faciemus? Costa: » Quid superest, inquit, Illustriß. Gubernator, » nisi vt exemplo Romanorum fortiter moriamur? Tum Pizarrus excipiens: Absit, absit, inquit,

inquit, vt honore & opibus amissis, animam quoque perditum eam. Secundum hæc dicta fortè Villam Vicentium prætereuntem conspiciens, sciscitatúsque qui esset, postquam is respondit, se exercitus Cæsarei primum Tribunum esse (Sergentem-maiorem vulgò vocant) tum ipse, Et ego, inquit, male fortunatus Gonzallus Pizarrus sum. Inde ab eo ad Præsidentem deducitur: cultu in primis eo die notabili. Insigni & præualēti vehebatur equo, quem præfulgentes argenteis bullis phaleræ vndique adornabant: ipse munimentum corporis leue indutus, nitentem ex auro purissimo galeam, cristis, & signo plurimis clarissimis sinaragdis distincto decoram gerebat.

PRÆSES verò cum in conspectum adductum sic alloquutus est: Quàm rectè fecisse tibi videris, Gonzalle Pizarre, qui occupata Cæsaris prouincia aduersus eum arma sumseris, & vectigalia eius consumseris? Pizarrus: Meos redditus, inquit, consumsi, non Cæsaris: prouinciam verò mihi pro meo iure vt Gubernator possidere visus sum, quam videlicet ego ac fratres mei armis subactam pro virili manu cepimus. Hoc responso audito, & Pizarro è conspectu amoueri iussò, Præses eius iudicium licentiato Ciancæ committit. Is vbi edita in reum crimina causamque cognouit, ei perduellionis ac proditiōis noxā iudicat. Præses damnatum ad capitale supplicium postera die abduci iubet. Corpus Cusci humanum, caput Limam delatum est, & in foro, septo cancellis ferreis loco, pilæ lapideæ impositum. Hic Gonzalli Pizarri fuit exitus.

*Gasca ad
Pizarrum
captum o-
ratio.*

*Pizarri
mors.*

Vegeto ac valenti corpore vir fuit: valetudine prospera, animi magni: auarior tamen quàm liberalior, literarum planè imperitus, & facili in omnes credulitate.

*Caruailis
exitus.*

P O S T hæc in alios quoque noxios animadu-
uersum. Caruailalem semiquadrantis horæ
spatio ad caudam religatum per campum tra-
xit equus: mox è patibulo suspensum in qua-
tuor partes dissecuit carnifex. Quum ad sup-
plicium traheretur, imperatorem suum Gon-
zallum Pizarrum crebrò suspirans flagitabat.
Pridie quàm moreretur, quum eum Didacus
» Centenus fortè inuisens ita cōpellasset, Dom.
» præfecte-castrorum, inquit, vbi nunc sunt tui
» illi militares vngues? ita ei respondit, Mihi, in-
» quit, erepti sunt in ipsa acie tamquam bellato-
» ri strenuo: sed tu vt vili & ignauo prostibulo
» ortus, è prælio fugisti. In eo viro sæuitia aua-
ritiæ par fuit: & exiguo illo temporis spatio
quo in Gonzalli Pizarri exercitu Præfecti ca-
strorum munus obiit, amplius trecentos Hi-
spanos occidit.¹ Quum aliquem suspenderet,
» sæpenumero ridens ei dicebat: Audiui te esse
» equitem: æquum est igitur eum tibi haberi
» honorem qui tuæ dignitati & nomini conue-
» niat. En tibi aliquot arbores: ex iis quamcum-
» que libuerit deligito: ea tibi à me fiet gratia
» vt ei quam optaueris suspendaris. Mox vbi mi-
ferum talibus sarcasmis aliisque eiusmodi
ludibriis eluserat, suspendi iubebat: assiduè se-
cum ad eius operis ministerium quatuor Nu-
midas circumducens. Longum esset comme-
morare fœda omnia & crudelia facinora
quæ

quæ iste passim edidit. Mortuo Caruaiale, Ioannes Costa & Ioannes de Torre aliique vndecim tribuni mil. suspensi sunt: multi milites virgis cæsi & in Hispaniam ad triremes damnati, alij in Chilensem oram exsulatum missi, Valdiuiam eius prouinciæ Gubernatorem sequuti sunt.

I OCTOGINTA annorum tunc erat Caruaial. Sub Gonsaluo Fernando, imperatore celebri, stipendia fecerat. Bellator primus, Rquenati prælio signifer: ceterum seuitia adeo insignis ut de eo prouerbiū vulgatum sit inter Hispanos *Crudelis ut Caruaial*. In eo prælio quo victus est ad Guarinam Didacus Centenus à Pizarro: Ferdinandus Bacicaus, inclinatum ad Centenum victoriam cernens, nec transire apertè ausus, clanculum secessit: neque tamen adeo fefellit, quin eius rei certior fieret Caruaial. Ergo, fuso Centeno, Bacicaum corripiens: & Compatrem suum per ludibrium appellans, ut reuera erat, multaque alia in eum salsè iaciens, in patibulum egit. Adeone simplici quidem seuitia in amico contentus fuit. *Aug. Zarat. Hist.*

*Peru libro septimo
cap. tertio.*

*

A



Gasca res Peruanas componit. Milites promissis explere frustra conatur. Contraria fratres in eius pecunias inuolant. Ille, recuperatis omnibus, in Hispaniam traiecit.

CAP. XVI.

SUBLATO partium duce Pizarro, Præses Cuscon ingressus, Hispanos omnes qui vassallos & subditos haberent, quosdam donis, plures promissis onustos, domum remisit: de strenua & fidei erga regem opera eorum gratias agens. Dein Gonzalli Pizarri aliorumque qui perduellionis damnati fuerant, ædes solo æquat, & arcis salem inspergit: mox Cusco excedens Purimam petit. Ibi cum Hieronymo Loaisa Archiepiscopo Limensi & Petro Lopez scriba suo de assignandis agris diuidendisque inter colonos Indis vassallis, consilio habito habito: Inoiosa centum millia ducatorum annui redditus attribuit: Valdiuia paulominus: sed hic postea non diu vixit. Venenosublatum fuisse ferebant. Ceterum Præsidem in hæc præmia & annuos redditus amplius decies centena & quinquaginta ducatorum millia pluribus erogasse constat.

Gasca duce de se benemeritos præmiis afficit, milites negligit.

VERVM vulgata eius diuisionis fama, multi milites, qui summis periculis ac sudoribus strenuam fidelémque operam Regi præbuerant, ac gaudio alacres haud ambigua spe mercedem laborum exspectabant: vbi se solos

los indonatos & præmiorum expertes præter
mitti videre, vehementer conqueri de Præ-
fide ac fremere apertè cœperunt. Mulcebant
iratos benignis verbis ipse & Archiepiscopus
quantum poterant: Sibi quidem non esse in
præsentia dicentes; quod ultra largirentur: sed
breui daturos operâ vt omnes dignâ meritis
gratiam referrent. Sed illi dictis vsque adeo
non placabantur, vt etiam vecordes seditio-
sis ac contumeliosis vocibus eos increpare &
ferocissimè obloqui auderent.

E A R V M aliquot haud illepidâ exempla
referam. Haud multis abhinc annis Cordubæ
Monacha erat (Magdalenam de Cruce appel-
labant) non tantum plebis opinione, sed Hi-
spaniæ quoque procerum iudicio pro diua &
fatidica vulgò habita. Quin ipse Cæsar expe-
ditionem nullam ferè aut inceptum aggredie-
batur, vt ad eam velut ad oraculum non mit-
teret, rogarètque vt fufis pro se precibus rem
Deo commendaret. Tandem aliquando frau-
de patefacta, compertum est sortilegam eam
mulierem esse, eique cum diabolo familiare
consuetudinem intercedere. Eiuscemodi Ma-
gdalenam de Cruce ipsum Præsidentem esse, ei
in os exprobrauit miles, eumque iniri à dia-
bolo: Archiepiscopum videlicet iis ambagi-
bus designans, quod Præsides nihil sine eius
consilio & sententia ageret.

A L I V S obiecit, astutiorẽ eo vulpem
cælo non tegi. Alius furens & exspes ei
dixit, Se in quam remotissimas terras abi-

re velle, vnde ne nomen quidem Hispaniæ audiret. In hunc adeò exarsit Præses, vt nisi optimos precatores habuisset, qui à Præsīde ei veniam exorassent, eum illico in patibulum acturus fuerit: tum verò remissa vltima pœna
 » in Chilen relegauit. Quidam etiam miles ri-
 » dens Præsīdem sic affatus est: Domine Præ-
 » sīdens, date mihi, quæso, de gratia birretum
 » illum quem vos habetis in capite. Tum Præ-
 » ses & ipse renidens: Ecquid vis illo facere?
 » inquit. Miles: Volo comburere, ait, & redi-
 » gere in puluerem ad facienda maleficia: quan-
 » doquidem vos cum illo tot bonos viros
 » decepistis: Alij vulgò in eum iaciebant, Venisse eum vt veniam daret tyrannis, & fidos Regis seruos occideret. Nonnulli minaciter dicebant, Nisi daret vnde viuerent, semet vltro vndecumque possent rapturos.

Hic tam perturbatus rerum status eò tãdem erupit, vt non pauci coniuratione facta Inoiosam interficere, Præsīdem vinctum in Hispaniam mittere, Cæsarem per litteras orare decernerent, vt sanctum atque innocentem aliquem virum eò mitteret, qui agros & ditiones prouinciæ omnibus vt quique meritus esset, de integro diuideret. Verùm quum omnia foras emanassent, captis consilij autoribus & in Hispaniam missis (in iis erat sacerdos Cantaber, qui se eo bello operam nauantem Cæsari quadraginta millia ducatorum consumsisse dicebat) ea tum quidē coniuratio in præsens repressa est. Verùm non
 multo

multo pòst quàm Præses Perusio in Hispaniam vela fecerat, noua seditio erupit. O-
 ctingenti exciti Hispani quendam Franciscū *Seditio mi-
 litaris in
 Peru.*
 Ernandem ducem & caput sibi imponunt: Petrum Inoiosam, Balthasarem Castellanium equestrem ducem, fratrem eius, & Didacum Palominum obtruncant, & quoscumque alios tribunos mil. & illustres viros adipisci potuere, qui primò Gonzalli Pizarri partes sequuti ad Gascam defecerant. Sed is motus statim restinctus est, sublato seditionis capite Ernande, quem noctu sui cum aliis aliquot tribunis interfecere.

CETERVM Præses, nequid incommodi ab iratis pateretur metuens: tum etiam ne contumelias & probra quâs à militibus lace-
 rabatur coram ipse audire ac videre cogere-
 tur: Purima relicta Limam concedit. Ibi Regiam curiam & iuridicos magistratus constituit: prouinciæ statum composuit, quæque *Gascæ Edi-
 cta in Peru*
 ad eius regimen pertinerent descripsit. In primis edixit vt sacerdotes ac monachi in singulos Indorum pagos tributum & Christianam fidem edocentes, falsas & peruersas opiniones ex eorum animis euellerent. Hispanos omnes, qui subiectos sibi vassallos & clientes haberent, omnium Indorum censum agere iussit, & vniuscuiusque fortunarum rectæquæque æstimatione inita, pro censu tributum modum describere. Ceterum in singulis quærent pagis missam vnâ Spiritus sancti (vt vocant) celebrari voluit, quem æstimatores orarent vt diuina ipsius ope adiuti in

cenſu peragendo ſanctè atque innocenter ſeſe gererent.

SED eo demum perfectò , ſummæ tributi imperatæ Indi reclamauerunt : Sibi multo plus indici querentes quàm pendere poſſent: maxima videlicet indigenarum parte vel aſſiduïs bellis exſtinctâ, vel enectâ laboribus, quibus ab Hiſpanis inclementiùs vexati eſſent. Edixit præterea vt Indici vaſſalli ſuis Senioribus ſeu patronis ex earum tantùm rerum genere tributum penderent, quas tellus ſua funderet. Quippe ante hæc Hiſpani aurum & argentum, quamuis deeſſet, ab illis flagitantes, vt quærerent, tormentis vrgebant: ac ſiqui fortè, quum nec poſſiderent aurum, nec vnde parare poſſent haberent, in ſiluas ſe abdiderant, Hiſpani eos veluti feras indagantes ſagaci canum odoratu perueſtigabant: multòſque ita repertos efferati canes dilacerauerunt: ipſi verò, damnata vitæ ſpe, tantas ærumnas ſuſpendio finiebant. Vetuit præterea Præſes ne in poſterum Hiſpani Indos inuitos ad ferenda onera adigerent: quamquam in nonnullis provinciis, præſertim in Quitenſi, penuria iumentorum eos onerari permiliſit.

Hiſp. ſenioria exemplum.

PORRO earum omnium rerum curam Archiepiſcopo Limenſi & quibuſdam Dominicanis commiſit: qui tum Hiſpanorum tum Indorum cauſis inſpectis, vbi verum comperiffent, pro ſua prudentia de rebus ſtatuerent. Ipſe verò totus in accumulandis Cæſari pecuniis, Hiſpanos provinciales omnes, quibus

quibus agros & ditiones assignauerat, stipendiarios facit, pensione imposita quam Cæsari soluerent. Licentiatum Gamam in Quintensensem prouinciam, Gabrielem de Roias diuersa parte in Potosiam Iudices assiduos cum Dominicanis aliquot monachis mittit, ac nominatim eis negotium dat ut peragrantes omnes eas terras, tum ab Hispanis colonis, tum ab Indis ipsis pecunias quantas maximas possent conquirerent. Atque illi ad eam rem minimè segnes, non ius aut verum in cognitionibus, sed solam opum magnitudinem, spectabant. Itaque passim specie iuris obiciendo, Tu in Regem rebellasti: tu Gonzallo Pizarro operam præbuiisti: tu euentum spectasti ut fortunæ tua consilia applicares: tu optasti ut vinceret & prouinciæ imperium occuparet: his, inquam, & aliis eiusmodi speciosis accusationum coloribus, ambo ingentem pecuniarum vim collegerunt. Inter hæc Gabriel de Roias in itinere subita morte extinguitur: ac plerique ferebant iusto Dei iudicio interceptum: & à Deo tandem exauditas esse diras & maledictiones vulgò à miseris prouincialibus in acerbissimos illos exactores iactas: moxque istum horribilis cacodæmonis specie quibusdam Dominicanis monachis apparuisse.

A T Præses, posteaquam quantam maximam potuit vim pecuniarum collegit: quæ decies centenum & quinquagenum milium Castellanorum summam æquabat, Pro-

præsidem in sui vicem licentiatum Ciancam relinquens, Lima decessit, & myoparonem Ioannis Caietani conscendens breui Panamā appulit: mōxque inde statim Nomen-dei cum pecuniarum parte profectus, Quæstorem regium reliquam summam, quamprimum posset, mittere ad se iubet.

*Contrera
fratres col
lectas à
Gasca pe-
cunias ra-
piunt.* B I D V O postquam inde decesserat ¹ Rodericus Contreras eiusque frater, inconsulti iuuenes, Roderici Contreræ Gubernatoris Nicaraguæ, filij, cum centum octoginta militibus de improviso Panamam irrumpunt. Isti Fratrem Antonium Valdiuiesam illius prouinciæ episcopum interemerant, quòd ad Cæsarem multa in ipsorum patrem scripsisset cui ob id abrogatum munus & erepta prouincia fuerat.

Tum verò ingressi Panamam quadringenties millies amplius ducatorum auri inuolant: neglecto argento vt grauiore & minoris precij. Nec ea præda contenti nonnulli milites, qui quū ad triremes à Præside damnati in Hispaniam mitterentur, naue vna rapta in Nicaraguam aufugerant: vindictæ cupidine ardentes, Nomen-dei quoq. petere statuunt. Ergo diuiso trifariam exercitu, Rodericus cum septuaginta quinque militibus terrestri itinere Nomen-dei contendit: frater eius cum totidem focijs secundo amne Chiagro defluens, eòdem iter capessit: ceteri ad præsidium nauium & partē prædæ custodiam remanent.

V I X Panama egressi prædones erāt, quum
ciues

ciues manu facta cum centum & quinquaginta amplius mancipiis, abeuntes insequuti, primum eos assequuntur qui per Chiagrum flumen delabebantur, eosque adorti facillimè fundūt. Mox alterum quoque adepti agmen, & illud profligant. Rodericus & monachus quidam cum quatuor aliis Hispanis in vicinas silvas se abdunt: nec deinceps quidquam de iis compertum est.

RODERICI frater quum non comparet, diligentissimè inter cæforum cadauera quæsitus: ac reperto fortè adolescentis cuiusdam corpore, quum illum ipsum vnus militum eius esse diceret, etsi lutulenta & confusa facie satis quis esset internosci non posset: quisquis tamen ille esset, auulsum corpori caput in medio Panamæ foro ferreis cancellis septo loco pilæ impositum est. Tres & triginta Hispani capti, labore ac vulneribus fessi reuinctisponè tergum ad ligneum cuneum manibus in urbem tracti sunt & in custodiam traditi. Eos ibi prætor quidam rerum capitalium, proprio motu, crudeliter pugionum ictibus confodit. Ceteri qui in nauibus erant, audita suorum clade, scaphis subitò fugam capessunt: sed breui omnibus captis, præcipuique suspensi, ceteri ad triremes damnati sunt. Interea Præses, audito Contrerarum latrocinio, cum valida manu Nomine-dei aduersum eos egreditur: sed accepto in itinere de eorum clade nuncio, & receptis pecuniis, in urbem regressus, breui inde in Hispaniam traiecit.

I QVO tempore Petrus Arias Abulensis Nicaraguam prouinciam à se inuentam regebat, filiarum unam Roderico Contrera Segobiensi in matrimonium collocauit. Is morte Petri Aria prouinciam, Regis concessu, obtinuit, eamque tantisper rexit, quoad noua Curia in Gratia-dei vrbe in Gattimala & Nicaragua consinijs, constituta est. Nam Iuridici eius Adseffores, non tantum imperium Roderico abrogarunt, sed & eum Indis, quos in ditione tum ipse tum filij eius habebant, ex Legum prescripto priuarunt. Is de iniuria sibi facta, ut putabat, questum ad Regem in Hispaniam nauigat. Sed Rex & Senatus Indici proceres, quamquam multa præclarè facta, meritâque tum suum soceri sui proferentem, repellunt, & obseruationem latarum Legum sancientes, quod ab Adsefforibus indicatū erat suo iudicio confirmant. Id ubi ad Fernandum & Petrum Contreras eius filios in Indiam allatum est, feroces iuuenes arcere eam cōtumeliam ferro, & quod iure nequiuierant vi extorquere statuunt. Et fortè iam sua sponte agris animis superueniunt ex Peru milites, Ioannes Bermeius aliique contubernales, partim ex ijs qui Gasca aduersus Pizarrum sequuti, nulla ab eo strenuè nauata opere premia acceperant: partim ex ijs qui fractis Pizarri partibus, quas tutari erant, extra Peruanæ prouinciæ fines, Presidis iussu, deportabantur. Illi, diuersis causis Gasca infensi, incendere adolescentes, hortari ut rem strenuè capefferent: haud dubiè, si ducentis aut trecentis militibus in nauis impositis, Peruanum aliquem portum tenuissent, fore ut quotquot Gasca ob nulla aut malignè reddita premia

premia succenserent, in partes transirent. His ergo & aliis stimulatī illi, milites occultē contrahunt, arma conferunt, & cœpta accelerant. Porro quum eius prouincia Episcopum in omnibus ferē negotiis patri suo aduersatum fuisse meminissent, ultionem ab eo ordiri statuunt. Ergo die quadam ingressi ex composito milites Episcopi domum, quum tesserarum fortē lusu sese oblectaret, hominem obtruncant. Inde nouo sanguine imbuta circumferentes arma, vexillum palam erigunt, & semet Libertatis vindicem exercitum nuncupant: mox raptis undecumque nauibus per Australe pelagus in Panamam vela dant. Aug. Zarat. Hist. Peru. lib. 7. cap. 12.

2 GASCA in Hispaniam reuersus, Valloleto in Germaniam ad Car. Cesarem transiit: ubi rebus à se gestis expositis, Palentia episcopatu ab eo ornatus est.



¶ Navigationis è Panama in Peru ratio. Portu-veterensis prouinciæ incolarum mores, superstitio peruicax, & nauigandi ratio.

CAP. XVII.

PRIVS QVAM Peruanis rebus & falsis opinionib. quas ex gētes de nobis cōcepere, finem imponā: quo modo quōve cursu è Panama in hoc regnū nauigetur, exponere hīc mihi consiliū est. Ergo nauigaturi in Peruanas prouincias, ferē inde à mēse Ianuario vsq. ad finē Aprilis soluere

E Panama
in Peru na
uigantium
cursus.

confueuerunt. quippe hæc totius anni maximè idonea ad nauigandum eò tēpeſtas eſt : ac tum aperta illa maria , æſtate videlicet obtinente, & aſſiduè Subſolano & Coro ſpirantibus. Quæ naues quacumque alia tempeſtate vela faciunt, ingenti maris ſæuitia & periculis conflictantur. Porro onuſtæ naues Panama primùm in Tabogam aut alias vicinas inſulas aquatū decurrunt (quæ Perlarum, id eſt vnionum, nominantur, ob repertam ibi ab Hiſpanis vnionum copiam) mox in altum prouectæ circiter centum & quinquaginta millia paſſ. verſus Occaſum nauigant, flexo videlicet in eam partem curſu, propter rapidos aquarum æſtus, qui torrentis inſtar perpetuo lapſu in Ortum decurrunt. Inde correcto curſu rectâ in Peruſum tendunt.

Qv o tempore primùm Panama eò nauigauit, nauis qua vehebar menſe Iunio ſoluit. itaque quòd ea hiberna tempeſtas illic eſſet, omnes ferè vectores morbis impliciti ſunt: quia naues quæ ea maria nauigant conſtratæ ac tectæ non ſunt, vt quæ in Septētrionali vehuntur Oceano (id eſt, eo qui aduerſam continentis Indicæ partem alluit) itaque in illis ſub diuo morantes perpetuò verberari imbribus neceſſe eſt. Ad hunc modum nauigantes tandem ad Gorgonam inſulam appuliſimus. Nauis- magiſter (Patronum vulgò vocant) vbi ſe in eam deferri videt, Hæc, inquit, terra dæmonū eſt : quippe nulla toto eo itinere peior nauibus nec ſtatio nec nauigatio occurrit. Tradidere nōnulli aſſiduè in ea inſula plueret: ſed

Gorgona
inſula.

sed in eo falluntur. Octo quidem certè continuos anni menses, inter tonitruum fragores, & corusca fulgurum, adeo effusos ibi ruere imbres verum est, vt elementa ipsa inter se certare ac misceri videantur. Quum nos eam insulam attigimus, iam veris initium erat, quod ibi sub finem Maij incipit: itaque quod tempus in Panama hiemis est initium, id in illa altera regione ineuntis æstatis principium est.

PORRO vicini continentis oræ accolæ auro abundant, & cacuminibus arborum mapalia sua, velut nidos, suspendunt. Eam oram, quia palustris & inequitabilis est, Hispani subigere nondum potuerunt. Gaspar Andagoia quum ad Baiam, id est sinum, Sancti matthæi esset, cum centum & quinquaginta militibus æstate populabundus eam provinciam percurreret, tabulas sæpe ad protegendum militem aduersum incidentia circumferens. Quippe Indi strenuè saxa, tragulas, ollas feruida aqua plenas, & quidquid fors in manus dederat, subeuntibus ingerebant. Hispani verò securibus arbores tandiu cedere, quoad & ipsæ & superstructæ domus ingenti fragore prociderent: interea tamen sæpe non inulti Barbari, nec nisi mutilatis aliquot Hispanis, interdum etiam elisis atque obrutis, cadere. Tandem quòd asperior ea esset regio, neque in tam informi omnis humani cultus solitudine alimenta exercitui expediri possent, Andagoia cum satis magna auri copia inde decessit: neq. ea loca ullis Hispanis hodie habitantur.

Domus arboribus superstructæ.

IAM quia hi tractus maxima anni parte importunis quibusdam ventis ab Occasu vel à Meridie perflantur, tum etiam propter rapidos maris æstus & torrentes aquas, velut præcipiti alueo perpetuò decurrentes: necesse est quotidie vesperi iactis in salo ancoris ad ea littora consistere: mox luce orta flantem à terra ventum sequi atque inde moliri. In quo sæpenumero vsuuenit, vt dum naues prouehi cogitant, in contrarium repulsæ peractum iter relegere cogantur, ac totos interdum quindecim aut viginti dies circa promontorium vnum harere, sicuti nobis contigit. Quum enim Caput S. Francisci in conspectu haberemus, centum triginta millibus pass. à Capite Passao distans (quod quidem caput in Portus-veteris finibus est) rati eum locum Indis habitari, vt quondam solebat, quotquot vectores in ea naui eramus, victus penuria (iam enim tertius mensis abierat ex quo Panama solueramus: & facilè mercatores qui eadem naui vehebantur, nos miserrima fame contabescere potius passuros, quàm vel buccam panis elargituros, apparebat) consumptis igitur propè alimentis, terrestre iter capeffere decreuimus.

ERGO vigintiquatuor eiusdem fortunæ focij in terram exponimur, & singuli cum quatuor Maizij scutellis ignotum iter quò casus & error ferebant ingredimur. Peruenimus ad flumina, quibus Quisimix nomen est: quatuor sunt haud magno inter se spatio discreta: ea nos summis laboribus ac periculis,
præ-

prægrādibus arborum ramis quæ in ripa fortè rimantibus occurrebant, simul iunctis & colligatis infidentes, tandem supera uimus. Ceterum quum aqua falsa esset, èstu uidelicet confundente dispares vndas (quippe statâ vice exæstuans mare, non tantùm his fluminib. sed & aliis quæ in eum Oceanũ defluũt, mixtũ subit, & xv. amplius milliũ spatio alueos inuehitur) ergo vt biberemus puteos fodere necesse erat.

TANDEM ad Caput Passaũ peruenimus. Ibi Indos crematis tuguriis penitus se in siluas abdidiſſe vt cõperimus, in alterum promontorij latus trãſgreſſi, ad ſinũ Caraquã procedimus. Is ſinus Acquinoctiali lineæ ſubiectus eſt. Ibi quò iremus incerti, quum neque in aduerſam ſinus partem traicere poſſemus, nec alimenta ſuppeterent, cancris & cereis quibuſdam prunulis veſcebamur, quĩs quum parum carnis ineſſet, lignum ſeu os interius ſimul comedebamus: & aquam certè ſalubrẽ ex lacu exiguo, quem haud procul mari in ſiluis reperimus, bibebamus. Ibi xxii. dies morati quoad nauis portum intraret, quum pro certo omnes haberent nos vel fame exſtinctos, vel ab Indis maſtatos eſſe: vbi à Nauarcho conſpecti ſumus, miſſa conſeſtim ſcapha excepti, ea nocte in naui requieuiſimus.

POSTERA die egreſſus Portum-veterem petij. Id oppidum habitatum Hiſpanis viginti duas fermè domus ex arundine contextas & palca tectas continet. Ea prouincia propemodum in vaſtitaſtem & ſolitudinem redacta eſt: indigenæ ſmaragdorum copia olim

Portus veteris colonia, & promontoria.

abundabant, & earum gemmarum feraces fodinas penes se occultas habent: neque hactenus tamen ullis tormentis adduci potuerunt, quanquam multis sæuitia torquentium extinctis, ut locum Hispanis indicarent. Mihi tamen aliquādo retulit Ioannis Dolmos trib. mil. dispensator quidam, Indicam mulierem ipsius concubinam locū illum ei edidisse: nec eum id postea euulgare voluisse, veritum ne Rex eas sibi fodinas attribueret. Multa quoque aurea & argentea vasa in supellectili quondam habebāt: sed ea Hispani omnia conuasarunt: itaque hodie nihil Patronis suis seu Senioribus pendunt, nisi ex iis fructibus quos e sua terra percipiunt: unde fit ut pauci Hispani coloni eam oram inhabitent.

*Gom. Hist.
gen. Ind.
lib. 4. cap.
195.*

TRADIDERE nonnulli, eius prouinciæ indigenas fœdos suos mores & falsæ religionis errores paulatim abiicere: neque ultra fallorum suorum numinum responsis fidem addere, ex quo sacerdotum & monachorum opera sancti Euangelij vocem audierint. Ego verò, quamquam ita esse optauerim, Deūmq. orem ut id propitius faxit, verè tamen testari possum, nullos adhuc neque sacerdotes neque monachos ad concionandum aut fidem nostram edocendam eos populos peragrassè.

*Portu-vete
rensiū per-
uicacis su-
perstitio.*

Quin ipsi quoque eam derident, palàmque ac publicè dicunt, se nolle Christianos esse, sceleribus videlicet & nequitia nostra deterritos. Ac quantumuis Præses Gasca edixisset, (uti suprà memorauimus) ut in singulis earum gentium pagis sacerdotes & monachi manerent

rent & crudiendis Indorum potissimum filiis operam darent: Hispani tamen huius coloniae municipes, & aliarum præterea aliquot, vehementer reclamarunt. Quippe sacerdotem vnum quadringentos ducatos in stipendium annuū petere: id verò pretiū esse maius quàm quantum omnes simul Indi Patronis suis tributū penderent.

Ac quia eo ferè tempore Perusio excessi, quorsum res postea euaserit, nescio: sed dum in ea prouincia morarer, sæpe fallendi temporis gratia Indicos illos pagos tum maritimos tum mediterraneos perambulans, in eiusmodi quiddam incidi. Ingressus fortè aliquando viculum quemdam ignobilem (Chiarapotum appellant) indigenas in fano solitis sacrificiis faciendis occupatos comperi. Quumque inter strepentium tympanorum sonitum patria quædam carmina canentes audiuissem, propius visendi cupidus, delubrum inco. Sed vix pedem intuleram, quum sacerdotes, toto vultu iracundiam testante, prope modū mihi in faciem despuentes, festinanter me foras eiciunt. Ibi vidi Idolum è creta tigridis effigie, ac duos pauones aliásque aues, quas suorum deorum sacrificiis dicatas habebant. Ibi præter hæc fortè adolescens aliquis mactandus aderat (quomodo apud eos humanis victimis litare fas ac sollemne est) mihi tamen tunc videre non licuit.

Alia quadam die vsuuenit mihi vt Picalancemam profectus, Indos eius pagi incolas compotantes prehenderem: quumque pro-

piùs accedens, per otium spectare vellem quo modo se largius potu inuitarent: quatuor repente ex illis minaci gradu ad me tendunt, & **OH** Christiane, inquit, nebulo impure, perfide, faceffe properè è finibus nostris. Ego

Indi Christianos sacrificiis suis interesse nolunt.

quum præter has minas, simul illos in meum ensẽ manũ iniicere velle animaduertẽrem, proripio me in fugam: & apud me constituo Indis numquam deinceps interuenire, quã die sollempnia sua agitarent.

Manta oppidum.

PRÆTER eos quos commemorauĩ, plures quoque perlustraui pagos, quales sunt Caia, Camulioia, Camuxioia, & alia earum gentium loca, quorum incolæ Indi aliqui filios suos enecant, ne Hispanis seruiant. Pro certo refertur, Mantæ regulos pulcherrimum & nobilissimum smaragdum habere, oui gallinæ magnitudine, quem inter præcipua numina colunt. Manta porro, oppidum ad mare situm, vna è præcipuis eius oræ vrbibus quondam erat: & priusquam Hispani eam prouinciam inirent amplius duobus Indorum millibus habitabatur: quum ex tanto numero vix hodie fortè quinquaginta supersint. Nec dispar solitudo in aliis eiusdem prouinciæ municipiis facta est. Quum aliquando Lupus Aiala

Peruenses inuiti Christianismũ subeunt.

ab huius ciuitatis Regulo peteret, an Christianus esse vellet: respondit ille, Se nescire, &, Faceret ipse vt visum esset. Ita Lupus Indum baptizari iubet, & Didacum numcupat: sed ne ita quidẽ cicuratum Hispani cuiusquam contrà os intuentem vñquam animaduerti. Eius subditi fœdis morib. bruti, spurci,

masculæ

masculæ veneri dediti & vitiis omnibus inquinati sunt.

PER omnem eius oræ longitudinem, Indi omnes eius maris accolæ aquam salubrem bibunt; quam è puteis manu factis hauriunt: & peregrè ituri omnes cucurbitam ea aqua plenam efferunt: nisi qui fortè Manta in Portum veterem iter faciunt. Quippe illi aquam putealem ferre negligūt, veriti ne in aliquē fortè Hispanum incidant, qui eam eripiat & bibat: sed duo millia passuum in mediterranea progressi aquam quadā ex rupe manantem, nigrā, spurcam & foetidam, excipiunt: haud dubij nimirum talem Christianos non bibere.

*Indi ne a-
quam qui-
dem libere
ferre, metu
Hispanorū
audent.*

EA regio calidi & humidi temperamenti est: itaque serenū ac purum cælum vix vñquā ibi conspicias. Ceruis, porcis, gallinīsque ex earū genere quę ab Hispania ad stirpē propagandā transuectæ sunt, abundat: neque vlla in Indiæ parte melior ex Maizio panis fit quàm illic. quamquam iis tamen nō assentior qui panem illum triticeo anteponunt. Mellis præterea, sed acerbi, ac ceræ, sed ignobilis, neque admodum bonæ, satis ferax: peculiare quoddam fructuū genus habet (indigenæ *Papaie* vocāt) ficuum specie, modicorū magnorūmq. quale nusquā in India, præterquā in eo regno, vidi. Arbor quę illud pomū gignit, procera & gracilis: fructus sapore dulci est. Ibi etiā aliud ficuum genus exiguorū visitur (*Tūne* nomināt:) sed & illi aliis provinciis, vt Nicaraguæ, Guattimalæ & toti Nouæ Hispaniæ regno, cōmunes sunt.

*Gom. Hist.
gen. Ind.
lib. 5. cap.
215.*

CETERVM omnes in vniuersum Portus-

*Pustule Pe-
ruenses.*

veteris prouinciæ Indi ferè pustulis quibus-
dam obnoxij sunt, seu verrucis: quæ è facie
aliisque corporis partibus erumpentes, quum
maximæ sunt, nucis iuglandis crassitudinem
æquant. Id morbi genus & ipse expertus sum:
nullo doloris cruciatu afficiunt, fœdæ, sangui-
neæ, ac ne aliud quidem remedium desiderât
quàm vt maturitate expectata, tenui filo con-
strictæ abscindantur. Indigenæ eius gentis ora
coloribus fucant: nares, labra aures & genas
perforant, ac festis suis diebus aurea monilia,
vniões, iis foraminib. velut emblemata inclu-
dunt. Quod ad cultum attinet, maxima pars
subuculis non manicatis vestiuntur: ceteri
nudi, & sæpe totum corpus nigro fucantes,
incedunt.

*Peruësi-
um
lintrium
forma.*

INDI vniuersæ illius maritimæ oræ accolæ
piscatui in primis student. Lintres quibus tum
ad piscandum tum ad nauigandum vtuntur,
instar ratorium, tribus, quinque, septem, inter-
dum etiam nouem aut vndecim tignis leuissi-
mis iunctis, expansæ manus effigie, contexunt,
ita vt medium tignum ceteris longiùs promi-
neat: cósque modò longiores, modò breuior-
es fabricantur, ac pro longitudinis & latitu-
dinis modo vela expandunt. Porro vbi per
tranquillum eiusmodi rates diu remigio
subegere, panem, fructus, aliáque eiusmodi
in mare, velut sacrificium, porriciunt: orantes
vt prosperum ventum immittat: quippe se de-
fessos esse, neque ad remigandum vires vltrà
sufficere.

Guan-



Guancailichie regionis incolarum mores & cultus.

Guinacaua transitus. Zarza: parilla herba.

Chimbos mons.

C A P. XIX.

PORTV-VETERENSIS prouincia fines proximè Guancailiqui regio excipit, regni Peruani prouincia inferior. Eius oræ maritimæ primus pagus, Colonchi appellatur, S. Helenæ prominenti proximus. Eius pagi ac populi Principem sæpe vidi, annorum fermè sexaginta hominem. Digna certè Principe ei facies, corpus vegetum robustumque & prospera valetudine erat. Subucula non manicata, & rubro tincta, amictus, torquem ex auro purissimo, sextuplicato circa collum circulo, quasi maiores corallij surculi, aut baccæ, crassitudine, gestabat, annulumque in digitis: illi quoque ex auribus perforatis baccæ & aurea stalagmia pendeant. Sinisterioris brachij carpum pellucida gemma instar speculi, tuendæ oculorum aciei, exornabat.

Quo tempore Hispani primùm eas terras ingressi sunt, principatum obtinebat in ea prouincia Regulus (Baltacho ei nomen erat) qui apud suos venerabilis non magis imperio quàm autoritate ea loca regebat. Iste nemini adeuntium aut visentium assurgebat, præterquam Colonchio illi principi, de quo antè dixi. Attamen iste Cacicus nulla vñquam

*Peruenses
reguli à
Christ. re-
ligione ab-
horrent.*

adduci persuasione potuit vt Legem Dei vel-
let audire. Eum aliquando Patronus suus me-
præfente, ita alloquutus est: Colonchie, inquit,
volo vt Christianus fias: at ille abnuens: Do-
mine, inquit, iam mihi propè acta est ætas, ne-
» que idonea, vt Christianus fiam: at filios meos
» potius, vt voles, cape, & eos quidquid vifum
» fuerit edoce: quippe illi munia ministeriæque
» moris tui facillimè obire afluefcunt: me verò
» id ætatis maiorum meorum legem & institu-
» ta relinquere non iuuat.

E I V S prouinciæ homines è superiore ma-
xilla quinque aut ſex dentes excutere ſolent:
ac ſi cauſam quaſiueris, id elegantia ſc cauſa
facere reſpondent. Subucula non manicata, vt
Portus-veteris indigenæ, amiciuntur. Puden-
da fascia bombycina velât, cuius extremæ vit-
tæ ad talos vſque demiffæ, inſtar equinæ cau-
dæ ab tergo dependent. Femina præcincto-
rio aut caſtula, nodo reuincta & ad medium
crus demiffa, integuntur. Eius prouinciæ po-
puli Hispanis in vrbe Guaiacuil habitantibus
ſeruiunt.

*Peruenses
culices in-
feſti.*

E A M coloniam principiò Hispani in pla-
nicie Chioni fluminis ripæ impoſuerant, qua-
draginta millibus paſſ. procul mari. In illis
autem regionibus immenſæ quædam pan-
duntur planicies, velut infinita camporum
patentium ſuperfuſis aquis merſa æquora:
tum denſiſſimæ ſilua, cum incredibili copia
crocodilorum. Adhæc octo anni menſibus
tanta vis culicum eas terras infeſtat, vt mirer
yllos incolæ ibi poſſe viuere. Itaque Hispanos

eo loco manētes, vbi nox aduenerat, vt quiescere possent, vela & conopæa circum pandere necesse erat, quod & ipsi quoque Indi adhuc faciunt. Quamquam etiam illi cubilia sublimè quatuor scapis arundineis firmissimis, leui tabulato, suspensa imponunt: & in hunc modum quiescunt, minus videlicet ita infestis culicibus.

ANNO VERO M. D. XLVI. continuis im-
bribus auctus fluuius ille non ingentem mo-
dò stragem dedit, sed totos circa campos & *Guaiacuil*
maximam regionis partem, illámque adeò *urbis inun-*
ipsam urbem, inundauit & obruit. Quare Hi- *datio,*
spani viginti millia passuum propius mare
nouæ vrbi sedem deligunt, eámque ad ripam
eiusdem fluminis colli imponunt. Is locus
Transitus-Gainacauæ appellatur tali de caus- *Gainacaua*
sa. Gainacaua ducem quendam suum cum *transitus.*
valido exercitu, ad subigendam eam prouin-
ciam quondam miserat. Dux quum traducere
exercitum decreuisset, indigenas transuersis
tignis trabibúsq. iniectis, quomodo schediæ
& rates compingi solent, fluminis transitum
ponte iungere iubet. Perfecto opere, quum
iam exercitus cum impedimentis transiret,
hostes funibus abscissis potētem soluunt: multi
in flumen præcipitantes gurgitibus hauriun-
tur: ceteri interclusi à suis ab circumfuso
hostium exercitu propè ad internecionem
cæsi sunt.

GAINACAUA vbi fuorum cladem ac-
cepit, magno cōtracto exercitu, Quito mouet,

& ex illis montibus in plana degressus, eam gentem ingenti cæde perdomat. Post eam victoriâ, iungendi aggere fluminis cupido eum incessit, ut pedestri transitu in vltiorem eius eius ripam tutò, quum visum esset, transcurreret. Iamque aggestis faxis & terra ingens moles iaci in alueum cœperat, & aggeris longitudo iam viginti & amplius passus impleuerat, quum Gainacaua propter latitudinem, altitudinem & rapiditatem fluminis quidquid ingerebatur absorbentis, incepto destitit. Hanc ob causam eum locum Hispani Gainacauæ transitum nuncuparunt: urbemque ibi à se conditam, San-iacobum, quæ ædificiorum & incolarum frequentia à Portus-veteris colonia nihil differt.

San-iacobum colonia.

Eius fluminis ostio Puna insula obiecta est, & ea quidem in ditione Regis. Eius indigenæ, quomodo & fluminum accolæ & aliæ earum prouinciarum gentes, quoad suppeditarunt vires, continua aduersum Hispanos gerentes bella multos interfecere. In iis, quum F. Vincentius de Valle-viridi, cum XLII. Hispanis Didaci Almagri furorem fugiens, (quo tempore ille Franciscum Pizarrum Marchionem interfecit) in eam insulam se abdidisset, nocte quadam Indi fustibus & clavis omnes ad vnum trucidarunt. Hic erat monachus ille, qui cum Attabaliba Cassiamalçæ colloquutus erat, quum is à Francisco Pizarro captus est (vti superius dictum est.) Eum Cæsar Episcopum Peruanæ prouinciæ designauerat.

Monachus primus Peruensium bellorum instigator, digna opere præmia refert.

IN Puna & finibus Guaiaquil & Portus-
 veteris, herba quædam ramosa reperitur: fo- *Zarzaparilla, herbæ*
 liis vt roboris, (¹ *Zarzaparilliam* vocant) quæ *vtendæ ra-*
 veneræ contagioni & aliis morbis medetur. *tio aduer-*
 Ea nempe duobus filicibus trita expressus & *sus vene-*
 percolatus succus, admisto aque calidæ modi *ream lyem*
 co, ægrotis bibendus porrigitur. Ij mox hau-
 sta eius potionis, quantam natura patitur, mē-
 sura, loco calido compositi, quoad tolerare
 possunt exsulant. Eo medicamento tres aut
 quatuor dies, vt visum est, vtuntur: biscocto
 tantum interea pane & pulli gallinacei aysi
 paululo vescentes. Alii eius herbæ ramuscu-
 los duntaxat aqua incoquentes, ius eliciunt
 quod interdum bibant: & eo sorbitionis gene-
 re nonnulli duos trēsve continuos menses v-
 tuntur.

IN prouincia Guaiaquil & aliis versis in
 Orientem regionibus, hiems mense Nouem-
 bri incipiens vsque ad finem Aprilis durat.
 Maio veris initium est, Octobri exitus. In ora
 eius maritima, inde à Tumbez Austrum ver-
 sus, adeo rari imbres sunt, vt vix triennij qua-
 drienniue spatio paucis miserè expressis plu-
 uiæ guttis planicies illæ aspergantur. Itaque
 ibi partim ob nocturnos rores qui copiose
 cadunt, partim diurnis accolarum irrigatio-
 nibus humentia fata adolefcunt. Arenosæ quo-
 que ibi planicies iacent, in quas numquam
 impluit: in montibus contra octo mensibus
 anni pluit: nonnulli etiam obsiti niuibz &
 perpetuo rigentes gelu conspiciuntur. A esta-
 te venti quidam assidue à Meridie incolis no-

xij infestique admodum spirant.


*Chimbo
mons altis-
simus.*

QVVM è Guaiaquil Quito iter facerem, Chimbon montem, in altitudinem XL. milliū pass. editum & omni prorsus humano cultu vacuum transgressus sum: quo in itinere, nisi Indus quidā pauxillulo aquæ oblato mihi subuenisset, siti planè extinctus essem. Postquam tandem in verticem perueni, paulisper consistens, nouas illas & mirabiles terras subiectas oculis è sublimi tanta cum admiratione despexi, vt inusitata quædā, velut in somnis, visi species oculis meis oblata videretur.

IN hac ingenti prouincia Quitoensi, vt & in aliis nonnullis Peruani regni regionibus, quum plerique populi peculiare idioma habeant, vulgò tamen Cuscensis lingua in vsu est. Quum enim Inguæ (id est Peruani Reges) eas prouincias ditioni suæ adiecissent, edixere vt omnes Cuscensem linguam ediscerent, eamque patres filios suos edocerent. Ex eo igitur illud idioma per vniuersas eas prouincias quæ eorum imperio subiectæ erant, promiscuo vsu obtinuit.

I. E. A. M. herbam ubi primum viderunt Hispani tum in Noua Hispania, tum in prouincia Hōdurensi, Zarza-parilla nomen ei indiderunt, ob cognationem quam cum Smilace aspera habet, quā Hispani Zarza-parillam vocant. Ceterum de varijs huius exhibendæ & vtendæ rationibus, copiosè agit Nic. Monardus in lib. de simplic. Indiæ Occid. medicamentis.

Peruano



*Peruanorum religio & ritus. Cultus. Pecora. Ebrietas
studium. Opificia. Vini apud
Peruenses summa
caritas.*

CAP. XX.



E gentes etsi cum dæmonibus colloquia misceant, ¹ Solem tamen pro numine præcipuo habent. Ab eo beneficium aliquot petitura tum Principes, tum sacerdotes, manè, oriente eo suggestum quoddam editum, lapideum, confcendunt: ibique demisso capite stantes, comploris ac confricatis inuicem manibus, mox in cælum sublatis passisque vt si Solem ipsum amplecti vellent, certas quasdam preces concipiunt, petentes ab eo quibus indigent. Nunc verò etiam quum ab Hispanis vexantur, eos vti Solem adorant, precantes vt misericordia in se vtantur, nève ipsis noceant.

Orandi ritus apud Peruanos.

INGENTIA ibi delubra numinum, præsertim Solis, & immensæ opulentia erant: incrustati intus auro & argento parietes: multæ quoque sacris dicatæ virgines (*Mamacone* appellabantur) nulli operi præterquam nendis texendisque tantum ornamentis deorum vacabant. Humanis victimis litant, viros ac pueros mactantes, quorum tamen carnes non mandunt. Pecudes quoque, aues & alia animalia immolant: & hostiarum fuso

sanguine Idolorum ora & templorum portas inungunt. Quum demonis colloquium expectunt, aut seminare, aut aliud quid aggredi in animo habent, sacerdotes aliquot dies ieiuniū sibi indicunt.

Sepeliendi ritus. MORTUOS regulos magnificis & ingentibus sepulcris inferunt, ac cum eis multum aurum argentūque elaboratum, formosissimas vxores & quas viuentes ipsi maximè dilexerunt, famulos, vestes, fruges, vinum quæq. alia carissima, simul defodiunt: ne videlicet eis cibis ac potus desit quoad in alterum mundum peruenerint. Quæ sepeliendi ratio in plebisque Indiæ regionibus vsurpatur.² Atque isti Immortalitatem animæ credunt. Eiuscemodi multa sepulcra ditissima Hispani reperere: pauca tamen illa præ iis quæ adhuc supersunt. Multos dies defunctos lugent.

Peruensium cultus. VIRI subucula ex lana aut bombycè non manicata vestiuntur, & pendente nodo ex humero altero penula: nobiles caput fascia inuoluunt, & floccum è lana gestant, qui in sinistram aurem propendet. Ex herba quadam candida, cannabis specie, calceos conficiunt. Feminae longa palla ab humeris ad talos vsq. promissa induta, & fascia quatuor digitos lata præcinctæ (*Chiumbi* appellant) ad pectus acus aureas & argenteas affixas præferunt, quas *Topi* nominant: ac superimpositum aliud breue amiculum gestant, quod *Liquida* appellatur: capillis quoque promissis & liberè fluentibus conspicuæ. Atque hic vestium mos & forma apud Cuscenses in vsu est.

PEREGRE profecturi rubro quodam bitumine faciem oblinunt, aduersus ventos, herbamque ore clausam (*Cocam* ipsi appellant) *Coca herba inedian leuans,* velut panchrestum quoddam pharmacum circumferunt. Quippe eius præsidio freti integrum diem, nullius nec cibi nec potus egentes, iter faciunt. Atque hoc quidem herbæ genus earum rerum, quibus mercaturam exercent, præcipuum est. Est & apud eos radicis genus (*Pape* vocant) tuberum specie, sed exigui saporis. Abundauere olim pecoris copia (id asini amplitudine³, specie propè cameli est) sed, vt ipsi referunt, non ita dudum tetraquædam lues, lepræ instar, armenta corripiciens maximam partem extinxit. Verùm multo peior lepra Hispani vniuersum propè id pecudum genus absumsere. Horum animalium caro ferinum quiddam sapit: eorum velleribus indigenæ quondam vestiri abundè consueuerant: quæ nunc in summa raritate carissima habent.

CETERVM hæ gentes, sicuti omnes ferè Noti illius orbis, summam voluptatem & *Ebrietas Peruanorum* præcipuum vitæ præmium in crapula collocant. Itaque postquam multo mero incaluere feminam quisque, quæ prima collibuerit, amplexus libidinem explent, sublato propè omni matrum, filiarum aliarumque necessitudinum discrimine: & ipsi adeò Reguli ac proceres easdem sorores & coniuges in matrimonio habent. Panem nullum planè faciunt, excusso grano tantùm cocto & tosto vescentes. Atque hæc vna lex est, quam inter alias

Gainacana tulit : quum videlicet expeditionē aliquam ingressurus , suos in pane faciendo occupatos esse nollet. Ergo etiam nunc eum morem obseruant.

*Peruano-
rum adifi-
das*

Eius Regni primaria quondam ciuitas Cusco erat, Inguarum imperij caput: quæ priscis temporibus longo abhinc æuo (vt indigenæ memorant) à Magocappa condita est, primo eius stirpis rege. Cuius ino successores, amplificatis imperij sui finibus & multis gentibus subactis, leges iis suas morēsque tradiderint, multaque passim ædificia , tum cultui deorum tum Regis vsibus destinata exstruxerint. Eorum parietes, leuissimo lapide, pumice ædificati sunt : straminibus & paleis integuntur : cuiusmodi ego aliis locis , maximè in prouincia Quitensi, in Tumbambæ finib. non minus sumtuosa & magnifica quàm in Cusco vidi. Ac quanquam plurima ab Hispanis diruta iaceant : multa tamen etiam nunc in militaribus viis visuntur (quæ indigenæ *Tambos* appellant) ex quorum semirutis maceris qualis fuerit ingentium eorum ædificiorum fabrica facile colligi potest.

*Guainaca-
ne monu-
menta.*

INTER alia Gainacauæ monumenta, nobilissimum opus via strata, complanatis ad æquum aliquot monticulis , adhuc spectatur. Quitensis istius prouinciæ aër temperatus & salubris est. Cuscenses reges plerumque ibi morabantur : multisque partibus aurificinas instituerant. Ac aurifabri quidem Indi, nullo ferreo instrumento vtentes , mirabilia o-
pera

pera, quamquam paulo rudiùs, non inſcitè tamen fabricabantur.

PORRO in hunc modum operantur. Primum aurum vel argentum fuſuri catino longo aut rotundo iniiciunt: eum ex panno terra incruſtato, & carbone contuſo factum, móx- *Aurificum* que exſiccatum igni imponunt cum ea metal- *Peruanorum* li copia quantam capere poteſt: mox quinque *opera.* aut ſex ſiphunculis arundineis tamdiu circumflando incendunt, quoad liquefactum metallum omni excocta ſcoria, niteſcat. Inde catino eductum aurifices humi ſedentes, nigris quibuſdam ſilicibus, aptè ad id factis tamquàm malleis, opus pariter inter ſe ſortiti elaborant & ex eo faciunt, aut (vt magis propriè loquar) faciebant proſperis ſuis rebus, quidquid iubebantur, puta diis dicatas ſtatuas, vaſa, monilia: pecudum etiam omniùmque animalium quæ videre poterant ſimulacra effingentes.

QVOD ad res ex Hiſpania cò traductas attinet, frigida omnia ac temperata loca tritico ſatis fida ſunt, & in iis abundè prouenit. Ibi etiam vites aliquæ, ſed parum feraces ſunt. *Gom. hiſt. nat. lib. 4.* Dicunt nonnulli ſpem eſſe ſibi fore vt breui vites in iis regionibus adoleſcant fiântque vina: imò vt fructus propè omnes Hiſpaniæ *Peruaniæ* conceſſi, ibi quoque naſcantur. Verùm, *regiones a-* etſi ſpem ſuam nemo illis tollit, irrita ta- *lendis viti-* men erit, neque, meo quidem iudicio, effe- *bus ineptæ* ctus quales illi ſperant, vmquam apparebunt: quippe aëris temperamento & cali poſitione noſtræ planè contraria.

Adhæc quando in Noua-Hispania aliisque locis vbi melior mitiorque tellus est, quamquam confitis vitibus, vinum tamen non collegere: quanto minus in Peruanis prouinciis? Addo etiam Dei bonitatē brutis illis gentib. tam præstantem liquorem concedere noluisse: sed attribuisse tantum pro eorum captu habitūque res ad tuendam vitam vtcumque necessarias.

HISPANI qui colonias ibi posuere Raphanorum, lactucarum, melonum, cucumerū, brassicarum, copiam habent. Limonum etiā & Aurantiorum, quamquam hi fructus non nisi loco calido nascuntur. Ficuum mediocriter. Pecoris propemodum inopia est, idque ob continua bella: & quum ibi essem, Limæ vacca vna centum ducatis æstimabatur: ouis quinquaginta & sexaginta.

PERVANI regni fertilissima prouincia Quito est: ea frumenti admodum ferax, magnam etiam vim porcorum & gallinarum, Hispanicæ sobolis, alit: insuper cuniculorum iucundissimi saporis ingenti copia semper abundans. Sed vini summa ibi caritas, nam in ipsa Quitenſi vrbe, vt quum vilissimè venditur, vini seria vna, duodecim circiter lagenarum capax (lagena seu bocalium, vt vocant, xxviii. uncias capit) quatuordecim aut quindecim ducatis aureis valet: Limæ & aliis maritimis locis, decem ac duodecim: sed Potosiæ (mediterranea vrbs est, quingentis amplius millibus pass. introrsus à mari retractior) vulgò Lxx. & Lxxx. ducatis venit. Ad eum modum

Vini caritas apud Peruanes.

dum ceteris locis, pro ratione ac situ regionis quò importatur, maius vel minus premium sortitur.

AT QVE hîc noua sæpe interuenit calamitas. quum enim cadi, seu seriæ aut fideliæ, quibus vinû ab Hispania deportatur, fictiles sint, quum è loco in locum circumferuntur, plerumque franguntur. Sæpenumero etiam, morantibus diutius nauibus, tanta iis locis vini penuria incidit, vt ciuscemodi cadus vnus quadingentis, quingentis interdum, imò etiam mille, ducatis aureis ematur.

I DE eorum opinionibus nonnulla quæ ad hunc locum pertinent ex Hispanis scriptoribus at-
texam. Quum nullam certam, ex scripturis ullis aut litterarum monumentis, Creationis mundi aut diluuij notitiam habeant: quod à Patribus traditum per manus habent, memoria retinent. Nimirum insignem quendam virum (Con ipsi vocant) à Septentrione quondam in eas terras venisse mira pedum pernicitate, & nullis ossium fulturis aut neruorum vinculis compacto corpore: qui solo nutu mōtes in plana subsidere cogens & profunda vallium complanans, viam sibi per inuia faceret. Eum porro priscos earum terrarum homines & feminas creasse: atque illis herbas & fructus siluestres, sustinenda vite dedisse. Mox ab Indis plana incolentibus offensum, terras antea fertiles in arenas steriles vertisse, atque inhibuisse pluuias. Ex eo nihil aut rarò apud eos pluuisse. Misericordia tamen motū, ne squalida siccitate regio animantia respueret, fontes aperuisse & fluuios, quos accolat

rigantes riuus carperent. Hunc quondam, quum Solis & Luna filium ferrent, pro summo numine adorabant. Donec ab Austro successit alter, Pachacama nomine (id Creatorem, apud eos sonat) Sole & ipse ac Luna ortus, priore longè potentior. Cuius aduentu Con disparuisse: istum autem creatos à priore illo mortales, in aues, cercopithecus, ursos, leones, psittacos, & alias volucres mutasse: atque Indorum qui nunc eas terras obtinent maiores creasse: illósque terræ atque arborum culturam docuisse. Itaque ex eo hunc pro Deo ab illis habitum, templum & diuinos honores obtinuisse: & nuncupatam eius nomine prouinciam, quatuor tantum à Lima leucis: ubi quondam eius Regni procures quum excederent vita, sepultura locum eligerent. Porro istum Pachacamam multas etates durasse, ac tantisperdum Christiani Peruanum regnum iniuere. Ex eo numquam deinceps esse visum. Credibile est, demonem fuisse, qui talibus prestigijs miseris illas gentes deluderet: cui rei argumento est, quòd ante Christianorum aduentum ex celebri illo Pachacama fano, velut publico oraculo, vulgò Responsa petebantur, quæ demon humana aut alia specie sacerdotibus, sacerdotes sciscitantibus, ederent.

CREDITUR præterea ab illis vulgò & adhuc narratur, ingentem priscis temporibus terrarum inundationem accidisse: eaque omnes submersos mortales præter paucos, qui altissimorum montium specubus abditi, prouiso comœatu, & cauernarum faucibus obstructis, communem sortem effugerint. Porro eos, quum remisisse imbres conyce-

rent

rent, emisisse duos canes: quos quum madentes & elutos recepissent, inde indicasse, nondum exire, omnia adhuc obtinentibus aquis, opportunum esse. Mox rursus emissos, quum cæno oblitos & sordidos regredi viderent, & subsedisse aquas nihilque præter limum superesse, inde deprehenderent, tum demum è cauis erepere ausos, magnam vim serpentium offendisse, quas diluvio recenti lustralenta tellus ediderat, easque magno labore paulatim sustulisse. Ceterum mundum quoque interiturum perhibent, sed non prius quam ingens quedam siccitas & velut conflagratio aeris acciderit, qua Sol ipse & Luna hauriantur. Itaque in eorum siderum, ac potissimum Solis, defectibus, vulgò lugubres clamores & planctus edunt, labi orbem & finem rerum adesse existimantes. Quænam, obsecro, hæc sunt sincerioris Theologiæ vestigia, quæ ne adhuc quidem in tanta barbarie ex earum gentium animis delere Satan potuit?

2 In eorū exsequijs tū multa alia absurda erant, tum hoc maxime, quòd aliquot sui liquoris (quem illi Cicha appellant) pocula in sepulcrum inuergentes, eum per calamum usque ad mortui os pertinentem, seu infundibulum, transmitterent. Ceterum non tantum Immortalitatis animæ, sed etiam Resurrectionis corporum sensum aliquem habere eas gentes tum sepulture ritus indicat, tum quod vulgò Hispanis dicebant, quum illi eruendo auro & argento sepulcra aperirent. Quippe orabant eos, ne ossa humatorum dissiparent, quò videlicet illi ocius & minore negotio resurgerent. Aug. Zarat. Hist. Pern. lib. I. cap. 12.

De Brasiliensibus quidem Barbaris ita scribit Lerijs: Non modò, inquit, immortalitatem animæ credunt: sed pro certo quoque habent, post mortem eorum animas qui virtutem coluerunt (virtutem autem illi definiunt suo more, nempe ultionē sumere de hostibus & quamplurimos mandere) post altissimos montes euolantes, patrum & auorū suorum animis aggregari, ibique in amœnissimis hortis perpetuis delicijs ac tripudijs letum ævum agere: ignavorum contrà manes, qui sine ulla propugnanda patriæ cura inglorij vixerunt, abripi ab Aignan (sic illi cacodemonem vocant) & cum eo sempiternos inter cruciatus viuere. Nauig. Bras. lib. 3. cap. 16.

3 Peruanæ oves instar camelorum (quos, si tubera demseris, specie propè referunt) magnis oneribus ferendis sufficiunt. Equitandi verò etiam usū eas ita assuescecerunt Hispani, ut duodecim aut quindecim milliarium spaciū, equitem dorso gestantes in die conficiant. Itinere fatigata prosternunt se humi: ac tum fodiendo aut feriendo frustra impuleris: nunquā, nisi onere leuata, surgūt. Pecus planè fructuosum, vel in esu carniū, vel in usu vellerum, quibus optimis & tenuissimis vestiuntur: præsertim eæ, quas illi Pacos vocant. Quippe & illæ paruo aluntur, & in summa laboris tolerantia, Maior pasta, quatuor & quinque dies sine ullo potu facillimè transigunt. August. Zarat. Histor. Peru. lib. 3. cap. 2.

4 Hæc statua, seu palatia, quæ Tambos vocant, Gaiuacaua, Attabaliba pater, ad ripas fluminum maximè, & in regijs vijs exstructa, non tantum commeatu, quantum exercitui alendo sufficeret

sufficeret, sed etiam armis, vestimentis, & omni telorum genere tanta copia instruxerat, ut is triginta millia hominum expedite vestiri & armari possent. Ea autem crebris intervallis disposita, plerumque diei unius itinere, interdum octo aut decem leucarum, rarissime quindecim aut viginti, spatio discreta ab alijs alia erant. August. Zarat. Hist. Peru lib. 1. cap. 14.



¶ Peruanī Christianos ex maris spuma concretos esse putant.
Aurifodina exhausta. Colonia in Peru ab
Hispanis condita.

CAP. XXI.

MATVRVM iam mihi videtur falsas eas opiniones quas illę gentes de nobis habent, expromere. Postquam ingressis Perusium Hispanis, mores eorum, facta & atrocia sæuitiæ exempla quæ passim ab iis edebantur, inspexere: numquam ex eo non modò fateri voluerunt, nos esse Christianos filios Dei (sicuti ab Hispanis audiebant) sed ne ita quidem in lucem editos ut vulgò nasci homines solent. Quippe fieri nō posse ut tam ferox & truculentum animal ab ullo homine genitum & feminae partu editum sit.

*Absurda
Peruanorū
de Christianis opinio.*

Itaq. eorum animis penitus hæc insedit opinio, nos mari esse ortos: ac proinde nos *Vira* cochie vocant. quippe *Cochie* apud eos valet mare, & *Vira* spumam significat. Ergo nos ē

mari concretos & coalitos, spumâque nutritos, vulgò ferunt: ac venisse in terras ad vastandum ac perdendum mundum. Neque eam opinionem ullus, præter Deum omnipotentem, eorum animis euulserit. Nempe inter se ita ratiocinantur, Venti domus prosterunt, arbores frangunt: ignis eademurit: sed isti Viracochiæ omnia deuorant: terram inuertunt, vim fluminibus afferunt, neque ullum tempus remittunt: perpetuò irrequieti modò huc modò illuc vagantur, aurum & argentum insatiabiliter quærentes: mox ubi quæsiuere alea consumunt, bella gerunt, mutuis cædibus se conficiunt, latrocinantur, blasphemant, Deum execrabiliter eiurant ab negantque: verum numquam loquuntur, & nos nostris ditionibus & fortunis spoliauere. Denique Indi mare diris execrantur, quòd tam sceleratam & truculentam sobolem in terram immiserit.

*Barbari
Christiano
rum vitium
grauissimè
arguunt.*

SÆPE varia eius regni loca periustrans, siquem fortè Indum obuium haberem, animi gratia, vt mentem eius nudarem, sciscitabar ex eo ubi hic aut ille Christianus maneret. Illi verò tantum abest vt responsum aliquod darent, vt ne in os quidem contrà me intueri sustinerent. Verum simulac petieram ubi maneret Viracochiæ, confestim mihi respondebant. Pueri quidem eorum vix verbum vnum balbutire incipiunt, quum patres digito nostrum aliquem indicantes, En tibi, inquit, Viracochiæ.

PORRO

PORRO quum in multis huius Re-
 gni pagis, nempe quia opulentum est, sacer- *Religionis*
 dotes & monachi erudiendæ iuuentuti dent *Christ. con-*
 operam, utinam tamen bonum aliquem fru- *tentus a-*
 ctum edant. Neque hîc omiserim quod in *pud Perua*
 Quito à Flandro quodam monacho Franci- *lis Hisp.*
 scano audiui, cui Iodocus nomen erat. Is *exemplis,*
 mihi retulit se in prouinciam Cagnariam pro-
 fectum, exstructo ibi cœnobio, omnes eius
 gentis regulos & primores euocasse. Quum
 tres tantum ex iis venissent, luculentissimam
 apud eos orationem habuisse, ut qui linguam
 Cuscensem optimè calleret, eisque quæ ad fi-
 dem nostram pertinerent copiosè exposuisse,
 fœdos simul eorum ritus & diabolicas ce-
 remonias damnantem: mox postulatu eo-
 rum omnes baptizasse, atque ita domum re-
 uersos.

VERVM ut vidit monachus eos ad sa-
 crum in templum non venire, de nuo ho-
 mines adit, rogâtque ut in sancto proposito
 perseuerent. Donec ad extremum ubi vidit se
 operam ludere, nec fructus ullam esse spem,
 quum illi palàm cum risu dicerent res Viraco-
 chiorum sibi non conuenire, nec sibi tantum
 ab suis rebus esse otij ut templo frequentan-
 do vacare possent: his, inquam, compertis,
 monachus sexto postquam eò venerat mense.
 Quito ad suum monasterium reuersus est.

AC quando in eum sermonem incidi, age
 libens ab Hispanis ipsis quæsierim, Si apud
 eos nulla umquam antehac notitia, ac ne
 nomen quidem ipsum Sacri Euangelij audi-

tum, atque hoc tempore gens aliqua in Hispaniam ad promulgandam Christianam doctrinam commearct, quomodo ipsi in Indiam iuerunt: atque ea ipsis suas fortunas, vxores & liberos eriperet, atque in ipsorum corpora tormentis cædibûsque sæuieret, ac pro mancipiis venderet, multasque alias indignas iniurias in eos ederet: quæro quid ipsi essent facturi. Ego quidem non dubito quin ipsi non tantum capitali & perpetuo odio eam gentem prosequerentur: & in eam probra omnia & fœda iacerent: sed etiam atroces de ea, si possent, expeterent pœnas. Si hoc Hispani ipsi alteri genti facturi sint, quis miretur hunc in modum Indos Hispanis, si possint, vsuros?

I A M superius de immensa opulentia egi ab Hispanis reperta, quum primum hoc regnum subegerunt. Attamen utcumque tantum inde opum exhausserint, Indi etiam nunc grandem lancem plenam Maizio tenentes, granum vnum ex omni aceruo eximunt, &
 » Vicarochiæ, inquit, hoc foras exportarunt:
 » & illud (lancem intuentes) apud nos reman-
 » sit: Itaq. illi ne tam ingenti gaza Hispani potirentur, partim proiecerunt in mare, partim defossas in terram opes abdidere.

H I S P A N I præter hæc argenti & auri fodinas ditissimas aperuere: & argenteorum quidem nobilissimæ sunt apud Potosienses. Non procul Cusco in flumine Caluaia auri purissimi ramenta inuenere: deinde in Quitensi prouincia auriferum aliud flumen, quod ab Hispanis San-barbara appellatur.

Aurarias

Aurarias quoque in quibusdam montibus na-
cti, cuniculis per magna spatia actis & tellure
ligneis columnis & fulturis suspensa, vsque-
adeo fodere, quoad aurariæ venæ finem inue-
nirent. Ac sæpe accidit vt fidentibus rimis
fracti montes, & omnes operarios & Hispa-
nos ipsos opprimerent. Aurum quod ex iis
montibus eruitur, minutæ arenæ speciem ha-
bet: id, effossa terra, argenti viui ope colligūt:
quod è fluuiis tollitur, in grumos & grana-
tum exigua tum maiora discretum est. At
nunc quidem omnes ferè aurifodinæ exhau-
stæ sunt: argentariæ abundè quidem adhuc sup-
peditant, sed non ea copia qua primùm. Ne-
que enim tantæ magnitudinis ullus mons est,
est, quem, si semper inde tollas ac nihil repo-
nas, aliquando non exhauseris.

*Hispanorū
in exhausti-
endis fodi-
nis labor.*

COLONIAE ab Hispanis in eo regno con-
ditæ hæ sunt: Lima, Arequipa, Cusco, Nea-
polis, Argyropolis, Trugillium, Guanucum,
Chiachiapoi, Quito, San-michael, & Portus-
vetus. Earum amplissima Lima est, quadrin-
gentis & quinquaginta circiter focis habitata:
ceterarum aliæ viginti, aliæ triginta, quædam
quadraginta, nonnullæ quinquaginta, aliquæ
octoginta domus continent. Denique sic sta-
tuo atque affirmo, omnium earum vrbium,
quotquot Hispani in ea India condiderunt:
(quas illi amplius trecentis esse iactāt) etiam si
in vnum acervum conferantur, non tot esse
ciues ac municipes, quot vel vnius suburbij
Mediolanēsis extra portam Comasinam olim
esse meminimus. Nam florentibus illius vrbis

*Colonia
Hispanicæ
in Peru.*

rebus, ex solo eo suburbio XII. amplius millia hominum, exceptis senibus, emitti solebant: at in India Occidentali, annumeratis etiam senibus ac pueris, lustro facto nunquam amplius XIIII. aut XV. millibus capitum reperta esse constat.

I Is Christ. religionis contemptus in Barbaris nulli verius causa quam Hispanorum sceleribus & flagitijs assignari debet. Nam alioqui non planè indociles neque à pietate alieni sunt. Id unius rei documento, quod ex Lerio nostro sumam, demonstrasse sufficiet. Is enim Americ. Histor. cap. 16. narrat, Se aliquando cum tribus Barbaris Brasiliensibus iter per siluam facientem, noua arborum herbarumque specie, simul canoro auium concentu, inuitatum ad predicandas Dei laudes, totum Psalmum 104. altà voce cecinisse. Mox quasi inuisse vnum ex illis quidnam sibi vellet quod cecinisset. ac tum se copiosè Propheta mentem & Psalmi sententiam exposuisse. Illos verò, ubi omnia hæc attentè audiuiſſent, ingenti cum admiratione in exclamationem erupisse, O H quàm vos
 20 Mair (sic illi Gallos appellant) felices estis, qui tot
 20 arcana sciatis, quæ nobis miseris occulta sunt!
 20 Ita nimirum cum aliquo fructu docentur Barbari, non libidinis & auaritiæ exemplis.

¶ Pere-



*Peregrini à Gasca è Peru arcentur. Hispanicæ classis nau-
fragii. Benzoni ex India Occid. in Hispaniam,
atque inde in Italiam reditus.*

CAP. XXII.

QVVM iam tertius ageretur annus ex quo in Perusium veneram, ac me, iam collectis aliquot ducatorum millibus, earum terrarum satietas & fastidium cepisset, reuerti in patriam cōstitui. Accessit eò etiā edictum Præsidis Gascæ, quo peregrinos omnes Perusio excedere iussit: quum videlicet à quibusdam Hispanis accepisset, Leuantinos (sic nimirum nos vocant) perfidos ac sæuos esse, ac multis Hispanis exitij causam fuisse. Ergo quum tunc in vrbe Guaiacuil essem, eoque fortè acatium è Panama mercibus onustum appulisset, abire inde & patriam reuifere statui.

Vt primùm, confectis ad quæ venerat, magistro nauis abire vacuum fuit, nauim conscendi VIII. die Maij, anno M. D. L. soluimus & in portu Zalangi præsidem Gascam inuenimus. Is Panamam petebat, vnde in Hispaniam traiceret: ac tum quòd solus nauigaret, Nauarchum nostrum comitem sibi ire iussit. Ille, quum Maizio nauem onerare vellet, Præsidem rogat, vt propter necessarios quosdam vsus ipsum ibi manere pateretur. Præses abit, nos tandiu in eo portu hæremus quoad onustum esset nauigium.

Mox inde soluentes, breui ad Mantara

appellimus: sed ibi nauigium scopulo illisum, fractumque mergitur: omnes vectores & nauæ cum maxima auri & argenti parte incolumes ad terram euadunt. Ea calamitas Naucleri seu piloti suæ artis non satis periti inscitia accepta est: is verò qui Panama acatium deduxerat, substiterat in Guaiacum eiuscemodi ob causam. Allatum fortè erat per eos dies ab

*Edictum de
arcessendis
vxoribus.*

Hispania Cæsaris edictum ac omnibus Indiæ partibus promulgatum, mulierum postulatu quæ viris iunctæ essent: Vt videlicet Præsides ac Gubernatores, viros qui in Hispania vxores haberent, in Hispaniam remitterent: aut iuberent eos de arcessendis eò vxoribus satagere. Ergo metuens Nauclerus ille ne Panama in Hispaniam remitteretur, nullius ibi fauore subnixus, quum eò reuerti nollet, in Perusio substitit.

AMISSO verò, ita vti dixi, nauigio expectare aliam traiciendi occasionem necesse nos fuit. Tandem quinquagesimo post hæc die, quum nauis Lima veniens eò applicuisset, ei iungimur, & breui Panamam peruenimus. Ibi comperto Præsidem cum omnibus nauibus è Nomine-dei in Hispaniâ vela fecisse, in Nicaraguam transgredior. Ibi graui ac diuturno morbo implicitus, ac vix tandem recepta valetudine, post quadriennium è Guattimala, vbi tunc eram, ad Portum-caballorum me confero, quò naues ex Hispania appulisse acceperam.

CONSCENDO nauim, soluimus: sed quum iam haud procul Cuba essemus, sæua repente

repentè coorta procella nauim ad breuia illi-
 dit : nos, omni propè amissa pecunia quæ in
 naui erat, ægrè in scapham transgressi, omnes
 tamen incolumes trigesimo quarto demum
 die summis cum laboribus & periculis Por-
 tum Auanę tenuimus: vbi classem Regiam re-
 perturos nos sperabamus. Sed ea iam octiduo
 antè, summo ipsius præfecto Didaco quodam
 Caictano, in Hispaniã vela fecerat : atque eam
 quidem vix medio itinere atrox adorta tem-
 pestas miserabiliter afflixit. Ex duodeuiginti
 nauibus, tredecim fluctibus penitus hausta
 sunt, (quarum vna vehebatur Clauissus Pa-
 namæ Gubernator, & duo Adseffores iuridici
 noui regni Granatæ, qui ob multa iniustitiæ
 & repetundarum crimina, Regis mandatu
 è prouincia in Hispaniam deportabantur)
 duæ quassatæ & semilaceræ ad Dominicæ
 insulæ littora eiectæ sunt. Tribus reliquis
 in Hispaniam abreptis, vna litoribus Por-
 tugalliæ illisa est : vectorum pars, amissa
 naui, ægrè ad terram enauit : altera Ca-
 licium portum incolumis subiit : Prætoria
 haud procul portu San-lucari de Barrameda,
 cum ducentis fermè hominibus periit. Præ-
 fectus scaphæ præsidio cum parte nauticorum
 & concubina euasit.

*Classis Hi-
 spanicæ
 naufragiū.*

Mox quum Hispalim venisset, iussu Re-
 gis in custodiam coniectus est. Obiiciebatur,
 eo tempore ex India soluisset vt ei necesse esset
 hieme in Hispaniam appellere, litorum præ-
 fertim egressu ea tempestate periculosissimo.
 Itaque ipsius culpa tantam calamitatem esse

acceptam. Ille verò culpam omnem in necessitatem transferens, se quum tantæ alendæ multitudini commeatus Auana expedire non posset, inde soluere esse coactum defendebat. Tandem hæc atque alia afferens emittitur, sed abrogato ei munere.

*Bentonis
in Hispania,
inde in
parriam,
reditus.*

E G O interea Auana hærebam æger animi ac mærens, idque duplici de causa. Primum quòd fortunarum mearum partem in supradicta naui amiseram: deinde quòd classem Regiam, cui me adiungere cogitabam, profectam comperissem. Verùm tam funesti naufragij nuncio audito, Deum diuinamque eius gratiã laudaui, quòd ei classi molienti me succedere nō esset passus, haud dubiè si id factum esset, cum aliis periturum. Tandem decimo post ea mense classis Regia in Indiam appulsa: moxque in Auana portu aggregatis quatuordecim nauibus cum modicis tum magnis, breui vela, Dei ope, in Hispaniam fecimus. Trigesimo nono quàm inde solueramus die, horribilem vnā tempestatem in eo cursu perpeffi, insulam quandam Lusitaniæ (vulgò Maderam appellāt) tenuimus, quæ iuxta Cosmographorum rationem ab Auana ampliùs **I V. M.** miliaribus distat.

*Belmuda
insula.*

M E D I O fermè itinere iacet exigua quædam & deserta insula, quæ ab Hispanis ¹ Belmuda appellatur: sed eam neque nos in conspectu habuimus, neq. multi nautæ illac præternauigantes vident. Sumto in Madera pane, vino, aliisq. commeatibus, vela damus: & octauum post diem, **X I I I. Septembris, M. D. L V I.**

San-

San-lucari portum ingredimur, atque inde Hispalim procedimus. Ipse, simulac expeditis negotiis dimissus sum, Calicium portum peto: & onerariam nauim conscendens (Vrcam vulgò vocant) Genuámque bimestri nauigatione peruectus, & incredibili ex conspectu patriæ perfusus gaudio, breui Mediolanum peruenio.

QVAMOBREM immensæ atque æternùm lau dandæ Maieſtati Dei, potentiæque eius, ac *Gratiam actio pia.* Seruatori nostro Iesu Christo, immortales gratias ago, quòd concessio mihi hoc beneficio vt res adeò nouas, tamque à nobis diuerſas ac remotas terras viſerem, me ab innumeris periculis liberauerit: vt quoties præterita in memoriam reuoco, humanum vnum corpus tot tantisque malis tolerandis ſufficere vix potuiſſe exiſtimem.

I HÆC *Belmuda ſeu Bermuda inſula, Garza etiam alio nomine dicitur: quòd nauis, cui ea primum apparuit, Garza vocaretur: illius verò Magiſter, Ioannes Bermudez Palenſis. Ad xxxiii. gradum in Septentrionem ſita eſt: parua & deſerta credita. Onied. Hiſt. Ind. lib. 2. cap. 9.*





CANAR. DESCRIPTIONIS
ARGVMENTVM.



O MNIBVS nauibus, quæ in Indiam
Occid. cursum dirigunt, primam statio-
nem præbent Canariæ, seu Fortunatæ
insula, CC. leucarum, nonnullæ etiam
CCXL. interuallo ab Hispania, à XXVII. ad XXIX.
ab Aequinoctiali limite, in Septentrionem, gradum
sitæ. Earum prisca nomina, Pluuialia, siue Om-
brios, Capraria, Niuaría, Canaria, Iunonia, &
eodem nomine proxima, sex tantum veteribus co-
gnitæ: hodie septem numerantur. Illæ post Iubæ &
aliorum veterum inquisitionem, diu nostris homi-
nibus ignotæ manserunt: donec Ioannis, secundi
huius nominis, Castellæ regis, denuo, anno Domini
M. CCCCv. aut (ut alij tradunt) Petri regis
Aragonie, temporibus, anno M. CCCXXXIII.

Hispanorum nauigationibus aperta sunt:

moxque (ut hîc scribit Benzo)

partim ab ipsis Hispanis,

partim à Gallis,

subactæ.

*

BREVIS



BREVIS INSVLARVM

QVÆ CANARIÆ APPELLAN-
tur, & rerum in iis memora-
bilium, descriptio.

*¶ Canariæ insule septem. Indigenæ pauci supersunt. Quando
& à quibus subactæ. Earum feracitas.*

CAP. I.



VANDO, Deo bene iuvante,
finem tandem brevis huiusce
meæ Historiæ assequutus sum,
operæ precium facturum mihi
videor, si quædam de Canariis
insulis memoria non indigna contexam. Hæ
septem sunt, Gran-canaria videlicet, Teneriffe, *Canariæ,*
Palma, Gomera, Ferrum, seu Ferrea, Lanza- *seu Fortu-*
rotta, & Forte-ventura. Eæ non magno inter- *nate insu-*
uallo inter se discretæ, ab ortu in occasum, *le, septem.*
continuo versu in ordinem porrectæ, xxvii.
gradibus & dimidio ab Aequinoctiali linea
absunt: Ab Hispaniæ promontorio Boldori
nongentis & octoginta pass. millibus: ab Afri-
ca lxx. Perhibetur à veteribus nonnullis scri-
ptoribus Fortunatas esse dictas, quòd omni-
bus quæ vita humana desiderat, iisque spon-
te genitis abundant. Verum Solinus multo

secus de iis scribens, plurimum istius fertilitatis famam eleuat.

*Canarij
indigenæ
pauci.*

PORRO veterum earum incolarum & indigenarum, stirps hodie propemodū sublata est. Ego quidem vnum duntaxat in Palma insula vidi, annos fermè LXXX. natum: cui, quod è præcipuarum & veterum insulæ familiarum stirpe esset, Rex Hispaniæ certum annuum stipendium in victum dabat. Quum mihi fortè aliquando sermo cum isto esset, & ab eo mores, atque instituta gentis cognoscere cuperem, numquam à vino integrum vacuūq. reperi. quippe eius potus dulcedine semel degustata, omnem voluptatem in ebrietate collocabat. Itaque ea de re nihil certi tradere possum, nisi fortè pauca quædam quæ vel ipse vidi, vel ab Hispanis nonnullis magno natu audiui. Sed priusquam id aggrediar, exponendum videtur quæ prima gens (vti à nonnullis scriptoribus proditum est) eas insulas subegerit.

*A quibus
primum
subactæ
Canariæ.*

IN Historiis Petri Aragoniæ regis, eius nominis IV. traditur anno M. CCC. XXXIII. ad eum adiisse nobilem quemdam Hispanum (Ludouico Cerdæ nomen erat) virum bellicarum rerum artiūque peritissimum, qui quod ei adhuc omnia incepta prosperè provenissent, arroganter Principem Fortunæ, sibimetipse cognomē fecerat. Is à Rege, vt eius autoritate atque auspiciis Canarias insulas subigere liceat, simulq. auxilium petit: mōxq. impetratis ab eo pecuniis ad celoces duas armādas, classe instructa è Calicio portu soluit.

Breui

Breui Gomeram tenet, ac centum & viginti milites in litus exponit. Sed vix egressos, Insulari feroces animis acriter impetu facto repellunt: maxima pars cæsi: ceteri trepida fuga compulsi ad naues partim eò nantes, alij scaphis raptim conscensis euasere: ac cum suo duce, qui Principatum Fortunæ se amisisse ferò tandem agnoscebat, spe irrita mæsti in Hispaniam reuertuntur.

TRADUNT nonnulli missas è maiore Baleari naues aliquot ad subigendas eas insulas: sed omnia fœdè atq. improsperè euenisse. Proditum est ab aliis, anno M. CCC. XCIII. Hispanenses & Cantabros aliquot naues militibus, equis & commeatu ad eam expeditionem instruxisse. Hi, quum classe perarmata ad Lanzarottam appulissent, exscensuque ad terram facto expedito agmine ad pugnam procederent, ne indigenas quidem incautos & solutos oppressere. Itaque multis horis acriter vtrimque pugnatum: tandem victores Hispani, plurimis hostium cæsis, multis captis, præda & spoliis onusti in Hispaniam reuertere.

ALII eius rei gloriam Gallo tribuunt, Nobilem videlicet quemdam Gallum,² Ventacurtium nomine, cōtractis ex castelli cuiusdam sui pretio pecuniis classem tantæ expeditioni parem armasse, primùmque eas insulas cœpisse subigere. Is enim quū ad Gran-canariæ orā naues applicuisset, atq. indigenæ egredientem in litus vim aduenarū conspexissent,

*Ventacurtius Gallus
Canariæ
tentat.*

id protinus Baianori insulæ regulo renunciant. Is tristi accepto nuncio, haud cunctanter concitis popularibus quantam potest multitudinem colligit: moxque omnes è vicinis collibus ac tumultis ad littus descendentes ferociter in hostem incurrunt. Ac Galli quidem primo furentium Barbarorum impetu pulsī ac perterriti, ingens damnum accepere. Sed mox confirmatis animis effusè concitant equos, & multa cæde hostium inuecti, turbatos in fugam vertunt. Baianor prælio superatus, simulatque ex fuga sese recepit, statim ad ducem Gallum legatos de pace mittit. Qua benignè data, Ventacurtius, Reguli huius consensu arcem in insula coctili latere ædificat, eamque quinquaginta militum præsidio munit.

EXINDE cum reliquis suorum ceteras insulas ordine prælegens, Palmam aggreditur, qua paruo negotio subacta, breui quoque Gomeram in potestatem redigit. Has tres insulas ita perdomitas Alphonso comiti Nebulensi Hispano, magno pretio vendit, qui mox ceteras ditioni suæ adiecit. Ex quibus apparet iam multis abhinc annis has insulas Hispaniæ regno subiectas esse.

IAM quod ad mores eius gentis attinet & fertilitatem terræ, quæ vel ipse vidi, vel ab aliis audiui (vti superius sum pollicitus) ea paucis exsequar. Primùm ergo earum insularum maxima (Gran-canariam Hispani appellant) rotunda propemodum specie, cxxx. circiter millium pass. ambitu, urbem in planicie modica

*Gran-cā-
nariæ de-
scriptio.*

dica sitam haud procul mari Oriẽtem versus, habet: quæ quum ibi essem quadringentis circiter domibus habitabatur. Ibi Gubernatores & præfecti tum seculares, vt vocant, tum Ecclesiastici, manent. Nullus ante urbem portus: sed duobus ab ea millibus pass. Septẽtrionem versus, prope exiguum montem statio quædam est. Ibi naues ancoras iaciunt: quibus scilicet tutandis vicino in littore Hispani modicam arcem excitarunt: vbi tum tormenta quatuor ferrea erant, eaque situ ac rubigine obducta. Ac sæpenumero equidem demiratus sum, quum Galli eodem ipso in littore naues aliquot cepcrint, satis validum ad impetus hostiles arcendos propugnaculum ab Hispanis non exstructum esse.

IN ea insula magna sit sacchari copia, plurimique propterea mercatores cò negotiandi causâ cõmeant, maximè Genuenses. Omnes arbores ex Hispania cò translata, faciliè, præter oleam, comprehenderunt. Ea quæ Palma dicitur fructuum vbertate, maximè vini, inprimis insignis est. Itaque tantum ex illis vitibus prouenit, vt non insulis modò vicinis vicina suppeditent, sed etiam dent quæ nauibus in Indiam, in Flandriam & Angliam portentur. Caprarum etiã & ouium greges ex insulæ habent, ex quarum lacte caseum ingēti copia faciunt: cuniculorum verò vim propè innumeram. De ceteris, Teneriffæ quoque & ipsa rebus ad victum necessariis abūdat: sed tres illæ priores palmam obtinent: reliquæ, vt exiguæ, inopes, & ignobiles spernuntur.

*Palmae in-
sula, descriptio.*

1 POMPONIVS *Mela lib. 3. cap. II. ira de iis scribit. Fortunata insula abundant sua sponte genitis, & subinde aliis super aliis innascentibus nihil sollicitos alunt, beatius quàm alia vrbes exculta. Idem propè Plutarchus in Sertorio. Solinus contrà cap. 20. De harum nominibus (inquit) expectari magnum mirum reor, sed intra famam vocabuli res est, &c. Idque multò quam alij verius.*

2 Joannes Betancurtius, nobilis Gallus, Robini Bracamontij, Francie Admirantis, cognari sui gratia & interuentu, Anno M. CCCCXVII. eas insulas subigendi facultatem suis auspiciis & Regio titulo, à Rege Castella obtinuit. Itaque venditis quacumque in Gallia possidebat, classem armat & Gallos admistis Hispanis ducens, in Canarias expeditionem suscepit. Habebat in comitatu monachum, Mendium nomine, qui, Martini v. Pontificis iussu, Barbaros Ethnicis superstitionibus deditos ad Christianismum verteret, & Episcopi titulo illis præsset. Betancurtius Lanzarottam, Forte-venturam, Gomeram, Ferrum & Palmam paruo labore in potestatem redigit. Gran-canaria potiri non potuit, x. millium armatorum exercitu Barbaris insulam propugnantibus. Inde eiectus in Lanzarottam se recipit: atque inde, exstructo latericio vel lapideo castello, subactas insulas regere & colonis occupare instituit. Mox etiam, variis mercibus, quas ab eo acceptas Hispanæ & Gallicæ naues exportabant, putà mancipiis, melle, cera, coriis bubulis & hircinis, sebo, ficibus, aliisque, pecuniarum vim ingentem facere: donec multi fama opum quibus ea insula abundarent excit,

ad ceteras subigendas confluerent. Ceterum Betancurtius quatuor insularum imperium Menaldo, consanguineo cuidam suo, moriens reliquit. Posthac, iurgio fortè inter hunc & Mendium Episcopum orto: Mendius aduersa multa de impotentia eius in Barbaros dominatu ad Regem Castellæ scribit. itaque cupere eos in Regis fide, ac ditione esse. Rex trium nauium classem eò mittit, Petro Barba duce. Is diues & cautus, vim etiam adhibiturus si opus esset, Menaldo facillè, ut eas sibi vendat, persuadet. Eas postea ipse Ferdinando Perazæ, Hispalensi equiti, vendidit: aut, ut alij tradunt, Alphonso comiti Nebulensi, qui eas aliis ditionibus cum Perazæ permutauit. Perazæ quidem, quocunque modo ijs potitus, Regium nomen primus asciauit. Gom. Hist. gen. lib. 5. cap. 222.



¶ Miraculum arboris in insula Ferro. Canariensium mores. Teneriffes insula mons.

CAP. II.

REs poscere hîc videtur, ut, priusquam hunc de Canariis sermonem absoluam, memorandæ Arboris miraculum referam. In insula Ferro est: perennes aquas è foliis exsudans stillânq. & quidè tanta copia ut non incolis modò, sed etiam multo plurib. sufficere possit. Ea arbor mediocri magnitudine, nucis iuglandis folio,

Arbor perennes aquas exsuda-

D.iii.

quamquã paulo maiore, muro circum lapideo
 septa, instar fontis, est: & eo cratere defluens
 aqua suscipitur. Arcanum equidem naturæ
 mirabile: nō reperiri tota insula vllam aquam
 præter eam quæ ex illa arbore manat. Porro
 arborem perpetua ac densa nebula circum-
 vestit: quæ tamen interdiu vbi solis æstus fla-
 grare incipit, paulatim discuti ac resolui vi-
 detur.

PRINCIPIO, Hispanos eam insulam su-
 bigere aggressos, quum neque fontes, nec pu-
 teos, nec flumina inuenirent, ingens admira-
 tio, stuporque incefferat. Quumque ab indi-
 genis sciscitando exsequerentur, vnde aquam
 sibi pararent: illi pluuialem aquam in vasis
 collectam, reponere ad necessarios vsus se re-
 spondebant: arbore nimirum prius arundini-
 bus, terra aliisque integumentis operta. quip-
 pe ita rati Hispanos, vbi aquam non reperis-
 sent, ex omni insula excessuros. Sed parum
 astus profuit. Nam insulana mulier Hispano
 cuidam, quicum familiaris ei consuetudo in-
 tercefferat, arborem & arcanã vim eius ape-
 ruit: protinùsque ille Hispanorum duci. At
 dux, qui rem tam inusitatam pro fabula duce-
 ret, risu temperare non potuit: mox tamen
 detecta arbore & rei certitudine comperta,
 omnes rei tam nouæ miraculo defixi obstu-
 puere. Neque mulier indicium impune tulit,
 siquidem primores insulæ proditum ab ea ar-
 canum quum cognouissent, breui necem ei
 clanculum intulere.

*Arborem
 illam mu-
 lier Hispana
 prodit.*

CETERVM hi ferè Canarienses quondā idololatræ erant. Caprarum pellibus, quibus *Canariensium mores & cultus.* abundabant, amiciebantur: neque alias domus, quam subterraneos specus norant, cósq. ferè ad radices montium aut sub collibus positos. Quum nullum haberent animal præter capras, quæ nostris multo grandiores sunt, ijs vice boum ad colendos agros utebantur, & earum cornibus terram velut bipaliis fodiebant. Milium illis pro omni fruge erat, ex quo duorum lapidum attritu commolito panem faciebant, ab ipsis *Gosio* appellatum. Vinum è *Canar. palmis.* vt Æthiopes, moliebantur. Colore curis prorsus tali sunt quali erronei illi quos vulgò Ægyptios vocant. Earum insularum cælū calidius quàm frigidius est, etiamsi Tenerife montem erigat (*2 Picum Teydæ* vulgò vocant) *Tenerifis mons.* totius propè anni spatio opertum fidumque niuib. Quod quidē primum signum à mercatoribus ad eas insulas nauigantibus eminus conspicitur.

I VVLGO creditur ea esse, quam Plinius & Solinus Ombrion, seu Plunialiam vocant: sic dictā quòd nulla in ea esset aqua nisi ex imbribus. De qua hæc Plinij verba sunt lib. 6. cap. 32. Inba de Fortunatis ita inquisiuit: Primā vocari Ombrion, nullis ædificiorum vestigijs: habere in montibus stagnum: arbores similes ferule, ex quibus aqua exprimitur: ex nigris amara, ex candidioribus potui in-cunda. Hactenus ille. Quæ quidem non videntur admodum discrepare ab ijs quæ de ea Insula ab Hispanis explorata sunt. Quamquam illi, nullo.

ibi nec stagno nec lacu nec fluvio, nec fonte inuento, solam eam salubrem & potui aptam aquam ex mirabili ea arbore stillantem compererint: & quidem tanta copia, ut non Insulanis modò eorūque armentis, sed etiam navibus eò fortè ad aquandum appellentibus sufficiat.

2 Mons hic in tantam altitudinem editus est, ut xv. ferme leucas ab imo ad summum verticem colligens, inde ab ducentorū quinquaginta milliarium Hispanicorum intervallo eminens conspiciatur. Eius ima silvæ & viridantia pascua vestiunt: media niues occupant: vertex nudus & sterilis fumos plerumque exhalat. Vulgò Galli nautæ eum Lepic de Tanariffe, appellant. Ceterum Teneriffe ea creditur esse, quæ à veteribus Ninaria dicitur.

D E



D'E G A L L O R V M
Expeditione in Floridam,
& clade ab Hispanis non
minus iniuste quam imma-
niter ipsis illata, Anno M. D.
LXV, Brevis Historia.

Cui adiunctum est,


Supplicis libelli & querelæ, à viduis, liberis,
cognatis & amicis Gallorum, ab Hispanis
in Florida contra fas ac fidem cæsorum, ad
Carolus IX. Galliæ regem delatæ, exem-
plum.

E S A I A E C A P. XXVI.

*Ecce Dominus egredietur de loco suo, ut visitet ini-
quitatem incola terre contra eum: &
reuelabit terra sanguinem suum,
nec operiet ultra interfe-
ctos suos.*

EXPEDITIONIS FLORID.

ARGUMENTVM.

 **V**NC libellum superioribus Benzonis libris adiunximus, tum quia eiusdem penè argumenti est, quum & rei in iisdem illis terris gesta historiam, & Hispanice scuitia insigne exemplum contineat: tum ut Hispanis ipsis speciosam illam laruam excuteremus, qua vulgò uti solent. Non mirum esse videlicet, se aduersus Barbaros & Anthropophagos homines nihil humani præter speciem oris habentes, quorum immanitatem frustra per benignitatem & modestiã effugeris, scuitia sapius quàm clementia esse vfos. Nam quid hîc simile adferent? Expeditionem in Floridam suscipiunt Galli, idq. Regis sui iussu: neque in alienam possessionem violenter irruunt. Etsi enim nullo iure Hispani latissimas illas in Occidente tū Insulas tū Indicæ continentis prouincias, nisi fortè umbratili Pontificis donatione, cuius ea non sunt, possident: ab illis tamen Galli, velut iusto titulo possessis, non vim duntaxat sed appulsum quoque abstinent: & iam Hispanis visam quidem, nullis tamen adhuc Hispanicis coloniis inessam oram, velut vacuam, occupant. Hîc Hispani non contenti vi ex ijs litoribus arcere Gallos, ut pedem in sua inferentes: non in armatos tantum, in quos par periculum & ardor certaminis irritat, sed imbellem quoque inermemque in turbam pueros & feminas plusquam beluina scuitia debacchati sunt. Et hoc quidem per me occultum sepultumque maneret, nisi Hispani plura atque atrociora & pridem & hodie in Belgio perpetrarent, quàm quæ apud Indos umquam edidere.



DE GALLORVM EXPEDITIONE IN Floridam, eiúsque miserabili exitu, Breuis Historia.

A quo primùm reperta & nuncupata sit Florida. Ioannis Pontij, Ferdin. Sotti & Hispanorum monachorum infelices in eam expeditiones.

CAPVT I.



QVAM inclementer & parum humanè Hispani victorias pacémque aduersum Indos Occidentales exercuerint, superiores libri abundè docuere: nunc verò etiam quomodo Gallos in Florida acceperint, breui narratu exsequar. Sed ante omnia quæ regio sit Florida, vbi sita, à quo primùm reperta & tentata, exponendum est.

Non procul Hispaniola Boriquena insula est, quam hodie S. Ioannis de Portu-diuite appellant. Eius primus occupator ac Gubernator Ioannes Pontius Legionensis, pro certo habens fore vt ab Didaco Almirante & prorege Indiæ, magni illius Christophori Columbusi filio, æmulantium calumniis accenso,

*Florida sita,
& quã
do pri-
mùm inue-
ta sit.*

provincia demoueretur, cedere inimicis flauit, & nouas sedes quærere. Itaque anno M. D. XII. celocibus duabus armatis, flexo in Septentriones cursu altum tenens, tamdiu nauigat, quoad aliquantum progresso Biminia insulæ sese aperuere: quæ ad Septemtrionem Cubæ insulæ iacent.

Fons fabulosus.

EODEM tempore de prodigioso quodam fonte fama increbruerat, cuius aquis epotis senes, exuta canicie, in iuuetam reuirescerent: neque eam fabulam cupidius sparserant Indi, quam crediderant nostri. Eam famam sequutus Pontius, dum circa eas insulas, fontem illū fabulosum quærens, senescit potius quam repubescit, sex amplius menses irritō errore absumit. Tandem tamen diu vagatus nouam Indicę continentis oram detegit, eamq. partem ad quā fortē ipso Resurrectionis die appulerat (quē vulgō Pascha floridū appellant) velut è re nata sumto nomine, Floridam ipse nuncupat. Id terræ prominens, linguæ aut manicæ instar, se ingenti fronte in altum euehens, centum leucas in longitudinem, quinquaginta circiter in latitudinem, patet. Eius extremum cornu ab Æquinoctiali linea, Septemtrionem versus, gradus xxv. distat: moxque extendi ac dilatari incipit, quā in mediam inter æquilonem & exortum æquinoctialem regionem versa est.

Florida nuncupatio.

Ex ea noua terra reperta ingentes sibi diuitias despondens Pontius, breui ad S. Ioannis insulam regressus, mox inde Hispaniam petit. Ibi à Rege Catholico, expositis quæ inueniat,

uenerat, non magis meritorū respectu quàm amicorum gratia, Biminensem & Floriden-
sem præfecturam, Adelantadi titulo, obti-
net. His auctus, in Boriquenam reuertitur: co-
loniæque in suam prouinciam deducendæ
certus, milites scribit, classem comparat, mul-
tōsq. in eas res sumtus facit. Sed vix in Floridæ
littus egressus, vrbi condendæ sedes quærebat
quum Barbari classe conspecta accurrunt,
expediunt arcus & nimbo sagittarum Hispa-
nos obruunt. Pontius ipse in turba, venena-
ta sagitta grauitè ictus, prælio excedere co-
actus est. Inde Cubam auctus, paulo pòst ex
vulnere moritur. Neque ipse tantum, sed
multi quoque Hispani qui eius auspicia ad
eam expeditionem sequuti fuerant, partim
Indorum telis confixi, partim morbis & mi-
seriis absumti sunt. Ita iam tum Florida in-
auspicatò tentata, inuentoris sui cæde nobi-
litate est.

*Pontius Flo-
ridam inse-
licitè ten-
tat.*

Ex eo quum ob truces & bellicosos incol-
las vulgò infesta atque infamis haberetur, per-
diu intacta māsit. Donec tandem multis pòst
annis Ferdinandus Sottus trib. mil. Attabali-
bæ Peruani regis spoliis diues, & ex iam par-
tis maiora concupiscens, eius prouinciæ su-
bigendæ administrandæque potestatem à Cæ-
sare petiit. Qua impetrata, cum multis Hi-
spanis Floridam init: & omiſsa condendæ co-
loniæ cura, in mediterranea progreditur. In-
de incertis huc atq. illuc errans sedibus vexa-
re indigenas, & vni parandi auri curæ intētus,
metalli eius fodinas quærere passim institit.

*Ferd. Sotti
in Floridā
expeditio.
de qua sup.
lib. 2. cap.*

13.

Parem videlicet vbique esse terrarum felicitatem, qualē in Peruana prouincia nactus erat, credens, aureos ibi montes opinionis errore finxerat. Ad extremum, quum non tantum Barbaros omni tormentorum genere, sed semetipsum quoque & socios cæca auri cupidine & irrito labore totos quinque annos fatigasset, & suorum spem ipse, & eum vita, destituit.

*Gom. Hist.
gener. lib. 1
cap. 45.*

SED ne tristi quidem Sotti exemplo ceteri à simili incepto deterriti sunt. Siquidē anno M.D.XLIH. Floridæ in ditionem redigendæ multi decus petiere. In iis Iulianus Samanus & Petrus Ahumada. Verum neque Carolo Cæsari, qui tum in Germania erat, neque Philippo filio eius, qui præsens Hispaniam imperio regebat, ex Indici senatus consilio, mittere quemquam in eam prouinciam cum imperio placuit.

ERANT tum fortē in Hispania Dominicani qui feroces illas gentes verbis magis cicurandas quàm malo & armis exasperandas esse dicerent, quique se eas tum ad Christianam fidem, tum ad Cæsaris imperium accipiendū sola oratione adducturos profiterentur. Nequid facilius dictum quàm creditum. Itaq. anno M.D.XLIX. auspiciis & sumtibus Cæsaris mittuntur eò monachi F. Ludouicus Cancellus de Baluastro Dominicanus & quatuor eiusdem ordinis.

APPELLVNT, exeunt de naui. F. Ludouicus cum collegis & nautæ aliquot inermes (neque enim doctrinam pacis præ se ferentes

arma

arma ostendere par erat.) Illis cōspectis, protinus Indi nō ad concionē, sed ad eādem aduolant. Mulcere alloquio Barbaros conabatur concionabundus monachus: sed verba fiebāt apud surdos. Ergo nequicquam vociferantē inuadunt, & cum duobus collegis trucidant: ceteri quum fortē Confessorum laudem inter suos quā martyrij palmam apud Barbaros consequi mallent, proripiunt sese in fugam & nauim repetunt.

*Dominica
ni in Flori
da à Bar-
baris truci
dantur.*

A T Barbari (sicut postea ex adolescente quodam, Ferdinandi Sotti olim pedisequo, auditum est) in lætitiā atque epulas versi saginatis monachorum carnibus opiparē vescūtur, & detractas corporibus pelles, cutim etiā caput in orbem attonsam, ferale tropæum, in delubro suo suspendunt.

H A E C igitur Florida est, de qua acturi sumus, inter ceteras Indiæ prouincias multis Hispanorum cladibus notissima: nunc verò etiā (vt ex sequenti Historia parebit) Gallorum.



Q V A E sequuntur, propè vsque ad finem, ex breui Gallicè scripta Historia summus, cui præfixa epistola Nicolai cuiusdam Challusii Diepensis nomen præfert: qui è Florida regressus, suos & sociorum casus memoria prodidit. Hunc ergo potius quā nos, quæ cum alijs viderit & perpeffus sit, vt in Gallico illo scripto, loquentem induximus.

E



Rex Galliae classem in Floridam mittit, cui Ioannem Ribaldum legatum praeficit. Prospera de Florida fama sparsa multos ad eam expeditionem inuitat. Apparatus classis Diepe fit. Multi metu inceptum deserunt. Retracti à fuga imponuntur in naues. Galli ab Anglis comiter accipiuntur.

CAP. II.

Rex Galliae in Floridam classem mittit.

PAVLO ante ciuiles Galliae tumultus, Rex ex Principum & consilij sui sententia decreuerat in eam India oram, quae Florida appellatur, nuperrimè à Gallis animaduersam & cognitam, multarum nauium classem cum non spernenda manu mittere. Itaque composito primo ciuili Galliae bello, pacèque regio Edicto sancita, intermissa eius incepti mentio reuocata est. Moxque in eius rei effectum Ioannes Ribaldus, vir magni animi consiliisque & longo rerum maritimarum usu peritissimus, in aulam à Rege accitus milites scribere, & septem naues viris commeatibusque instruere regijs auspiciis iubetur, eique ipse classis, Legati regij titulo, praeficitur. Mandatum disertè erat vt recto cursu in Floridam nauigans, ab omnibus Hispanorum littoribus atque insulis; quaecumque in ditione Regis Hispaniae essent, vim atque egressum abstineret.

VVLGATA protinus eius expeditionis fama, multos vt illo Pratore & regijs auspiciis

ciis irē vellēt, & se ei clāssi adiungerent, perpulit: sed propriā quemque causā & variū affectus trahebant. Alios cognoscendi orbis cupidō accendebat, à quā nemo vīquam in genus abhorruit. quippe navigationem plurimū ad id studium conferre. Alij recenti à bello adhuc calentes, nauigandi subire molestias quā conflictari prioris vitæ sordibus & ingrato labori malebant.

S E D in primis stimulabat omnes secundus de Florida rumor per Galliam dispersus. Ei videlicet terræ omnium rerum, quibuscumque vita carere non debeat, copia abundanti: mitissimam etiam, vitalis ac perennis salubritatis, cæli temperiem esse concessam. Quippe neque infesto rigore ac gelu Septemtrionis premi, neque nimio solis æstu exuri: sed salubri vtriusque mixtura, iniussos etiam agros sponte natis frugibus incolas alere. Quod si excolere etiam liberet, hominibus tantū gnauis atque industriis opus esse, qui nativam soli eius vbertatem in humanos versus labore & cultu elicerent. ita optimam terrarum fore.

*Fama de
Florida,
multa
vera
affingit.*

Ipsam ab Austro in Septemtriones propè pari cum Europa longitudine porrectam, latitudine etiam XXIII. ferè gradus amplecti: quūque solis percussa radiis plurimū genitalis calor concipiat: eo tamen ita temperato vti non tantū rore ac frigore nocturno, sed lætis quoque ac mollibus pluuiis, ut è pingui cespite magnam vim herbidi graminis

mirandam in altitudinem crescentis sua sponte tellus effundat. Adhæc auri omniumque animalium diuitiæ, spaciøsæ planicies, aprici colles montesque clementer editi: mira amnium fontiumque amœnitas, varietasque arborum gummi nobile & odoriferos succos exsudantium, prospera fama passim celebrabantur.

*Apparatus
Galli-
cæ classis
Diepæ sit.*

ERGŌ talibus pollicitis multi inuitati, plerique etiam auara ditescendi spe, diuersis è partibus Diepam confluebant. Eo loco lustrari multitudinem conuenientium atque inspici oportebat, vt ex omni numero, quos maximè ad eam expeditionem idoneos iudicaret, Reginus legatus legeret. Segnius tamen quàm pro nonnullorum studio tota res administrata & perfecta est: eorum maximè qui milites domi suæ exceperant, indignantium tam diu ignauos & immunes homines suis sumtibus ali, etiamsi spe precij & splendidis promissis lactarentur.

QUATVOR menses & amplius otiosè inambulantes in ea vrbe consumserunt: donec tandem fide data se Regi strenuam fidelémque operam nauaturos, in verba legati iurauere: simulque vt sacramento obligati fuerant, stipendium in sex menses accipiunt: cuius rei mox Prætorem ipsum pœnituit. Quippe in eunte Maio, Anno M.D.LXV. quum naues cōscendentium numerum recognosci oporteret multi eorum etiam qui stipendium acceperant, siue longitudine itineris, seu formidabili barbari elementi specie perterriti, mutato repente proposito, clanculum se subducunt. Ei
deser-

desertioni vt maturè obuiam iretur, ne latius exemplum serperet, conquisiti desertores atque à fuga retracti, seuerè eodem ipso momēto naues conscendere iubentur. Id x. die Maii factum est: nos tantisperdum pecorum & farinae commeatus in naues in salo stantes imponitur, in ea statione vsque ad xxii. diem eiusdem mensis hæsimus. Multitudo eorum qui conscenderant, in quibus aliquot cum familiis suis opifices, trecentorum numerum efficiebat.

QVVM ibi commodum & imperium Legati regij simulq. secundum ventū expectaremus, xxii. eius mensis venti repentè vehemētes vtrimque ingruunt. Inde in horrescens mare, & concitati ex alto fluctus ictūque contrario inter se horribilem in modum arietantes, nautas quoque ipsos turbauerant. Ergo trepidi & ancipiti malo attoniti nihil opis inuenire, nisi vt incisis ancoralibus, amissis ancoris, nos ventorum arbitrio permitterent. Vehementissimus omnium Aparctias erat: is tanto impetu vela nostra ex alto percussit, vt protinus ad Portum-gratiæ (vulgo *Haure-de-grace*, Normaniæ portus est) volantibus similes deferremur. Ibi triduum morati, quoad missus à nobis Dieppam myoparo, nuncia inde referret, ab ea statione xxvi. eius mensis soluiimus.

QVVM rectà in Floridam cursum corrumpere cogitaremus, aduerso prætinus vento repulsi ad insulam, cui *Wich* nomen, Anglicæ ditionis, deferimur. Ibi Angli de nostræ

E. iij.

Expeditionis consilio cognoscere quum voluissent, postquam intellexere, se suâque nobis iuuandis benignè obtulerunt. Ibi à xxviii. eius mensis ad xiiii. Iunij quum naues in ancoris stetissent, ea ipsa die aspirante Aquilone secundo, sublati velis rectum in Floridam cursum capeessimus, quam velut nouam Franciam appetebamus.

T O T O S duos menses Oceanum fulcauimus, priusquam Floridæ oram vllam aut vicinam aliquam ei terram in conspectu haberemus, præterquam Antiliarum vnâ (quam indigenæ *Vocaionques*, Galli Magnam-lucasiam vocant: nostrum aliquibus eam Catharinam, Regis ipsius matris nomine, nuncupare placuit) Eam xxvii. gradibus ab Æquinoctiali circulo in Septentrionem distare fecerunt. Ducentis etiâ ab ea leucis in alto nauim quandam animaduertimus, sed ad quam non propius quàm quinque aut sex millibus pass. accessimus.

Lucasia magna, vna ex Lucas insulis.



Gallica classis in Floridam appellit. Floridensium cultus, mores, cibi, fruges, potus. Crocodili & Alate serpentes. Florid. religio.

C A P. I I I.

TANDEM



ANDEM XIII. Augusti Floridæ
litora nobis sese aperuere, mox igne,
quod Indi nobis signū dabāt, cminus
conspēcto, phascium ad exploran-
dum terræ accessum mittimus. Is fluuiū quen-
dam exiguum speculatus, ostium ipsius inue-
hitur. Accurrentes ad litus aliquot Barbari
nummos mercibus nostris permutant. Eam
autem pecuniam sibi partam aiebant ex naui
quadam quæ ab Antiliis reuertens carinam
ibi vadis fixerat. Repertum quoque in eo lito-
re Hispanum vnum, qui è naufragio ante vi-
ginti annos ibi facto euaserat, in nauim accē-
pimus. Mox sciscitati ex eo, ecquid de Gallis
audiuisset & vbi sedes haberent: docemur, Ni
hil scire ipsum ea de re, nisi quod ab ipsis Bar
baris didicisset: Gallos videlicet quinquagin-
ta leucis Septentrionem propius quàm quò
appulisse, confedisse.

*Hispanus
naufragus
à Gallis
excipitur.*

ERG O inde retro oram præteruecti (quæ
nobis depressa, & solo arenoso arbusculis cō-
sita: leni etiam neque admodum profundo
æstu, qui ab Occasu brumali adlabitur, inun-
dari visa est) medio fermè cursu flumen dete-
gimus, quem Maij fluuiū nostri antè numcu-
pauerant, vbi æstus quoque, ab Occasu sol-
stitiali affluentes, modicè intumescunt: ac
propter tenuitatem aquæ sidentes in vadis an-
coræ facillimè conspici possunt. Sex quidem
aut octo à litore millibus pass. non profun-
diorem quàm sex aut septē vlnas aquæ alti-
tudinē comperimus. In aliud præterea flumen
nos incurrisse memini, inter Maium & Ayū

*Maij flu-
uius.*

*Delphinorum
flum.
us.*

fluuios, à Maio Septemtrionem versus quatuor millibus pass. distans: ad cuius os singulis noctibus iactis in profundū ancoris, octo aut nouem vlnas altitudinis, arenámque interdum in fundo, nonnumquam calculosam terram, aliquando permistum limo vliginoso fabulum, reperiēbamus. Fluij quoque qui Delphinorum dicitur, iacta bolide altitudinem explorantes, duarum vlnarum esse in aluei faucibus cognouimus: quamquam ibi æstus quatuor super cubitis intumescit.

*Carlinæ
castellum
Caroli IX.
nomine
nuncupatum.*

POST hæc commodum aliquem egressum in ea ora speculati, xxvii. Augusti in statione Maio flumini obiecta, quatuor à litore millibus pass. ancoras ad vii. aquæ altitudinis vlnas iacimus. Vigesima nona die eius mensis tribus minoribus nauigiis flumine aduerso subeuntes, rectà ad Carlinæ castellū tendimus. Id propugnaculum nostri paulo antè, vt per-fugio ac præsidio Gallis eò appulsis esset, exstruxerant, satis commodo atque opportuno situ. quippe hinc alluente fluuiio: ab altera parte vicina silua, campóque inter siluam & munimentum interiecto, cui amœnus collis imminet, quem densa altaque gramina omni ex parte vestiunt. Semita tantum vna adibat silua, vnus passus latitudine, vix singulis peruia: quam nostri aperuerant vt ad fontem qui in nemore erat, commearent. Postquam ad eum locum peruenimus, Prætor noster exportari è nauibus cibaria ceterósque com-meatus ad recreandum præsidium iubet, nósque opifices cū feminis ac pueris eò cōcedere: negotio

negotio dato nobilibus viris Vllio, Bellocairo, & aliis vt nos eò deducerent, quibus etiam rerum quas in impedimentis preciosissimas habebat, custodiam commisit. Ceterum eos, qui in Castello erant non mediocri lætitia aduentus noster affecit. quippe anxios mæstosque, quòd iamdiu nihil è Gallia audirent. Onerabat dolorem, quòd alimenta etiam defecerant, nisi fortè indigenarum, agrestium & barbarorum hominum, ritu viuere vellent: à quibus etiam nihil, nisi vi & rapto extorquere poterant, sicuti suo loco fusiùs dicemus.

SIMVLAC nobis quies concessa est, indigenarum speciem contemplari cœpi, quæ mihi satis liberalis & humana visa est. Quippe *Floriden-* viris rectus & quadratus corporis habitus: *sium indi-* natiuus cutis colos in rubedinem vergit. Re- *genari hæ-* gulos esse illis & singulis præesse pagis accipi: *bitus &* corpus distinctum coloribus & maculis va- *cultus.* rium gerere, pro ornamento habent. Nullo vestitu, nec magis viri quàm feminae, coluntur: nisi quòd illæ peplo aut plagula ex Ciofi *Ciof, ani-* alteriùsve animalis pelle, quam nodus astrin- *mal Florid.* git, extremis fasciæ tæniis in sinistrum femur pendentibus, muliebria operiunt. Ceterum plena rotundaque oris specie, nec simi neque chilones sunt: truces vigentesque oculi, promissa cæsaries, quam & concinnè circa caput colligunt: ita innexis comis, quoties bella incunt, pharetræ illis vicem præbentibus. quippe ibi sagittas condunt, quibus mirum est, quàm procul, quàmque certo ictu, destinata feriant.

Floriden-
sium mo-
res.

QVOD ad mores attinet, foedi & flagitiosi sunt: liberos suos, neque vlla domestica erudiunt disciplina, nec coercent: nec rapere, nec pro suo vti quod rapuere, ipsis religio vlla est. Attamen sua cuique vxor & seuera illic matrimonia sunt. Bella aduersus finitimas gentes, sed sermone dissonas, gerunt: tela illis præcipua, arcus & sagittæ. Domus ferè rotundæ vt columbaria nostratia, robustis impositæ arboribus & palmarum foliis contactæ, nec ventos, nec tempestates metuunt. Infestis tamen vexantur culicibus, quos ipsi *Maringones* vocant: neque alia ope quàm crebro igni, maxime sub cubilibus accenso, ab eiusmodi pestibus se liberant. Acriter ea infecta pungere referunt, & corporis partem morfu ab iis appetitam in lepræ speciem verti. Nihil ferè preciosius aut elegantius ducunt, quàm versicolores animum pennas: precium etiam apud illos calculis, quos ex piscium ossibus faciunt, & rubris quibusdam ac viridibus lapillis.

Floriden-
sium fru-
ges.

CIBI eorum, radices, fructus, herbæ & varij generis pisces. Pinguissimo pisce vtuntur, quem exenteratum fumo durant: patriâ lingua *Banquané* nominant: cuius exempto adipe pro butyro aut alio liquamine vtuntur. Frugumstrarum nihil habent, sed Milij quoddam genus summa copia, quod in septennium pedum altitudinem crescens, culmo arundineo, granum pisi crassitudine, spicam seu paniculam pedali longitudine fundit, recentis ceræ colore. Cuiusmodi omnes ferè tum insularum, tum continentis Indiæ Occidentalis

dentalis indigenæ vtuntur, & vulgò *Maiz* vocant in Hispaniola: Brasilienses verò *Anati*. Quum eo vesci libet, primùm tritum in farinam soluunt, mox eo diluto mistoque *Migan* suum (vt ipsi vocant) informant: id oryza nostræ speciem refert. Protinus corrumpitur. itaque quam recentissimum edi oportet. Siluestres labruscas magna copia ea tellus alit, *Labrusca* quæ, vt multis Galliæ locis videre est, ample- *apud Floridenses.* xu arborum innixæ sursum reptant: sed cultu mitescere, vinumque reddere ab incolis non docentur, neque eius rei vsum ipsi norunt. Potum ex multiplici herbarum succo, *Floriden.* ipsi sibi moliuntur: *Cassinet* appellant: Cer- *sum potus* uisiæ fermè colorem refert, ac ne mihi quidem ipsi bibenti admodum abhorrenti gustu visus est.

R E G I O mihi montosa ac siluosa visa est: inde ingens ferarum copia, quarum sæuitiæ ipsi indigenæ, nisi acri custodia semet sepiant, obnoxios sæpe se esse memorant. Iam mira multa de animalibus quæ ibi esse auditu tantum accepi, consultò prætereo. Ea exsequi satis habeo quæ mihi visu comperta, & quæ nunc memoriæ prodantur, satis digna iudico. Crocodilos in primis plures vasto *Crocodili* hiatu ex arenis prædam captantes vidimus: *Florid.* in iis mortuum vnum, cuius caro tenera & candida, mihi sociisque vespertibus vitulina gustum referre visa est. Is tormentuli globo duas inter squamas adactò, cæsus fuerat: alioquin cute contra omnes ictus inuicta.

Ore vasto hic erat, maxillis horribilem in modum inuersis, pectinatim stipante se dentium serie: hiatu quidem adeo patēti, vt solidam iuuentem vorare posse videretur. Ceterum XII. aut XIII. pedes longus, breuiora crura quam pro cetera corporis proportionē habebat, vnguibus sœuis armatus: cauda longa & valida, in qua præcipua eius vis roburque consistit. Nullam in eius ore linguam animaduerti, nisi fortē intra fauces lateret. Ore enim (vti dixi) ita prodigiosē distorto erat, vt superiorem maxillam inferioris loco positam haberet, secundum planē ac terribile visu spectaculum.

*Alata
serpens.*

ALATAM quoque serpentem, à nostrorum vno interfectam, non procul nemore, vidi: alis, vt videbatur, eatenus instructam vt tolli à terra posse, & demissē volitare, videretur. Eius defectum caput Barbari summa cura abstulerunt: rationem scire non potui. Nostrum aliquibus opinio erat, id superstitione quadam à Barbaris fieri: neque quantum animaduvertere mihi licuit, planē religionis expertes sunt. Immo, quemadmodum signis & argumentis quibusdam deprehendi, eos non tantum ad ciuilem aliquam morum honestatem, sed etiam ad pietatem, si Dominus concederet, assuefieri posse existimo. Quippe simulac ære campano in castello signum ad preces datum audiuerant, extemplo in vicinum campum concurrentes, sublati, vt nos, in cælum manibus, attentionem aliquam ac reuerentiam præ se ferebant.

*Florides
ses nō pro
sus à pieta
ge alieni.*

¶ *Hispa*



*Hispanica classis ad Floridam appellis. Hispani Gallorum
castellum de impromiso adorti Gallos viros
feminasque promiscuè trucidant.*

CAP. IIIL.

INTEREA Prætor noster, iniuncti muneris haud immemor, propugnaculo muniendo intentus erat, ut incursionibus Barbarorum sustinendis par esset, si fortè in nos impetum facerent. Verùm vnde minimè metuebatur periculum atrox ingruit. Nam XIII. Septembris, repentè classi nostræ quinque Hispanæ *Hispana classis infesta Gal-
lis perniciem molitur.* naues superueniunt, Prætoria quadringentorum, ut videbatur: scapha centum & quinquaginta, doliorum capax: tribus domonibus comitata. Ea classis ad eam ipsam stationem appellit, ubi quatuor nostræ naues in ancoris stabant, circiter horam nonam vespertinam. Noctu nostri in colloquium Hispanos euocant, petuntque quo animo quidve quærentes suis nauibus adeo propinqui steterint. Illi respondent se Gallis pro hostibus uti, mutuūque inter eos bellum satis supérque indictum esse. Nostri Hispanorum infesto perspecto *Gallica classis Hispanicam fugit.* animo, neque sibi satis ad resistendum virium, sublati cōfestim dolonibus altum capeunt. Hispani fugiētes passis & ipsi velis insequuti, assequi tamen nequiuerunt. Itaque Delphino-
rum fluminis ostium inuecti, exscēsum ibi facere statuunt. Mox cum Barbaris (ut ex euentu

*Hispani cū
Barbaris
de Gallorū
nece consi-
lia sociant.* apparuit) consociatis de perniciē nostrā con-
filiis, occultos militum globos, quantum satis
ad rem patrādam esse visum est, inde ab eo
flumine emittunt: Sexcentos in armis fuisse
expeditos, à Barbaris postea accepimus.

P A V L O post, quum tres naues nostræ è
fuga collectæ ad stationem reuersæ essent,
(nam Prætoria, Trinitas ea vocabatur, paulo
longiùs in altum prouecta à reliquis discesse-
rat) Ioannes Ribaldus Prætor, tribus illis
Hispanis ultro occurrere easque aggredi sta-
tuit: postquam utique ex Consilij sententia
instructam in alto classem ostendere hosti, ut
necessarium, decreuit, & se toto Oceano de-
fendere, nisi nauium iacturam facere velle-
mus. Nostris enim militibus in terram expo-
sitis, facillimum hosti erat, naues præsidio
vacuas, nullo impediēte occupare & iniecto
vincto abducere: quod sine graui nostro incom-
modo accidere non poterat. quippe supremo
crepto auxilio & sublata vnica ope, qua regem
Galliæ de rerum nostrarum statu possemus
certiorem facere.

I T A Q V E x. Septembris, hora tertia po-
meridiana, Prætor lustrato & recensito exer-
citu, lectisq; non iis modò militibus quos
ipse nuper adduxerat, sed eorum quoque præ-
cipuis qui Castellum præsidio antè obtine-
bāt: in iis nominatim, legato, signifero, & præ-
fecto-ordinum Laudunerij tribuni mil. om-
nēsque ad strenuam Regi operam nauandam
cohortatus, simul nauim conscendit. Is tribu-
nus tum quod iamdiu nullū è Gallia nūcium

acci-

acciperet, tum in summa commeatus angustia
 tardio victus, paulo ante aduentum nostrum
 inde excedere & reuerti cogitabat: parum in-
 terim sollicitus, ne quid Barbaris iniuriæ à suis *Galli Bar-*
 inferretur, quo eorū animi à Gallis alienaren- *barorum*
 tur. Itaque illi tolerante ipso, vulgò indigenas *animos ab*
 vexare, & vi captos in castellum trahere: mi- *se alienāt.*
 lium, ceterasque eorum fortunas agere ac fer-
 re. denique omnia facere quæ necessitas impa-
 tiens legum iubebat. Quibus ex rebus ingens
 breui Barbarorum odium in nostros confla-
 tum est. Ergo (vt coniiicere ex euentu est) sti-
 mulante partim insita humanis ingeniis vici-
 scendi cupidine, partim protegendi corporis
 appetitu, omni animantium generi à natura
 tributo, perniciem nobis clam struere, &
 occulta cum Hispano consilia inire, inci-
 piunt.

VND ECIMA die Septemb. circiter octa- *Tempestas*
 uam horam matutinam, quum iam nostræ *Hispanica*
 naues haud procul Hispanis abessent, vehe- *& Gallica*
 mens repente turbo exoritur, effuso imbre *classis con-*
 mistus, cum ingenti fragore cæli tonitribus- *cursus di-*
 que & fulguribus præstinguentibus aciem o- *rimis.*
 culorum, vt penè ipsum cælum continuo
 incendio ardere videretur. Turbatæ vtrin-
 que classes diuersæ abiere: tres nostræ naues
 demissis antennis procellæ vim declinare, Hi-
 spana Prætoria & scapha vêtum sequi, coactæ
 sunt. ea tempestas, vsque ad xxiii. Septembris
 diem tenuit. Interea Hispani in terram egressi
 satis ocij ad nostra exploranda habuere, eaque
 cōparanda, quibus nos per dolū opprimerent.

Neque eos fallebat, nos præcipuè classe pol-
lere, eóq. vires abductas: ceterâ multitudinem
in castello relictam, imbellem numerum, par-
tim ægrotis, nondum ex iactatione maritima
recreatis, partim opificibus, feminis ac pueris
constare. Ducenta fermè & quadraginta capi-
ta ibi erant, Laudunerij trib. mil. fidei ac tu-
telæ commissa: militare robur in nauibus: ne-
que is, casus eius qui superuenit securus, vim
vllam hostilem ab terra metuebat.

*Hispani
Gallos de
improviso
oppressos
sædè iugu-
lant.*

A T Hispanus incredibili celeritate, siluas,
stagna, & flumina transgressus, ducibus Bar-
baris, xx. die Septembris improuisus aduenit,
& paulo ante solis exortum, pluuioso admo-
dum tempore, Castellum nullo resistente in-
greditur. Plerique vigilum solutis manè excu-
biis, ad reficienda quiete corpora fœda totius
noctis tempestate vexata, dilapsi erant. Hispa-
ni portula aperta irrumpentes, sopitos vigilés
in cubilibus suis obtruncant: fœda inde truci-
datio in castello fit: viri ac mulieres, ægroti &
valentes, senes ac pueri promiscua cæde iugu-
lantur. Quis immania eius diei facinora, quis
stragem huic parem aut animo assequi queat,
aut oratione complecti? At nostri interea ta-
men in tantis angustiis nō se deserere: qui ma-
ximè impigri erant, è stratis inter tumultum
elapsi celeri fuga se in nauigia ad fluminis ri-
pam religata proripiunt, quorum Prætor Ia-
cobo Ribaldo, nauis vnius Præfecto (cui Per-
la nomen erat) & Ludouico Ballardo legato
eius, custodiam commiserat. Alij repenti-
no casu oppressi, vallum transiliunt: in iis

Laudu-

Laudunetius trib. mil. cum domestica ancilla illac erupit.

IPSE, vix è tugurio egressus, quum ad opus diurnum fabrilè scalprū gerens proficisceretur, in hostes incido: ac quum neq. vlla nisi in fuga spes, neque vllum effugium nisi per vallum pateret, & iam iam tergo meo duo Hispani cum hasta & sarissa hærent: ibi repente, qua vi nescio, haud dubiè quidem diuinitus, geminatis in senili hoc meo & effæto corpore viribus, vallum nouem ferè pedes altum, quod ægrè aliàs per ocium reptando ascendere & sensim transgredi potuissem, expedito saltu supero, & in siluam accelero. Ab ea quum non longius abesse viderer, quàm quantum telo adigi potest, respiciens & in Castellum oculos retorquens, paulisper etiam in colle substiti, idque eo fidentius quòd nemo mihi fugienti instaret. Ab eo loco facili in totum Castellum & inferius adeò hypæthrum prospectu, sæuientes Hispanos, & horribilem nostrorum lanienam video, triaque iam hostium vexilla munimentis imposita. Quamobrem omni de nostris spe amissa, collectis coniectisque in vnum Dominum sensibus, meam salutem eius gratiæ cōmendans, in siluā me proripio. Quippe nihilo immaniores feras experiri posse videbar, quàm hostes, quorum plusquam beluinam sæuitiam in nostros exundantem conspexeram.

*Hispanicæ
sæuitiæ ex-
emplis hor-
ribile.*

CETERVM horribiles illæ angustię, in quas coniectus nullam circā spem neq. viam salutis in terris cernebam, nisi Dominus

Errantes in solitudine, clamant ad Dominum: & de angustis eorum eripit eos. singulari quadam ope, & præter omnem opinionem, me ex tam præsentis periculo eriperet: crumpere in suspiria & flebiles voces co-
Psalm. 107. gebant; atque eiusmodi clamores, crebro singultu ac gemitu interruptos, ad Dominum edere: O D E U S patrum nostrorum, Deus

misericors, qui te ex ipsis inferorum faucibus
 » & media mortis abyſſo inuocari à nobis iuſſi-
 » ſti, téque nobis laborantibus certo adfuturum
 » es pollicitus: quaeso vt pro ea spe ac fiducia
 » quam in te reposui, viam mihi aliquam osten-
 » das, qua exitum tot malis, atque huic infelici
 » meæ senectuti, in profundos dolorum gurgi-
 » tes demersæ, finem tandem inueniam. Saltem
 » hoc vnum concedito, ne hinc ex ferarū rabie,
 » illinc ex hostium tuorum nostrorumq. sæuitia
 » cōceptus pauor, omnem ex animo meo fidem
 » & certam de promissis tuis persuasionem ex-
 » cutiat. Illi nos magis propter sacrosanctum
 » tuum nomen, quod inuocatum est super nos,
 » quàm vllam aliam ob rem oderunt, Domine.
 » Fer opein mihi Domine, fer opem. nam me
 » tot vndique circumuallant mala, vt emergere
 » nequeam.

D V M hæc mecum anxius agito, inuium in-
 terea saltum densisque inter proceras arbores
 virgultis ac spinis, veluti perpetua sepe obie-
 cta, contextum penetrās: vix semihoræ spacio
 processerā, quum ecce repentè è proximo stre-
 pitus hominū lugubri ciulatu planctūq. per-
 mixtus, ad aures meas peruenit. Ego, Dei auxi-
 lio fretus, progredior ac circūspectās, primū
 vnum è nostris nobilem, cui Blōderio nomen

erat,

erat, reperio: neq. lōgo ab eo interuallo alium, quem D. Robertum vocabāt, nobis omnibus facile notum, quòd ei precum in castello concipiendarū cura cōmissa esset. Mox etiam in Vllij nobilis viri pedisequū, D. Belli nepotē, Iacobū Tufæum, & multos alios vno agmine, incidimus. Ibi collecti & cōmunem miseriam descentes, quid factò opus esset vt salutì cōsuleremus, vnà deliberamus. Tū nostrū vnus, quem vulgò omnes in Sacrarum litterarū lectione plurimū versatum atq. exercitatum iudicabant, hunc ferè in modum disseruit:

EXTREMUM hoc miseriarū est, Fratres: quocumq. conuertimus oculos, nihil præter immanem barbariem cernimus: cælum, terra, mare, siluæ, homines, omnia nobis aduersa atque infesta sunt. Iuuat tamen humanā misericordiā experiri. Ecquid scimus num fortè Hispanus, si nos eius fidei ac clemētiæ permittimus, deditis ac supplicibus parcat? Interficiat nos: breuis in morte dolor, harum etiam calamitatum finē afferet. Homines sunt: neq. extra spē est, quin furore placato nos in deditionem accipiāt. Nam quæ alia salutis via aut ratio nobis superest? Nō præstat subire manus hominū quàm aut hīc lacerari ferarū vnguib. aut miserima fame tabescere? Ille ita loquutus est: & maior pars, consiliū approbās, in eam sententiā ibat: me frustra dissuadente, & cruentas adhuc ab recenti victoriā hostiū manus subiiciēte. Neq. verò eos propter cōmunes regū ac populorū discordias, aut humanā certamina, tam impotēti rabie scēuisse: sed ob id maximè

*Hispani ob
religionem
pro Gallos
oderunt.*

quòd intellexerint nos ex eorum numero esse qui Euangelio nomen dederint. Non pudere nos in homines potius quàm in Deum conijcere oculos? qui suorum vitam vel in media morte incolumem præstat, iis que ferè, quoties terrena subsidia deficiunt, & humanæ spei locus nullus est, salutarem manum è cælis porrigit. Simul in eam sententiam petita è Scripturis exempla adferebam, Iosephi, Danielis, Eliæ, & aliorum Prophetarum: Apostolorum etiam, in iis Petri & Pauli, qui extraordinariis, & humanæ rationi incognitis

Esa. 59. 1. modis, periculis erepti sunt. An breuior aut
 » imbecillior nunc est (aiebam) Dei manus
 » quàm olim fuit? Non meminimus exitus
 » Israelitarum ex Ægypto, quum à Pharaone
 » fugerent? Quæ spes erat populo, vt tam potentis tyranni manus effugeret? Ipse à tergo
 » fugientium vestigiis hærens: mare à fronte,
 » vtrumque latus prærupti montes claudebant.
 » Itaque qui tum mare diuidens, quibus nullæ
 » ad resistendum vires, ac ne effugium quidem
 » patebat, hinc à fronte, hinc ab tergo, inclusis, iis per medios fluctus nouum iter aperuit, non potest idem per inuios ignotæ
 » huius terræ saltus nos in tutum locum de-

Eorum qui ducere?

hominum

fidei quàm

Dei prou-

dètia se cre-

dere ma-

lunt, tristi-

exitus.

H AEC & talia quamuis dicerem, sex tamen ex omni numero minimè assensu, deserunt nos, ac sperantes se aliquid gratiæ apud hostes inuenturos, ad eos se conferunt. Verùm mox tristi experientia didicere, quàm parum prudenter sibi consulant, qui plus fidei in hominibus

minibus quàm in Dei promissis ponunt. Vix enim silua egressi per clium ad castellum descendebant: quum ab circumfusiis protinus Hispanis capti, ceterorum exemplo iugulati sunt, & ad ripam fluminis tracti, vbi cumulatæ corporum strues iacebant, eorum quos in Castello Hispanicus furor absumerat.



Hispani Gallis qui in nauibus erant deditiōis leges serunt. Galli deditiōnem aspernantur. Hispani in mortuos seuiunt.

CAP. X.



INGVLARE sanitiæ exemplum hoc loco non prætermittam. Iacobus Ribaldus, Perlæ præfectus, (nauigij id nomen erat) naueis in ancoris, centum fermè à cruento illo spoliario passibus, habebat, multosq. è carnificina elapsos exceperat. Hispani egregia de incrimibus victoria inflati, & reliquum Gallorum sanguinem haurire cupientes, Castelli tormenta in naues & lenunculos dirigunt, sed tum pluuioso tempore, tum non satis paratis machinis, effectum est, vt sine vllō nostrorum vulnerē, omnes eorum conatus in irritum caderent. Itaque tubicinem ad naueis mittunt, qui nostros ad deditiōnem compelleret. Verum vbi his parum moueri Gallos intelligunt, legatum vnum è suis remittunt, qui Dom-Petri de Maluendo, huius cohortis Præfecti, auto-

Hispani quos infidiis excipere non potuerunt, verbis pellicere conantur.

ritatem præferens, cum illis de pace his conditionibus ageret: vt traditis maioris formæ nauibus, ipsi cum suis rebus atq. impedimentis, scaphis & lenunculis ad ceteram classẽ euaderent, quæ in salo ad ostium fluminis stabat, à Castello quatuor millibus pass. distans.


Galli cordatè omnẽ cum Hispano compositionem aspernantur.

AD hoc postulatum nostri respondent: Nullum sibi cum ipsis bellum esse, quod pace aut deditiõẽ finiri opus sit. Se sextum ante mensem eam nauigationem Regio mandatu ingressos: ac tantum abesse vt eam hostili in quemquam animo, aut prædandi consilio susceperint, vt disertè tum ab Rege suo, tum ab ipsius Almirãte, seu Archithalasso, vetitum sit, ne in vlla Hispanorum litora exscẽsionem facerent: immò, quominus illis iustam offensionis causam præberent, ne propiùs Hispanicæ ditionis oras naueis appellerent. Nos verò (inquiunt) hoc Regis mandatum sanctè atque inuiolatè seruauimus: ac ne id quidem vobis relictum est, vt eadem hanc nostrorum hominum, quos contra omnia belli iura trucidastis, nostro vllò merito aut culpa accidisse causẽmini. Itaque nil mirum est, si vos eius rei aliquando pæniteat. De cetero, quas petitis naues, vita potius nostra quàm iis vos potituros scitote: ac si vis adfertur, nos arma & corpora & quidquid à Deo accepimus, opposituros.

HISPANVS reuersus, Gallos verbis nihil flecti renunciat, immò animos atque arma expedire ad certamen. Tum furiosa illa cohors omnem in cẽsorũ corpora iram effundere,

dere, eaq. procul nostris qui in nauibus erant, ostendere: vt eorum pectora fauciarent, quorum corpora laniare, vt vellent, non poterant. Nam mortuorum exsculpinges oculos, & pugionum mucronibus præfixos gestantes, amaro cum risu atque vlulatu in Gallos, quò illis oculi dolerent, versus aquam torquebant.

*Hispani in
cadavera
saniunt.*



Galli aliquot ex Hispanorum manibus elapsi, agrè ad mare perueniunt. In aliquos è sociis incidunt.

CAP. VI.



AM, vt ad nos qui in silua manseramus redeam, quum porrò ire & ignotum transgredi iter pergeremus, ad mare, quantum ancipiti æstimatione augurabamur, tendentes: tandem, Deo gressus nostros dirigente, in montis cuiusdam iugum enisi, mare inde prospicere cœpimus. Sed multum adhuc viæ, & difficillimæ quidem, supererat. Mons, quâ descendendum erat, arduus, adeoque præruptus & præceps, vt stabilis gradus vllò loco insistendi minimè spes esset: ita rectis saxis, vt agrè nemo, nec nisi tentabundus manibúsq. retinens virgulta ac stirpes circa eminentes, den itere sese posset. Ergo modò saluti consuleremus, manibus non parcimus, quamquam iam laceras stirpium furculis ac spinis cruráque & totum corpus foedè cruentatum haberemus.

*Galli Hispanorum
manus elapsi, cum
locorum
difficultatibus cer-
tant.*

NOBIS tandem ægrè è monte demissis, interiectum nemus, impositum colli, maris conspectum abstulit, quò per ingentem planiciem præalto limo atque vligine informem, palustrique vlua, calamis, & inusitato quodam caricum genere confitam, perueniendum erat. quippe earum herbarum caulis duritie ligni, folia etiam præacuta crura nobis & pedes ita incidebant, vt sanguinem elicerent. Nos interea in aqua pube tenus, continuus etiam imbribus adeo perfundebamur, vt hinc paludibus, illinc nimbis obruti, perpetuo quodam diluuiò demersi videremur: & quò longius procederemus, eo altiores aquarum voragines occurrebant.

*Galli ad
Deum in
perditis
rebus con-
fugiunt.*

ITA QVE, quum extremum tempus vitæ nobis tum adesse crederemus, vltimo complexu inter nos dato, collacrymantes suum quisque & sociorum casum, multis cum suspiriis & lacrymis clamare ad Dominum cœpimus, & cum serio peccatorum sensu iusta eius in nos iudicia penásque agnoscentes, mæstas eiusmodi voces supremos inter gemitus fundere: HEV Domine, ecquid in vilibus hisce

- ” vermiculis cõterendis, dexterâ tuam fatigas?
- ” animæ nostræ ingenti dolorum æstu retorrida, toties experta clemētia tua freta, in sinum
- ” tuum semet reiciunt. O Pater misericors, libera nos ab his angustiis mortis: aut si ad suprema ventum est, & in hac solitudine nos
- ” interire iubes, ne patiaris vsque adeo sensus
- ” nostros mortis horrore constringi, vt gratiæ
- ” tuæ obliti, cuius tot documenta propter

Chri-

Christum Filium tuum nobis dedisti, locum
 demus Satanæ, diffidentia ac desperationis
 spiritui. Nam seu moriamur, nos tibi velle mo-
 ri, coram Maiestate tua hîc testamur: seu viua-
 mus, non ob aliud victuros, nisi vt miracula
 tua in medio Ecclesiæ & cœtus seruorum
 tuorum enarremus.

His precibus conceptis, ægrè ad nemus
 contendimus. Sed prius traiciendus erat in-
 gens amnis, ea prata interfluens: cuius alueus
 latitudine quidem modica, sed immensa al-
 titudine, transiri posse vado spem ademerat:
 præsertim quum procliui ad mare campo,
 prærapida celeritate aquas euolueret. Hinc
 nobis rursus noua laborum facies: nemo no-
 strum committere se præcipiti alueo & nata-
 tu periclitari audebat. In tanta rerum difficul-
 tate hæsitantibus, venit mihi in mentem reli-
 cta nobis ab tergo silua: itaque socios ad to-
 lerantiam & bonam spem cohortatus eò re-
 uertor, & longum ramum fabrili illo scalpro
 cum quo deprehensus fueram, amputo. Mox
 ad nostros regressus qui me anxij expecta-
 bant, Agedum (inquam) fratres: experiamur
 an huius longurij ope Deus ad perficiendum
 iter nos adiuuet. Simul longurium à terra in
 amnem porrigimus: quumque non plures
 vno traici possent, cui primo obtigit, is li-
 gno insidens aquam ingreditur: nos tamdiu
 perticæ alterum caput retinuimus, quoad
 ferè ad medium alueum enasset: tum ne secun-
 da aqua deferretur, vi in alteram ripam impel-
 limus. Ibi exstantium cannarum aliarumque

*Deus per
 inuia pjs
 viam facit.*

herbarum adminiculo in terram euadit. Ita primis ad eum modum expositis, alij deinde repetiti & singuli traiectioni sunt: neque id tamen sine ingenti periculo. Quippe & multū falsæ aquæ bibimus, & labore ita debilitati sumus vt propè semianimes in vltiorem ripam euaderemus.

TANDEM collectis animis progredimur, & ad vicinam illam mari siluam à nobis notatam, quoad eius fieri poterat, vestigia dirigimus. Quūque aliud par priori flumen obiectum esset, eiusdem perticæ ope, haud minore quàm illud alterum negotio ac periculo, tandem tamen Deo bene iuuante, superauimus. Sub vesperam siluam inimus: ibi quum nox oppressisset, ingenti cum pauore, applicati arborum truncis & stantes, pernoctauimus. Neque nobis, quamquam summa continuati laboris fatigatione affectis, somni vlla cupido. nam quæ animis inter tam ancipites metus, & omnia circà horroris plena, quies esse poterat? Itaque ea nox perpetuis vigiliis nobis extrahitur: ac primo etiam fermè diluculo feram quamdam, quinquaginta circiter passuum à nobis interuallo prætereuntem, cerui magnitudine, conspiciamus: cui enorme caput, scintillantes & stantes oculi, aures promissæ erant, posterioribus partibus, velut tubere quodam, eminentibus. Eam velut prodigium quoddam exhorruimus, maximè ob radiantes & enormiter grandes oculos: quamquam ad nocendum propiùs non accesserit.

*Feras ne
noceant
p̃is, cohibet
Dominus.*

ORTA luce egressi è silua, mare rursum
prospicimus, quò secundum Dei opem, ve-
lut ad vnicum vitæ subsidium, contendeba-
mus. Sed nouæ de integro interueniunt mo-
lestiæ. Quippe rursum in limum & paludes
demersi, cannis & vlua constratas, neque prio-
ribus illis absimiles, quum non aliud com-
modius ostenderetur iter, fessa illac membra
trahimus.

INTER hæc, haud procul via quà transi-
turi eramus, repentè hominum agmen ap-
paruit, quos quum primò hostes esse suspica-
remur, qui ad intercludendam nobis fugam
ex transuerso incurrerent: postquam ex pro-
pinquo trepidos ac nudos, pari ac nos habitu
conspicati sumus, facilè è nostrorum reliquiis
aliquos esse cognouimus. Ij verò erant Lau-
dunerius trib. mil. ministra eius domestica,
Iacobus Morguesius Diepensis, Franciscus
Vallius Rothomagensis, Hospitis coronæ fer-
reæ Rothomag. filius, Nicasius Crottensis,
Nicolaus Minutarius, Laudunerij trib. tu-
bicen, & alij præterea aliquot, viginti sex o-
mnino homines.

Vix præ fletu vsurpata consalutatione, &
deliberantibus quid facto opus esset, duo è
nostris in præaltam arborem connisi, vnum
è minoribus nauigiis nostris aspiciunt, cui
Mallardus præfectus præerat. Eique mox si-
gno è sublimi edito, nos ipsius auxilio egere
admonent. Is minorem scapham ad nos mit-
tit: sed priusquam ad litus perueniremus,

carecta rursus & duo fluuij iis pares quos ea ipsa die & superiore traieceramus, nobis superandierant. Ad eam rem plurimum longius ille quem nuper excideram, & duæ præterea perticæ à Laudunerijs comitibus prouisæ, vsui fuere.

*Nautarū
in miseros
Gallos hu-
manitas.*

SED quum iam propè ad scapham euasisset, inedia & labore resoluti, posteaquam linquente animo vires ad connitendum vltra non sufficerent, propè exanimis collapsi sumus. Ac nisi nautæ, qui nobis tum non vulgarem humanitatem præstiterunt, auxilium ferre properassent, eo loco exanimati essemus. Illi nos exceptos ordine in scapham portarunt, atque inde ad nauim, vbi humanissimè accepti sumus. Mox quum panem & aquam nobis apposuisent, sumto cibo vires animosque paulatim reparare cœpimus: perspicuo ergo nos diuinæ bonitatis, & acceptæ ab eo salutis, argumento, qui nos tot præsentibus periculis & mortibus præter spem liberasset, vt ei immortales gratias ageremus. Ergo miraculis Dei enarrandis & mutuis inuicem cōsolationibus perpetem eam noctem traducimus.

*Gratiarū
actio.*



Æ Gallica classe duæ naues Galliam repetunt. Hispanicam nauim in fugam vertunt. Ad Rupellæ portum appellunt.

C A P. V I I.

V T



T primùm lux reddita est, Iacobus Ribaldus, Perlæ navis præfectus, proximè nos adnauigans, quid factu optimum esset, quæve ratio iniri posset ad reliquias nostrorum hominum nauésque seruandas, nobiscum deliberat. Ibi tum quantis commeatum angustis laboraremus, quàm debilitatę vires essent, arma & tela nostra ab hostibus capta: insuper de Prætoris nostri statu incertitudo, in medium adferuntur, quem vtrum naue alicubi vadis illisa periisset, an tempestate procul abreptus erraret, incertum esse. Itaque nihil potius esse decernimus quàm primo quoque tempore in Galliam vela facere. Atque hæc quidem fuit primorum sentētia, vt qui è laniena euaserant, bipertito diuisi, pars in naue, cui Perlæ nomen erat, manerent: alij sub imperium Mallardi præfecti concederent.

ITA QVE re non iam vltra cunctationem recipiente, xxv. die Septembris, vento Septentrione vehementi ab ea ora profecti, celeriter conspectu terræ ablati sumus: moxque in alto alij ab aliis disiecti, vt numquam inde postea nostræ naues in eo cursu mutuum in conspectum venerint. Quingentas inde leucas satis prospero cursu emensi, tandem manè quodam sub ortum solis Hispanam nauim, quæ repentè ex alto in nos inuecta erat, ita strenuè repulimus, ac tormentorum fulminibus obruimus, vt manantem sanguine alucem per columbaria pérque latera navis cernere mus. Iámque nobis ab hoste de victoria pro-

*Gallorum
pars in
Galliam è
Florida re
portatur.*

*Hispanicæ
navis à
Gallica
vincitur.*

palam concessum erat: vehementiùs tamen concitato mari propiùs congregi, & nauim Hispanam ferrea manu iniecta abstrahere, non potuimus. hoc vnum ad plenam victoriã nobis defuit. Quum enim ex eo concursu nauium magnum sequi incommodum necesse esset, ac periculum, ne allisa nauigia mutuo attritu demergerentur: sicut ipsi libenter eo discrimine defuncti prælio abstiterunt: ita nos ab iis abstinuimus, & quod nemo nostrum ex eo certamine vulnere ictus, aut cæsus occubuiſſet, præter focarium nostrum, Deo læti gratias egimus.

RELIQVVM deinceps iter pacatum & sine vlllo hostium incurſu tranſegimus: iniquioribus tantum ventis subinde conflictati, qui nauim nostram sæpe in litora Hispaniæ eiekturos minati sunt. quod vnum, veluti calamitatum noſtrarum cumulum, exhorrebamus. In vndis præterea quidquid malorum tolerari potest, inopiam, frigus, famem, pertulimus. Quippe nobis, qui erepti carnificinæ è Florida redibamus, pro omni tegmine noctu atq. interdium nihil præter simplex induſium aut laceræ quædam pannicularia (miserum aduerſus frigora & ceteras aeris iniurias præſidiũ) velando corpori supererat. Panis quamparciſſimè dabatur nobis, iſque ſitu corruptus ac mucidus. Aquæ etiam, quamquam foetidæ, nõ ad ſatietatem, ſed in diem cyathum duntaxat vnum, & quidem exiguum, bibeſſamus. Ex hac tam inſalubri victus ratione, multi è noſtris, vbi terram attig iſſent, periculofis morbis

*Gallorum
ex Florida
redeuntium
angustia.*

bis impliciti, plerique etiam extincti sunt.

TANDEM mæstam hanc nostram & laboriosam nauigationem, lætus, vt in malis, excepit exitus. Quum enim ad Rupellæ litus ap-
 pulissemus, ab eius oræ accolis & ipsius adeo *Rupellano
rum in mi
seros beni-
gnitas.*
 urbis ciuibus perbenignè & humanissimè ex-
 cepti fuimus: multa in nos ab illis publicè ac
 priuatim hospitaliter facta, munificè que adeo
 collatæ opes, vt quæ in suam cuique redeunti
 patriam necessaria erant, nemini nostrum de-
 essent.



¶ Io. Ribaldus Prætor Hispanicam classem querens, naufragiū facit. Galli fame & miseris conflictantur. Tandem ab Hispanis in ditionem accepti fœdè trucidantur.

C A P. V I I I.

NUNC eorum quæ de Ioanne Ribaldo superius retulimus, redire in memoriam oportet. Is, vti antè dictum est, cum lecto militum nostrorum robore, obuiam Hispanis ad certamen egressus: eos quidem, quum quinque dies per altum quæsisset, non reperit. Sed Prætoriam suā nauim (Trinitatem vocabant) quæ à cetera classe aberrauerat, fortè nactus: omnium ignarus quæ in Castello nobis acciderant, totius oræ appulsu prohibere Hispanos constituit. Prætoriam conscendit, vt facilius inde, ex naturalis disciplinæ more, omnes Prætoris edicta & iussa acciperent.

INTEREA aduersam per se tempestatem quum sequere ventus cœpisset, continui etiam imbres fœdabant. Quinto die vento vis addita: geminatur tempestas: neque vlla ope impediri potuit, quominus terræ illatæ naues carinas vadis figerent. *Gallice classis naufragium.* Quinquaginta ferme leucis suprà Maium flumen ad oram euecti, fractis nauibus, & comœatu amisso, incolumes tamen ipsi euaserunt. Vnus tantum Grangius trib. mil. fracto naui malo insidens, fluctibus haustus est: cuius magnum meritò desiderium fuit. Erat enim in eo homine non summa tantum ingenij consiliūq. præstantia, sed mirifica etiam in familiari congressu comitas ac dexteritas, qua ceteros ad virtutum suarum imitationem alliceret.

CETERVM nostros ægrè emersos vndis, omni tempestate truculentior excipit fames: neque ad eam sedandam, quidquam opis, omnibus amissis, supererat: nisi quæ terra vltro præberet, herbarum videlicet, radicūque omne genus, mandere conarentur. Quūque alia alimenta deficerent, ea necesse erat vbiq. rimari quæ latranti stomacho obiicerent. Neque tantum fames sed sitis quoque miseros fatigabat, cui pellendæ nihil præter veteres cisternas & putres lacunas aderat, ex quibus fœdam adèò & turbidam cœno aquam hauriebant, vt vel solus spumæ eius conspectus etiā valentissimis nauseam & ægritudinem cieret. Attamen indomita famis sitisque rabies omnia, quamuis spurca & insalubria, ingerere in ventrem subigebat: totos octo dies tam misero

ro victu extrahunt.

N O N O demum die exiguum fortè scapham reperiunt: lætum id inter mala: eius ope sperant se sociis qui in castello erant naufragium suum significaturos. Quippe ab eo, terrestri itinere, duodecim leucarum interuallo aberant, maritimo quinquaginta. Ad hæc interiectum flumen Delphinorum, quatuor in latitudinem stadia diffusum, profundo alueo & nusquam vada aperiente, non nisi nauigio transmitti poterat. Itaque excepta lætè ea scapha, linteas suas tunicas seu indusia concerpta, stupæ vice, rimis explendis infulciunt, & commissuras eius ferruminant.

T V M Ioannes Ribaldus Prætor pro solita comitate & modestia, multos eorum quorum *Ribaldi ad* consilio utebatur, conuocatos, in eam fermè *socios oratio.* sententiam alloquitur: H V M A N A M patientiam, ô socij, miseriæ nostræ vicerunt. neque “ in tantis ærumnis vita tolerari diutius potest. “ Et multò quidem optabilius esset morte semel defungi, quàm tam perditò rerum statu “ centies mori verius quàm vivere, nisi fides vetaret providentiæ Dei diffidere, cuius vel in “ extremis rebus auxilium sperandum atque expectandum est. Interea tamen, quod nostrarum partium est, versanda nobis sunt sedulò “ omnia, si quem fortè industria animi & labore inueniamus malorum exitum. Itaque è nobis aliquos scapha ad castellum mittendos ceseo, qui nostris deploratū rerū nostrarū statū renuncient, & auxiliū petant. Ac protinus magnam vim lacrymarum profundens, positis

humi genibus, preces ad Deum orditur. Quibus peractis, quem potissimum huic obeundæ legationi deligerent, circumspectant. Thomas Vassor Diepenfis ad eam rem maximè idoneus visus: ei negotium dat Ribaldus ut quamcelerrimè possit fociis quàm misero statu sint significet. Ei se comites adiunxere Vincentius Simon, Michael Gouor, & alij usque ad decem & sex.

NOSTRI, qui (vti paulo antè dictum est) trans flumen erant, eadem die in vltiore parte Castellum versus cohortem armatorum, expasso vexillo incedere prospiciunt. Postquam coniecturis, quantacumque ex tanto interuallo capi potuerunt, Hispanos esse innotuit: nostri, qui in tantis rerum angustiis hoc sibi supremum perfugiū superesse crederent, nonnullos è suis ad hostem mittunt, qui cum eo de deditioe & vita paciscantur. Legati Galli primò satis humaniter ab Hispano excepti sunt.

HISPANAE illius cohortis præfectus (Vallemandum vulgò appellabant) viri nobilis, equitis & Christiani fide suam in Gallos beneuolentiam affirmans: & cum Hispano victori sollemnem semper morem fuisse testatus, ut supplici hosti, Gallo præsertim, clementer consuleret: neque se ab eo instituto discedere velle, aut quidquam grauius in eos statuere, quod postea in mutua vtriusque gentis inter se odia & publicas clades erumperet: omnes liberaliter palàm per interpretem affatus, fidenter venire ad se hortatur. Simulq. instrui scapham

&

Hispani ducis crudelis perfidia in miseros.

& quinque Hispanos traicere in vltiorem ripam ad nostros iubet. Hispani transmissio fluuio, Gallos Vallemendi præfecti nomine liberaliter appellant. Ioannes Ribaldus prætor primus nauculam cum triginta suis conscendit: ipse à Vallemendo satis comiter excipitur: ceteros ab eo aliquantulum seductos, Hispani manibus ponè tergum reuinctis, binos simul colligant.

INTEREA Galli, vnoquoque traiectu triginta, trans flumen exponebantur: tantisperdum Vallemendus Ribaldum, hominem minimè malum, qui de ipsius fide non dubitaret, fallacibus verbis produci & lactari curat. Nostri interim quum omnes flumen transmississent, bini ad eum modum colligantur, si mûlque permisti Hispanis Galli ad Castellû procedunt. Ribaldus prætor & alij, in primis Ottignij dominus, vbi suos ita nexos & iugatos vident, nescio quid sinistri ex eo augurari & toto ore expallescere. Interea tamen rursum Vallemendi fidem appellant: ille sedulò confirmat eos, neque aliò indita Gallis vincula testatur, quàm vt tutò in Castellum deduci possint. ibi se illis cum fide præstiturum quæ pepigerit.

*Hispanus
Gallum
fallacibus
verbis
lactat.*

QVVM iam non procul à Castello abessent, ille tû sciscitatus quinam inter Gallos nautæ, remiges, fabri nautici, tormentarij, aliique maritimis muneribus vtilis essent: triginta eius generis inuentos à ceteris secernit.

*Gallorum
inermium
laniena.*

Nec longo inde temporis spacio armatorum cohors Castello egressa, pleno gradu in nostros contendit, qui seorsum à Vallemendi agmine ducebantur. Gregem ouium ad lanienam agi diceres. Tum cornua occinere incipiunt, & Hispanorum militum furor erumpere: cæduntur vincti & inermes Galli ad fistularum, tympanorum & buccinarum cantus, ita vt quiritantium clamor exaudiri non posset. Ibi gladiis & hastis strenuè sæuire Hispani, & quàm fœdissimum quisque vulnus fecerat, tam maximè gloriari. Ergo vix semi horæ spatio facilem & egregiā scilicet victoriam de inermibus ac deditis tulere, quos ipsi in fidem acceperant.

*Ribaldi
Prætoris
Galli mors.*

D v m hæc perpetrantur, Ioannes Ribaldus Vallemendi fidem implorās, vitæ suæ parci orat: ipse etiam Ottignius ad pedes eius prouoluit, promissorum vt meminisse velit, supplex obsecrat. Sed omnia hæc frustra fuere. Nam ille neglectim obuerso tergo, præterijt: simulque vnus carnificum eius, pugionem in Ribaldi auersum corpus defigit: mórque eo vulnere prolapsus, vno alteroque subinde ictu iacentem conficit.

Hic fuit miserabilis nostrorum exitus, quñ se in fidem & clementiam Hispanorum tradidissent, quæ Punica religione seruata ab illis fidēs est. Neque satis habuere sæuitiam innoxio sanguine explere, sed vt omnem barbariem superarent, Legati regij barbam abraser, luculenti facinoris specimen: eamque inclusam litteris Hispalim misere, quemadmodum

dum à nauticorum nostrorum nonnullis, quorum opera Hispani ad eum nuncium in Hispaniam perferendum vsi sunt, nuper bona fide nobis relatum est: in iis nominatim Christophoro Britone, Portu-gratiensi, qui clam Hispali Burdegalam transgressus, Burdegala Diepam naui reuectus est.

POST HÆC Hispani memorabili victoriæ tropæum imponunt: Legati Regij corpus membratim dissecant, & eius capite in quatuor partes diffisso, miserabiles illas quadras totidem arrectis contis præfigunt, eosque quatuor Castelli angulis statuunt.*

POSTREMO (quod ex Nobili quodam Britone qui Floridam vidit, ipse accepi) Hispani, ut insigni aliqua catastrophe eam tragœdiâ clauderent, lacera illa corpora, truncos artus, putres puerorum, feminarum & virorum formæ, exstructa extra Castellum pyra, igni cremarunt, ut faciliè appareret id non magis hostili rabie quàm veræ Religionis odio, ab ipsis esse factum. Sed utcumque cæsorū reliquias flammis aboleuerint, tam fœdæ rei tamen memoriam neque à conspectu ipsius Dei, neque ex hominum animis delere adhuc potuerunt, neque umquam poterunt.

CETERVM in tradenda Gallorum cæde quæ plurimis & oculatis testibus memorata sunt, retuli: sed non omiserim eorundem temporum rumorem validum adeo ut nondū exolescat. Expeditione suscepta, Hispanum ab Aulicis quibusdam per occultos nuncios de re tota certiorem esse factum: & qui eò na-

* Hæc-

nus Galli-
ca illa Ni-
storia: nos
quæ sequi-
tur addidi-
mus.

Hispani
Gallorum
cæsorū
corpora cre-
mauit.

uigarent, maximam partem Hugonotos esse, Regni perturbatores & Regis ipsius hostes, obuiam prædam & quæ impunè inuadi posset. Hæc vulgò tum iactata nec affirmare, nec refellere in animo est. Sed postquam ea gesta sunt, quòd tam atrocis iniuriæ exemplo non Galli tantùm, sed Regis quoque ipsius Maiestas, cuius auspiciis ea expeditio suscepta fuerat, violata esse videretur: etsi ea in feminas puerosque immanitas omnium questus antequam, cæsorum liberi, viduæ, cognati & amici, ultionem orantes, Carolo I. X. regi Galliæ supplicem libellum obtulere. Ac Carolum quidem de eo questum apud Regem Hispaniæ, atque illum facinus pro rato non habuisse satis constat: quum interea non minus impunitas maneret sicariis, quàm mors interfectis: donec senescente facti in uidia, mentionem omnem ac memoriam eius rei

maiores casus oppressere.

Porro libelli exem-

plum infrà scri-

ptum est.

*

SV PPLI-



SUPPLICIS LIBELLI
exemplum, Carolo IX. Regi Galliae oblato à
viduis, liberis pupillis & orphanis, propin-
quis & amicis, subditorum eius qui ab Hi-
spanis in Francia Antartica, quam vulgò
Floridam vocant, fœdè trucidati sunt, Anno
 M. D. LXV.

MISERABILES planè personæ at-
 que opis egentes (Christianissime
 Rex) viduæ & orbatæ parentibus pue-
 ri puellæque propè innumere, pedi-
 bus tuæ Maiestatis, plenæ lacrymarum & sup-
 plices, aduoluuntur: & ærumnas suas apud te
 deplorantes, lugubre spectaculum patrum,
 virorum, filiorum, fratrum, nepotum & pro-
 pinquorum suorum (qui circiter nongenti,
 misti feminis virisque pueri, in Florida à Pe-
 tro-claudio & Hispanis militibus fœdè truci-
 dati sunt) propè præsens oculis tuis exhibent.
 Id verò facinus quum per se vel auditu fœdū
 atque horrendum sit: tum hodie maximè sub-
 ditorum tuorum sanguis perfidiosissimè fu-
 sus, Dei fidem & iustitiam aduersus scelera-
 tos latrones implorat.

ITAQUE iam tuarum partium est, ô Rex,
 cogitare, ea lege imperio tuo subiectos po-
 pulos, tum vt eos iustitia regas, tum vt sub
 præsidio ac tutela Maiestatis tuæ incolumes
 conserues. In primis verò miseris atque affli-
 ctis, qui secundum Dei opem ad tuam fidem
 cōfugiunt, præsertim recenti adhuc vulnerū

*"Is idem
 est qui
 Vallemara
 do sibi no-
 men fecit."*

dolore succurrere: eorúmque, haud secus atque herus fidelium seruorum, aut etiam pater filiorum, ærumnis ingemiscens, orbitatem & lacrymas consolari. Nam querelæ quidem quas ad te deferunt, non minus miseratione dignæ videntur, quàm Petri-claudij Hispani immanitas consuetis belli commerciis omnibúsq. diuinis ac humanis legibus aduersa est.

Id quò faciliùs intelligas, nos rem paulo altiùs repetentes patienter, vt facis, audito. Meminit Maiestas tua subditos illos tuos regiis literis fretos, quas Ioannes Ribaldus abs te accepit, tuo mandatu, tuis auspiciis, in Floridam nauigasse. Quò quum peruenissent, quinque Hispanæ naues (quarum maxima octingentarum amphorarum, proxima, ducentarum, ceteræ mediocris formæ, erant) repente plusquam hostili impetu tuos illos homines adortæ sunt. Mox classiarij earum milites in terram lapsi, Castellum tuo nomine atque auspiciis à Gallis exstructum irrumpentes, viros, feminas, pueros, & quidquid obuium fuit obtruncant: neque his aut illis ætas aut imbecillitas miserationē attulit. Quinetiam transfossa puerorum infantiúmque corpora (horrendum visu) præfixa hastis ad ludibrium ostentabant.

INDE octingentos fermè Gallos, cohortem Ribaldi Prætoriam (quamquam fide data, si arma tradidissent, abire omnes incolumes passuros) manibus post tergum reuinctis, feruilibus

seruilibus probris fœdatos: sceleratos, lepro-
fos, pædicones & latrones Francos vocantes,
in ore ipsius Ribaldi iugulant. Quúmque is
tam fœdi spectaculi horrore perterritus, ad
Petrum-claudium accedere conaretur, vt se
in eius fidem ac tutelam, velut asylum, conij-
ceret, ab eo superbè repulsus, móxque eius
iussu à milite, pugione in tergum impresso,
percussus est. Quo vulnere quum corruisset,
idem hic miles iacentis pectus vno & altero
ictu hausit. Mortuo quoque ludibria adiecta:
ceruices incidit miles: barbæ pilos abradit, &
quadrifidum caput quatuor pilis eodem in
castello, vbi ceterorum corpora exanima ia-
cebant, præfigit. Postremò litteras ad regem
Hispaniæ, præclaræ victoriæ nuncias, & in iis
pilos aliquot Ribaldi barbæ inclusos, mittit:
perspicuè tali ludibrio prodens, quàm pa-
rum Regiam tuam maiestatem vereretur,
quam adeo superba contumelia, per clien-
tium tuorum iniurias & dedecora, violare au-
sus est.

NE QVE verò credibile est, Principem
vllum aut Regem Christianum, imò nec Bar-
barum, tam abhorrenti ab omni humanitate
esse animo, vt execrabile illud facinus appro-
bet, & eò quidem fœdius quòd media pace
in tuos admissum est, quum tibi neque cum
Hispano, neque cum vlla externa gente, bella
aut hostiles inimiciæ intercederent. Perpe-
trati tamen huius latrocinij Hispanos, nulla
iniuria abs te violatos, reos esse, nostrorum
sanguis & lacrymæ nostræ clamant, & quidem

iis locis ac personis quæ sub nullius iure ac ditione, præterquã tua, sunt. Nisi fortè Petri-claudio impudentiam sæuitiæ adiungere ac dicere libeat, Ibi ius esse vbi vis & arma plus polleant: licere peregrinis latronibus in præfidia & ditiones tuas, in tuorum fortunas & corpora, cum exercitu imperioque inuadere: licere pro suo iure in eorum ceruices sæuire, quos Deus Maieſtati tuæ subditos attribuit, & quidem tam arto fidei & obsequij vinculo tibi obſtriſtos, vt millies mortem oppetere malint, quàm in noui Principis fidem ac ditionem concedere.

QVAMOBREM ſi Petri-claudij facinus Hispaniæ rex ratum non habeat, nihil ſuper eſt, niſi vt vel iſtius ſupplicio iniuriam tibi factam expiet, vel tibi eum noxæ dedat: tibi que in poſterum ius ac poſſeſſionem vacuam Floridæ tradat, quæ pridem tuis auſpiciis ab tuis occupata, regni tui finibus ac ditionibus adiecta eſt. Neque enim ſubditi illi tui, qui, propagandis imperij tui finibus, eam prouinciã pro virili parte manucepere, pro fugitiuis eò redacti ſunt, aut vt rei exulésve in vltimas terras deportati: ſed eos Maieſtatis tuæ legatos, miniſtros mandatorum tuorum, eò nauigaſſe iuſſu & miſſu tuo, litteris ipſemet regiis Ribaldo datis confirmati, qui tuam in eo vicem ac perſonam referret.

INDIGNAS verò illas & atroces in vno ſcelere per ſe iniurias, etiam onerat iſtorum impunitas. Quippe ſi inultæ omittantur, liceatque

ceâtque nefariis latronibus, violatoribus omnium humani iuris ac fidei publicæ, non luce hac tantum, sed spoliis etiam tuis nostrisque impunè perfrui: sicuti dolor ad nos, sic ad te dedecus, & manante latius exëplo, periculum ad omnes pertinebit. Sed ut ab aliis impunitate alatur istorum immanitas, te tamen subditorum tuorum iniurias, per quorum latera foderis, lentè non accepturum confidimus. Neque verò meritas ab istis pœnas expeti, tua tantum aut nostra, sed publici exempli & humanæ societatis, interest, quam Petrus-claudius cum suis, quantum in se fuit, soluit.

POENI ceterique Afri fidem ac fœdera quoties commodum erat, frangebant. Itaque Punica fides ut illis quondam exitio fuit, etiam vulgò hodie infamis est. Romanis contra adeo sancta erat fides, ut eam fallere, etiam hosti, peius omni peste fugerent. Utinam hæc laus meritò à nobis Petro-claudio eiusque sociis tribui posset: quibus adeo vilis promissorum veritas & fides fœderum fuit, ut ad eam violandam sacrum Dei nomen vertere veriti non sint, ac si eum in scelerum suorum societatem adsciscere vellent. Deum equidem non ignoramus, interdum improbis frena laxantem eorum quoque opera uti, siue ad nos castigandos, siue ut ipsi iustum scelerum suorum aceruum, iustis pœnis materiem, cumulent. Idq. ne iustitiæ ipsius & iudiciorum obliti, pater nã eius indulgentiã malè agendo fatigemus. Sed vicissim hoc verum est: ut idem ad opus hominum scelera & Dei iudicia concurrunt: ita Deum

graues tandem ab impiis pœnas pro meritis exigere.

QUOD reliquum est (Christianissime Rex) tot pupillorum orbitas, tot viduarum solitudo, ac iustæ nostrum omnium lacrymæ & squalor te moueant, qui parentes, qui fratres, qui propinquos, clientes tuos, per immane Petri-claudij scelus amisimus. Liceat priuatarum iniuriarum obliuisci: nihil ad te mala nostra pertineant. Quid augusto Regiæ maiestatis nomine spreto, quid pollutis auspiciis tuis, quid non fœderum modò fide, sed etiam Iure-gentium in legatis tuis violato, facies? Fortissimis viris, tribunis ac ducibus tuis, contra omne fas & belli commercia interfectis, non iura experire, non arma capies? sed horrendos istos carnifices tuorum strage ouantes & super impunitatem præmia etiam ferentes scelerum, tacitus intuebere?

MELIORA equidem de te ominamur & speramus (ô Rex) Deumque ipsum Opt. Max. obnixè quesumus vt verè heroicos in te spiritus excitet. Isti cruentos à recenti tuorum cæde gladios, manantia sanguine spolia, & reliquias infelicitis exercitus tui in Hispaniam ad triumphum & ludibrium deferunt. Quum sibi tantum licere in tuis te sciente ac vidēte pulcrum ducunt, possuntne apertius demonstrare quid facturi sint, si teipso potiantur?

QUAMOBREM, vt tuæ Maiestati & Gallico nomini iniustum dedecus meritis paricidarum suppliciis deleas, generosum & dignum te, dignum auis tuis, spiritum induc: Deo bene iuuante,

iuuante, subditorum tuorum causam suscipe,
susceptamque qua potes ac debes fide tuere:
vt coram toto Christiano orbe tuam in pro-
tegendis subditis fortitudinem, tum etiam
tuorum innocentiam, testatam facias. Nullo
quidem maiore piaculo (ô Rex) tum innoxio
nostrorum sanguini, tum iustæ iræ tuæ paren-
tare potes, quàm latronum pœna: vt non tan-
tùm cæsorum viduæ coniuges, propinqui
& liberi desiderium suorum & graues
suos dolores eo solatio leniant: sed
etiam te omnes verè Regem
tanto parem nomini, &
Patrem populi tui,
agnoscant.

*





NOVI orbis historiæ libro secundo Benzo Hispanos monachos & sacerdotes, aliósque eorum exemplo colonos, in India ea interdium committere scribit, quæ alios vel noctu perpetrare puduerit. Tantam foeditatem etsi premere quàm mouere multo satius fuerit: attamen quia isti tum in illis terris, tum etiam in hoc nostro orbe, nouam Sodomam instaurare parant, nisi maturè obuiam eatur: Georgij Buchanani, Poetæ clarissimi, graue & ὀπιμωρητικὸν carmen in Colonias illas Indicas huc atterere visum est: earum videlicet pœnarum prænuncium, quæ istorū capitibus cælitus imminet, ni seriò resipiscant.

IN COLONIAS

BRASILIENSES.

DESCENDE calo turbine flammeo,
Armatus iras Angele vindices,
Libidinum iam notus ultor
Exitio Sodoma impudica.

*En rursus armis quod pereat tuis
 Lustrum Gomorrhæ suscitât æmulum
 Syrûm propago, & exsecranda
 Spurcitia renouat palæstram.
 Pars illa mundi, quam sibi propriam
 Sedem decauit mollis amœnitas
 Luxûsque, sub fœdis colonis
 Seruitium tolerat pudendum.
 Abominandis arsit amoribus
 Strigosus æstu, pauperie & fame,
 Glandis vorator, virulextum
 E raphanis redolens odorem.
 Quem (rêre) ponet nequitia modum
 Frænis libido libera? & insolens
 Humanioris ferre victus
 Illecebras meliore cælo?
 O Christiani infamia nominis,
 O fœda labe & nota temporum!
 O turpium turpisque causa &
 Exitus & precium laborum!
 Ignota rostris verrimus æquora,
 Gentes quietas sollicitauimus
 Terrore belli, orbisque pacem
 Miscuimus misero tumultu.
 Per ferrum & ignes & mare naufragum
 Secreta rerum claustra refregimus,
 Ne deesset impuris cinædis
 Prostibulum veneris nefanda.*

*Gens illa nullos mitis in hospites,
 Et ora victu assueta nefario,
 Portenta conspexit Cyclopum
 Sanguinea dape fœdiora.
 Nunc Scylla sauos exere nunc canes:
 Nunc nunc Charybdis vortice spumeo
 Connolue fluctus, & carinas
 Flagitijs gravidas resorbe.
 Aut hosce tellus in patulos specus,
 Aethêrve flammis perde sequacibus
 Turpes colonos, Christiana
 Dedecus opprobriúmque terra.*

FINIS.

ELEN-





ELENCHVS, SIVE INDEX

rerum & verborum maximè insignium

quæ in his Historiis tra-

ctantur.

A



CHLA, portus

& colonia 170

Alexandri ponti-

ficis bulla do-

nationem Indiæ conti-

nens 284

Alphonſi Hoiedę expeditio

75. ab regulo quodam

vulneratur ob raptam

coniugem 83. Franciſca-

norum cultum ſumit &

moritur 85

Alphonſi Ninni nauigatio

53

Alquinotepi Indi cum Mon-

tęgio graue colloquium

220

Ambitio ne luctu quidem

minuitur 238

Animal gemino vtero inſi-

gne 215

Antiqua Darienis, colonia

89. 91

Apri, vmbilicum dorſo ge-

rentes 173. 174

Arbor mirabilis in inſula

Ferro

423

Attabaliba rex Peru, Ponti-

ficem Rom. non agno-

ſcit 281. Eius regius para-

tus 279. pretium pro re-

demtione paciſcitur 283

à Pizarro necatur 290. e-

ius ad Pizarrũ oratio 289

prodigia mortem eius

portendentia 294

Auana, colonia in Cuba 151.

152

Auaritiam Hiſpanorum In-

di grauiffimè caſtigant,

aut eludunt 83. 100. 104.

162. 201. 208. 224. 249. 406

Aurificum Peruenſum ope

ra 399

Aurifodinas Peruenſes pro-

pè exhauſerunt Hiſpani

409

Aurum, Chriſtianorum

Deum vocant Indi 249

Auſtrale mare 104

Axi, piper Indicum 15

B

B Acicaus. vide Machi-

caus

Balfamum Indicum 232

H

- Barthol. Columbus Hispaniolæ præfectus 33. Cacos perduelles debellat 48
- Barthol. de Casis à Rege Hispan. Cumanae administrationem impetrat 67
- suos omnes amittit 69. querelas de tyrannide Hispan. aduersus Indos ad regem defert 331
- Battatæ, Indicæ radicis species 123
- Beatricis de Cueva, Petri Aluaradi viduæ, confumacia in Deum & horrendus exitus 239
- Bellorum ciuiliū in Perū initia 303.308
- Belmuda insula 414.415
- Benzo in Indiam nauigat 1. Summa peregrinationis eius 95. eius in patriam reditus ex India 414.415
- Blascus Nunez Vela mittitur in Peru 323. eius in Affessores suos falsè dictum 324. dum nihil de summo iure remittere vult, Colonias ad rebellionem accendit 327. Procuratorem regium interficit 330. capitur 335. à Pizarro victus interficitur 345
- Blasphemare ex Hispanis di
- dicisse se dicunt Barbari 251
- Bombadilla Christophoro Columbo succedit 50. Is Columbos fratres victos in Hispaniam mittit 50. Naufragium facit 52
- Boriquena, insula 17.429
- Bulla Pontificia de Indis in libertatem vindicandis 77. de Indiæ Occid. donatione 284
- C
- Acáuate, fructus & moneta Nicaraguensium 228
- Canariæ insulæ septem à quo primum subactæ 418. directæ à Gallis 143
- Canarii indigenæ pauci 418
- eorum mores 425. panis ibid.
- Canellæ regio 317
- Canes Hispanorum scuitiæ ministros esse pudent 295
- Caribes, qui dicantur 169
- Carlinæ Castellum à Gallis in Florida exstructum 440
- Caroli V. ad Gonz. Pizarum literæ 354
- Carolus IX. de cæde suorum apud regem Hisp. queritur 470
- Carthago noua, colonia à Gallis

INDEX.

Gallis diripitur	156	xularet auaritia	118
Cassinet, Floridensium potus	443	Christoph. Columbus primus Indiæ Occid. inuentor	21.
Castellani Galli erga Italum benignitas in India	16	Quam ingeniose mordaces inuidorum de se sermones reperculserit	23.
Castellio trib. mil. in Cumanenses Indos sæuit	70	Eius perseverantia	24.
Cazabi, secundarius Indorum panis	121	Ridetur à Lusitanis & Anglis	24. 25.
Ceratus, iudex integer in India	261	Prima eius in Indiam nauigatio	26.
Ceratum Hispanorum contumaciæ tædet	262	Ei ex gloria inuidia oritur	28.
Cesada, iudex, moriens conscientiæ doloribus vtitur	262	Almirans à rege designatur	33.
Chimbos, mons	394	Secunda eius nauigatio	34.
Chira, Peruani regni prouincia	271	in odium Hispanorum incurrit	38.
Christianæ religionis contemptus in Barbaris vnde	410	Indos perduelles & sub imperium redeuntes clementer tractat	48.
Christiani nomen gerere, & re ipsa esse, multum differunt	244	Inimicorum calumniis honore deiicitur	49.
Christianos multos Barbari damnabunt in Iudicio	248	Hispanos seditiosos vincit	60.
Christianorum auaritia grauissimè notant Barbari	249	Astuto consilio com meatus à Barbaris impetrat	60.
Christianos ex spuma maris ortos credunt Peruani	405	Moritur	62.
Christianum nomen vbiq; celebre, si à Christianis exularet		Eius genus & posteritas	ibid.
		Christus non sæuis edictis, sed benignitate, orbem subegit	75
		Coca, herba mira	397
		Coloniæ Hispanicæ in Peru	409
		Coloniæ Peruenfes in Proregem rebellant	329
		Cometes in Peru refulgens	294
		Contreræ fratres	pe-
		H. ij.	

INDEX.

- cunias regias diripiunt 376. Nicaraguenſe epiſcopum interficiunt 376. 379
de Creatione rerum, Peruenſium opinio 401
Crocodili in Florida 443
Crocodilorum oua edulia 213
Cubagua inſula vnionum 3. 43. 71

D

- D** Eſiderata inſula, prima Columbo viſa 3. 35
Delphinorum fluuius 440
Dentibus conſeruandis medicamen 13
Didaci Almagri cum Pizarro ſocietas 267. Mareſchallus Peru designatur 296. in Chilem proficiſcitur 297. eum liberat à quo poſtea interfectus eſt 307. à Ferdinand. Pizarro capite damnatur. 309. eius mors & natalis 310. 311
Didacus eius filius regimen Peru inuadit 316. Ab amico proditur 322
Didacus Columbus Chriſtophori filius, Almirans designatur 109
Didacus Gottierez Veraguæ Gubernator 184. aurum extorquere à Cacicis Indis nititur 192. ab Indis trucidatur cum omnibus ferme militibus 200
Didaci Lopez ad Aſſeſſores Guattimalæ epiſtola 257
Didaci Niqueſæ expeditio in Indiam 81. errores 92. intemperantia linguæ labitur 97. eius mors 98
Didacus Ocampus Indos aſtu captat 65
Didacus Velazquez Naruaen in Corteſium mittit 207. 211
Diluuij notitiam aliquam habent Peruenſes 403
Diuini iudicij exemplum in ſuperbam & blaſphemam viduam 238
Dominicani in Florida à Barbaris trucidantur 433
Domus Arboribus ſuperſtructæ 381

E

- Ebrietas Peruenſium 397.
Canarienſium 418
Edictum Ferdinand. regis de non aduendis oris à Columbo

INDEX.

lumbo repertis	53.63	in Hispania custodia clau-	
Edictum Cæsaris de Indis in		ditur	313
libertatē restituendis	323.	Ferdinan. Sotti in Floridam	
eius capita	331	expeditio	204.431
Edictum Cæs. de arcessendis		Fernandina, insula	29
vxoribus	421	Ferrum seu Ferrea, insula	
Empedocles Dominicanus	417		
232		Ferrum in pretio apud In-	
Episcoporum in India studiū		dos	242
257.259.260		Floridæ situs	430.435. à
Episcopus à quibusdam Hi-		quo primum inuenta, i-	
spanis interfectus	376.	bidem	
379		Floridæsum cultus, mores,	
Episc. à Barbaris trucidatur		& cibi	441
392		Fons fabulosus	430
Equis ferè victorias suas ad-		Fortunatæ insule, hodie Ca-	
uersus Indos debent Hi-		nariæ	417
spani	202	Francisc. Caruaial insignis	
Equos Hispanorum hono-		bellator & sæuus	368.
rificè curant Mexicani		369. Centenum vincit	
203		342. eius exitus	368
F		Fr. Lopez Hispanus scriptor	
Abula de primo Indiæ		vanitatis arguitur	18.21.
Occid. inuentore	18	22	
Ferdinandus Hisp. rex Co-		Fr. Montegij in Iucatanam	
lumbum classe instruit	26	expeditio	218
Quæstores in Cubaguam		Franc. Pizarrus, à sue alitus	
mittit	63	317. puer suos paui	179.
Ferdin. Cortesius Mexicani		Hoiedæ legatus in Vra-	
regni subactor	206. ab	benfi prouincia	84. eius
Hispano equite deride-		in Peru expeditio	267.
tur	107. eius perfidia &	Almagrū insidiis captat	
sæuitia in regem Mexi-		305. ab Almagri factione	
canum	209	interficitur	315. eius na-
Ferdin. Pizarrus inexorabilis		tales	316
aduersus Almagrum	310.	Fumus inebrians	115

INDEX.

G

G Allia rex classē in Floridam mittit	434	Guacci, animal rapto viuēs	36
Galli insula	269	Guadalupea, insula	3
Gallicæ classis naufragium	464	Guaiacan	132
Galli piratæ Indicarum opū fama exciti	43. 140	Guaiacuil coloniae inundatio	391
Galli pir. Hispanorum naues prædatur	142. & seq.	Guaiuuus, arbor	125
Galli ab Hispanis capti	149	Guainacana Attabal. pater	291
Galli Hispanorum perfidiam grauissimè vliscutur	155	Guaiuacanæ transitus monumenta	391.
Galli ab Hispanis in Florida iugulantur	448. elapsi nonnulli Galliam repetunt	Guanauanus arbor	126
Gallorum inermium in Florida laniena	468	Guanaxia, insula	58
Garionexius Cacicus in Hispanos arma rapit	42	Guattimala vrbs eluuiē quarum euertitur	239.
Gomera, insula	417	instauratur	240
Gonzallus Pizarrus dux paritium in Peru	328. Peruenfis Gubernator designatur	Guattimalensium mores	241
337. eius in aduersis inuictus animus	356. 366.	Gubernatores Indiae fallacibus promissis milites onerant	3. 187
Cetenum vincit	358. eius mors		
377			
Gorgona, insula	269. 380		
Granata, colonia	231		
Gran-canariæ descriptio	420		
Guacanarillus Cacicus Hispanos in Hispaniola trucidant			

H

H Ayti, insula	29	
Hispani qui primi in India relictī sunt à Columbo, ab Indis necantur	35	
Hispani tædiū sui apud Indos mouent	72. odio flagrant	103. III
Hispani in India prædas hominum agunt	7	
Hispani ad capiendos Indos Indis abutuntur	9	
Hispani Indos canibus obiciunt		

INDEX.

- | | |
|---|---|
| <p>ficiunt 293.295.374</p> <p>Hispani nauali prælio à Gal
lis fusi 146.461</p> <p>Hispani Gallis in Indiam
viam monstrant 144</p> <p>Hispani quo consilio expe-
ditiones Indicas suscepe-
rint 203.204</p> <p>Hispanis captis aurum in os
infundunt Indi 104</p> <p>Hispani multos in Peru præ
textu causæ partium, ob
simultates interficiunt
351.362</p> <p>Hispani aliquot inuicem a-
lios mandunt 206.210</p> <p>Hispani immodici laudum
suarum prædicatores 176.
181.243</p> <p>Hispani cum Italo duellum
178</p> <p>Hispani mortuos à se susci-
tatos in India venditant
206</p> <p>Hispani Gallos in Florida
iugulant 448.eorum cor-
pora cremant 469</p> <p>Hispani ducis in Gallos per-
fidia 466</p> <p>Hispanicæ classis naufragiū
413</p> <p>Hispanorum auaritia à Me-
xicanis elusa 208</p> <p>Hispanorum dominatus In-
dis quauis alia calamitate
grauior 220.227</p> | <p>Hispanorum aduersus Indos
pugnantium arma 11</p> <p>Hispanorum faciles de In-
dis victoriæ 107. equis
debitæ 202.sæuitia in Ni-
gritas seruos 136</p> <p>Hispanorum ab Indis acce-
ptæ clades 299</p> <p>Hispanos mortales esse quo
modo Indi deprehendāt
17</p> <p>Hispanus Hispanorum mo-
res in India, depingit
257</p> <p>Hispaniolæ mercaturæ ho-
diernæ 131</p> <p>Hispaniolæ descriptio 128</p> <p>Hispaniolensium religio.117.
112.113</p> <p>Historia lepida cuiusdam
militis famelici 212. Indi
cuiusdam pecuniam a-
spernantis 161</p> <p>Houus arbor & fructus
124.132</p> <p style="text-align: center;">I</p> <p>Iamaica,insula 158</p> <p>Iguannæ, lacertarum ge-
nus 213.216</p> <p>Immortalitas animæ Peru-
ensibus credita 396</p> <p>Indi Christianorum simiæ
32. aliquod semen reli-
gionis habent ibid. be-
nifici 117.neque furto ne-
que auaritiæ dediti ibid.</p> <p style="text-align: right;">H.iii.</p> |
|---|---|

INDEX

Indi caducis bonis affixi non sunt	77.110.167 118.165	Indis edicto Regio libertas adimitur	73. seruitus ab- rogatur	77
Indi reguli liberum ad Sot- tum responsum	205	Indiæ solum frugibus nostris ferè ineptum		129
Indi à Christiana religione ob Hispanorum scelera abhorrent	205	Indicæ contractationis do- mus		145
Indi Cacici ad Hispanum præfectum libera vox	194	Indica mancipia quomodo Hispani venentur		7.8
Indi Cacici ad Hispanum præfectum libera vox	194	Indicę mulieris inusitata spe cies		5
Indi Christianos suis sacrifi- ciis intèresse nolunt	386.	Indicarum gentiũ color		245
Humanis victimis litant	168.	Indici senatus origo		145
Indi de calamitatum causis verius quàm Hispani iu- dicant	40	Indorum liberi Hispanorũ consuetudine corrũpun- tur		250
Indi Hispanicum iugum ex- cutere cupiunt	244.	Indorum de Deo notio		252
Indi Hispanorum ataritiam eludũt	83.	pertinax Idololatria		256.
Indi Christianos abominan- tur	222	Polygamia		417
Indi cuiusdã graue de Chri- stianis iudicium	224	Indorum de Hispanis opi- niones variæ		54.55
Indi Hispanorum in Cuma- na stragem edunt	63	Indorum in mutuis commer- ciis simplicitas		160
Indi fugientes Hispanis fa- mem relinquunt	37.95	Indos captiuos quomodo Hi- spani tractent		10.14.15.364
sibi mortem consciscunt,		Inge, Peruanorum reges		301
		Inoiosa Machicao succedit		338. eius strategema
		classẽ Pizarri. Gascæ prodit		350
		Insulæ huc & illuc fluctuan- tes		221
		Ioannis Pontii in Floridam expeditio		204.431
		Ioannes Ribaldus ab Hispani- nis		

INDEX.

nis interficitur	468	Mona, insula	152
Isabella, colonia	36	Monachi in Indiam traiciunt	
Iucca, radicis Indicæ genus		63. 71. Indorum liberationem procurant	77
121			
Iudicum graue munus	262	Monachi male excipiuntur	
Iudicis cuiusdam in morte		in Florida & Guattimala	
cruciatus	262	81	

L

L Ampugnani Mediol.		Monachorum libidines nefandæ in India	249. 478
ad piscandos vniones infelix nauigatio	71	Mons flammiumus	231
Lanzarotta, insula	417	Mundum interiturum credunt Peruenfes	403
Legendi & scribendi vsus			

N

Indis miraculo est	243	N Auigia Indorum monoxyla	8. 30. 61
Legio, colonia	231	Nauis totum orbem circumuecta	302
Lima, colonia 293. ibi tumultus in Proregem oritur		Nautal prouincia	4
334		Nicaraguæ prouinciæ descriptio	227
Lucasia magna, insula		Nicaraguenfis lacus emissarium	189
438		Nicaraguenfium mores	229
Ludouicus Columbus Almirans, Christ. Columbi nepos	138	moneta 228. potio 229. saltandi ritus	230

M

M Achicaus Panamam diripit	338	Nicolaus Olanda Hispaniolæ præfectus	52
Magellanicum mare & fretum	58. 302	Nigritæ serui in Hispanos rebellant 137. fidei Hispanor. credere se non audent 139. Hispanos vexant	183
Maius fluuius	439	Niguæ, Indici pulices	127
Maizium, Indicarum frugum præcipua	120	Nomen Dei blasphematur ab Indis sæuitia Hispanorum incensis	57
Mamei, arbor	125		
Manati, pisces	212. 216		
Mangus regulus Peru, Hispanis fidē non habet	303		
Manta, oppidum	386		

INDEX.

Nominis-dei colonie origo	96	Peruana nauigatio	379
Nominis-dei emporiū	175.	Peruani in Hispanos rebel-	lant 298. Hispanos pro
eius situs	182	Christianis agnoscere no-	lunt 244
O			
Lea in Canariis coales-		Peruensium linterium forma	
cere non potest	421	388	
Oliuarij cancellarij Gallie		Peruenses reguli à Christ.re	
exitus	263	ligione abhorrent	390
Ombrios,insula	416.425	Peruenses culices	ibid.
Oraculum,de Hispanorum		Peruensium ritus	395.eultus
in Indiam traiectu	31.33	397.oues 397.404. ebric-	
Oraculum Pachacamae in		tas 397.ædificia 398. auri-	
Peru	402	fices	399
P			
Achos quid vocent In-		Petr. Aluaradus Mexicanos	
di	278.404	diripit 207. eius in Peru	
Palma, vna è Canariis	421	expeditio 234. mors	237
Pamph. Naruaez expeditio		Petrus Gasca componendis	
206.210		motib. Peruanis mittitur	
Panamae situs	180	346. eius sollertia & astus	
Panama in Peru nauigantiū		347.353. eius ad Gonz. Pi-	
cursus	379	zarrum literæ 348. Hostiū	
Panamensis & Veneti em-		duces præmiis inescat 331.	
porij collatio	175	Pizarum prælio victum	
Panis apud Indos conficien-		capite plecti iubet 367.	
di ratio	120	edicta eius in Peru	373.
Pariensis regio Indiae ferè		militum in eum false di-	
amoenissima	12	cta 371.372. Peru decedit	
Pariensium arma & mores		375. peregrinos è Peru	
12.13		arceat	411
Pecuniarum & opum con-		Pinea, fructus species	124.
temtus apud Indos	161.	125.126	
165.173		Piper Indicum	15.165
Peru proprie quæ provin-		Pisces volucres	2
cia dicatur	283	Platanus Indica	124
		Polygamia Indorum	117
		Portus-	

INDEX.

Portus-vetus , colonia & prouincia	383	tum student in India	250
Portu-veterensium perui-cax superstitio	385	Sacerdotes feminarum vir-ginitatem delibantes	12
Potosienses fodinæ	408	Sacerdotes iidem & medici apud Indos	116
Potus apud Indos ex Maizio		Sagittarum veneno tincta-rum remedium	14
123. ex Cacauate 229. ex		San-germanum, colonia	156
multiplici herbarum suc-co	443	San-iacobum, colonia in Pe	
Plittaci satis infesti	228	ru	392
Puna, insula	277	San-iacobus, primaria Cubæ	
Pustulæ Peruenfes	388	colonia	158
Q		San-ioânis de portu-diuite,	
Visquiz Attabalibæ ne		insula	17
cæ vlcisci conatur	291	Septentrionale mare	104
Quitenfis ædituus Blascum		Sepulturæ absurdus ritus	
proregem prodit	344	apud Indos	168.396.403
Quito, Peruani regni fertilis		Serpens alata	444
sima prouincia	400	Seruitus barbaris odiosa	172
R		Smaragdi in Indiæ mediter-raneis inuenti	161
Egum-ciuitas, colonia	293	Solis & Lunæ origo, ex In-dorû Occid. opinione	114
Resurrectionis corporû Pe-ruenfes sensum aliquem		Strategema Hisp. aduersus	
habent	403	Indos 64. in Gallos	157.
Roldanus Ximenez à Christ.		Indorû in Hispanos	296.
Columbo secedit	41.42.	Inoiosæ	340
monita & litteras Colûbi		T	
spernit	46. scribit in Co-lumbos fratres ad regem	Ambos, quid vocent	
ibid. mergitur mari	52	Indi	398.404
Rupellanorum in fratres e-		Teneriffæ, insula	417.426
genos benignitas	463	Teneriffes mons	425
S		Tecoani, animal rapto vi-uens	174
Sacerdos metallarius	232	Testudines inusitatae magni tudinis	189
Sacerdotes quæstui tan-			

INDEX.

Toletum, colonia	5.66	adit 280. Hispanos in eum
Tumbesia, prouincia	276	accendit 281. ab Indis ne-
Turbines inusitati in Hispa		catur 392
niola	38.39	Vinum carum apud Indos

V

242. 400

Vacca de Castro in Peru		Viracochie, Christianos vo-
mittitur 319. Alma-		cant Peruani 405
grum vincit & necat 322		Vites in India Occid. ægrè
Valboæ & Ancisi factiones		coalescunt 130.399
89.99		Verdugus Nomine-Dei po-
Valboæ à socero, capitali		titur 342. inde eicitur
supplicio afficitur 106		343
Vallemandi Hisp. trib. mil.		Vespertiliones diri 215
perfidia & sæuitia 466.		Vitrum Attabalibæ iudicio
467.468		auro pulcrius 291

Velzaris mercatoribus Ger		Vuæ agrestes apud Indos
manis Valentiolam In-		124. 443
diæ prouinciam Cæsar		VVich, insula Anglica 437
oppignerat 109		X

Ventacurtius Canarias ten-		X Aguator, fabulosum
tat 419.422		flumen 189

Veragua à Columbo dete-		Xilo, balsami genus 233
gitur 59. asperrima regio		Z

94.184

Vincentius de Valle-yridi		Z Arza-parilla, herba 393
monachus Attabalibam		Zemes, idola Hispanio-
		lensium 33

F I N I S.

*Mendas aliquot quæ nobis exciderunt,
sic emendato.*

Pag. 41. lin. 2. *exemplo*, lege *extemplo*. Ibid. 8. *Calacio* l. *Calicio*
pag. 96. lin. 13. *feliciorum*. l. *feliciorem*. 132. 3. Hobi arboris descri-
ptionem ad præcedens caput, id est, ad pag. 126. transfero.
135. 5. *Hispanoila* l. *Hispaniola*. 203. CAP. X. l. CAP. XIII. 212.
CAP. XIII. l. XIII. 239. 12. *subacentibus* l. *subiacentibus*.



**RARE BOOK
COLLECTION**



**THE LIBRARY OF THE
UNIVERSITY OF
NORTH CAROLINA
AT
CHAPEL HILL**

FLATOW
E141
.B47

